

Matius

Matius arye, Yesus el kai teleb yupu ati, sekuk yupu

Abuku sekuk deiyoknye bira, Matius ulamuk. Matius ara, Yesus arye wipdeiyamuk mapu, sik 12 nang kan-kan ton ulamuk. Yesus min diba kum teneamuk talak ara, Matius arye, Roma ninye deiyok nang arina ati, yo bok bulunanye ulamukce, ubula weik dololamuk bukni, Yesus arye, 'Anye bira na yupu peterelbinamle' tenen, Matius yukubukba, Yesus diba tenebukce, malye winilamuk ning nirya batakuka, Yesus dobolbalamuk.

Markus arye el sekuk buku Injil Markus, akunum sekamukbuk, aminyan talak ara Matius arye, 'Yahudi yala nang Yesus diba tenepnamak' tenen, abuku Injil Matius sekuk. Yahudi yala nang nirya arye, 'Ninye Lyena Deiyoknye yanamsile' tenen, fia kalikuka dina uk ulamika ati, Matius arye, 'Kume, Ninye Lyena Deiyoknye bira, yuknye kume, Yesus el akunum yanmasile, diba tenepnamak' tenen, abuku sekukce, Yahudi yala ninye ati aribuk.

Matius arye, Yesus el apu yapu ati, nyabuk yupu (Lukas 3:23-38)

1 ¹Asekeipnusin buku noutamak ara, Yesus Kristus el deipkirikdop nang si seknune. Yesus Kristus el apu kopropa ara, Daud. Daud el apu kopropa ara, Abraham. ²Abraham el mi ara, Isak. Isak el mi ara, Yakup. Yakup el mapu ara, Yehuda ap, el du yapu ap, deiyamuk. ³Yehuda el mapu bitinye Peres ap, Sera ap, sik nin si ara, Tamar. Peres el mi ara, Hesron. Hesron el mi ara, Ram. ⁴Ram el mi ara, Aminadab. Aminadab el mi ara, Nahason. Nahason el mi ara, Salmon. ⁵Salmon el mi ara, Boas. Boas el lin bira, Rahab. Boas el mi ara, Obed. Obed el lin bira, Rut. Obed el mi ara, Isai. ⁶Isai elce deibuk mi ara, Daud deibuk. Daud ara, Israel ninye sik weik ninye deiyoknye ati, Raja Daud nyalamik. Daud el mi ara, Salomo. Salomo el lin si ara, Batsyeba. Ara, Uria domuk kil bukni, dibuk talak ara, Daud youwak dakukce, Salomo deibuk. ⁷Salomo el mi ara, Rehabeam. Rehabeam el mi ara, Abia. Abia el mi ara, Asa. ⁸Asa el mi ara, Yosafat. Yosafat el mi ara, Yoram. Yoram el mi ara, Uzia. ⁹Uzia

el mi ara, Yotam. Yotam el mi ara, Ahas. Ahas el mi ara, Hisikia. ¹⁰Hisikia el mi ara, Manase. Manase el mi ara, Amon. Amon el mi ara, Yosia. ¹¹Yosia el mapu ara, Yekonia ap, el weit yapu ap, deiyamuk.

Amapu deiyamuk talak ara, Babel mutuku nang arye Israel ninye opbisibikke, tapu koubuka Babel mutuku bobinamikke, talya fil uk aruklamikba dolamik.^a ¹²Afil fia dolamikbuk, kiting tamun yupa 70 akunum ubuk ura, ton Israel ninye ara, Israel mutuku tamubuka biyik. Tonda, Yekonia el mi Sealtiel deibuk. Sealtiel el mi ara, Zerubabel. ¹³Zerubabel el mi ara, Abihud. Abihud el mi ara, Elyakim. Elyakim el mi ara, Asur. ¹⁴Asur el mi ara, Sadok. Sadok el mi ara, Akim. Akim el mi ara, Eliud. ¹⁵Eliud el mi ara, Eleasar. Eleasar el mi ara, Matan. Matan el mi ara, Yakup. ¹⁶Yakup el mi ara, Yusuf. Yusuf bira Maria dobuk. Dobukba, Maria arye Yesus deibuk. Ara, ‘Ninye mutuku-mutuku nirya noutamak arye, ninye weike lyeplirye, sik kanye talima fia talinamle’ tenen, Allah arye wibuka deiyamuknye ati, Kristus nyanyake.

¹⁷Aning ati ara, Abraham arye deibukba, dadeipdanin yangalamika ani, Daud deibuk talak deipdanin yangalamika ani yupa ara, 14 kibuk. Tonda, Daud arye deibukba, dadeipdanin yangalamika ani, Babel mutuku nang arye, Israel ninye tapu koubuka bobiyik talak ababye, deipdanin yangalamika ani yupa ara, 14 ton kibuk. Atonun ton, Israel ninye arye, Babel mutuku batakuka, sik mutuku kopropa tamubuka biyik talak ara, anyapce deipdanin yangalamika ani, Yesus Kristus^b deibuk talak ara, deipdanin yangalamika ani yupa ara, 14 ton kibuk. Yesus Kristus delina ara, ‘Allah arye wibuka deibuk touk, tukwak ninye nirya lyeplirye sik kanye talima talinamle’ tenen, deiyamuk.

Yesus Deiprik talak ati sekuk yupu

¹⁸Yesus Kristus delin talak winibuk ning ara ani. Yusuf birye, ‘Maria dopnamle’ tenen, moun akunum domuk bukni, min kum domukce, neika min kum unmarikak uk, Maria mi bobuk. Maria mi bobuka ara, Allah El Dib Kanye arye mikip aribuka deice arye, mi bobuk. ¹⁹Yusuf bira Musa sekamuk yupu kekebuka fia diksukumuk ulamuka anya arye, ninye nirya arye, ‘Akil ara malye kil tenebicak’ tenen, ‘Ninye kekenak akil batakna ati, laka kum nyapnune. Akil duknubuka bataknamne,’ teneyamuk. ²⁰Uteneyamuk bukni, Yusuf aning ati, kanye talima ikin kanye tuba ubuk talak ara, mapmokak, Allah el im deice fil donye malaikat arye, Yusuf el lengdar mabuka deice arye yanuka laka nyabuk.

^a 1:11 2 Raja-Raja 24:8-16 ^b 1:17 *Kristus* – Yunani nang arye, Kristus nyalamik. Ibrani nang arye Mesias nyalamik. Bukni, nunda asi bitinye nyanyabe. Ayupu bitinye deiyok ara, ‘Ninye lena deiyoknye unamle’, tenen, Allah arye wipdeiyamuknye ati nyanyabe. Tonda lak len yupu nomor 3 dipdelulume.

“Daud el yala nang arye deipkuknye, Yusuf, Maria el mi bobuka ara, ninye arye kuma. Allah El Dib Kanye mikip deice arye mi bobuke.

Aning ati ara, ilil una kume. Maria talya mangkau asa dopnalame. ²¹ Maria arye sal mi deipnamle. Deiplyop ura, el si Yesus nyapnamlyame. Yesus nyapnamlama deiyok ara, ‘Elda Ninye Lyenanye ulule,’ tenena ati nyapnamlyame. Allah el mapu nirya sik malye wininyak ning ap, malye tenenyak ning ap ati, ‘Allah arye wenebuka oplyak’ tenen, Yesus arye aning nirya kum daneiplirye, ninye weike lyepnamla ati, ami el si Yesus^c nyanamle.” Malaikat arye Yusuf ati nyabuk.

²² Ura, Maria ninye dona kum dib aryuk, Allah El Dib Kanye mikip deice arye mi bobuka ara, Allah arye nyapdeibukba, el yupu laka nyalamuknye nabi^d Yesaya arye nyalilamuk touk winipnamuka ati, winibuk. ²³ Yesaya arye nyalilamuk yupu ara ani.

‘Ninye dona kum kil arye, mi bomlya ani sal mi deipnamle. Deiplyop ura, el si ati Imanuel nyanamake. Imanuel nyanamaka ara, ‘Allah ap, nun ap, neika unyapnye’ tenen, nyanamake.’ (Yesaya 7:14)

²⁴ Malaikat arye ayupu nyapdeibukba, Yusuf bukuop ura, Allah el im deice fil donye amalaikat arye, “Winipliyame,” nyapmok touk, Yusuf arye Maria dobuk ura, neika ulamrik. ²⁵ Yusuf arye Maria domuk bukni, akil ap neika mana kum dib aryuk, Allah El Dib Kanye mikip deice arye sal mi deibuk. Sal mi deibukop ura, Yusuf arye, “Ami el si ara Yesus,” nyabuk.

Kurya ning weik kel nang arye, Yesus dilyayik yupu

2 ¹ Yesus deiyamuk mutuku ara, Yudea tam noutamak bukni, mutuku si ara, Betlehem mutuku deibuk. Yesus deibuk talak ara, amutuku nirya weik ninye deiyok talibuka ulamuknye, el si ara Raja Herodes ulamuk. Yesus akunum deibukop ura, kurya ning min arye kel kibuka balamik nang, kiting yangan tam arye, weik mutuku si Yerusalem mutuku dilyayik. ² Yayikke asipdeyik. “Yahudi yala nang sik weik ninye deiyoknye Raja, winiryuk deipmalnye bira dan ulul do?” nyabuka asipdeyik. “Kiting yangan tam arye, anye el kurya tikukba eibupurye, ‘El si erepnamap’ tenen, kurya im noutamak banmok bisik uk elilamuburye, melibuka yanmabe,” nyabik.

³ Nyabikop ura, yuk nang arye Herodes dam laka nyabikba, Herodes kekebukce malye kanye bobuk. Tonda, ‘Yerusalem mutuku ulamik nang

^c 1:21 *Yesus* – Yunani nang arye, Yesus nyalamik bukni, Ibrani nang arye asi ati Yosua nyanyake. Asi ara, bitinye bukni, el deiyok ara tonoka. Ara, ‘Allah Yahweh arye ninye lyesulule’ tenen asi nyanyake. ^d 1:22 *Nabi, Allah el yupu laka nyan nang* ara, Allah arye ‘Ninye kekepnamak’ tenen, elce wibuka deiyamuk nang ati, el yupu laka nyabukop ura, anang arye, yuk ninye nirya ati, laka nyalbalamik. Anang ara, nabi nang nyanyabe. Nabi nang sik laka nyan yupu nomor 25 dipdelulume.

ababye, yata yupu nyanmak do?’ tenen, sik nirya ababye malye kanye bobik. ⁴Herodes ara, malye kanye bobukce, Yahudi yala nang, sik Allah arina ap, el si erena ap ati, anyaik fum fil dona deiyok nang ap, Allah arye, ‘Wininamlulume, aning ara kum wininamlulume,’ nyapdeibukba, Musa arye sekeiyamuk yupu peterena deiyok nang ap, Raja Herodes arye yukubukba yayikop ura asipdeyuk. “Allah yupu laka nyalamik nang, nabi-nabi arye, ninye nirya lyeplirye talinamlanye Kristus ara, yata mutuku deipnamle nyalamik do?” nyabuka asipdeyuk. ⁵Asipdeyuk bukni, sikce, “Yudea tam noutamak bukni, Betlehem mutuku deipnamle nyalamik,” nyabik. Ara, Allah yupu laka nyalamuknye nabi Mika arye, ayupu laka nyabuka sekeiyamsuke. El sekeiyamsuk yupu ara, ani.

⁶‘Allah arye Betlehem mutuku ati nyabuk. “Yudea tam noutamak aubuk mutuku nirya ara, mitik mambul mutuku bukni, Betlehem mutuku ara fia weik mambule. Ara, Betlehem mutuku noutamak unyak ninye kan-kan arye, weik ninye deiyok unamlanye deipnamake. Anye bira, domba basam teleb ubuka weilamlanye atonun, Allah el mapu Israel ninye ati, bico tenebuka, ‘Wininmale’ nyabuka, fia talinamle. Aning ati ara, Betlehem mutuku ara, weik mambul mutuku nyapne,” Allah arye nyabuk.’ *(Mika 5:2)*

⁷Sik kurya dipnin yangalamik nang arye Herodes ati nyabik.

Anang arye Herodes ati ayupu nyabikba, Herodes arye kurya dipnin yangalamik nang yukubukba yayikop ura, duknubuka asipdeyuk. “Anggun eiplum kurya ara, dan sum arye tikuk do?” nyabuka asipdeyuk. ⁸Asipdeyukce yupu ton mopreibuk. ‘Betlehem dilbinamak’ tenen, ayupu nyapdeibuk. “Betlehem mutuku bimunce, ami elamunya ani, akunum eipmunyop ura, tamubuka na yanuka nyapnumunyeba, na ababye el ti si erebuka kilbinmane. El si erepnamna atia,” nyabuka, Raja Herodes arye tenepce arye nyaplobuk.

⁹Ayupu nyabukba, kekebikop ura, kurya banmok bisik eibuka, melibuka dobolbalamik nang ara biyik. Kiting yangan tam arye tikmokba, eipmek kurya uk el menekmokba, sik aminyan melibuka banmeka ani, Yesus deipmok aik, aruma dup deice tikukop ura, sik babye anyaik wekik. ¹⁰Akurya anyaik aruma dup deice tikukop ura, sik weik arye kanye deibik. ¹¹Weik arye kanye deibikce, anyaik wekuka Maria ap, el mi Yesus ap eibikce, ami el kina ati, sik nirya arye, gutam tuku diprongobukabikce, tonda, Yesus el si erenmek. Erenmekce, sik mambul ning, lin ning fum torokukabikce, dekna weik ning Yesus ati aribik. Sikce Yesus aribik ning ara, ani. Yo fia akunum mikuk ning, el si kemenyan uku dongobikiba, ‘Teleb nintong nyapnamle’ tenen, aribik. Aning ara el si ara, kemenyan. Tonda, dekna weik ning emas^e aribik. Ton ning ara, dekna weik yo fia, teleb nintong nyalamuk ning, el si ara mur aribik. ¹²Aribuka mapmekba,

^e 2:11 Emas ara, gat ning bukni, dekna weik ning ulule. Emas ning kel kina ati, lak len yupu nomor 4 dipdelulume.

lengdar deice Allah arye anang ati nyabuk. “Anggun tamubuka ban talak ara, Herodes dam bisik bana kume. Yuk bisik arye anggun mutuku kopropa tamubuka binamlulume,” nyabukba, kekebikce yuk bisik biyik.

**‘Herodes arye Yesus oplyak’ tenen, Maria ap, Yusuf ap
arye, Yesus bobuka Mesir mutuku bobirik yupu**

¹³Sik kurya dipnin yangalamik nang, Yesus delin aik akunum batakuka biyikop ura, lengdar deice arye, Allah el im deice fil donanye malaikat arye, Yusuf ati ayupu nyabuk. “Herodes arye ami oplyak anya arye, bukmince ami ap, el lin ap bobuka, Mesir mutuku bobilyame. Herodes arye, ‘Ami opnamne’ tenen, fia enamla anya arye, Mesir mutuku bimincedaulamina ani, na arye yukupkinyop ura, tamubuka amutuku yanamlyame,” nyabuk.
¹⁴Allah arye Yusuf ati nyabukop ura, Yusuf bukukabukce ami ap, el lin Maria ap bobuka, alukunyan noutamak aryuk Mesir mutuku biyik.

¹⁵Daulamika ani, Raja Herodes dibukop ura, tamubuka sik mutuku kopropa yayik. Awinibik ning nirya ara, Allah yupu laka nyalamuknye, nabi Hosea arye nyalamuk touk winibik. Hosea nyalamuk yupu ara ani.

‘Allah arye nyabuk. Mesir mutuku noutamak arye na mi yukupsiba, tamubuka yayuk.’ *(Hosea 11:1)*

¹⁶Sik kurya dipnin yangalamik nang arye, Herodes tenepce arye talya nyaplobuk yupu deiyok kel kiyamika ati, kekebukabikce, el dam tamubuka kum biyik bukni, sik mutuku kopropa bana ati, yuk bisik biyik. Akunum biyik bukni, aminyan ara Herodes aning kel kibukce, el fia yu ubuk. Sik kurya dipnin yangalamik nang arye, Herodes ati, “Kurya atalak arye tiku,” nyabikba, Raja Herodes kekebukce, sik nyabik touk deiyok koubuka, anyapce nukdebukabukce, ‘Sal mapu kiting tamun bitinye arye sekdongobuka, utam mapu nirya obuka sirya daknamne,’ tenebuk. Utenebukce, yu weik ubukba, el yin talin nang ati ayupu nyapdeibuk. “Betlehem mutuku ap, adam karin mutuku nirya ap, sal mapu, kiting tamun bitinye arye sekdongobuka utam sal mapu nirya oploplulume,” nyabuk. Elce nyabuk touk binuka obik.

¹⁷Amapu nirya obika ara, Allah yupu laka nyalamuknye nabi Yeremia nyalamuk touk, winibuk. Yeremia nyalamuk yupu ara ani.

¹⁸‘Rama mutuku noutamak ara, weik arye malye nyana ap, engena ap, wininmakba, kekepmabe. Rahel, el mapu dipmakba, weik arye engenmale. El kanye talima weik arye buku sukunmala ati, kum namin uptue. Kanye namin una ara, el like. Ara el mapu weike dipmaka atia.’ *(Yeremia 31:15)*

**Yusuf ap, Maria ap, Yesus ap, sik nirya arye
Nasaret mutuku tamubuka yayik yupu**

¹⁹Yusuf bira Mesir mutuku noutamak daulamuka ani, Herodes akunum dibukop ura, Allah el im deice fil donanye malaikat, lengdar deice Yusuf ati

nyalyayuk. ²⁰“Yusufo, ‘Ami optibye’ tenen, pirilamik nang nirya ara, akunum dibika anya arye, bukukapmince, ami ap, el lin Maria ap, bobukapmince, Israel mutuku tamubuka bobinulyame,” nyabuk. ²¹Nyabukop ura, Yusuf bukukabukce ami ap, el lin Maria ap bobuka, Israel mutuku tamubuka bobiyukce, sik daulamik.

²²Daulamik bukni, aminyan talak Israel tam tamubuka biyuk bukni, “Herodes dibukba, el pununa ati, winira el mi Arkelaus arye Yudea tam talibuke,” nyabikba kekebukce, ‘Anye birye opsilyak’ tenen, ilil weik ubukba, ‘Yudea tam kum binune,’ tenebuk. Tonda, Allah lengdar deice arye, “Yesus oplyak ati kanye wisiplyame,” nyabuka ati, Yusuf kekebukce, Yudea tam kum bukni, Galilea tam uk tamubuka biyuk. ²³Galilea tam biyukop ura, tonok mutuku si Nasaret mutuku binuka ulamik. Nasaret mutuku binuka ulamika ara, sik Allah yupu laka nyalamik nang, nabi nang arye ayupu nyalamik. Ara, “Ninye Lyena Deiyoknye bira, ‘Nasaretnye ulule,’ nyapnamake,” nyalamik. Aning ati ara, Nasaret mutuku binuka ulamikak arye, sik Allah yupu laka nyalamik nang laka lyalamik touk, Nasaret mutuku binuka ulamik.

**‘Yesus aminyan yanamle’ tenen, Yohanes arye Yesus bisik kintinilina
ati nyabuk yupu**

(Markus 1:3-8; Lukas 3:2-17)

3 ¹Atalak ara, ninye una ap, mok cena ap kum ulamukak, Yudea tam noutamak arye, Yohanes min arye ninye mek dongolamuknye yayuk. Yayukop ura, ayupu peterelamuk. ²Yohanes peterelamuk ning ara, ani. “Anggun nirya, anggun kanye talima malye tenelulum ning ap, anggun malye winimunya ning ap batakuka, kanye dangupmunye ura, Allah arye amalye ning nirya kum daneiplirye, namin kipnamsile. Winipnamlum ning, ara Allah arye ninye weike lyeplirye sik kanye talima talinamle talak akunum dam upmala ati, anggun malye winimunya ning nirya bataknululume,” nyabuk.

³Anye Yohanes ara, elda talinye kume. Allah yupu laka nyalamuknye nabi Yesaya arye, “Bisik Kintinilnanye yanamle,” nyalilamuk touk, anye bira Yohanes ayanmale. Yesaya arye domon yupu nyalilamuknye ara ani.

‘Na Allah ara, na yupu laka nyalinanye birye, mok cena ap, ninye ap, kumak arye, ayupu nyanamle. Winibuka nyanamle. “Ninye Deiyoknye nun Ni Allah yanamla ati, bisik pung uk yalinamlulume. Nun Deiyoknye binamle bisik ara, pung uk yabuka kintinilnamlulume.”’ *(Yesaya 40:3)*

⁴Yohanes arye unta basam bola kobuka, potong kepman butum aling wibuka ongolamuk. Abasam bola uk deiyatinga delilamuk. Tonda, Yohanes arye mong mek ap, sul kwising ap, dilamuk.^f ⁵Weik asik dolamik mutuku,

^f **3:4** *Yohanes winilamuk ning* – Yohanes arye mong mek ap, sul kwising ap dibuka, unta basam bola kobuka potong kepman butum aling wibuka ongolamuk ning ara, sik minop talak Allah yupu laka nyalamik nang, nabi-nabi arye ton winilamik. Adeice arye ninye nirya, ‘E Yohanes ara, dipkoprop Allah yupu laka nyananye, nabi ulule,’ tenelamik.

Yerusalem mutuku ulamik ninye ap, Yudea tam noutamak ulamik ninye ap, Yordan mek duman ulamik ninye ap, yupa weik arye Yohanes peterelamukak kekelbalamik. ⁶Balamikce sik malye ulamik ning, yuk ninye kekelamikak arye, lakak laka nyabikce batakik. “Nun dipkoprop malye winilamupe,” nyabuka, sik malye winilamik ning lak akarye, laka nyabuka batakklamikba, Yohanes arye adib tenelamik ninye uk bobuka, mek ongolamuk. Aninye bobuka mek dongolamuk mek si ara, Yordan mek.

⁷Aninye mek dongolamuk bukni, elce diba tenena ninye mek dongolamukak, sik Farisi^g nang ap, Saduki nang ap dilyayikba, eibukop ura, anang ara tuba malye winilamika anya arye, sik ti ayupu nyabuka wenebuk. “Anggun yu una ap, tenepce arye talya yupu nyabuka duknuna ap winimunya ara, ninye ton kwatima duknubuka mapmalya arye, si tolamsil touk winilulume. Yatanye birye sik ti, ‘Allah arye malye winin ninye wenebuka opname,’ nyabikba kekelumce, ‘Allah arye nun opsilyak’ tenen, bik-bik abuka bilum do? Yata nang arye, anggun ti ayupu laka nyapsuk do?” Yohanes arye sik ti nyabuka wenebuk. Nyabukce ayupu ton nyabuk.

⁸“Anggunda, ‘Nunce nun malye wininyap ning akunum batakape,’ nyabuka talya yupu deice arye nyapnutum bukni, yo duk moulamya ani eklamle touk, dipkoprop batakumce, diksukumuk uptumba eiptinyeto ura, diba tenepsitinye. Ati, anggun malye winimunya ning adip aryuk batakmunce, telebuk unululume. ⁹Tonda, sikce, ‘Kume, nun deipkirik dopnye bira, Abraham usulula ati, Allah arye kum wenepnamsile,’ tenebuka kum nyapnamlulume. Aning ara tenena kume. Allah arye, ‘Abraham el mapu na doproptinye’ tenen, pataptop ura, talya ubuk keil arye bobuka, Abraham el mapu ton kintinipdeiptue. ¹⁰Yo wena^h deiyoknye birye, yo wepmala ati, el ya bobuka yo deiyok dam kintinipmale. Teleb yo duk kum moulamle yo nirya ara, webukapliiryu uku dongopname.”

¹¹“Anggun malye ning nirya batakmunba, mek sirika dem dongosunun bukni, nada mitik mambulnye anya arye, aminyan talak yanamla weik deiyoknye bira, elda weik mambulnye. Nada, mambulnye kum ati, fia malye fil uk bukni, el sandal koulongon tapu na arye kum loploptinye. Aminyan yanamlanye bira, el mikip fia weik ati, elce Allah El Dib Kanye arinamsile. Na arye mek sirika dem dongopsiniba, anggun nong nirya mek singilamle touk, aminyan yanamlanye bira, el mikip fia weike ati,

^g 3:7 *Farisi nang ara*, Yahudi yala ninye, sik deiyok nang ulamikce, agama fil dona deiyok nang ulamik. Tonda Yesus ati diba kum tenelamik. Tonda lak lyen yupu nomor 10 dipdelelume. ^h 3:10 *Yo wena* nyabuka deiyok ara ani. Ara, malye winilamikce ninye ara, Allah arye aninye ati wenebuka oplopname talak, akunum dam upmasila ati, adomon yupu nyabuk.

elce Allah El Dib Kanye aripsiliba, anggun kanye talima nirya talinamsile. Uku arye malye ning dilamle touk, Allah El Dib Kanye arye, anggun malye winin ning nirya dobuka, kum kipdeipnamsile. ¹²Batce dipnulinye bira, batce bama labuka, uku dongoplirye, batce nong uk dilamle touk, Yesus arye ninye nirya bokuka, teleb ning doproplirye, malye ning bataknamle.ⁱ Ninye arye din ning teleb ning yo lalina deice delilamak touk, Allah arye el ti diba tenebikirye, diksukumuk wininyak nang ara, aninye dobuka im deice deipliba, el ap neika fia unamake. Tonda, ninye arye din ning bama labuka, uku dongolamak touk, Yesus arye malye winin ninye nirya dobuka, uku fia dilulak dongopnamle. Auku ara fia kum tangaptue, fia dinamle.” Yohanes arye awekmek nang nirya ati adomon yupu nyabuk.

Yohanes arye Yesus mek dongobuk yupu
(*Markus 1:9-11; Lukas 3:21-22; Yohanes 1:31-32*)

¹³Yesus ara, ‘Yohanes arye na mek dongopnamnil’ tenen, Galilea tam arye Yohanes el peterelamukak Yordan mekin yayuk. Yayukce, “Mek dongopnilyame,” nyabuka morobuk. ¹⁴Morobuk bukni, Yohanes arye, ‘Nada malinye,’ tenebukce ayupu nyabuk. “Kume naio, teleb ning ara, ance na ti mek dongopnutum bukni, ance na morolyanmanilam ara, yata ati do? Na kanye ara aning kum winiptinye,” nyabuk. ¹⁵Nyabuk ura, Yesus arye tamubuka nyabuk. “Kume, Allah arye nun ti, ‘Winibuka diksukumuk unamake’ tenepsuk touk, diksukum ninguk wininuyaba ati, winitalak ance mek dongopnilyame,” nyabuk. Nyabuk ura, Yohanes arye telebe nyabuka Yesus mek dongobuk.

¹⁶Mek dongobukba, Yesus ara mek fum arye mek wekabuka ani, tikildongouk talak ara, adip aryuk Allah arye im deice kukeibukba, Yesus arye dinmok. Dinmokba, Allah El Dib Kanye ara, yalma maka atonun dayukce, Yesus el nong deice bulyayuk. ¹⁷Bulyayukop ura, Allah im deice arye ayupu nyapdeibuk. “Anye bira, na Mi Koproprop ulule. Na arye el ti fia bico tenenuna anye arye, el ti na kanye fia deilinune,” Allah arye nyabuk. Nyabukop ura, Allah El Dib Kanye arye Yesus talima noutam nyapdeibukba, Yesus ara ninye fia kum ulamik mutuku, pata mutuku noutamak biyuk.^j

Isa Mutuku Dongonye arye, ‘Yesus malye yupu nyaptue’ tenen,
winideyuk yupu
(*Markus 1:12-13; Lukas 4:1-13*)

4 ¹Yohanes arye Yesus akunum mek dongobukop ura, Allah El Dib Kanye arye, ‘Yesus ara ikin upliba, Allah el yupu uk kekepnamal do,

ⁱ **3:12** *Batce bama* – Allah yupu minop talak sekik ning ara, batce kum nyabik. Sikce, gandum ning ati, domon yupu nyabik bukni, ayupu deiyok ara atoto uka.
^j **3:17** Yesaya 42:1

Isa Mutuku Dongonye^k arye, nyaplye yupu kekepnamal do?’ tenen, Yesus el talima noutamak yupu nyapdeibukba, Yesus el winildena ati, ninye fia kum ulamik mutuku, pata mutuku noutamak biyuk. Amutuku noutamak ulamuk talak ara, Isa Mutuku Dongonye arye, ‘Yesus malye uptue’ tenen, Yesus dam yanuka winideyuk. ²Yesus amutuku ulamuk talak ara, kiting noutam ap, lukunyan ap nirya ara, like yupa tonok keba koklomdikin, ara 40 malam malamuk. Amutuku ulamuk talak nirya ara, ‘Din kum dipnamne,’ tenebukce, din bulung uk ulamuka anya arye, like yupa tonok keba koklomdikin, 40 sum akunum ubuk ura, el din fia patabuk. ³Din fia patabukop ura, Isa Mutuku Dongonye arye, ‘Yesus winipdenun’ tenen, Yesus dam nyalyayuk. “Anda dipkoprop Allah el Mi Koprop ulaminyop ura, aubuk keil dopropmince, ‘Kwaning kipliyame,’ nyapminba, kwaning daliba, aning dobuka diptume,” nyabuk. ⁴Nyabuk bukni, Yesus arye tamubuka nyabuk. “Allah yupu buku sekeipsuka noutamak nyasilya ara ani.

‘Ninye nirya kwaning uk dibikirye, kam fia kum unamake.

Bukni, Allah arye el yupu nyasilye ning nirya kekebuka, dobolbalamikop ura, kam fia unamake. Din ning ara mitik mambul bukni, weik mambul ning ara, Allah el yupu aupmala ati, din ninguk tenena kume. Allah yupu kekebuka dobolbana ara, weik mambule.’

(Ulangan 8:3)

Minop talak sekamik Allah yupu nyapsine,” Yesus arye nyabuk.

⁵Nyabukop ura, Isa Mutuku Dongonye arye, Yesus bobuka Yerusalem mutuku Allah ati arel balamikce, el si erelamik aik^l duma deice deibuk.

⁶Deibukce, ayupu nyabuk. “Allah yupu buku noutamak ara ayupu nyabuka sekik.

‘An opkilyak ati, Allah el im deice fil don nang, malaikat nyapdeipliba, tukwak fia moubuka kalikmaka arye tomobuka erelinamkiyake. Ara, ‘An yan kisok babye, keil yan dum dukuka opkilyak’ tenen, kalikuka melinamkiyake. Tomobuka erelinamkiyaka anya arye, ‘Mitiktonun arye ton oplyak’ tenen, an ti kalikinamkiyake.’

(Mazmur 91:11-12)

Isa Mutuku Dongonye arye ayupu nyabuk ura, ayupu ton nyabuk.

“Ura, Mazmur yupu akunum nyapkina ara, ayupu ara Allah yupu buku noutamak aupmala ati, anda Allah el Mi Koprop ulaminyop ura, anyaik duma deice arye, tukwak sakminyebuk, kum opkutue,” Isa Mutuku Dongonye arye Yesus ati nyabuk.

^k 4:1 *Isa Mutuku Dongonye* nyanyapnye bira, sik Yahudi yala ninye, sik yupu deice arye Setan nyalamik. Sik Yahudi yala ninye, sik yupu Ibrani yupu deice arye, Setan yupu deiyok ara, atau artinya ning ara, “Ninye Onanye, tonda Minina Yupu, tonda, Lululina Yupu Nyana Deiyoknye ulule,” nyalamik. Tonda, laka nyana yupu nomor 13 dindelelume.

^l 4:5 *Allah ati arel balamikce, el si erelamik aikati* laka nyana yupu ara, laka nyana yupu nomor 15 dindelelume.

⁷Nyabuk ura, Yesus arye tamubuka nyabuk. “Anyapmanilam ning ara aupmal bukni, yuk Allah yupu sekamik ning ara nyapnukine. Ara ani.

‘Anggun Ni Allah arye, ‘Dipkoprop kalikuka melinamsil do, kum do?’ tenen, Allah ati winilden ning winina meme.’ *(Ulangan 6:16)*

Ayupu ara Allah yupu noutamak ulula ati nyapkine,” Yesus arye nyabuk.

⁸Aminyan ara, Isa Mutuku Dongonye arye Yesus bobuka, weik mutuku konak bobiyukce, mutuku-mutuku nirya ap, weik deiyok nang talibuka unyak mutuku nirya ap, aubuk ning urasin teleb ning ap, sik dekna weik ning ap nirya, binebukce, “Dipdelyame,” nyamokba, Yesus arye dinmok. Dinmokba, Isa Mutuku Dongonye arye Yesus ati ayupu nyabuk. ⁹“Anda na si erebuka, na si erebuka kipniminyop ura, elinmalam ning nirya an ti aripnukine,” nyabuk. ¹⁰Nyabuk ura, Yesus arye tamubuka nyabuk. “Kume, Allah yupu buku noutamak arye nyasulule.

‘Anggun Ni Kopropa Allah ara, el si uk erebuka talinamlulume.

Anggun kanye ara, el deice anyuk delinamlulume. El fil uk donamlulume.’ *(Ulangan 6:13)*

Ayupu ara, Allah yupu noutamak ulula ati nyapkine. Ati, Isa Mutuku Dongonye anda, na batakuka an yukak bilyame,” Yesus arye Isa Mutuku Dongonye ati nyabuk. ¹¹Nyabukop ura, Isa Mutuku Dongonye biyukba, Allah el im deice fil don nang, malaikat-malaikat, Yesus dam yayikce, el patalamuk ning, aning nirya ara melilamik.

Yesus arye deiyok koubuka peterelamuk yupu

¹²Ura, yuk nang arye, “Raja Herodes arye, Yohanes tapu koubuka ninye wenen aik dongopmale,” nyabikba, Yesus kekebukce, tamubuka Galilea mutuku yayuk. ¹³Galilea mutuku noutamak bukni, Nasaret mutuku batakuka, Kapernaum mutuku yanuka ulamuk. Kapernaum mutuku ara, Galilea mekwen dam asik domikak ulamuk. El ulamuk mutuku ara, minop arye Zebulon yala nang ap, Naftali yala nang ap, ulamik. ¹⁴Amutuku binuka ulamuka ara, Allah yupu laka nyalamuknye, nabi Yesaya nyalilamuk touk winipnamuka ati, binuka ulamuk. ¹⁵Yesaya arye sekeiyamuk domon yupu ara ani.^m

‘Zebulon mutuku tam unyak ninye ap, Naftali mutuku tam unyak ninye ap, Yordan mek duman, ton Galilea mekwen dam umunye ninye anggunda, Yahudi yala kum ninye ap, Yahudi yala ninye ap, neika umunye ninye ati nyapne. ¹⁶Anggun kanye talima kunuknak

^m 4:15 *Yesaya nyabuk yupu* – Yesaya arye adomon yupu nyalamuak ara, Kapernaum mutuku ulamik ninye, Yesus winin ning kum kel kiyamik bukni, Yesus arye amutuku noutamak deiyok koubuka peterebiyuka anya arye, amutuku ninye arye Yesus eibika ati, ayupu nyalamuk.

atonun ulamak bukni, winitalak ara, weik dirina atonun ning akunum eipmake. Sik aunyak nang talima kanye dipna atonun unyamukba, kunuknak atonun ulamak bukni, winitalak ara, weik dirina atonun ning eipmake ati, bereklirye kiting deililamle touk unamake,' Yesaya arye domon yupu nyabuk. *(Yesaya 9:1-2)*

¹⁷Yesus arye Nasaret mutuku batakuka, Galilea mutuku biyuk talak ara, aning ara, Allah yupu deiyok koubuka peterelamuk. El peterelamuk yupu ara ani. "Anggun malye winimunye ning ap, kanye talima malye tenelulum ning ap, batakanamlulume. Ara, Allah arye ninye weike lyeplirye sik talima talinamle talak akunum dam upmala atia," nyalamuk.

Yesus arye el ap neika balamik nang wipdeiyamuk yupu
(Markus 1:16-20; Lukas 5:2-11; Yohanes 1:35-42)

¹⁸Ayupu nyapnin balamuk talak noutamak ara, Yesus arye Galilea mek lil kwa banmok. Banmokce ninye bitinye sik nang susuk uk eibuk. Eibuk nang ara, Simon, ton el si ara Peterus nyalamiknye ap, el weit kopropa Anderias ap, 'Mek imbal dongobuka dopnanam' tenen, mek fum aling atonun ning, mekin bal don ning, el si jala dolkwetenmarikbuk eibuk. Sik abitinye nang ara, mekin bal don nang anya arye, winimarik. ¹⁹Sik winimarikba, Yesus eibukop ura, abitinye nang ati nyabuk. "Anggunda na melibuka dobolyanururume. Mekin bal dongobuka dolamlum touk, ninye bulubuka don nang kipdeipnamsine. Ara, 'Allah lyeplirye sik talima talinamle' tenen, sikce ninye weike bulubuka na dam boyanamnurume," nyabuk. ²⁰Yesus arye nyabukop ura, Simon ap, Anderias ap, sik bitinye nang ara, mekin bal dongobuka don ning, jala batakrikce, adip aryuk Yesus melibuka dolbolbirik. ²¹Yesus ayupu nyabukce, amekwen lil kwa uk banmoka ani, bitinye nang ton, Yakobus ap, el weit Yohanes ap, ara Zebedeus el mapu, sik mek lia yo deice arye mekin bal dongobuka dolamrik ning, el si ara jaring, aning fum lipsisikuka winimarikbuk eibuk. ²²Eibukop ura, Yesus arye yukubuk ura, sik bitinye nang arye, sik ni Zebedeus ara, mek lia yo deice abukmokak, anyaka uk batakuka, sik adip aryuk Yesus melibuka birik.

Yesus arye uk din ninye kwetelamuk yupu

²³Sik ap, Yesus ap, Galilea mutuku noutamak balamika ani, Yesus arye, sik Yahudi yala nang Allah yupu keken aikⁿ wekuka, el yupu

ⁿ 4:23 Allah yupu peterena ap, kekena ap ati domik aik – Yahudi yala nang, sik Allah yupu peterna aik ara, nun mitik gereja atonun wamuk bukni, mitikto yuk. Ara, sikce hari Sabtu weklamikce, Allah el si erelamik. Tonda yuk-yuk sum ara, Allah yupu kekena ap, peterena ap, ninye wapdanop ura sik yupu lipsisikuka bokoliana ati, anyaik weklamik. Bahasa Indonesia deice arye, 'rumah ibada' nyanyake. Anyaik lak len yupu ati, nomor 26 dipdelulume.

peterelamuk. El teleb yupu peterelamuka ara, Allah arye ninye lyeplirye sik talima talinamle yupu, lak teleb yupu peterelamuk.

El peterelamuk talak nirya ara, sik amutuku ninye mitik uk dilamuk nang ap, minop danirye weik uk dilamuk nang ap, teleb ubuka kwetelamukba, aninye nirya teleb ulamik. ²⁴Yesus arye, ninye kweteptra daulamuk bukni, yuk nang arye el winilamuk ning laka nyalbalamikba, Siria mutuku tam ulamik nang nirya ara, Yesus winilamuk ning kekelamik. Aninye nirya kekelamika ati, uk yala-yala nirya fia weike dilamukba, kanye imun ulamuk ninye weik arye bobukabikce, Yesus dam boyangalamik. Ara, minop arye, weik uk dilamuk ninye ap, isa arye sik talima wekuka talyamuk ninye ap, walwal arye kanye wangalamak ninye ap, sik taruk yan nirya sesal selamuk ninye ap, Yesus dam boyangalamikba, Yesus arye aninye nirya, teleb ubuka kwetelilamuk. ²⁵Yesus elce winilamuk talak nirya ara, Galilea tam ulamik ninye ap, Yudea tam ulamik ninye ap, Yordan mek koubuka otam ulamik ninye ap, sik asik sepuluh arye dobuka ulamikce, amutuku si Dekapolis nyalamik mutuku ulamik ninye ap, Yerusalem mutuku ulamik ninye ap, weik arye Yesus melibuka balamik.

Yesus mutuku dup deice biyukce peterelamuk yupu
(Lukas 6:20-23)

5 ¹Ura, sik ninye weike Galilea tam ap, Yudea tam ap, Yerusalem mutuku ap arye, bulubuka yayikba, Yesus eibukop ura, ‘Peterepnun’ tenen, weik mutuku kon deice welebuka buku. Bukuop ura, elce wipdeiyamuk nang, sik 12 nang ara, el bukmok dam bukik. Abulupmek nang nirya babye anyaka uk bukik. ²Aninye ap, el yupu kekebuka dobolbalamik nang, yuk nang ap, sik nirya bukik ura, elce ayupu deiyok koubuka peterenmok.

³Sik kanye deibuka telebuk winin nang ara, ani. Ara, sik kanye talima erena kum aryuk, Allah arye, “Etekdopuk unamlulume,” nyasyila ara, ‘Nunda talima malye ninguk winiyaba, ati, nun bidamnye aryuk kum winiptibye. Allah el melisilya deice aryuk teleb unamabe,’ tenebikce ninye ara, Allah lyeplirye, sik kanye talima talibuka, el mapu kipliba, el ap neika unamake. Allah arye sik taliliba, el tam nang unyaka ati, sik kanye deibuka telebuk unyaka atonun, afia unamake.

⁴Sik kanye deibuka telebuk winin nang ara, ani. Ara, sik babye malye winin ning ap, yuk nang malye winin ning ap ati, ‘Se,’ tenebikirye, mambul kanye bobuka engenamak nang ara, Allah arye sik talima kwa dibuka melinamle. Aning ati ara, sik kanye deibuka telebuk unyaka atonun, fia unamake. ⁵Sik kanye deibuka telebuk unyak nang ara, wininyake. Ara, sik kanye erena kum arye, mitang arye unyak nang ara, Allah arye ninye weike lyeplirye, sik talima talinamle talak ara, mutuku-mutuku nirya wiryuk ning, kintinibuka arepliba, anang arye talinamake.

Aning ati ara, sik kanye deibuka telebuk unyaka atonun, aminyan talak babye afia unamake.^o

⁶Sik kanye deibuka telebuk winin nang ara, ani. Ara, Allah arye “Diksukumuk unamlulume,” nyasilye yupu ati, ‘Aning uk winiptibye’ tenen, fia patalul nang ara, sik kanye talima noutamak diksukum winin ning, pataplye ning nirya, Allah arye tuba melibuka arinamle. Aning ati ara, sik kanye deibuka telebuk unyaka atonun, aminyan talak babye, afia unamake.

⁷Sik kanye deibuka telebuk winin nang ara, ani. Ara, yuk nang ikin uplye nang ati, talima arepliba, melibikce nang ara, Allah arye anang wenena kumce melina uk unamle. Tonda, yuk nang arye anggun ti malye winipbikeba, adip aryuk yu upliba, kum kwang dakalulume. Sik ti malye winipmangu nang ati, ila tamubuka malye kum wininyak bukni, namin kibikirye, anang ati teleb ulinyake. Aning ati ara, anang sik kanye deibuka telebuk unyaka atonun, fia unamake.

⁸Sik kanye deibuka telebuk un nang ara, ani. Ara, sik kanye talima bitinye kina kum dib aryuk, ‘Na talima ap, nonge ap nirya, Allah akunum aripa ati, malye winin ning tonok ning ababye kum wininamne,’ tenenyakce, el yupu uk kekebuka unyak nang ara, Allah eipnamake. Ara, sik talima kanye dukdongopra, Allah ap, neika ulamikiry, Allah ap epdakiry, kanye deibuka epdanamke. Aning ati ara, sik kanye deibuka telebuk unyaka atonun, fia unamake.^p

⁹Sik kanye deibuka telebuk un nang ara, ani. Ara, ninye olanmace talak, ‘Namin uptinge’ tenen, ‘Olana ap, walana ap ara, batakulume,’ nyabuka, teleb ubuka bita dilamice nang ara, Allah diba tenebuka unyaka anya arye, aminyan talak ara, anang ati Allah arye nyapnamle. “Anang ara, na mapu unyake,” nyapnamle.

¹⁰Sik kanye deibuka telebuk un nang ara, ani. Ara, sik Allah yupu diba tenenyak nang ara, diksukumuk ulamice bukni, yuk malye nang arye eibikcop ura, ‘Diksukum una ara nun like’ tenen, anang ara Allah el mapu unyaka ati, ikin ning sik nong deice deibikirye, malye kilinyake. Bukni, sik diba tenenyak nang ara, Allah akunum lyebukce, sik kanye talima talilula anya arye, el mapu unyake. Ati, sik kanye deibuka telebuk unyaka atonun, aminyan talak babye unamake.^q

¹¹Anggunce na tuba diba tenepnuluma ati aning ara, malye nang arye malye yupu nyabuka yu kilina ap, ikin ning anggun nong deice delina ap, lululina yupu nyana ap winipsicop ura, anggun kanye deibuka telebuk unamlulume. ¹²Ara, Allah arye anggun ti kanye deipsuka anya arye, urdemuk aripnamsil ning, weik arye im deice kintinibuka akunum deipsuke. Aning ati ara, amalye winin ning nirya winipsicop ura,

^o 5:5 Mazmur 37:11 ^p 5:8 Mazmur 24:3-4 ^q 5:10 1 Peterus 3:14

anggunda kanye fia deibuka unamlulume. Amalye winin nang, anggun apu yapu arye, na yupu laka nyalamik nang, nabi ati, atouk ikin ning sik nong deice delilamika anya arye, winitalak unyak nang babye anggunda na yupu kekelulum ninye ati, atouk malye winin ning winilnamsiake. Winipnamsiyak bukni, im deice binamlum talak ara, Allah arye menenga ning weik arye arinamsile. Aning ati ara, anggun kanye fia deibuka unamlulume nyapsine.

¹³Winipmanto yupu nyapnusine. Din ning to kum nyaplyeba, ‘To nyapnamle’ tenen, garam dongobuka dilamak touk, anggunce na ti diba tenelulum ninye ara, tukwak mutuku unyak ninye kan-kan, garam uwa atonun ululume. Ara anggunce namin una ap, ninye melina ap winimunyop ura, anggun winilulum ning yuk nang eibikirye, kel bikikirye, diba tenenamaka ati nyapsine. Garam uwa teleb nyalamle deiyok ning ara kum uptuba, ila tamubuka teleb kipdeiptumba, to nyaptu do? Kume, aning ara fia kum winipmanto ati, to kum nyaptuba kum diptinge. Talya buru tam donokiceba, ninye arye aning deice yanibuka banyake.

¹⁴Tonda, anggunda mutuku-mutuku niry a ninye kan-kan arye weik dirina atonun ululume. Weik mutuku dup aik domtingce, weisa uptingop ura, yata ubuka duknuptu do? Kume, aweisa dirina upliba, yuk karen mutuku ninye niry arye eiptinge. ¹⁵Mutuku konak ulamak weisa ara, ninye arye ubuka deibikiba, kum duknulul touk, aik fum delilamak weisa ton nyapnusine. Ara, sik weisa ubikirye, aik fum boyangalamaka, ara ‘Kau fum siknipdongopnamap’ tenen, ubuka yangalamak do? Tonda, ‘Amsuna dangabuka, amutam weisa siknipnamap’ tenen, ubuka yangalamak do? Aning ara kum. Weisa ubikirye, abilinga taram ak deibikiba, dirina weik upliba, anyaik wekmace ninye niry elinyake.

¹⁶Aning ati ara, ‘Ninye eipnamak’ tenen, upna delilamak touk, anggunda ninye dinak niry weik dirina atonun unamlulume. Winimunyop ura, yuk nang arye anggun teleb winilulum ning eibikirye, anggun Ni Allah im deice ululnye ati, kel kibuka el si uk erenamake. Yesus arye el mapu ati nyabuk.

Yesus arye Musa sekamuk yupu ati laka nyabuk yupu

¹⁷Yesus arye ayupu nyabuk. Anggunce, ‘Musa sekamuk yupu,^r mem yupu ap, Allah yupu laka nyalamik nang, nabi-nabi nang arye sekamuk yupu ap, kum daneipnamle ati, Yesus arye yayuke,’ tenenululume. Bukni, aning ara kum tenenamululume. Aning ara kume. Allah arye, ‘Wininamlulume, aning ara kum wininamlulume,’ nyapdeibukba, Musa arye sekeiyamsuk yupu ap, tonda Allah yupu laka nyalamik nang nabi-

^r 5:17 *Musa seklamuk yupu* lak len yupu ara, nomor 35 dipdelulume.

nabi nang arye sekamik yupu ap, ‘Ayupu ara kum daneipnamle’ tenen, na kum yase. Sikce, “Aminyan talak, Allah arye winipnamle,” nyabuka sekamik ning ara, bola deice atonun ulul bukni, dipkoprop nong upnamle ning una ati, na yase.

¹⁸Na dipkoprop nyapsine. Winitalak arye dipdongobuka, im ap, tuku ap, kum danamle talak noutamak nirya ara, Allah arye, ‘Wininamlulume, aning ara kum wininamlulume,’ nyapdeibukba, Musa arye sekeiyamsuk yupu, mem yupu noutamak ara, tonok huruf babye, fia mitik sekna ning babye, min kum, kum danamle. Ayupu nirya, sik lyalamik touk, dipkoprop nong upnamle.

¹⁹Allah arye, ‘Wininamlulume, aning ara kum wininamlulume,’ nyapdeibukba, Musa arye sekeiyamsuk yupu, mem yupu noutamak ning ara, yatanye do nirya, mitik ning babye gaktapredi, ‘Yuk nang ton, sik bidamnye gaktaptinge’ tenen, “Musa yupu ara dawaplye, ayupu kekena kume, bataknululume,” nyabuka petereplyopop ura, aminyan talak, Allah arye ninye weike lyeplirye sik kanye talima talinamle talak ara, anye ati aning ara, weneplirye nyapnamle. “Anye fia mambule kume. Anye bira talinye,” nyapnamle. Bukni, anyapce tamubuka, yata nang do nirya, Musa el mem yupu sekamuk ning kekebuka ulirye, ‘Yuk nang ton atonun, Musa el yupu ara teleb yupu anya arye, kekenamake’ tenen, petereplyop ura, Allah arye ninye weike lyeplirye, sik kanye talima talinamle talak ara, Allah arye anye biti, “Anye bira, ereipnamne, elda weik mambule,” nyapnamle.

²⁰Anyapmasina ara, talya ati kuma. Sik Farisi nang ap, Allah arye, “Wininamlulume, aning ara kum wininamlulume,” nyapdeibukba, Musa arye sekeiyamsuk yupu, mem nyabuka peterena deiyok nang ap, talya nang arye utenenyake. ‘Se, sik diksukum una ara telebe,’ tenenyak bukni, dipkoprop sik anang ara, talima malye nang unyaka anya arye, Allah arye anang kum talinamle. Anggun akekepmanulum nang ara, anggun dipkoprop Allah yupu moubuka kekebuka, diksukum upmunyop ura, Allah ninye weike lyeplirye, sik kanye talima talinamle talak ara, anggun ti, ‘Telebe,’ nyabuka anggun dobuka talinamsile. Yesus arye nyabuk.

**“Anggun nirya arye, yuk ninye ati, yu una meme,” Yesus
arye nyabuk yupu
(Lukas 12:58-59)**

²¹Ayupu nyabukop ura, Yesus arye ayupu ton dukdongopra nyabuk. Minop talak Allah yupu peterelamik nang arye,

‘Ninye talya obuka batakona ara meme. Ninye talya obuka batakikcop ura, yupu bokeibikirye wepnamake,’ nyalamik. *(Keluaran 20:13)*

Nyabuka peterelamikba, sik apu yapu kekelamika anya arye, anggun babye ayupu tuba kekelulume. ²²Bukni, na arye nyasunun yupu ara,

ani. Yata yuk dib tenena nang do nirya, yuk nang ati, ona kum bukni, deremunye ning babye, Allah arye wenepnamsile. Tonda, sik minop talak ulamik nang arye nyalamik. “Yata yuk dib tenena nang do nirya, fia yu upliba derelakirye, sik bidamnang ati, ‘Anda fia weik malinye,’ nyapmunyop ura, Yahudi yala weik ninye deiyok nang, Sandeheren^s nang arye wenepnamsiyake,” nyalamik. Bukni, na arye nyasunun yupu ara, ani. Yu upliba derelamunce, yuk dib tenena nang ati, “Anda fia walwalnye,” nyapmunyop ura, anyapmamunye ning ati, Allah arye anggun wenena ati, anggun dobukapsiliryne, uku din mutuku dongopsilyak ati, kanye moubuka unululume. ‘Aning ara talya nyapmala,’ kum tenenamululume.

²³ Aning ati ara, anggunce Allah si erena ap, tonda, ‘Nun malye un ning eipsiliryne, kum daneipnamsil’ tenen, anggun malye winin ning dekna ati, Allah bita arepnumunye talak ara, moubuka tenepdenamululume. Anggunce, ‘Se, na arye, ninye yuk dib tenenanye bita, malye upmasiba, anye birye na ton derepnuke,’ tenepmunyop ura, adip aryuk Allah arepnumunye ning ara, anyaka uk batakuka deipnululume. ²⁴ Allah ati arepnumunye ning anyaka uk deipmunce, anggun ti derepmasilinye dam bimunce, yupu talibukamunce teleb upmunyop ura, ‘Anang arye tamubuka Allah ati arepnun’ tenen, deipmamunye ning ara, ila dobuka Allah ati arinamululume.”

²⁵ “Aning atonun, anggun derepsikce nang arye, anggun bobuka yupu talinak bobisikce talak ara, minopce anggun adip aryuk yupu talipmunce, telebuk ulinamululume. Dobuka bobasikce talak bisik noutamak arye, teleb min kum kipdeipmunyop ura, derepsilinye birye, yupu talina deiyoknye birye arepsiliba, yupu talina deiyoknye birye wenepsiliryne, yin talin nang arepsilyop ura, wenen aik dongopnamsiyake. ²⁶ Aning ara moubuka tenepnululume, na arye dipkoprop nyapsine. Yupu talina deiyoknye birye, ‘Winibuka arepnamsululume,’ nyapsikce touk, nirya min kum aryamunye talak ara, wenen aik^t noutamak arye kum lopnamsiyake. Afia unamululume. Ati, yuk nang arye anggun ti derepsikce ning ara, adip aryuk merekelinamululume. ‘Yuk talak uka’ tenena kume.” Yesus arye nyabuk.

Kil ubula yoldana ati, nyabuk yupu

²⁷ Ayupu nyabukop ura, Yesus arye ayupu ton nyabuk. “Allah yupu peterelamik nang arye,

^s 5:22 *Sandeheren nang* ara, Yahudi yala nang sik sisinanye nirya bulyamikce, ninye wenena ati yupu bokolina deiyok nang ulamik. Anang ara Sandeheren nang nyalamik. Tonda ayupu kel bikna ati, lak lena nomor 12 dipdelulume. ^t 5:26 *wenen aik* – Yesus arye adomon yupu nyabuk ning deiyok ara ani. Yesus arye, ‘Anyapsina atonun, Allah arye wenebuka opsilyak’ tenen, ‘Anggun malye umunye ning batakuka, Allah el yupu kekebuka telebuk unamululume. Lo tuba waplye talak uk, sik malye ning teleb ulinamululume. Tonda yuk nang ap, yu una mem’ tenena ati nyabuk.

‘Kil ubula yoldana meme,’ nyabuka peterelamik. *(Keluaran 20:14)*

Nyabuka peterelamikba, anggun apu yapu kekelamik touk, anggun babye kekelulume. ²⁸Bukni, na nyapsin yupu ara, anggun asing arye kilapu eipmunce, ‘Akil ara teleb tenepmana ati, dobuka yoptinye,’ tenepmunyop ura, ara dipkoprop kil dobuka talya yolamak touk, anggun talima ap, kanye ap, tenena noutamak arye akunum winilulume. Winipmunyop ura, Allah el kanye ara, ‘Akunum yopdanmarake,’ tenesulule. ²⁹Ati, anggun sirik tam asing arye eipmunce, malye upmunyop ura, anggun sirik tam asing kwetebuka donoklulume. Tonok asing kum dasutop ura, ara telebe. Bukni, asing bitinye tuba aupsilyop ura, tuba-tuba malye umunyop ura, Allah wenepsiliryne anggun dobuka, uku din mutuku dongopsilyeba, ara fia ikin weik unamlulume. ³⁰Aning atonun, anggun sirik taruk arye malye upmunyop ura, asirik taruk ara sekuka donoknululume. Tonok taruk kum dasutop ura, ara telebe. Bukni, taruk bitinye tuba aupsilyop ura, tuba-tuba malye umunyop ura, Allah wenepsiliryne anggun dobuka, uku din mutuku dongopsilyeba, ara fia ikin weik unamlulume.” Yesus arye nyabuk.

Domikce kilapu batakna ati nyabuk yupu

³¹Yesus arye nyabuk. “Sik Allah yupu peterelamik nang arye nyalamik. ‘Anggun domunye kilapu ‘Akil batakun,’ tenepmunyop ura, kil batakna ati laka nyan surat sekuka aripmunyop ura, akil talya mangkau asa bataknamlulume,’ nyalamik. *(Ulangan 24:1)*

Nyabuka nyalamikba anggun apu yapu kekelamik touk, anggun winitalak winilulum ninye babye ayupu kekelulume. ³²Bukni, na nyapsin yupu ara, anggun domunye kilapu yuk nang arye ubula yocop ura, akil batakna mitik telebe. Bukni, ubula kum yobmakce bukni, mambul ning ati, deiyok kum upmalibuk, talya batakmunyop ura, ara fia malye. Anggun kilapu arye, yuk nang ap ubula yoldakcop ura, batakna teleb bukni, yuk deiyok niryne deice arye tenepmuncne, anggun kilapu talya batakmunyop ura, ara malye. Abatakmunye kil yuknye birye doplyop ura, sik bitinye talya yoldalamak touk wininamrake. Bukni, akil ati malye ulina deiyok nang ara, sik kilapu batakanyak nang uka. Tonda, yuk nang domikce kilapu ubula kum yomikcebuk batakikceba, yuknye birye akil doplyop ura, anye babye talya yoldana atonun ulule. Ati, anggun babye, yuk nang babye, yuk ninye arye batakikce kilapu babye, batakikce ninye babye, dolana meme. Tonda, sik kilapu do, ninye do, talye-talye yoldana kumop ura, batakna fia meme.” Yesus arye nyabuk.

Yesus arye, “Nyalin yupu nyan talak ara, yuk ning si ap, Allah el si ap, tabakuka kum nyanamlulume,” nyabuk yupu

³³Yesus arye nyabuk. Ura, Allah yupu peterelamik nang arye anggun apu yapu ati,

“Anggunce Allah ati dipkoprop winipnamle,” nyalilulum yupu ara, talya nyaltakana kume. Anggunce Allah ati, “Winipnamabe,” nyabuka nyalalulum yupu nirya ara, “Dibkoprop wininamlulume,” nyalamik.’ Ayupu ara” anggun babye kekelulume.

³⁴Bukni, na winitalak nyapsin yupu ara, anggunce yuk nang ati nyalin yupu nyamunye talak nirya ara, ‘Kekepsikce nang dib tenepnamsiyak’ tenen, mambul ning si ap, tabakuka nyana meme.’ Anggunda, “Allah el uleye mutuku im deice arye nyapsine,” nyamunye ning ara, batakanamlulume. Ara, im deice ara, Allah ulirye aning-aning nirya talibuka ulula anya arye, nyana meme.

³⁵Tonda, anggunce, “Tukwak mutuku im sirya, mutuku sirya nirya si deice arye nyapsine,” nyamunye ning ara, batakanamlulume. Tukwak mutuku im sirya, mutuku sirya nirya ara, Allah elce talilula anya arye, el yan deice didik selula atonun ulule. Ati ayupu nyana meme.

Tonda, “Kota Yerusalem mutuku si deice arye nyapsine,” nyamunye ning ara, batakanamlulume. Ara, ‘Nun weik ninye deiyoknye, nun Ni Allah arye, ‘Yerusalem mutuku wininamne,’ tenen, wibuka deiyamuk mutuku ulula ati, nyana meme. ³⁶Tonda, sik kisok potong ara, ‘Miripnutue, tonda kurupnutue’ tenen, aning nyabuka moroptuma babye, kum miripnamsile. Tonda kum kurupnamsile. Aning fil dona ara, kanam fil uk bukni, anggun mikip fia ninye ati, aning babye kum winiptume. Aning ati ara, “Na kisok ap, na si ap deice arye nyapsine,” nyamunye ning ara, batakanamlulume.

³⁷Aning ati ara, anggunce nyalin yupu nyanamlum talak nirya ara, ‘Winipnune,’ tenelulumop ura, “Yo, winipnune,” nyapnamlulume. Aning atonun, ‘Kum winipnune,’ tenelulumop ura, “Kume, kum winipnune,” nyapnamlulume. Anggunce, ‘Yuk ninye dib tenepnamsiyak’ tenen, yuk ning si ap tabakuka nyamunye ning ara, isa arye nyapsiliba winin ning atonun ati, winina meme nyapsine. Yesus arye nyabuk.

Yesus arye ninye malye usinyak ning mal dona ati nyabuk yupu

³⁸Yesus arye ayupu nyabukop ura, ayupu ton nyabuk. Minop arye kekelamlum ning ara ani.

‘Yuk nang arye anggun asing tulubuka opsikcop ura, anggun babye tamubuka anang sik asing tulubuka onamlulume. Tonda, yuk nang arye anggun si bana tarakuka opsikcop ura, anggun babye tamubuka anang sik si bana tarakuka opnamlulume.’

(Keluaran 21:24)

^u 5:33 Imamat 19:12; Bilangan 30:2; Ulangan 23:21 ^v 5:34 *mambul ning si nyana* – Sik Yahudi yala ninye ara, ‘Nun nyanyap yupu, yuk nang diba tenepnamsiyak’ tenen, sikce nyalilamik talak ara, yuk weik mambul ning si ap tabakuka nyalamik. Winipmanto ning ara, minop talak ulamik nang arye, “Allah el si erebiryey, el ti arenyap asik, anyaik si deice arye nyapsine,” nyabuka nyalilamik. Bukni, Yesus arye, “Aning ara fia malye ning,” nyalamak.

Nyalamikba kekelamlume. ³⁹Bukni, na winitalak nyapsin yupu ara, sik fia yu nang, ‘Opnuyap’ tenen, opsikcop ura, sik bidamnye ila tamubuka anang obuka lyeldana kume. Yu nang arye sirik katum opsikcop ura, ila ton tam katum babye merekeipnamlulume. ⁴⁰Tonda, yuk nang arye, ‘Sik butum aling arepsitinge’ tenen, yupu talina deiyok nang dam bobisikcop ura, anggun nong deice aongopmamunye butum aling ap, na tenemunye deice butum aling ap, talya mangkau asa anang ati arinamlulume.

⁴¹Atonun ton, yu nang arye, “Na bisik melina ati, na bona bobuka, na binamne mutuku melibuka bobinamnyame,” nyabuka ikin fil deipsikcop ura, sik nyabikce mutuku babye, anyapce otam karen binamak mutuku babye, abona melibuka bobinamnyame. ⁴²Yuk nang arye anggun ti moropsikcop ura, adip aryuk arinamlulume. Tonda, yuk nang arye, ‘Tia bopnun’ tenen, moropsikcop ura, sik anang tia bona ati, sik moropmakce ning arinamlulume. Yesus arye nyabuk.

Yesus arye, “Yuk nang arye anggun ti, ‘Nun like,’ tenelamsiak ninye ati, bico tenenamlulume,” nyabuk yupu

⁴³Yesus arye nyabuk. Allah yupu peterelamik nang nyalamikba, anggun apu yapu kekelamik touk, anggun winitalak ululum ninye babye kekelulume. Ara, ‘Anggun oldalamlum nang ati, lik tenenamlulume. Bukni anggun dam unyak ninye ati, bicoe tenebuka melinamlulume,’ nyalamsikba kekelulume.” ⁴⁴Bukni, na winitalak nyapsin yupu ara, ani. Anggun oldalamlum nang ati, bico tenebuka melinamlulume. Anggun nong deice ikin ning deililamsiyak nang ati, ‘Allah arye aninye lyepnamle’ tenen, moronamlulume. ⁴⁵Wininamlum ning ara, anggun Ni Allah, im deicanye, ‘El mapu unamak’ tenen, wininamnyame. Allah ara fia telebnye ulula anya arye, teleb ninye babye, malye ninye babye, bico tenebuka kanye talima aresulule. Anggunda el mapu ululuma ati, anggun babye atonun unamlulume.

Allah el kiting ara, elce nyaptuba, malye nang dam babye, teleb nang dam babye, delilule. Mok ababye, Allah elce nyaptuba, malye nang dam babye, teleb nang dam babye, mok celule. ⁴⁶Yuk nang arye anggun ti, bico tenebuka kanye talima melisinyak nanguk bico tenepmunyop ura, adeice arye Allah elce anggun teleb una ati, ‘Talya arepnamne,’ tenepsuk ning aripnamsil do? Kume. Sik fia malye nang, ‘Ninye deiyok nang doproprnamak’ tenen, pajak yo bok bulubuka delilamak nang, anggun malye nang ababye, sik babye atonun nang ati, bico tenebuka melildanyake. Aning ara, ninye niry a sik babye atonun nang ati melildanyake. ⁴⁷Anggun kayapu nang, yuk dib tenena nang tonok si erebuka telebe nyapmunyop ura, ‘Aning ara teleb unamabe,’

^w 5:43 Imam 19:18

kum tenenammlulume. Yuk nang niry a atonun unyake. Allah diba kum tenenyak nang ababye, sik bidamnang ati si erebuka telebe nyanyake.

⁴⁸Aning ati ara, anggun Ni Allah im deice ululnye birye, ninye niry a ati, bico tenebuka kanye talima melilul touk, anggun babye ninye niry a ati, kanye talima arinamsile. Anggunda, Allah el mapu ululuma anya arye, anggun Ni Allah malye una kum dib aryuk diksukumuk ulye touk, anggun babye atonun, malye una kum dib aryuk diksukumuk unamlulume. Yesus arye nyabuk.

Yesus arye bona utotoa talina kum ninye melina ati nyabuk yupu

6 ¹Yesus arye ayupu nyabuk. “Anggun kanye moubuka una ati, ayupu nyapnusine. Anggunda, ‘Allah el si erebuka el fil donamape,’ tenemunye talak niry a ara, yuk nang eipsikirye, ‘Sikda teleb nang, tenenamnsiyak’ tenen, ninye si seknak lakak anyuk kum fil donamlulume. Ninye si seknak uk laka fil domunyop ura, anggun Ni Allah im deice ululnye birye, ‘Dekne ning arinamne’ tenepsuk ning kum arinamsile.”

²“Aning ati ara, sik tenepce arye talya nyaltakanyak nang ulamak ning ara, anggun atonun kum unamlulume. Anang ara, Allah el si erena ati kum bukni, ‘Yuk nang eipsikirye, si erepsikirye, fia teleb nang tenepnamsiyak’ tenen, bona utotoa talina kum ninye patalul ning arebikce talak ara, weik bingong nyana terompet nyabikirye, ninye weik arye ban bisik niry a ap, Allah yupu peterena aik kopropa ap, anyaka anyuk yuk ninye dinyak ak laka ubuka arenyake. Na dipkoprop nyapsine, Allah arye anang ati, aminyan talak teleb ning ton kum arepnamle. Anang arye teleb wininyak ning ara, yuk ninye arye laka akunum elinyaka ati, sik menenga atonun ning ara akunum dopropmake. Allah arye anang ati yuk ning tabakuka kum arepnamle.

³Bona utotoa talina kum nang arepnumunyop ura, ‘Yuk nang eipnusiyaak’ tenen, lakak kum arinamlulume. Bona utotoa talina kum nang arepnumunye talak ara, Allah elcuk tenepnamsila ati, yuk nang kekena ati, laka nyana kum dib aryuk, talya yupu tunimabuka duknupmunce arinamlulume. ⁴Winipmunyop ura, yuk nang arye kum eipnamsiyak bukni, anggun Ni Allah ara duknubuka umunye ning niry a elilunye anya arye, elcuk eibuka kel biksiliry e, teleb ning kintinipsuka ara aminyan talak arinamsile.” Yesus arye nyabuk.

Yesus arye Allah morona ati nyabuk yupu

(Lukas 11:2-4)

⁵Yesus arye ayupu nyabukop ura, ayupu ton nyabuk.

Anggun talimak malye ning tuba aupsukbuk, ‘Ninye eipsikirye, teleb nang tenepnamsiyak’ tenen, nong bola deice uk teleb unyak nang wininyak touk, anggunda na mapu arye aning kum wininamlulume.

Amalye unyak nang ara, 'Yuk nang arye eipsiting' tenen, ninye bulubuka balamak bisik ap, Allah yupu peterena aik kopropa ap, ninye dinak tikikirye, Allah moronyake. Awininyak ning nirya ara, 'Teleb nang tenepnamsiyak' tenen, unyaka anye arye, na dipkoprop nyapsin, anggun menenga atonun ning ara adeice arye akunum dolonyake. Aminyan talak Allah arye anang ati yuk ning ton tabakuka kum arinamle.

Bukni, na mapu, anggunce Allah moronamlum talak nirya ara, sik anang wininyak touk kum wininamlulume. ⁶Anggunda anggun aik kopropa wekmunce, buplan tirikdongopmunyop ura, Allah moronamlulume. Winimunya talak ara, ninye asing arye kum elinyaknye, anggun Ni Allah ati morolulumba, elcuk dinamsile. Winipmunyop ura, anggun Ni Allah ninye duknubuka ulamak ning nirya elilunye anye arye, kel biksilirye, el tenepsuk ning, menenga ning aminyan talak arinamsile. ⁷Tonda, Allah diba tenena kum nang arye, Allah moropnukce talak, 'Yupu cang arye nyabibiba kekepnusile,' tenebuka morolamak touk, anggunda na mapu aning kum wininamlulume. ⁸Anang yupu cang arye nyabuka, Allah morolamak touk kum moronamlulume. Anggun patasilye ning min kum moropmamunya talak arye, anggun Ni Allah akunum kel bikilula anye arye, yupu cang arye morona kum unamlulume. ⁹Anggunce Allah moronamluma ara ani.

Nun Ni Allah im deice ululumnye birye, 'Nun babye, yuk nang nirya babye, an si uk erebuka unamap' tenen, moropkiyabe.

Tonda, ance mutuku-mutuku nirya ap, nun tukwak nang nirya ap, talisilyamce, 'Nun Weik Deiyoknye an tonok unamsilam' tenen, moropmabe. ¹⁰'Minop yamince, ninye mutuku-mutuku nirya talibuka unamsilam' tenen, moropkiyabe. Tonda ance nyapminba, im deice unyak nang fil dolamak touk, nun tukwak nang babye, 'An tenesiminye touk, melipsiminba, an fil uk donamap' tenen, moropmabe. 'Ance teneminye touk, im deice ap, tukwak mutuku noutamak ap, aning atouk unamle' tenen, moropkiyabe.

¹¹ Asum-asum nirya nun kwaning ap, yuk ning ap, patasilye touk, 'Melibuka arepsiminyeba, dobuka dinamabe' tenen, moropmabe.

¹²Yuk nang arye nun ti malye upsikiba, nun babye namin kinyap touk, ance ton nun malye wininyap ning ati, 'Namin kibuka, kum kipdeipnamsilam' tenen, moropkiyabe. ¹³'Malye upnamak do?' tenen, 'Weik ikin winilden ning kum arepnamsilam' tenen, moropkiyabe. Aning kum bukni, tonda, Fia Malye Uning Deiyoknye, ara Isa Mutuku Dongonye arye, 'Malye ulisulul anye arye, malye winibibyak' tenen, 'Ance kalikuka disimince melinamsilam' tenen, moropkiyabe.

Ayupu nyabuka Allah moronamlulume. Yesus arye el yupu kekenmek nang ati nyabuk. Nyabukce ayupu tonap nyabuk.

¹⁴Anyapmasin yupu ara, urdem ati kum nyapsine. Deiyok ara, yuk nang arye anggun ti, malye upsikiba, namin kipmunce, tonap kum tenemunyop ura, anggun Ni Allah im deice ululnye birye, anggun malye winilulum ning ati atonun, namin kipsiliry, kum daneipsilyop ura, aning ati tuba tenebuka kum wenenamsile. ¹⁵Bukni, yuk nang arye anggun ti, malye upsikiba, kum namin kipmunce, tuba tenemunyop ura, anggun Ni Allah el babye, anggun malye winilulum ning ati, kum namin kilinamsie, aning ati tuba tenebuka, dipkoprop wenepnamsile. Yesus arye nyabuk.

**Yesus arye, “Allah el si erena ati, din dina kumce,
si tebuka unamlulume,” nyabuk yupu**

¹⁶Yesus arye nyabuk. Sik talimak malye ning tuba aubuk buk, ‘Ninye eipnamsiyak’ tenen, nong bola deice uk teleb unyak nang atonun kum unamlulume. Sik anang ara, Allah si erena ati, din dina kum, si tebuka unyak talak ara, ‘Yuk nang eipsikirye, mambul nang tenepnamsiyak’ tenen, sik asok melmel karikuka engepmanto unyake. Tonda, ‘Yuk nang eipsikirye, se Allah ati din dina kumce, urdemuk unmake, tenenamsiyak’ tenen, potong wina ap, mek kekena ap, kum dib aryuk, malye-malye ubuka lakak banyake. Anang ara yuk ninye eibikirye, sik ti, ‘Se, sikda mambule,’ tenelamak nang akunum dopromaka anya arye, aminyan talak Allah arye yuk menenga ning ton sik ti tabakuka kum arepnamle.

¹⁷Anang ara wininyak bukni, na mapu anggunda aning atonun kum wininamlulume. Allah si erena ati, din dina kum, si tebuka unamlum talak nirya ara, anggun nonge ap, asok ap, mek kekukapmunce, potong wibuka talya kanye bobuka, nonge nirya diklya asa unamlulume.^x

¹⁸Awinamluma nirya ara, yuk nang eipsikirye, ‘Allah ati din dina kumce, si tebuka unmake, kum tenepnamsiyak’ tenen, nyapsine. Anggun Ni Allah ninye asing arye kum elinyaknye, elcuk, anggun duknubuka winimunya ning nirya, eibuka kel kilulnye anya arye, el si erena ati din dina kumce, si tebuka umunyop ura, kel biksiliry, el tenesilya ning arinamsile. Yesus arye nyabuk.

Yesus arye mambul ning bulubuka delina ati, nyabuk yupu
(*Lukas 11:34-36*)

¹⁹Yesus arye ayupu nyabukop ura, ayupu ton nyabuk. Anggun mambul ning ara, tukwak mambul ninguk bulubuka, dokola kum delinamlulume. Tukwak mambul ning nirya ara, sisilya una ap, sing arye dina ap deice arye,

^x **6:17** *urasin teleb unamlulume* – Yesus arye ayupu nyabuka deiyok ara ani. Sik Yahudi yala nang arye, Allah kina ati, din dina kumce, si tebuka ulamik talak ara, ‘Ninye nirya eipsikirye, mambul nang tenepnamsiyak’ tenen, sikce dobuka sik kisok deice delilamikce, lakak uk balamik. Ati, “Winina ara, malye uka,” nyabuk.

malye-malye ulule. Tonda, ubula don nang arye, sik buplan kukuka wekikirye, ubula donyake. Ati, tukwak mambul ning nirya ara, kum dasutue. ²⁰Mambul tenelulum ning ara, tukwak kum delinamlulum bukni, im deice^y mambul ninguk ara, im deice dokola delinamlulume. Im deice ara, sisilya ap, sing arye dina ap deice arye, mambul ning malye kum uptue. Tonda ubula don nang arye, buplan kukuka im deice ning ubula kum doptinge. Ati, im deice mambul ning nirya ara, min kum dasutue. ²¹Anyapmasin yupu ara, urdem ati kum nyapsine. Deiyok ara, anggun mambul ning dokola delulumak ara, aning uk patasilibuk, anggun kanye talima aning uk tuba-tuba tenenamlulume. Ati aning ara, im deice uk dokola delinamlulume.

²²Anggun nonge upna atonun ning ara, anggun asing upsuke. Asing teleb dasutop ura, bisik teleb ninguk eibuka bitume. Bukni, asing malye upsilyop ura, asing kubuka kwepdanin, malye bisik uk binamlume. Aning atonun, anggun kanye talima anggun bidamnye ning ap, malye ning ap, aning atibuk tenepmunyop ura, aminyan wininamlum ning nirya malye winipnamsile. ²³Anggun asing noutamak dirina kum weksutop ura, kunuknak uk bitume. Aning atonun, anggun kanye talima noutamak anggun bidamnye ning atibuk tenepmunce, malye ninguk tuba upmasyop ura, anggun fia malye uk unamlulume. Anggun kanye talima ap, winimunye ning ap, fia kunuknak atonun unamlulume. Teleb winin ning ara, tonok ning ton kum wininamlume. Yesus arye nyabuk.

“Allah ap, talye tukwak mutuku ning ap kum taleptume,” nyapbuk yupu

²⁴Yesus arye ayupu nyabukce, ayupu ton nyabuk, “Yata nang do nirya, sik deiyok nang bitinye nang ati, kanye talima deibuka, tonye fil dobuka, tonye fil dobuka, kum winiptinge. Tonok fil donye birye, el deiyok nang bitinye nang utiringop ura, tonoknye birye abitinye nang ati fil kum doptue. El deiyok nang bitinye nang ati, kanye talima deibuka, sik bitinye nang ati, fil teleb ubuka kum doptue. Ato fil don nang ara, ton deiyoknye biti, kanye talima deibuka, ton deiyoknye biti, lik tenebuka unamake. Tonda, sik deiyok nang bitinye ubrikiba, ton deiyoknye biti, kanye deiplirye meliplirye fil donamle. Ton deiyoknye biti, lik tenebikirye, lik upliba, bataknamake. Tonye bira, bataknamle, tonye bira, fia talinamle. Ayupu nyapmasin touk, Allah ap, yo bok do, talya tukwak ning nirya ap ati, neika atonun patapliba, teleb ubuka kum fil doptume. Weik mambul ninguk tenepmunce, wibuka talinamlulume,” Yesus arye nyabuk.

Yesus arye kanye imun una ati, nyabuk yupu
(Lukas 12:22-31)

²⁵Yesus arye ayupu nyabuk.

^y 6:20 *Im deice mambul ning nyabuk ning, ara Allah arye “Wininmale,” nyasilye ning nirya kekebuka winipmunyop ura, menenga ning arinamsile ati nyabuk.*

Anggun patasilye ning nirya ati, 'Se yata winiptibye do?' tenen, kanye imun una kume. Anggun din ning ap, butum aling ap ara, mitik mambul bukni, anggun nonge ap, kam una ap ara, weik mambule anya arye, Allah arye anggun patasilye ning ati melinamsile. Aning ati ara, 'Se, nun yata mek ap, yata din ning ap, dipnamap do? Nun butum aling ara, yatato butum aling ongopnamap do?' tenen, kanye imun kanye bobuka kum unamlulume. ²⁶Sik maka lakuka balamaka nirya ati tenipdelulume. Maka ara yal ning kouna ap, nong una ap, din ning dokola delina ap, fia kum wininyak bukni, sik Ni Allah arye amaka sik din ning tuba arepliba, dinyake. Maka ara, mitik mambul bukni, ninye nirya ara weik mambul anya arye, Allah arye anggun ti, anggun patasilye ning nirya melibuka arinamsile. Aning nirya ara, kum bikmalumce, kum kel bikmalum do?

²⁷Anggun awekmalum nang noutamak ara, yatanye birye tenepturye el kanye imun uptua deice arye, like tonok talak tonap tabakturye kam uptu do? Ara kum winipmanto. ²⁸Yata ati, 'Yatato butum aling ongopnamap' tenen, kanye imun usulul do? Dolkua kan-kan arye ulamle kurun ning ara, tenenammlulume. Akurun ning urasin ara, fia teleb ulul bukni, aning ara fil dona ap, butum aling ongona ap, kum ulule. ²⁹Afil kum dolul bukni, weik ninye deiyoknye Raja Salomo ongolamuk butum aling ara, urasin mitik teleb bukni, atalye kurun ning urasin ara, fia weik telebe. Dolkua noutamak talya ulye kurun ning ara, asum arye kurun upmalya ani, kiting deiplirye koulupliba, uku dongonyake.

³⁰Bukni, Allah arye akurun el urasin fia teleb ubuka kwelilule. Ati, aning ara mambul kum ning bukni, anggun tukwak ninye ara weik mambul ululuma ati, Allah arye anggun patapsilye butum aling babye melibuka arinamsile. Bukni, anggunce Allah ati, weik arye diba kum tenelulume. Anggunce, 'Nun patapsilye ning Allah arye arinamsile,' tenen, diba tenelulum ning ara, mitikanun usulule. ³¹Allah arye dipkoprop melinamsila anya arye, anggun mambul upsilye ning ati, 'Se, yata din ning ap, mek ap, dipnamap do? Tonda, yata butum aling ongopnamap do?' tenen, kanye imun kum unamsile. Anggun talima ap, kanye ap, atukwak ning ati weik patapliba, atalye-talye ning deice kum delinamlulume.

³²Tukwak ning wabliba, ninye patalul ning nirya ara, Allah diba tenena kum ninye arye, 'Aning uk doproptibye,' tenebuka unyake. Wininyak bukni, anggunda na ti diba tenelulum ninye, anggun patasilye ning nirya, anggun Ni Allah arye akunum tenesilirye melibuka arinamsile ati, kanye imun kanye bobuka kum unamlulume. ³³Aning uk tenebuka kum unamlum bukni, weik mambul ning ara, Allah arye, 'Wininamake,' tenen, nyasilye touk diksukum una ap, lyepsilirye nun kanye talima talibuka unamsil ning ap, im deice welepnamlum ning ap, aning uk minopce tenepmunce, fia moubuka talipmunyop ura, yuk yala

ning nirya babye, elce arinamsile. ³⁴Aning ati ara, ‘Ambusum ara yata winipnamap do?’ tenen, kanye imun una kume. Ambusum ning upmal ning ara, ambusum ning anyuk tenenamlum. Asum-asum nirya kanye imun usilye ning ara, akunum aupmalula anya arye, yuk sum ning ara, aunmalum sum noutamak tabakuka tenena kume. Yesus arye nyabuk.

Yesus arye, “Yuk nang ati yapyap ana meme,” nyabuk yupu
(Lukas 6:41-42)

7 ¹Yesus arye nyabuk. “Anggunce yuk nang ati, anggun babye malye un ning tenena kum dib aryuk, yuk nang sik malye ning atibuk, ‘Anggunda fia malye nang,’ nyabuka, yapyap abuka kum nyanamlulume. Yuk nang ati yapyap ana fia nyapmunyop ura, Allah arye, anggun ti yupu bokeipsiliry, wenepnamsile. ²Anggunce yuk nang ati yapyap nyalamlum touk, Allah arye anggun ti yapyap abuka wenepnamsile. Yuk nang ati, weik arye yapyap amunyop ura, Allah el babye weik arye yapyap abuka anggun ti wenepnamsile. Anggunce yuk nang ati mitika aryuk wenepmunyop ura, Allah el babye mitika aryuk anggun ti yapyap abuka wenepnamsile,” Yesus arye nyabuk.

³Yesus arye ayupu nyabukop ura, adomon yupu ton nyabuk.

Anggun asing noutamak weik yo touku aupmasilibuk, aning tenena kum dib aryuk, anggun kayapu nang, dib tenena nang ati, “Anggun asing noutamak yo kita singsinga atonun ning aupmakile,” nyamunye ning ara, yata ati do? ⁴Yata wiribuka arye an asing noutam weik yo touku aupmasilibuk, anggun kayapu nang ati, “An asing noutamak yo kita singsinga atonun ning doproprukine,” nyaptum do? ⁵Anggun kanye talima noutamak fia malye ning tuba aupmasilabuk, ‘Teleb ning winibibiba, yuk nang eipsikirye, sikda teleb nang tenenamsiyake,’ tenelulum nang ani. Minop ara, weik yo touku anggun asing noutamak aupmasilya doproptumop ura, anggun kayapu asing tulukmatu ning teleb ubuka eiptumce doptume. Sik asing noutam weik ning kum dobuka batakmunyop ura, yata ubuka eiptumce, anggun kayapu nang asing noutam, mitik uplye nang doproptum do? Yesus arye nyabuk.

⁶Ayupu nyabukop ura, adomon yupu ton nyabuk. “Anggun Allah arina ati wibuka deiplum ning ap, dekna weik ning ap, doproprumnce bai kam ap, yua basam ap aripmunyop ura, yaniprikiry tamubuka si tobuluklobuka batakadurake. Bulukuka batakaduraka anya arye, teleb ning dobuka kam ap, basam ap ati kum arinamlulume. Aning atonun, ninye sik talimak gat upliba, ilil kumce, pi dobuka unyak nang ara, Allah yupu fia ilil ning ara, talima gat nang ati kum peterenamlyame. Anang ara, Allah yupu kum kekepmanto nang ati, peteremunyop ura, ayupu kum kekebikiry, yaniptabuka talya uk unamake.” Yesus arye el yupu kekenmek nang ati nyabuk.

Yesus arye Allah morona ati nyabuk yupu
(Lukas 11:9-13)

⁷Yesus arye ayupu nyabuk. Anggun patasilye ning moropmunyop ura, Allah kekepsiliryne aning uk arinamsile. Anggun patasilye ning, ‘Dana ak eipnuyap do?’ tenen, epkirikmunyop ura, eipnamlume. ‘Anyasik wekuka bitinye’ tenen, bisik lourum-lourum nyabuka, ubuka, pitin-pitin upmunyop ura, Allah arye buplan kukeipnamsile. ⁸Aning ati ara, na dipkoprop nyapsine. Yata nang do nirya, Allah ati morolulum nang ara, Allah kekepliryne arepliba dolonamake. Elkirikilulnye bira, Allah arye melipliba eipnamle. ‘Anyaik wekuka bitinye’ tenen, bisik lourum-lourum ubuka, pitin-pitin ululnye bira, Allah arye abuplan kukeipliba weknamle.

⁹Anggun teniplulume. Anggun awekmalum nang kan-kan, yatanye el mi arye el li biti, kwaning moropli bukni, talya keil uk arepnamlum do? ¹⁰Tonda, el mi arye mekin bal moropli bukni, ninye on kwatima arepnamlum do? Kume, anggun mapu arye morobikce touk, teleb ninguk arinamlume. ¹¹Anggunda talimak malye winilulum nang bukni, anggun mapu ati teleb ning arina ara akunum kel biklume. Winimunya ning ara, mitik teleb ubuka, mitikanun arye arelulum bukni, anggun Ni Allah im deice ululnye birye, el kanye talima fia telebnye binya arye, el ti moropnyak ninye arinamsil ning ara, weik telebe uka. ¹²Allah arye, “Wininamlulume, aning ara kum wininamlulume,” nyapdeibukba, Musa arye mem yupu sekeipsuk yupu ap, Allah yupu laka nyalamik nang, nabi nang arye seklamik yupu ap, weike seklamik bukni, yupu deiyok fia weik mambul ning ara, ani. Anggun winimunya ning winamlum talak nirya ara, ‘Se, yuk nang arye na ti, teleb ubuka winibuka winipnitinge,’ tenemunya touk, anggun babye, yuk nang ati, aning atonun teleb ubuka wininamlulume. Yesus arye nyabuk.

Yesus arye mitik bisik buplan ap, weik bisik buplan ap ati, nyabuk yupu

¹³Yesus arye ayupu nyabukop ura, ayupu ton dukdongobuka nyabuk. “Anggun akekenmanulum nang ara, mitik bisik buplan noutamak wekenamlume. Allah arye malye unyak ninye wenebuka donoknamlak mutuku bisik ap, buplan ap ara, weik bisik weike ubuka anya arye, abisik deice ara, ninye weike wekuka banyake. ¹⁴Bukni, Allah arye kanye talima teleb unyak ninye taliliba, fia kam unamakak ara, el wekelban bisik ap, buplan ap ara, fia mitik dukun bisik anya arye, ninye weike, ‘Se, abuplan wektibye’ tenen, enyak bukni, ninye fia mitikanun uk eibuka wekenamake,” Yesus arye nyabuk.

Yesus arye yo mouna ati nyabuk yupu

¹⁵Yesus arye ayupu tonap nyabuk. “Kekenululume. “Tilila yupu peteren nang arye yanuka peterepsikcak’ tenen, kanye moubuka unamlulume. Ara, anang

arye, ‘Allah el yupu peterenyabe,’ nyabuka talya nyaplopsikiba, tilila yupu peteren nang yanuka peterepscip ura, mangkau kanye bobuka, sik nyanyak yupu diba teneluluma ati, anggun moubuka tenepmunce unamlulume. Anang sik winina ara, kanye talima mitang arye teleb winin nang atonun wininyak bukni, sik talima ak ara, yua basam atonun unyake. Ara, yu una ap, wirik-wirik ana ap, unyaka ati nyapsine. ¹⁶Winibuka wininyak bukni, sik wininyak ning moubuka eililum deice arye, ‘Aning ara, tilila nang unyake’ tenen, kel bikinamlulume. Anggun kel bikna ati, winipmanto ning nyapnusine.

Ura, ninye arye, ‘Sumik duk^z daknuyabe,’ tenebikirye, cunang tapu deice mouamlyak ton dakanyak do? ‘Kisang dakuka dipnuyp’ tenen, kwalip naca tapu deice arye dakanyak do? Kume. ¹⁷Aning atonun, dina teleb yo duk moulamle yo ara, teleb yo duk uk moultue bukni, ninye kum dipmanto yo duk moulamle yo ara, malye yo duk uk mouptue. ¹⁸Teleb yo duk moulamle yo ara, malye yo duk kum mouptue. Malye yo duk moulamle yo ara, teleb yo duk kum mouptue. ¹⁹Teleb yo duk kum moulamle yo nirya ara, ninye arye webukabikirye, uku dongonyake.^a

²⁰Anyapmasin touk, yo yala nirya yo duk moupliba eipmunce, ‘Ayo yala ara anye,’ tenelamluma atonun, atilila yupu peterenamak nang arye, sik wininamak ning deice arye, eibuka kel bikinamlulume. ²¹Ninye aryuk na ti, ‘Na ni, Na ni,’ nyabuka talya nyaltakaninyak nang nirya ara, na arye talipniba, neika kum unamabe. Na ti, ‘Na nie,’ nyabuka, talya nyaltakaninyak nang nirya kum bukni, Na Ni Allah im deice ululnye birye, ‘Ninye nirya wininamak’ tenen, nyasilye touk kekebikirye, aning uk talibuka unyak nang uk, na arye talinirye, na ap neika unamabe,” Yesus arye nyabuk.

²²Ayupu ton nyabuk. “Allah arye ninye nirya wibuka boknamle talak ara, ninye weik arye na ti nyapnamniyake. ‘Naie, Naie, an si deice arye, an yupu lakak laka nyalamubu talak ara, an si deice arye isa dolkwetelamubu. An mikip deice arye, ninye kum winipting ning, sirya dana fil dolamubu,’ nyabuka moropnamniyake. ²³Bukni, na arye aninye ati, adip aryuk laka kibuka nyapnamne. ‘Anggunda kanye talima fia malye ululum nang anye arye, na dam arye bindoplulume. Anggun winilamluma ara, na kum kel bikamsise. Anggunda na mapu koprop kume. Anggunda na walwale,’ nyapnamne,” Yesus arye nyabuk.

**Yesus arye aik dona kel nang ap, aik dona walwal nang
ap ati, nyabuk yupu
(Lukas 6:47-49)**

²⁴Yesus arye nyabuk. Ura, ‘Na nie,’ nyabuka, talya nyaltakaninyak nang ati, “Anggunda na walwale,” nyapnamne, nyapmasina aning ati

^z 7:16 *sumik, kisang* – Yunani yupu deice arye, anggur duk ap, ara duk ap sekik. ^a 7:19 *wena* – Yo duk nyabuka deiyok ara, ninye arye wininyak ning ati nyabuk. Yo wena nyabuka deiyok ara ani. Ara, malye winilamikce ninye ara, Allah arye aninye ati wenebuka oplopnamle talak, uku dilulak dongopnamla ati, adomon yupu nyabuk.

ara, yupu tonap nyapnusine. Yata ninye do nirya, na nyasinye yupu kekebikirye, aning uk wininyak ninye ara, aik dona fia weik kel nang atonun unyake. Anyaik dona kel nang ara, 'Anyaik dopnun' tenen, tuku palibuka mutuku yangan keil deice ayukumna yo ikuka aik do buke. ²⁵Aik akunum do bukop ura, weik mok cebuka, yena do buke, mek obukop ura, anyaik dam yanuka obuka aknubuk bukni, aik kum loklobuk. Ara mutuku yangan keil deice arye ayukumna yo ikuka do buka ati, el aik kum loklobuk.

²⁶Bukni, yata ninye do nirya, na nyasinye yupu amol deice aryuk kekebuka batakikcop ura, aik dona walwal nang atonun unyake. Aik dona walwalnye bira, ayukumna yo mek wininga deice uk deibuka do buk. ²⁷Do bukop ura, mok cebuka, yena do buke, weik mek deibukak dongobukce, anyaik dibukce loklobuk. Anyaik loklobukba, weik arye lelim nyabuk. Yesus arye nyabuk.

²⁸Yesus arye ayupu nyanmok ani, sirya dakukop ura, abulupmek nang nirya kekebuke, mambul kanye bobuka, 'Se' tenen, ngalukunmek. ²⁹Ara, 'Allah arye, 'Wininamlulume, aning ara kum wininamlulume,' nyapdeibukba, Musa arye sekeiyamsuk yupu peterena deiyok nang arye, peterelamsik touk kum bukni, Yesus ara, dipkoprop weik kel arye peterelamsile. Elda, dipkoprop peterena weik deiyok ning taliliry peterelule,' tenebuka, ngalukunmek.

Yesus arye barye suse atonun suse dilamuknye kwetebuk yupu
(*Markus 1:40-44; Lukas 5:12-14*)

8 ¹Yesus arye ayupu-ayupu nirya peteremoka ani, akunum sirya dakukop ura, amutuku kon deice arye koulukuk. Koulukunmok talak ara, ninye weike aminyan melibuka yanganmek. ²Aninye nirya koulukuka yanganmek bukni, barye suse atonun suse, nong bol nirya dilamuknye, aunmoka arye, Yesus eibukce Yesus dam yayuk. Yayukop ura, Yesus si erena ati, gutam tuku dibuka yanuka buku. Yanuka bukuke, Yesus ati morobuk. "Naie, an kanye deipnutumce, 'Anye bira kwetepnune,' tenepnutumop ura, na barye suse adip aryuk kwetepnutume. Ati, 'Kwetepnutum' tenen, moropmakine," nyabuka morobuk. ³Barye suse dilamuknye birye morobukop ura, Yesus el taruk anye deice deibukce ayupu nyabuk. "Na arye an ti kanye deibuka kwetepnukine. An suse winalak akunum teleb ubuka nipdeipkine," nyabuk. Nyabukop ura, adip aryuk anye el barye suse atonun suse dilamuka nirya ara, kum dayukba, teleb ubuk.

⁴Kum dayukba, Yesus arye anye biti nyabuk. "An suse kwetepmakinba, lopmakila ara, yuk nang ati, laka kum nyalbinulyame. Lak kum nyanulyam bukni, an nong dipdenamkila ati, Yahudi yala nang, Allah el si erena aik fum fil dona deiyoknye dam binuka, laka nyapmince, el elina

ati, an nong benbenepnulyame. Tonda, uk dilamne ninye uk lopnop ura, Musa arye, ‘Wininamlulume,’ nyabuka sekamuk touk,^b Allah si erena ati, kam un ning obuka arelbalamak touk, an babye aning kintinibuka arelbinulame. Ara, yuk ninye eibikirye, ‘Allah arye anye akunum kwetepmamile, tenepnamkiyak’ tenen, nyapmakine,” Yesus arye nyabuk.

**Yin talin nang sik deiyoknye, el fil donanye biti, Yesus
arye kwetebuk yupu
(Lukas 7:1-10)**

⁵ Yesus amutuku batakuka ila tonap banmoka ani, Kapernaum mutuku biyukop ura, yin talin nang sik deiyoknye birye, ‘Na fil donanye, Yesus arye kwetepnutue’ tenen, Yesus dam yanuka morobukce ayupu nyabuk.

⁶ “Naie, na ti fil donanye bira, weik uk dilamukce, nong nirya sesal sebukba, weik arye donmalba, an ti inilyanmakine,” nyabuk. ⁷ Nyabuka morobukop ura, Yesus arye tamubuka nyabuk. “An aik binirye, an fil donanye kweteipnune,” nyabuk. ⁸ Yesus nyabukba, ayin talina deiyoknye birye tamubuka nyabuk. “Naie, nada, mambul kumnye binya arye, anda weik telebnye na ti kum binuka weknamnile. Atikmalamak aryuk, an yupu nyapminba, adeice aryuk na fil donanye bira, uk kum dalirye teleb upnamale.

⁹ Aning ara, talya ati kum nyapkine. Na kele. Na deiyok nang arye nyapnikiba, sik nyapnikce touk, adip aryuk fil donune. Tonda, na babye, na amutam yin talin nang ati, ‘Winiplume,’ nyabuka yupu nyapdeipniba, kekebikirye, adip aryuk afil uk donyake. Tonoknye biti, ‘Bilyame,’ nyapniba balule. Tonye biti, ‘Yalyame,’ nyapniba, yangalule. Aning atonun, na fil donanye^c biti, ‘Afil dopnilyame,’ nyapniba, afil uk donulule. Aning ati ara, anda weik mikipnye unmalama anya arye, yupu uk nyaptumba, na fil melibuka melina teleb uptue.” Yin talina deiyoknye birye Yesus ati nyabuka morobuk.

¹⁰ Ayin deiyoknye birye ayupu nyabukop ura, Yesus kekebukce, se tenebuka ngalukuk. Ngalukukce, el melibuka yanganmek nang ati ayupu nyabuk. “Na dipkoprop nyapsine. Israel mutuku noutamak balamse talak nirya ara, anye bira Yahudi yala kumnye bukni, elda weik arye diba tenepmanil touk nang ton kum eililamse. ¹¹ Siria talak, Allah arye tukwak mutuku im sirya, mutuku sirya nirya noutamak, ninye weik lyeplirye, sik kanye talima talinamlak ara, ninye weike bulubuka yanganamake. Kiting yangan tam ap, kiting wekelban tam ap, dana-dana

^b 8:4 Imamat 14:1-32 ^c 8:9 *na fil donanye* – Yo bok deice deklamik ninye ara, bona weik talin nang arye, bona utotoa talina kum ninye ati, yo bok deice arye deklamik. Deklamikba, abona talina kum ninye arye sik bona weik talininye ati sik fil talya urdemuk dolamik. Tonda, lak len yupu ara nomor 36 dipdelulume.

tam nirya arye, Yahudi yala kum ninye weike bulubuka, nun Yahudi yala nang, nun apu yapu^d ap ara, Abraham ap, Isak ap, Yakup ap, yanuka bukikceba, Allah arye weik kwalina kwalibuka deipliba, neika dinamake.

¹² Aninye nirya ara, Allah arye el kwalina dina ati, kintinibuka deipsukak, anyuk bukikirye dipnamak bukni, Allah arye, ‘Na tenen ninye unamake’ tenen, min arye wiamuk ninye, Yahudi yala ninye ara, na ti diba kum tenenyaka ati, sikda kum wekanamake. Allah arye aninye dobuka buru tam kunuknak noutam donokliba, aninye ara kanye imun upliba, weik arye ngalukuka engenamake,” Yesus arye nyabuk.

¹³ Nyabukop ura, el ti moropmoknye birye, el dam yanmok yin talina deiyoknye biti, ayupu nyabuk. “Kao, tamubuka an bidamnye asik bilyame. Diba tenepmanilamce, moropmanilama atonun melipnamkina ati, asum winipnukile,” nyabuk. Nyabukop ura, akiting atalak deice aryuk, yin talina deiyoknye, el fil donanye uk dilamukce sesal semuk ning ara, kum danyukce teleb ubuk.

Yesus arye uk dilamuk ninye weike kwetebuk yupu

(Markus 1:29-34; Lukas 4:38-41)

¹⁴ Yesus arye nyabukop ura, banmoka ani, Peterus aik binuka wekuk. Anyaik wekukce, Peterus el yamal kil weik nong bupu uk dinmokba, mapmoka eibuk. ¹⁵ Eibukce, akil el taruk deice Yesus taruk deibukba, weik nong bupu uk dinmoka ara, kum dayuk. Uk kum dayukba, akil amapmokak arye bukukop ura, Yesus ap, el melin nang ap, sik din ning kintinibuk. ¹⁶ Sik aunmek bukni, eibukop ura, yuk nang arye isa talyamuk ninye ap, uk yala-yala nirya dilamuk ninye ap weike, Yesus dam boyayik. Boyayikba, Yesus arye yupu tonok nyabuka deice aryuk, ninye talyamuk isa nirya yakukba bindobik. Tonda, uk dilamuk ninye nirya kwetebukba, uk dilamuk nang nirya kum dayuk. ¹⁷ Yesus arye, afil dobuk ning nirya ara, ‘Allah yupu laka nyalamuknye, nabi Yesaya arye nyalamuk touk winipnul’ tenen, winibuk. Nabi Yesaya arye laka nyabuka sekeiyamuk yupu ara ani.

‘Nun Lyenanye birye nun uk dilamsuk ning nirya ara, kum daneipsuke.’

(Yesaya 53:4)

‘Yesus ap binamabe,’ tenelamik nang ati nyabuk yupu

(Lukas 9:57-60)

¹⁸ Ninye fia weike Yesus dam bulubuka yayikop ura, Yesus eibukce el mapu ati, ayupu nyabuk. “Nunda, mek lia yo deice bukibirye, Galilea mek deice arye otam binamabe,” nyabuk. ¹⁹ ‘Mek lia yo buknyap’ tenen, tuba banmek talak ara, Allah arye, ‘Wininamlulume, aning ara kum

^d 8:11 *Yahudi yala nang, sik apu yapu* – Laka nyana yupu nomor 20 dirume.

wininamlulume,' nyapdeibukba, Musa arye sekeiyamuk yupu peterena deiyoknye, tonoknye birye Yesus dam yayukce ayupu nyabuk. "Naie, An banalam mutuku nirya ara, na ap bananame," nyabuk. ²⁰Nyabuk ura, Yesus arye anye biti tamubuka nyabuk. "Kabang atonun ning do, yuk talya buru tam ulamle ning do nirya ara, tuku dekuka aik dobikirye unyake. Maka yala nirya ara, sik asik ara, yo deice dobuka unyake. Tonda yo taruk deice manyake. Kabang el asik ara, yo peia fum ton malule. Kabang ap, maka ap, sik asik aupmal bukni, nada Ninye Mi Koproprop Atonunye bira,^e na bidamnnye aik kum ati, na manak ton kum upnuke," Yesus arye nyabuk. "Na ti dobolyaniminyop ura, ikin upnamkila ati, aning tenena kum dib aryuk yanamlam do, bataknaalam do?" Yesus arye, Musa yupu peterena deiyoknye biti nyabuk.

²¹Yesus banmok bukni, Yesus el neika balamdiknye tonok arye, yanuka nyabuk. "Naie, aminyan ara, an ap, bananam bukni, na ni koprop dipmala ati, "Telebe dabilyame,' nyapniminba, na ni weilbinune," nyabuk. ²²Anye bira, nyabuka asipdeyuk bukni, Yesus arye tamubuka nyabuk. "Kume, adip aryuk an melipnininba, binuname. Diba tenena kum ninye ara, akunum dibik ninye atonun ninye unyaka anye arye, sik bidamnnye aryuk dibikce ninye weipnamke," nyabuk.

Yesus arye weik yenya kum daneibuk yupu
(*Markus 4:36-41; Lukas 8:22-25*)

²³Yesus arye ayupu nyabukba, sik banmekani, Galilea mek lilkwa biyikop ura, Yesus ap, el yupu kekebuka melyamikce balamik nang ap, mek lia yo deice wekuka bulbuyik. ²⁴Mekwen deice banmek bukni, weik yenya talye karin arye dobukba, mek lonting-lonting nyanmokce, mek lia yo fum mek wekenmokba, mekwen deibukce, sik mek lia yo mekwen fum wekmanto unmek. Aning nirya wininmok talak ara, Yesus mapmokbuk wininmok. ²⁵Winibuka mapmokba, Yesus el melin nang arye el mapmokak biyikce, "Naie, nun mekwen dipmanto unmasila ati, an bukmince, yupu sekmince, nun ti lyepsilyame," nyabuka morobik.

²⁶Nyabikop ura, Yesus arye tamubuka nyabuk. "Anggun ilil unmaluma ara, yata deiyok ati do? Na ti mitikanun uk diba tenepmanulume," nyabuk. Yesus nyabukop ura, bukukabukce ayenya donmoka ap, mekwen lonting-lonting nyanmoka ap ati, "Tunimablyame," nyabuka yupu sekuk. Yupu sekukop ura, atalak aryuk amekwen lonting-lonting nyanmoka ap, ayenya ap, tunimabuk. ²⁷Winibukop ura, Yesus el melin nang arye,

^e 8:20 *Ninye Mi Koproprop Atonunye* – Yesus arye el bidamnnye biti, ayupu weik arye nyalamuk. Ara im deice yayuk bukni, ninye nong atonun dayukce, tukwak mutuku yayuka ati, nyabuk. Tonda, ninye tukwak ninye ati, Ninye Lyena Deiyoknye ulula ati, ayupu nyapdayuk.

sik weik ilil weik ubukba, ngalukunmekce asilanmek. “Se, Yesus ara, yatatonye ulul do? Weik yenya babye, mekwen lonting-lonting nyanmal ning babye, el yupu nyaplop ura, el nyapmal touk kekebuka winiple,” nyabik.

Yesus arye isa talyamuk nang bitinye ati kwetebuk yupu
(*Markus 5:1-17; Lukas 8:26-37*)

²⁸Weik yenya akunum tunimabuk ura, mekwen deice uk banmeka ani, Galilea mekwen otam, mutuku si Gerasa mutuku biyik. Ura, Gerasa mutuku ara, isa arye talyamuk nang bitinye, ninye weiamik keil deiya noutamak ulamrik. Sik bitinye ninye weiamik keil deiya damak uk ulamrik talak ara, isa arye talyamuka deice arye, abitinye nang yu weik ulamrika anya arye, yuk nang arye amutuku noutamak kum balamik. Yesus ap, el mapu ap, Gerasa mutuku akunum biyikop ura, Yesus ara, mek lia yo deice arye tukwak kutukuka tikilbiyuk. Tikilbiyuk ura, isa arye talyamuk nang bitinye, ninye weiamik keil deiya noutamak arye kutukukaprikce, Yesus dam yarik. ²⁹Sik abitinye nang Yesus dam yarikop ura, Yesus ati nyaprik. “Anda, Allah el Mi Koproprop ulyame. Anda nun yata wiripnusilama ati, yanmalam do? ‘Allah arye isa nirya obuka sirya daknamne,’ tenebuk talak min kum upmal bukni, ance, ‘Sik opnaman’ tenen, yanmalam do?” nyabuka Yesus ati asipderik.

³⁰Yesus ati ayupu nyaprik talak ara, ninye arye weiamik basam, yupa fia weike amutuku taram bukni, mitik pera tuku dilamik.

³¹Basam arye tuku dipra aunmeka ati, isa mer nirya arye Yesus ati, moronmek. “Ance inibuka dopkwetepsiminba, aunmak basam nong fum wektibye do?” nyabuka moronmek. ³²Moronmek bukni, Yesus arye, “Telebe, anye el kanye talima talamlumak arye kutukuka buru bilulume,” nyabuk bukni, adip aryuk isa talyamuk nang bitinye sik talimak arye, isa nirya kutukukabikce, omutuku unmek basam nong fum wekelbiyik. Wekelbiyikop ura, abasam yupa weike, amutuku taram arye bik-bik abuka koulukikce, mekwen fum wekelbanmek. Wekikop ura, abasam nirya mekwen dibukba, dibik.

³³Abasam weinmek ninye arye, awininmok nirya ap, anang bitinye isa talyamuk bukni, Yesus arye kwetebuk ning ap nirya eibikce, awininmok ati ninye asik dolamik noutamak laka nyapnin banmekba, ninye weik kekebikce, ‘Yesus ap, awininmok ning ap, eipnamap’ tenen, Yesus dam dilyayik. ³⁴Anyaik domikak ulamik ninye nirya, Yesus dam dilyaikce, awinipmok ning nirya ap, Yesus

ap eibikce, ilil ubukba, ‘Yesus ara, nun mutuku nirya batakuka, yukak bindoptue’ tenen, Yesus ati morobik.

Yesus arye nong nirya meiyal semuknye kwetebuk yupu
(Markus 2:3-12; Lukas 5:18-26)

9 ¹Sik nirya daulamika ani, Yesus arye ‘Na mutuku kopropa binune’ tenen, mek lia yo deice wekuka, mekwen deice arye otam tamubuka binmoka ani, omutuku biyukce, Kapernaum asik dolamik biyukop ura, amutuku noutamak ulamik ninye arye kekebik. ²Yesus wekuka bulbiyuk aik unmokce peterenmok talak ara, dum barye nang pala yo deice arye, nong nirya meiyal semuknye, kum binmantonye baya wibuka boyayik. Sikda, ‘Yesus arye anye kweteptue’ tenen, boyanmaka deice arye, Yesus ara, ‘Na ti dipkoprop diba tenepmaniyake,’ tenebuka kel kibukce, anye min kum kwetebuk talak arye, ameiyal semuknye biti nyabuk. “Na mio, an malye teneminye ning ap, malye winiminye ning ap, kum daneipkinirye, namin kipnamkine,” nyabuk.

³Yesus arye ayupu nyanmok talak ara, Musa sekamuk yupu peterena deiyok nang ton, abukuka kekenmekce, sik kanye noutamak arye tenenmek. Anye birye ayupu peterenmala ara, yata ati do? Yesus ayupu nyanmala deice arye Allah si yanipmale. Ara, Yesus arye, ‘An malye winiminye ning namin kipkine,’ nyapmoka deice arye ara, ‘Na Allah atonunye unune,’ nyapmoka ati, elda dipkoprop malye nyanmale. Nun kele, ‘Allah elcuk nun malye wininyap ning kum danalilula ati, yatanye birye tonap afil doptu do?’ tenebik.

⁴Sik talima noutamak nirya tenebik ning ara, Yesus el kanye noutamak akunum tenebukce kel kipmoka ati, elce Musa yupu peterena deiyok nang ati nyabuk. “Amalye yupu anggun kanye talima noutamak tenepmaluma ara, yata ati do? ⁵Na kanam arye, ameiyal semukba, kum binmantonye biti, ‘An malye winiminye ning nirya kum daneipkine,’ talya nyaploptinye do? Akumop ura, kanam aryuk, ‘Tikukapmince, an amsuna dobuka banulyame,’ talya nyaploptinye do? ⁶Bukni, nada Ninye Mi Koprop Atonunye, na mikip deice arye, ‘Tukwak ninye sik malye winilamikce ning nirya, kum daneipsutue,’ tenen, kel kipmanuluma ati, ameiyal semuknye biti, adip aryuk kwetepnune,” Yesus arye nyabuk. Nyabukce, meiyal semukba, kum binmantonye ati ayupu nyabuk. “Anda, tikmince an amsuna dobuka, an aik tamubuka bilyame nyapkine,” nyabuk.

⁷Nyabukop ura, adip aryuk meiyal semukba, kum binmantonye teleb ubukba, tikukabukce, el amsuna dobuka, awekmek nang nirya sik adip aryuk, anyaik fum arye buru tam binuka, el bidamnye aik tamubuka biyuk. ⁸Biyukba, awekmek nang nirya eibikce, Yesus winibuka deice arye, ‘Se, Allah arye el mikip fia weik arye anye akunum aribuka ara, kel bikaba atia,’ tenebuka ngalukunmekce, Allah el si erenmek.

Yesus arye Matius doprobuk yupu
(Markus 2:14-17; Lukas 5:27-32)

⁹Yesus amutuku batakukce, yukak banmok. Banmoka ani, tonoknye, el si ara Matius ulamuk. Roma mutuku nang arye amutuku nirya talilamika ati, amutuku ulamik nang arye sik pajak yo bok Roma mutuku weik ninye deiyok nang ati arilamik. Matius ara, Roma mutuku nang arina ati, ‘Apajak yo bok bulubuka, Roma mutuku nang aripnamne’ tenen, ayo bok deiyamuk aik fum bukmokak, Yesus yayukce eibuk. Eibukce, Matius ati, “Anda na melibuka dobolyanilyame,” nyabukba, Matius arye adip aryuk tukuka, el bukmok aik batakuka Yesus melibuka dobolbiyuk. ¹⁰Banmarika ani, Matius el aik koprop wekrikce, sik ap, Yesus el dopromukba, el melibuka balamik nang ap, amutuku talyamuk nang, Roma mutuku nang ati, pajak yo bok bulubuka arilamik nang weik tonap wekik. Tonda, yuk nang ap weik arye neika din dinmek. Sik Yahudi yala peterena deiyok nang arye, atalye ninye ati, ‘Sikda malye wininyak nang,’ tenelamik.^f

¹¹Dinmek bukni, sik Farisi nang ara, Roma mutuku deiyok nang arina ati, pajak yo bok bulubuka delina deiyok nang ap, yuk nang ap, ara ‘Sikda malye-malye wininyak ninye,’ tenelamik nang ap, Yesus ap, neika din dinmekba, sik Farisi nang arye eibik. Eibikop ura, Yesus el melin nang ati asipdeyik. “Anggun peterena deiyoknye Yesus ara, telebnye ulul bukni, pajak yo bok bulubuka delina deiyok nang ara, sikda ubula don nang unyaka anya arye, anang ap, yuk malye-malye wininyak nang ap, neika dinmaka ara, yata ati do? Ara malye uk wininmale,” nyabuka wenebik. ¹²Nyabuka wenebikba, Yesus arye ayupu kekebukce, anang ati domon yupu nyabuk.

Uk dinmalibuk, aning moubuka tenena kum nang ara, ‘Ninye kwetenanye dokter dan do?’ tenen, kum enyake. Akum bukni, ‘Se, uk dinmasile’ tenen, moubuka tenelanyak ninye ara, ninye kwetenanye dokter ati pataplyeba, enyake.

Aning atonun, nada malye winin nang teleb ulina ap, lyena ap ati yase. Aning atonun, mitik pung uk ulamice bukni, sik talima noutamak malye ning tuba aupmalibuk, aning moubuka tenena kumce, ‘Nunda teleb nanguk unyabe,’ tenenyak ninye ati, ‘Lyepnamne’ tenen, kum yase. Ati adomon yupu nyapsine. Uk dina kum nang ara, dokter kwetenanye kum patalule. Akum bukni, uk din ninye ara, dokter kwetenanye ati patalule.^g

^f **9:10** *malye nang* – Sik Yahudi yala peterena deiyok nang arye, sik bidamnye atibuk utenelamik. ‘Nunda, diksukumuk unyabe. Yuk ninye nirya ara, malye winin nanguk unyake,’ tenelamikce, sik bidamnye talima erelalamik. ^g **9:12** *uk dina nang* – Yesus arye ayupu nyabuka deiyok ara ani. Ara malye wininyak bukni, aning tenena kum dib aryuk, ‘Nunda teleb nang uk,’ tenelanyak ninye ara, ‘Yesus lyepsutue’ kum tenenyake. Bukni, ‘Se, nunda dipkoprop malye nang unyabe,’ tenelanyak ninye ara, ‘Yesus lyepsutue’ tenen, pataplyeba, Yesus ati enyake.

¹³ Aning ati ara, na nyapnusin yupu ara ‘Deiyok ani’ tenen, anggun aik tamubuka bimunce, fia tenepmunce, kel bikinamlulume. Ara, Allah yupu nyalamuknye, nabi Hosea arye sekamuk yupu nyasilye touk,

‘Allah el kanye ara, Allah arina ati, kam ning obuka arilamak ning ara, na patana kume. Weik mambul ning ara, yuk ninye nirya ati bico tenebuka melilana ara, aning uk ara, weik telebe tenenune.’

(Hosea 6:6)

Allah arye nyapdeibukba, Hosea sekamuk yupu ati nyapsine. Aning atonun, mitik pung uk ulamice bukni, sik talimak malye ning tuba aupmalibuk, aning tenena kumce, ‘Kume, nunda teleb nanguk unyabe,’ tenelanyak ninye ati, ‘Aninye ara dobuka lyepnamne’ tenen, kum yase. Sik malye winilamikce bukni, talima noutamak ara, ‘Se, nunda malye nanguk unyabe,’ tenenyakce, malye kanye bobuka unyak ninye ara, ‘Sik malye winilamikce ning batakikcop ura, atouk ninye dobuka, lyepnamne’ tenen, yase. Yesus arye sik Farisi nang ati nyabuk.

Yesus arye din dina kumce, Allah morona ati nyabuk yupu

(Markus 2:18-22; Lukas 5:33-39)

¹⁴ Yohanes Pembaptis elce peterelamuk yupu kekelamukce, melibuka balamik nang ap, sik Farisi nang ap arye, sik malye winilamne ning ati, ‘Allah moropnyap’ tenen, din dina kumce, din bulang uk ubuka, Allah moronmek. Sik winibuka moronmeka ati, atalak ara, Yohanes Pembaptis el yupu kekebuka balamik nang, Yesus dam yayikce asipdeyik. “Nun ap, sik Farisi nang ap, nun nirya arye, ‘Nun malye wininyap ning kum daneipnamsil’ tenen, din dina kumce, din bulang uk ubuka Allah moronyabe. Nunda wininyap bukni, an mapu ara, awinipye touk yata ati kum wininyap do?” nyabuka asipdeyik.

¹⁵ Asipdeyikop ura, Yesus arye anang ati domona yupu arye tamubuka nyabuk. “Kil donanye dopnulye talak ara, el ap, el kayapu ap, el melin nang ap ara, neika tuba unyak talak ara, kanye deibuka kum unyak do? Tonda, kwalin ning kwalibuka neika kum dinyak do? Ikin kanye bobuka, engena uk unyak do? Kume, sik kwit el kil don talak ara, kanye deipmanyaka anya arye, fia teleb kanye deipdakiry, kwalibuka neika dinyake. Aning atonun, nada kil donanye bito ununa ati, na mapu ara kanye imun upliba, din dina kumce, din si tebuka kum unyake. Din bulang uk kum unyake. Bukni, na talibuka bobuka binamniyak talak ara, sik ikin kanye upliba, din dina kumce, din bulang uk unamake,” Yesus arye ayana asinmek nang ati nyabuk.

¹⁶ Ayupu nyabukop ura, Yesus arye, ‘Allah yupu sekamik ning telebuk ulule,’ tenebuk bukni, ‘Sik Farisi nang ap, sik apu yapu ap, Yahudi yala deiyok nang ap arye, sik bidamnye tenelamikce, talya tabakuka peterelamik,’ tenebuk. Sik tuba peterelamik ning mem ning ara, ‘Ara malye, kel kipnamak’ tenen, awekmek nang nirya ati, domon yupu

bitinye nyabuk. Tonda Yesus arye, ‘Na peteren ning ap, na wininye ning ap deice arye, kanye tenena wiryuk ning kel kipnamak’ tenen, awekmek nang nirya ati, ayupu bitinye nyabuk. Yesus arye nyabuk yupu ara ani.

“Yatanye do nirya, minop butum aling baraplyop ura, abutum aling lipsisikuka wina ati, winiryuk butum aling kwilikukaptingce, mek kum likilamikiry, kwilikamlyak deice deibikirye, kum winyake. Minop butum aling kwilikamlyak, winiryuk butum aling tabakuka wilamting bukni, ‘Winiryuk wibice ning el urasin yuk, minop butum aling el urasin yuk uplyak’ tenen, aning kum wininyake.

Tonda, abutum aling mek likikirye, kiting ak deibikiba, akunum miklyop ura, minop butum aling kwilikilule. Deiyok ara, winiryuk butum aling mikliry, mitik uplyop ura, awilamakak arye, fum weik arye tonap kwelekenamle. Ara, winiryuk butum aling arye, minop butum aling kwilikamlyak deibuka wibikirye winilula ati, minop butum aling ap, winiryuk butum aling ap, ansinibuka wina ara, malye. Winibuka kum winyake.” Yesus arye nyabuk.

¹⁷Ton ning ara ayupu nyabuk. “Aning atonun ton, ninye domba bola dobuka, potong lyeklobikirye, dana-dana tam nirya wibikcop ura, fumbisik ara, anggur mek kwebuka dikdongobuka delinyake. Wininyaka ati, ninye arye purupra, winiryuk kwelamak anggur mek ara, minop domba bola fum kum dikdongobuka delinyake. Winiryuk anggur mek^h kwebuka minop domba bola fum dikdongoptinge bukni, anggur mek mikip nepliry, domba bola Kwilikliry, mek sakalule. Kwilikliry sakalyop ura, anggur mek ap, domba bola ap, kum danuka malye ulule. Aning ara, kum wininyak bukni, anggur tapu duk purupra, winiryuk anggur mek kwelamak ning ara, winiryuk domba bola fum uk dikdongobuka delinyake,” Yesus arye nyabuk.

**Yesus arye uk dilamukce, ining balamuk kil ap, dibuk kilmu ap,
kwetebuk yupu**

(Markus 5:22-43; Lukas 8:41-56)

¹⁸Sik nirya Yesus ap aunmek bukni, tonoknye yayuk. Anye bira, Yahudi yala nang Allah si erelamik aik, anyaik sik deiyok nang weik ulamik bukni, el ton ulamuk. Yayukce, Yesus eibukop ura, ‘Yesus ati si erebuka kipnun’ tenen, Yesus yan dam gutam tuku dipdongobuka bukukce, Yesus ati weik arye moronmok. “Na kilmu akunum dipmal bukni, ance yanuka, el nong

^h 9:17 *Winiryuk anggur mek* nyabuk ning ara, domon yupu ati nyabuk. Ayupu nong ara ani. Ara Musa arye sekamuk yupu nirya ara, teleb yupu wamuk bukni, Yesus arye peterelamuk yupu nirya ara, winiryuk yupu ulamuk. Ati aning ara, Yesus el yupu nirya, Musa sekamuk yupu yok punubuke. Yesus el kanye ara, ‘Ninye nirya arye, Musa sekamuk yupu batakuka, na yupu uk talibuka dobolbanamake,’ tenebukce adomon yupu peterelamuk.

deice an taruk deipnutumce kweteipnutumba, kam buknamle,” nyabuka moronmok. ¹⁹Moronmokba, Yesus ap, el melin nang ap, amoronmoknye ap, neika banmekce, Yesus dam dana-dana niry a langdipmekce banmek.

²⁰Abanmek nang kan-kan noutamak arye, uk dilamukba, kiting tamun 12 deice arye, el ining balamuk kil neika banmek. Yesus fil dobuka winilamuk ning kekebukce, ‘Yesus ara ninye kwetenanye dipkoprop ulule,’ tenebuka ati, akil arye utenebuk. ²¹‘Yesus el butum aling talya bolpipnutu ura, elce kwetepnutue,’ tenebuk. Utenebuka ati, abanmek nang noutamak arye, Yesus el balye tam tikilyayukce, el deice ongomok butum aling ara bol pibuk. ²²‘Yesus el butum aling bolpipnun’ tenen, yayukce, Yesus el butum aling bol pibukba, Yesus arye tamubuka, ayanmok kil eibuk. Eibukce ayupu nyabuk. “Na ka kilo, an diba tenepmanilama deice arye kwetepmakine. An kanye imun wamkuk ning ara akunum kweteipmakina ati, telebuk kanye deibuka binamlyame,” nyabuk. Yesus arye nyabukop ura, atalak aryuk, akil el ining balamuk ning ara, kum danyukce teleb ubuk.

²³Sik niry a ila banmeka ani, el kilmu dipmoknye aik akunum biyukop ura, anyaik dam unmek nang, sik weik arye engena ap, weik arye ngalukuka malye nyana ap, weik yupu nyabuka kwelana ap, ninye dipneba bung-bung nyana nyalamak ning nyanmeka ap, aniry a wininmekba, Yesus arye eibuk. Eibukce, anyaik wekukce, amalye nyabuka, kwelanmek nang ati, Yesus arye nyabuk. ²⁴“Anggun weik arye malye nyanmalumce, ngalukuka kwelanmaluma ara, yata ati do? Anggunda, anyaik batakuka yukak bilulume. Akilmu ara kum dipmale. Talya mapmale,” nyabuk. Nyabuk bukni, anyaik wekuka unmek nang arye, akilmu akunum dipmoka ara, akunum kel kipmeka any a arye, anang arye Yesus ati akutunmek.

²⁵Akutunmekba, awekuka engenmek nang niry a ati, Yesus arye buru tam akunum yakwetebukop ura, akilmu dipmokba, deipmek aik wekuk. Wekukce, Yesus akilmu taruk talibukba, adip aryuk akil tikukabukce, banmok. ²⁶Banmokop ura, anyaik wekmek nang niry a arye, mambul kanye bobuka ngalukunmekce, amutuku noutamak ulamik nang, yuk nang ati ayupu laka nyalamikba ninye weike kekelamik.

Yesus arye asing kun nang ap, yupu lubanye ap ati, kwetebuk yupu

²⁷Akilmu akunum kam bukeibukce, amutuku batakuka, bisik noutam banmoka ani, asing kuamuknye nang bitinye, el balye tam tikilyarik. ‘Kwetepsetu’ tenen, weik yupu nyabuka yanuka moroprik. “Anda Daud yalanye birye deipkukba unmalama any a arye, Ninye Lyena ati, Allah arye wibuka deipkuke. Ati bico tenepsimince, kwetepsutume,” nyabuka moroprik. ²⁸Nyabuka moropnin banmarikba, Yesus tonok aik akunum wekukop ura, abitinye nang Yesus dam yarik. Yarikba, Yesus arye

nyabuk. “Anggunce, ‘Nun asing kwetepsetume,’ nyapmanuruma ara, ‘El dipkoprop kwetepsutue,’ tenepmanurumce moropmanurum do?” nyabuka asipdeyuk.

Asipdeyukba, sikce tamubuka nyaprik. “Naie, ‘Dipkoprop kwetepsutume,’ tenepmakiname,” nyaprik. ²⁹Nyaprikba, Yesus arye anang sik asing talibukce, ayupu nyabuk. “Anggun diba tenepmanuluma atonun winipnusine,” nyabukba, atalak aryuk sik asing kuamuka ara, teleb ubuk. ³⁰Teleb ubukba, Yesus arye ‘Yuk nang kekebikirye, kel kipnicak’ tenen, anang ati yupu mopreibuk. “Akwetepmasin ning ara, ‘Yuk nang arye na ti kel kipnicak’ tenen, na arye kweteipmasina ara, kum laka nyapnururume,” nyabuk. ³¹Yesus arye nyabuk bukni, abitinye nang arye Yesus kwetepmok ning laka nyapra balamrikba, amutuku noutamak ninye weik arye kekelamik.

³²Asing kuamuk nang, bitinye nang Yesus kwetebukba, banmarik talak ara, yuk nang arye, lubanye tonok Yesus dam boyayik. Anye bira, isa el talima taliamuka deice arye, lubanye ulamuk. ³³Anye bira, isa talyamukba, luba ulamuk bukni, Yesus arye aisok yakukba, atalak aryuk, anye yupu teleb kibuka nyanmok. Yupu teleb ubuka nyamokba, abulubuka wekuka kekenmek nang arye, se tenen, ngalukunmek. Ngalukunmekce, ayupu nyabik. “Amutuku Israel tam noutamak nirya ara, atouk ning ara kum ubukba, nun min arye fia kum elilamupe,” nyabik. ³⁴Anang arye nyabik bukni, sik Farisi nang arye, “Kume, Yesus arye aisok yakalula ara, isa mer nirya, sik deiyok Isa Mutuku Dongonye, el mikip deice arye yakalule,” nyabik.

Yesus arye, “Allah el fil don nang mitik uk unyake,” nyabuk yupu

³⁵Winitalak noutamak ara, Yesus arye, weik asik dolamik ap, ninye mitika arye ulamikak ap, Yahudi yala nang, sik Allah yupu peterena aik binuka wekelbalamukce, ‘Allah ninye lyeplirye sik kanye talima talinamle’ tenen, lak teleb yupu lakak ubuka peterelamuk. Tonda, Yesus arye mutuku-mutuku nirya peterepra balamukce, uk yala yuk-yuk, uk dilamuk ninye weike kwetelilamuk. ³⁶Amutuku-amutuku nirya balamuk talak ara, ninye yupa weik yangalamikba elilamuk. Dilamukce, ayangalamik nang ara, ninye arye weilamak domba, sik apu dam kum ulyop ura, ‘Ortam binun do, atam binun do?’ tenen, kanye walwal upliba, teniltolamak touk, aninye unmekka ati, Yesus arye aninye ati bico tenebuka talima aribuk.

³⁷Winibukce, el yupu kekebuka, el melibuka dobolbalamik nang ati, adomon yupu nyabuk. “Weik wa wiyamiceba, fia weike paplirye, kwaning nong ara weike akunum wisiampye, bukni, yongopra lilbinmanto nang ara, mitik nun unyake. ³⁸Aning ati ara, wa deiyoknye birye nyapdeipliba, ‘El fil don nang arye, el wa dam

lilbanamak' tenen, wa deiyoknye bitu moronamlulume." Yesus arye nyabuk.ⁱ

Yesus arye, 'Na yupu dobuka, peterelbinamak' tenen, 12 nang wipdeiyamuk yupu

(Markus 3:16-19; 6:8-11; 13:11-13; Lukas 21:12-17; Lukas 12:2-9, 51-53)

10 ¹Yesus arye, 'Anang ara, na fil donamak' tenen, el yupu kekebuka, el melibuka yangalamik nang noutamak bukni, el mapu, sik 12 nang ati deiyok koubukba, el dam yayik. Yayikop ura, Yesus arye ninye kanye talima noutamak talyamuk isa dobuka dolkwetenamaka ap, uk aning-aning nirya kwetenamak ning ap, 'Afil donamak' tenen, el mikip weik arye aning 12 nang ati aribuk. ²Yesus arye 12 nang wipdeiyamuk nang, sik Rasul nang ara, sik si ani. Tonoknye bira, Simon nyalamik bukni, aminyan ara anye bitu, Yesus arye 'An si Peterus,' nyabuka si nyapdeibuknye ap, tonda anye el weit kopropa Anderias ap, Zebedeus el mapu bitinye Yohanes ap, el weit Yakobus ap, ara, ³Pilipus ap, Bartolomeus ap, Tomas ap, ton amutuku talyamik nang, Roma nang pajak yo bok arina ati bulubuka delilamuknye, Matius ap wibuka deiyamuk. Tonye bira, Alpeus el mi Yakobus ap, Tadeus ap, ⁴Simon Patriot' ap ara, Yudas Iskariot, ara, Yesus opnamika ati, yukubuka biyuknye ap, Yesus arye wibuka deiyamuk. ⁵Anang 12 nang wibuka deibukce, 'Na fil donamak' tenen, nyapdeibuk yupu ara, ani.

Yesus arye nyabuk. "Anggunda, Yahudi yala kum ninye aik dobuka ulamakak ap, Samaria mutuku nang ulamak ak ap, kum peterelbinamlulume. ⁶Yahudi yala ninye ara, sik dam kum binamlum bukni, domba basam wein ninye kum unyakba, domba, 'Na apu kopropa ara anye,' tenena kumce, talya yukak balamak touk, Israel tam ninye, aning atonun wininyak ninye ati, 'Nun deiyoknye, dan do?' tenen, talye-talye uk unyaka anye arye, Israel yala ninye^k sik dam uk peterepre banamlyame.

⁷Anggun peterelbinamlum talak ara, ayupu peterenamylume. "Allah ninye weik lyeplirye anggun kanye talima melinamsil talak, ara Kerajaan

ⁱ 9:38 wa nyabuk yupu – Yesus arye adomon yupu nyabuk ning ara, Allah yupu pataplyeba, moubuka kekepmanto nang weike daunyak bukni, Allah arye nyalilulba, el yupu dobuka peterepre banamak nang, mitikanun unyake. Ati, 'Allah yupu peterelban nang weik upnin banamak' tenen, 'Allah moronamak' tenen, ayupu nyabuk. ^j 10:4 Patriot nyalamiknye bira, deiyok ani. Ara, sik Yehudi yala ninye kan-kan, ton nang arye, 'Sik Roma mutuku ninye arye, nun ap, nun mutuku nirya ap, ninye deiyok kibuka talisinyaka ara, nun like, anye arye, opbisipnamabe,' tenelamik nang ati Patriot nang nyalamik. Ara winitalak mitikanun merdeka nyalamaka atonun yupu atia. Minop talak ara, Simon babye Patriotnye ulamuka anye arye, el si ati Simon Patriot nyalamik. ^k 10:6 Israel ninye sik si nyalamiknye bira, Israel ton nyalamik. Tonda, Yahudi yala ninye nyalamik bukni, aninye ara tonok yala ninye uk. Sik yala si ara, bitinye uk.

Allah ara,¹ akunum dam upmasile,” nyapnamlulume. ⁸ Amutuku nirya banamunye talak ara, uk din ninye kwetelinamlulume; dipmakce ninye kam bulinamlulume; weik barye suse^m atonun suse dilamlye ninye kwetelinamlulume. Ninye kanye talima talyamlye isa inibuka dolkwetenamlume. ‘Afil nirya donamlum’ tenen, na mikip urdemuk anggun nong deice deipmasina ati, anggunce, uk dilamlye ninye kwetepnamlum ning ap, afil-afil nirya donamlum ning ap ati, yo bok morona kume. Yo bok morona kum dib aryuk, urdem aryuk ninye kwetelulume, afil nirya donamlulume. ⁹ Na fil dolbanamlum talak ara, yata ning do nirya, dekna weik ning emas ap, perak ap, tembaga ap, nirya libuka bobana kume. ¹⁰ Weik aling arye aning nirya libuka kum bobinamlume. Tonda, ‘Butum aling na’ tenen, libuka boban ning ap, sepatu ap, kama ap, kum libuka bobinamlume. Anggunce na fil teleb ubuka fil dopmunye bukni, anggun binuka fil dopnamunye mutuku ninye arye, anggun patapsilye ning ara arinamsiyake.ⁿ

¹¹ Weik asik dobuka ninye weike ulamakak babye, mitik asik babye bimunyeba, ‘Ninye tonoknye birye yuk nang melamlirye, diksukum ulamlenye, amutuku aulul do?’ tenen, anggunce dipdebuka enamylulume. Telebnye eipmunyop ura, anye el asik uk wekuka daulamunya ani, amutuku unamlumnye talak akunum uplyop ura, yuk mutuku banamlume. ‘Fia teleb asik dan do?’ tenen, anyasik-anyasik sakaldana kume. ¹² Diksukum ulyinye birye, ‘Na aik weklulume,’ yukubuka dopropsilyop ura, ‘Sik anyaik nang sik un ning nirya, Allah arye teleb kipdeipnamle’ tenen, anyaik nang ati Allah moronamlulume.

¹³ Anyaik nang arye anggun ti, nong kanye deibuka melipsikcop ura, akunuma. Bukni, anyaik nang arye anggun ti, nong kanye deibuka kum melipsikirye, batakisikcop ura, ‘Allah arye teleb updeipnamsile,’ nyapmamunye yupu ara, ila tamubuka dopropramlulume. ¹⁴ Yata asik nang do, yata mutuku nang do nirya, anggun ti nong kanye deibuka kum melipsikirye, tonda anggun yupu kum kekepsikirye batakisikcop ura, ‘Amutuku batakuka yuk mutuku binuyap’ tenen, tenepmunce binumunye talak ara, amutuku dupmasilye tuku ara, kilibuka batakmunce, yuk mutuku banamlume.

Wininamlum ara, amutuku ninye arye, ‘Allah yupu batakmba ati, nun yan tuku yanibuka, batakmasika atonun, ayupu nyalyanmasiak nang akunum batakmasiake. Se, sikce batakmasiak touk, Allah arye nun tibuk

¹ **10:7** *Kerajaan Allah* nyalamiknye bira, Kerajaan Allah bukni, ara tukwak mutuku talibuka weik ninye deiyok kouna ati kume. Ara ninye lyeplirye, anggun kanye talima talisulula ati ara, Yesus arye ayupu nyalamuk. Tonda, sirya talak ara, im deice welepnamaka ati, ayupu Kerajaan Allah ton nyalamik. ^m **10:8** *weik barye suse; korot suse* – Aninye dilamuk suse ara, “Dipkoprop asuse dilamukani,” kum nyaptibye bukni, ton kel weik nang ara, “Korot suse dilamuk,” nyanyake. Ton kel weik nang ara, “Bol kon dilamuk,” nyanyake. ⁿ **10:10** 1 Korintus 9:14; 1 Timotius 5:18

wenebuka bataknamasile,' tenepnamake. 'Aning tenepnamak' tenen, na arye nyapdeipmasin touk winibuka wininamlulume." Yesus arye nyabuk. ¹⁵Nyabuka ayupu ton nyabuk.

Na dipkoprop nyapsine. Allah arye ninye mutuku-mutuku nirya bokuka deiplirye, wenepnamle talak ara, Sodom mutuku ninye ap, Gomora mutuku ninye ap ara, fia malye-malye weik winilamik bukni, aninye ati, mitikto kanam arye wenepnamle. Ara sikda minop talak na yupu kum kekelamika deice arye malye winilamika atia. Bukni, winitalak na yupu peterepra bamunyeba, anggun yupu kum kekepnamak ninye ara, aminyan talak Allah arye fia mikip arye, wenepnamle. Weneplyop ura, sikda fia ikin weik unamake.^o

¹⁶Domba basam tonok bai kam weik ulamice kan-kan ulyop ura, bai kam arye domba basam opmanto ulye touk, na arye dopdeipsiniba, na yupu bobuka peterelbimunyop ura, kanye talima malye kanye bobikirye, yu ulul nang arye, na mapu anggun nong deice ikin ning deibuka opmanto winilinamsiake. Aning ati ara, ninye ton kwatima arye, kanye wisibuka ulamle touk, anggunce aning-aning nirya ati weik kel kipmunce, kanye fia moubuka unamlulume. Tonda, yu upsiliba, yu asa una kum bukni, yalma maka talima namin asa ulirye, ninye kum opmanto ulamle touk, anggunce talima namin asa ubuka telebuk unamlulume.

¹⁷Aning ati ara, ninye arye aning-aning winipnamak ning ara, moubuka dimunce, moubuka tenenamamlulume. Anggunda, 'Yupu talina deiyok nang arye wenebuka opnamak' tenen, tapu koubuka arilbanamsiyake. Tonda, Allah yupu peterena aik^p noutamak bobisikceop ura, kama weik arye kulabuka onamsiyake. Aning ati ara, 'Winipsicak' tenen, kanye moubuka unamlulume.

¹⁸Na ti diba tenepnulumce, na yupu peterelbinamluma ati, yuk nang arye, anggun ti tapu koupsikirye, 'Nun mutuku talibuka deiyok usinyak nang arye, Yesus el mapu opnamak' tenen, weik ninye deiyok nang, Gubernur nang ap, sisinanye weik ninye deiyok nang, Raja nang ap, sik dam bobinamsiyake. Bobisikceba, anang ap ara, ton yuk Yahudi yala kum nang ap, 'Sik kekenamak' tenen, na si deice arye fil domunye ning nirya ara, laka kibuka laka nyapnamlulume. ¹⁹Yata talak do nirya, anggun tapu koubukapsikirye, yupu talina deiyok nang sik dam bobisikcop ura, yupu min nyapnumunyop talak ara, 'Se, yata ubuka nyapnuyap

^o **10:15** Kejadian 19:24-28 **P 10:17** Allah yupu peterena ap, kekena ap ati domik aik – Yahudi yala nang, sik Allah yupu peterna aik ara, nun mitik gereja atonun wamuk bukni, mitikto yuk. Ara, sikce hari Sabtu weklamikce, Allah el si erelamik. Tonda yuk-yuk sum ara, Allah yupu kekena ap, peterena ap, ninye wapdanop ura sik yupu lipsisikuka bokoliana ati, anyaik weklamik. Bahasa Indonesia deice arye, 'rumah ibada' nyanyake. Anyaik lak len yupu ati, nomor 26 dipdelulume.

do?’ tenen, mambul kanye kum bonamlulume. Allah El Dib Kanye arye anggun talima noutamak winitalak nyapsilye ning uk, kekepmunce nyapnamlulume. ²⁰Ara, anggun Ni Allah, El Dib Kanye mikip arepsiliba, amikip deice arye anggun talima noutamak fil dosilyeba, ayupu nyanamluma ati nyapsin.

²¹Sik tonok du weit bukni, yukubuka tapu koubikirye, ‘Ninye deiyok nang arye opnamak’ tenen, bobinamake. Atonun ton, sik ni yapu arye, sik mapu kopropa yukubuka, tapu koubikirye, ‘Ninye deiyok nang arye opnamak’ tenen, bobinamake. Aning atonun, sik mapu kopropa nirya arye, sik nin yapu ap, sik ni yapu ap ati, “Sik yupu ara nun kum kekenamap,” nyabuka, yuk nang ati, “Nun ni yapu ap, nun nin yapu ap opdeipsululume,” nyabikcop ura, onamake.

²²Na ti diba tenenululumce, na yupu nyalbinamluma ati, ninye nirya arye, anggun ti fia lik tenebuka, mal pinamsiyake. Bukni, yatanye do nirya, na batakna kumce, fia tunimabuka ulamlenye obice ning ababye, Allah arye anye lyepnamle. ²³Na diba tenemunce, na yupu peterelbanamluma ati, na yupu peterepmunyeba, yuk ninye arye malye yupu nyabukapsikirye, anggun nong deice ikin ning deipsikcop ura, amutuku batakuka, omutuku peterelamunyebuk, amutuku babye bataksikcop ura, ila yuk mutuku ton binuka peterepra banamlulume. Atonun ton binuka, Israel ninye sik asik dobuka ulamak ak ap, unamakak ap, amutuku nirya min kum binuka peterepmanunye talak ara, aminyan ara na Ninye Mi Koprop Atonunye yanamne. Yesus arye ayupu nirya nyabuk.

²⁴Nyabukop ura, ayupu ton nyabuk. “Peterebiceba, kel kibice nang ara, mitikto mambule bukni, sik peterena deiyoknye bira weik mambule. Tonda, ‘Fil doplulume,’ nyabikiba, talya fil donyak nang ara, mitikto mambule bukni, sik fil deiyoknye bira, weik mambule. ²⁵Peterena deiyoknye, guru arye el yupu nyabuka, el ulamle touk, el amutam ninye kekebikirye, el ulye touk winibikcop ura, aning ara telebe uka. Aning atonun, sik fil donyak nang arye, sik fil deiyoknye ulamle touk, aning uk unamake. Aning ara telebe.

Aning ati ara, peterena deiyoknye birye nyaplye yupu, yuk nang arye kum kekebikcop ura, el mapu arye nyanyak yupu babye, kum kekepnamake. Yuk nang arye peterena deiyoknye biti, el nong deice ikin ning deibikirye, malye winibikce touk, anang arye el mapu babye ati atonun winipnamak. Peterenanye birye nyapliba, yuk nang kekebikcop ura, el mapu babye nyabikiba kekepnamake. Nada tonok aik deiyoknye atonun ununa ati, yuk nang arye na ti, ‘Anye bira, fia malyenye, elda isa nirya, sik deiyok isa Belesebul⁹ ulule,’ tenebikirye akunum nyapnikcop ura, na

⁹ 10:25 *Belesebul* nyanyaka, ara Isa Mutuku Dongonye ati nyanyake. Isa deiyoknye, el tonok bukni, el si ara bitinye nyanyake. Tonda laka nyana yupu nomor 13 dindelelume.

aik unyak nang, ara na amu unyak ninye nirya ati, atonun ton tuba-tuba nyanamake,” Yesus arye el wipdeiyamuk nang, sik 12 nang ati nyabuk.

²⁶Nyabukop ura, ayupu ton nyabuk. “Aning ati ara, malye yupu nyabuka, anggun nong deice ikin ning deipnamsiyak nang ati, ilil kum unamlulume. Ilil una kume. Ninye mutuku-mutuku nirya sik duknubuka wininyak ning ap, duknubuka nyanyak yupu ap, aminyan talak Allah arye laka kipdeipnamle. Tonda, Allah arye minop talak duknyamuk ning nirya ara, laka kipdeipnamle. Aning nirya lakak uk danamle atia. ²⁷Na arye anggun ti teleb yupu bukni, nun uk bulubuka sisikinyap yupu ara, ‘Ninye mutuku-mutuku nirya kekepnamak’ tenen, laka kibuka laka nyalbinamlulume.

Tonda, na arye murmur nyabuka nyasunun yupu ara, ninye nirya kekenamakak lakak nyabuka laka nyanamlulume. ²⁸Ninye kanya kum opsitinge bukni, nong ara opnamsiyak nang ati, ilil una kume. Bukni, ninye malye-malye weik unyakba, weneplirye uku din mutuku dongoplirye, ninye nong ap, kanya ap, obuka sirya daknamsilanye, el ti ilil unamsulume. Ara urdem ati kum nyapsine, ‘Allah arye wenebuka opsilyak’ tenen, el ti ilil unamlulume.

²⁹Kukalima maka ara, fia mitik keil uang deice arye wamuk deice dekenyak bukni, amaka babye, Allah arye, ‘Amaka diptue,’ kum teneplyop ura, tonok maka babye, dipturye tukwak kum saktue. Mitik maka babye anggun Ni Kopropa Allah arye kum luba kilule. ³⁰⁻³¹Winibuka kalikuka dilul bukni, kukalima maka ara, weike uptuop ura, ‘Ara fia mambule,’ kum tenepnamle. Maka ara mambule kum atia. Bukni, anggun ninye yuk-yuk uk ara, weik mambule anya arye, Allah bico tenesilirye, kalikuka melisulule. Allah arye, ‘Aninye ara na’ tenen, anggun kisok potong nirya babye, akunum nukuka kel biksuke. Allah arye mambul kum ning maka ati, kalikirye moubuka tenilul touk, anggunda weik mambule anya arye, fia tenesilirye, kalikisulule. Aning ati ara, ilil una kume. Ati, anggun patasilye ning nirya ara, Allah arye kum lubakinamsil bukni, melibuka arinamsile.” Yesus arye el mapu ati nyabuk.

³²Nyabukce, ayupu ton nyabuk.

Yata ninye do nirya, ninye yuk nang dam bikirye, “Yesus ara, dipkoprop na ni unulule. Nada, el yupu kekebuka unune,” nyanyak ninye ara, na Yesus arye, na Ni Allah im deice ulinye biti, “Aninye ara dipkoprop na mapu unyake,” nyapnamne. ³³Bukni, yata ninye do nirya, ‘Yuk nang arye opsikcak’ tenen, “Nada, Yesus el mi kume,” nyabuka batakikce ninye ara, na arye na ni dam, “Aninye ara, na ti diba kum tenenyaka ati, na mapu kum unyake,” nyapnamne. ³⁴Sikce na ti, ‘E, Yesus ara ninye mutuku-mutuku nirya tonok kanye uk bobuka, talya tunim,’ nyabuka, ‘Talye-talye

kanye deibuka unamake tenen, yayuke,' kum tenenamulum. Na yupu bobuka yuk nang ati, peterepra bamunyop ura, sik kanye yuk tenenyak nang arye ayupu ati, yu ubuka nyana ap, oldana ap, unamake.^r

³⁵Kume na uniryenyaneyupu deice arye, Allah yupu laka nyalamuknye, nabi Mika arye nyalamuk touk unamle. Mika arye nyalamuk yupu ara ani.

“Tonoknye birye el li koprop ati mal finamle. Tonda, tonok kilmu arye, elin biti mal finamle. Tonda, tonoknye el mi arye dobuk kil, akil arye el yamal kil ati mal finamle. ³⁶Aning atonun, tonoknye bira, el mining aik nang arye, el ti mal pinamake.” (Mika 7:6)

Mika arye nyalamuk yupu dobuka nyapsine. Ara, na nyasinye yupu ati, ninye arye, yu upliba, oldanamake. Yesus arye nyabuk.

³⁷Nyabukop ura, ayupu ton nyabuk.

“Ura nada, ‘Mika arye nyalilamuk atonun unamle’ tenen, yasa ati, yata nang do nirya, anggun ni yapu ap, anggun nin yapu ap ati, weik arye kanye delilulum bukni, na ati ara, kanye mitikanun aryuk kanye delilulum nang ara, na mapu kum uptinge. Atonun ton, anggun mapu ap, anggun kil mapu ap ati, weik arye kanye talima dukuldongolulum bukni, na ati ara, kanye talima mitikanun aryuk dukuldongolulum nang ara, na mapu kum uptinge. ³⁸Tonda, yata kil do, yatanye do, na ti diba tenepnikiryen, na dobolyanganamniyak nang ara, sik bidamang ning atibuk, ‘Aning mambule,’ kum tenenamake. Sik wenebikiba opnamak nang arye, wanwanun yo dobuka, talya mangkau asa balamak touk, na mapu koprop ara, ‘Anggun opsikca babye, telebe uka, ara mambule kume,’ tenebuka, na mapu babye, ‘Opnamak do?’ kum tenenamake. Aning tenena kumce, sik babye kam un ning ap, sik babye patalye ning ap atibuk, kum tenenamake. Sik yuk nang ara, sik bidamang ninguk tenebikirye, tonda, ‘Yesus melibuka bipye bukni, yuk nang arye opsikcak’ tenen, duknubuka lyepdakiryen, na yupu kekebuka kum dobolyanganamniyak nang ara, na mapu kum uptinge.” Yesus arye nyabuk.

³⁹Nyabukce ayupu ton nyabuk. “Yata nang do nirya, sik yuk nang arye, ‘Yesus el mapu unyaka anya arye, opnamabe,’ tenebik bukni, lyepdanuka dunubikke nang ara, aminyan sirya talak ara, Allah arye wenepliba, dibikcop ura, ila tamubuka tonap, na ap neika kam fia kum unamake.

^r 10:34 *oldana unamake* – Yesus arye ayupu nyabuka ara, deiyok ani. Ara, Yesus arye fil dopsuka deice arye, ninye ap, Allah ap, teleb ubuka neika uptibyene. Tonda, Yesus diba tenebibiop ura, yuk yala nang ap, nun ap, teleb kanye bobuka, telebuk neika uptibyene. Bukni, ton nangop ura, ‘Yesus nun like,’ tenebikcop ura, nun ti ara, ‘Anang ara nun like,’ tenenamsiyake.

Dibikcop ura, na ap neika kum unamabe. Bukni, ‘Nun opsikcak’ tenen, ilil una kum dib aryuk, na yupu uk kekebuka dobolyanganinyak ninnye ara, yuk nang arye, ‘Yesus el mapu unyak’ tenen, obikcop ura, sik nong dipnamak bukni, sik kanye ara, na ap neika fia kam unamabe. ⁴⁰Yata nang do nirya, anggun ti, ‘Yesus el mapu unyak’ tenen, kanye talima arepliba, kanye deipsikirye melipsicop ura, ara dipkoprop na ti kanye talima delinulule. Na ti kanye talima arepnilyop ura, dipkoprop ning ara, na Ni Allah dopdeipnuknye biti kanye talima arenulule.” Yesus arye nyabuk.

⁴¹Nyabukce ayupu ton nyabuk. “Yata nang do nirya, ‘Allah yupu laka nyanyak nang unyak’ tenen, kanye talima arepliba, nong lyam-lyam nyapsikirye, melipsicop ur, Allah arye el yupu laka nyanyak nang dekna ning arepnamle touk, sik melibikce nang babye aning atonun ninguk arepnamle. Aning atonun ton, ‘Allah yupu kekebuka diksukumuk unyak nang unyak’ tenen, kanye talima arepliba, kanye deibuka kipsikirye melipsicop ura, Allah arye, adiksukum unyak nang dekna ning arepnamle touk, sik melibikce nang babye, aning atonun, dekna ning arepnamle. ⁴²Tonda, na dipkoprop nyapsine. Yata nang do nirya, anggunda na mapu ati, ‘Anang ara, Yesus el mapu unyaka anye arye, melipnuyabe,’ tenebikirye, talya ikip mek sirika kwebuka arelamaka ababye, Allah arye dekna doplirye, dekna talya arepliba, dopropnamake.” Yesus arye el mapu ati, ayupu nirya nyabuk.

Yesus arye Yohanes ati dopdeibuk yupu

(Lukas 7:18-35)

11 ¹Yesus arye el yupu bobuka, ‘Peterepra banamak’ tenen, wibuka deiyamuk nang, sik 12 nang ati, ayupu nirya nyabukce, akunum peterelamukop ura, amutuku batakuka, Galilea tam noutamak asik dolamikak nirya, el yupu peterepra balamuk. ²Yesus arye peterelamuk ning ap, winilamuk ning ap ara, yuk nang laka nyabikba, Yohanes arye kekebuk. Ara, diba tenena ninnye mek dongolamuknye, Roma mutuku deiyoknye birye wenena aik fum dongobuknye, Yohanes Pembaptis arye, Yesus winilamuk ning kekebukce, el melin nang ati ayupu nyabuk.

“Anggunda, Yesus dam bimunce, ayupu ara asipdelulume. ‘Nabi nang arye, ‘Ninye mutuku-mutuku nirya noutamak arye, ninye weik lyeplirye sik kanye talima talinamlanye yanamle,’ nyalamsiknye bira, an akunum do? Yuknye ton aminyan talak yanamsil do?’ nyabuka, Yesus ati asidelbilulume,” Yohanes arye nyabuk. ³Nyabuk ura, el melin nang arye Yesus dam binuka asipdeyikba, Yesus arye tamubuka anang ati nyabuk.

⁴“Anggun amol arye kekelulum ning ap, asing arye eililulum ning ap, Yohanes dam lakak laka nyalbilulume. ⁵Ara, nyapnululume. ‘Asing kuamlye ninnye perekepliba, elinyake. Aik bukamikce nang kwetelilulba,

banyake. Barye suse atonun suse dilamlye nang kwetelilulba korokolsakalule. Amol kunukamlye nang kukeipliba kekenyake. Akunum dipmakce nang kam bulilule. Tonda ninye lyena ati, Allah el lak teleb yupu talya kankan ninye kekena ati peterepliba, kekenyake,' ⁶Yatanye do niryra, na wininye ning eiplirye, tonda kekeplye deice arye, kanye kum boktoplirye, teniltona kum dib aryuk batakna kum upnilyop ura, telebuk unamle. Ati na nyapmasin yupu bobuka, Yohanes dam nyalbilyame," Yesus arye, Yohanes el melin nang ati nyabuk.

⁷Nyabuk ura, Yohanes el melin nang kekebikce biyikop ura, Yesus arye el dam wekmek nang ati, ayupu nyabuk.

Yohanes ara, mek kum ati ninye kum unyak noutamak arye Yohanes peterelamukba, kekelbaluma ara, yata ning 'Eipnamap' tenen, dilbalamlum do? 'Yenya dolirye utotoa lulukunmaliba, eipnuyp' tenen, dilbalamlum do? ⁸Akumop ura, yata ning 'Eipnuyp' tenen, dilbalamlum do? 'Tonoknye fia teleb butum aling ongobuka upliba eipnuyp' tenen, dilbalamlum do? Kume, weik teleb butum aling ongonyak nang ara, weik ninye deiyok nang, Raja nang sik asik unyake. ⁹Akumop ura anggunce, 'Allah yupu laka nyananye, nabi eipnuyp' tenen, dilbalamlum do? Unyop ura, dipkoprop nyapsine. Allah yupu laka nyananye nabi dilamlume. Bukni, anye Yohanes ara, yuk Allah yupu laka nyana nang atonun kum ulule. Anggunda mitik mambul bukni, Yohanes ara, weik mambulnye ulule.

¹⁰Minop arye Allah yupu laka nyalamuknye nabi Maleaki arye anye Yohanes ati, nyabuk. 'Yupu lak nyalinanye yanamle' tenen, ayupu sekamuk. Allah arye nyapdeibukba, nabi Maleaki sekamuk yupu ara ani.

'Allah arye nyabuk. Na yupu lak nyalinanye^s minopce dopdeipniba, yupu lak nyalbinamle bukni, an aminyan binamlyame.

Na yupu laka nyalinanye birye, an binamlam bisik ara, kintinipdeipnamkile,' Allah arye nyabuk.

(Maleaki 3:1)

Maleaki sekamuk yupu dobuka akunum, nyapsine. Yesus arye nyabuk.

¹¹Yesus arye nyabukop ura, ayupu ton dukdongobuka nyabuk. "Aning ati ara, na dipkoprop nyapsine. Minop danerye dipdobuka winitalak niryra, kilapu niryra arye delilamik mapu niryra ara, mitik mambul ulamik bukni, diba tenenyak ninye mek dongolululnye Yohanes uk ara, weik mambulnye ulule. Yuk nang niryra ara, el atonun mambul kum unyake. Bukni, ninye mek dongolamunye Yohanes ati ara, Allah el kanye ara, 'Elda, mitik mambule,' tenelule. Ara, nada Ninye Lyena Deiyoknye

^s 11:10 *yupu laka nyalinanye* – Ayupu deiyok ara ani. Yupu lak nyalinanye ara Yohanes ati nyabuk. Bisik kintinilinanye bira, ara Yesus yupu kekepnamak ninye arye, sik malye wininyak ning bataknamake ati nyabuk. Tonda, bisik binamlenye bira, ara Ninye Lyena Deiyoknye Yesus ati nyabuk.

tukwak mutuku min kum yase talak bukni, na yangana ati, Yohanes arye na lak nyalinanye ulula ati, elda weik mambulnye ulule.

Anyapmasin bukni, winitalak arye dipdongobuka do unamle talak nirya ara, Allah arye ninye weik lyeplirye sik talima talinamle talak wekenamak nang noutamak ara, yuk nang arye aninye nirya ati, 'Weik mambule,' fia kum tenenyake. 'Anang ara weik mambule,' kum tenenyak bukni, na dipkoprop nyapsine. Allah el kanye ara, 'Im deice welepnamak nang nirya ara, weik mambule unyake. Yohanes ara mitik mambul uka,' tenelule. 'Yohanes ara, teleb fil dolul bukni, elda mitik mambule,' tenelule.^t Deiyok ara, tukwak fil donyak nang ara, mitik mambul bukni, im deice welebana ara, weik mambul ati nyapsine." Yesus arye nyabuk.

¹² Yohanes Pembaptis Allah yupu deiyok koubuka peterelamuk talak arye dipdongobuka, winitalak nirya ara, Allah diba tenena kum nang arye, Allah diba tenena nang ati, sik nong deice ikin ning weik delinyake. Wininyaka ara, 'Allah arye ninye weik lyeplirye sik talima talinamle talak kum winipnamle' tenen, wininyake. Bukni, winibikca babye, Allah ati diba tenenyak nang tuba weik upnin banmake. Tonda weik tonap upnin banamake.

¹³ Musa sekamuk yupu ap, Allah yupu laka kibuka, laka nyalamik nang arye nyalilamik yupu nirya ap deice arye, 'Allah arye aminyan talak wininamle, wininamle,' nyabuka nyalilamik.^u Sikce ayupu nyalilamik bukni, sirya ara, Yohanes yayuk. ¹⁴ 'Sik Allah yupu laka nyalamik nang arye nyalilamik yupu kekebuka, diba teneptibye,' tenemunyop ura, anyapnusin yupu ton diba tenepnululume. Ara, nabi nang arye, 'Aminyan talak Elia atonunye yanamle,' nyalilamiknye bira, ara ninye mek dongolamuknye, el Yohanes ati, ayupu nyalilamik. Elia atonunye bira, Yohanes atia.^v ¹⁵ Anggun amol aupmasiba, na nyapmasin yupu kekepmanto ninye ara, 'Ayupu nong, deiyok ani' tenen, moubuka kekepnululume. ¹⁶ Anggun tenipdelulume. Winitalak umunye nang ara, anggun winimunye ning atonun ning ati, winipmanto yupu nyapnusine. Sikda, ninye din ning bulubuka deibikirye, deklamakak ara, mapu bulubuka bukikirye, arikal dolamak touk ululume. Ton mapu arye yuk mapu ati, nyanyake.

^t **11:11** *Yohanes mitik mambule* – Winitalak ara, Yesus yupu ap, Yesus winilamuk ning ap deice arye, diba tenebityop ura, Allah arye lyeplirye, nun kanye talima talinamsile. Allah ap neika fia unamak ninye nirya ara, weik mambule. Allah el fil uk bukni, tukwak mutuku fil donyak ninye ara, nabi nang babye, mitik mambule. Bukni, Allah arye, 'Im deice binamak ninye ara, weik mambule,' tenelule. ^u **11:13** *nyalilamik yupu* – Nabi-nabi nang arye nyalilamik yupu nong noutamak ning ara, ani. Ara, Allah arye ninye weik lyeplirye anggun talima talinamsilanye, Mesias yanamle talak ap, Yesus arye wininamle ning ap ati, 'Aminyan talak Mesiasnye yalirye wininamle' tenen, nyalilamik. Sirya talak nyalinanye bira Yohanes Pembaptis. Elce nyalamuk talak noutamak ara, Mesiasnye Yesus ara, dipkoprop yayuke. ^v **11:14** Maleaki 3:1

¹⁷“Se, ‘Kanye deibuka mot sepnamap’ tenen, bung-bung nyana atonun ning nyabibi bukni, anggun lik ati batakmasulumba, nun ap mot kum sepmabe. Atonun ton, arikal dona ati, ‘Ninye dibikiba, mot nyabuka engelamak touk engepnamabe’ tenen, mot nyabuka engenmaupuba, anggun lik ati, batakmasulumba, nun ap kum engepmabe. ‘Nunce winipnuyabe,’ tenebibe ning nirya ara, anggun lik ati, batakasululume.” Amapu arye sik kayapu mapu ati nyanyake.

¹⁸Amapu lik upliba, batakamak touk, anggun babye atonun winilulume. Ara, Yohanes ara, dina teleb ning roti ap, anggur mek kanye wangalamak mek ap, kum dilamuk bukni, sik diba tenena kum nang arye el Yohanes biti, “Anye bira, isa arye el talima talibuka ulule,” nyanyake.

¹⁹Bukni, Yohanes aning winilamak touk, na Yesus arye kum wininune. Nada, Ninye Mi Koprop Atonunye birye dina teleb ning ap, anggur mek kanye wangalamak mek ap, dipra unun bukni, na ti anggun diba kum tenenyak nang arye, “Anye Yesus ara, din fia dilulnye ulule. Elda, kanye wangalamak mek fia dilulnye ulule. Ati, elda malinye ulule. Tonda, ‘Amutuku talina deiyok nang, Roma mutuku nang arye doproprnamak’ tenen, pajak yo bok bulubuka delilamak nang ap, malye-malye unyak nang ap, anye bira Yesus ara anang ap, neika ulule. Aning nirya ulula ati ara, fia malye winilule,” nyanyake.

Na ti diba tenena kum nang arye ayupu nyanyake bukni, na dipkoprop nyapsine. Weik kel nang arye teleb wininyak ning ati, yuk walwal nang arye, “Aning ara talye,” nyanyak bukni, aminyan talak ara sik weik kel nang arye wininyak ning nong akunum upliba lakak uplyop ura, ninye nirya arye, ‘E sikce teleb winilamik’ tenen, kel biknamake. Aning atonun, diba tenena kum nang arye na ti, “Elda malye uk ulule,” nyabuka malye yupu nyaninyak bukni, na ap, amalye un ninye ap, neika unmabya ani, aminyan talak ara, na yupu diba tenebikirye, sik malye un ning batakuka, diksukumuk unmakce bukni, eipmunyop ura, kel biknamlume. Na fil donye ning nong uplye talak aryuk kel biknamlume. Na arye aninye ap neika umunya ara, telebe uka. Yesus arye nyabuk.

Yesus arye el ti diba tenena kum nang ati wenebuk yupu

(Lukas 10:13-15)

²⁰Yesus arye amutuku-amutuku nirya peterepra balamuk talak ara, ninye kum winipmanto fil ap, sirya dana fil ap weik arye dololamak bukni, amutuku ninye ara, sik malye un ning batakna kumce, el ti diba kum tenelamik. Aning ati ara, el mambul fil dolamakba elilamik ninye ati deiyok koubuka wenelamak. Wenebukce, ayupu nyabuk.

²¹Anggun Korasin mutuku umunye nang ap, Betsaida mutuku umunye nang ap, Allah arye wenebuka opnamsila ati, anggun bico. Anggunce, ‘Se,’ tenebuka mambul kanye bonamlulume. Anggun dilamlumba,

anggun mutuku noutamak sirya dana fil ap, ninye kum winipmanto ning fil ap dolamsa ara, Tirus mutuku ap, Sidon mutuku ap noutamak fil dolamtinyeto ura, sik amutuku bitinye unyak nang nirya arye, mambul kanye bolamtingce, sik malye ning batakuka balye tamubuka, na ti akunum diba tenelamninge. Bukni, amutuku bitinye noutamak ara, afil kum dolamsiba, aning nirya kum elilamika ati, diba kum tenepnike.

²²Bukni, na dipkoprop nyapsine, anggunda amutuku ululum ninye ara, mambul fil dopniba, aning-aning nirya elilulum nang anya arye, Allah arye ninye nirya ati bokuka deiplirye, sirya talak ninye nirya wenepnamle talak ara, Tirus mutuku nang ap, Sidon mutuku nang ap, mitikto kanam arye wenepnamle. Bukni, winitalak umunye ninye ara, anggunc na ti, ‘Anye bira nun like’ tenen, batakanululum nanguk ara, fia ikin arye wenepnamsile. ²³Anggun Kapernaum mutuku ninye ara, ‘Nun teleb nang anya arye, Allah arye erebuka im deice deipnamsile,’ tenelalulum do? Kume, Allah arye wenebuka uku din mutuku donoksiliba, uku arye dibuka sirya daknamsile. Anggun Kapernaum mutuku nang ara, anggung dilamlumba, anggung mutuku noutamak na arye ninye kum winipmanto ning, mambul fil dolamse bukni, diba kum tenenululume. Bukni, amambul fil ara, Sodom mutuku noutamak afil uk dolamtinyeba, eipmanitingop ura, Sodom mutuku ulamik ninye arye, “Se, nun dipkoprop malye unyabe,” nyabuka, sik malye ning bataktingce,” na ti diba tenelamningop ura, kam tuba unamtinge.

²⁴Aning ati ara, na dipkoprop nyapsine. Allah arye ninye bokuka sik malye winilamik ning ati wenepnamle talak ara, Sodom mutuku winilamik ninye ara, malye weik winilamik bukni, Allah arye aninye ati mitikto kanam arye wenepnamle. Bukni, anggung winitalak ululum ninye uk ara, na arye ninye kum winipmanto ning, mambul fil weik arye dolamsiba, elilamlum bukni, tuba diba kum teneluluma ati, Allah arye weik ikin arye wenebuka oplopnamsile. Yesus arye sik Kapernaum mutuku ninye ati nyabuk.

Yesus arye, “Na wininye ning ara kel biknululume,” nyabuk yupu
(Lukas 10:21-22)

²⁵Yesus arye ayupu nirya nyabukop ura, el li Allah ati moronmaka deice arye ayupu nyabuk. “Naie, anda im deice ap, tukwak mutuku nirya ap, talyamlumce, aning nirya deice tam weik deiyoknye ulyama ati, na arye an ti, ‘Telebe,’ nyabuka an si erepkine. Tonda, an nyasiminye yupu noutamak ning ara, kel bikna kanam nang ap, weik kel nang ap ati,

^w **11:23** *bataktingce* – Yunani yupu deice arye, nyabuka sekik: ‘Malye butum aling ongolamtingirye, uku singsinga noutamak bukmatgingce, sik malye ning batakklamtinge.’ Winibuka sekik bukni, nunce ayupu deiyok, nong noutamak uk sekupe.

deiyok dunulul bukni, mitik mapu atonun unyakce, talima mitang arye unyak nang ati, deiyok noutamak ning ara laka kibuka laka nyasilyame. ²⁶Diba na ni, winiminye ning ara, ance, ‘Wininamne,’ teneamuk touk wininmala ati, aning arye an talima kanye deilikulule. Ati telebe nyapkine.” Yesus Allah morona deice arye ayupu nyabuk.

²⁷Allah morobukop ura, el yupu kekenmek nang ati ayupu ton nyabuk.

Na Ni Allah arye, ‘Na mi Yesus, aning-aning nirya talibuka deiyoknye unamle’ tenen, akunum arepnuke. Ninye nirya tonoknye ton, Allah el Mi Koprop arye, el kanye talima noutamak tenelul ning ara, kum kel biktinge. Allah el Mi Koprop kanye talima uye ning ara, Allah elcuk kel bikilulue. Ninye nirya tonoknye ton, na Ni Allah el kanye talima noutamak tenelul ning ara, kum kel biktinge. Na Ni Allah, el talima noutamak uye ning ara, tukwak ninye ton kum bukni, na uk ara, el Mi Koprop arye kel bikinune. Tonda, ‘Na arye peterenunba, na ni uye ning kel kipnamak’ tenen, wibuka deipse nang uk, na Ni Allah arye pataplyeba, tenelul ning kel biktinge. ²⁸Anggun kanye imun kanye bobuka ululum ninye ap, nong ap didik usilye ninye ap, ikin ululum ninye ap, anggunce anggun kanye imun usulul ning na nong deice deipnumunce, moropnumunyop ura, na arye melisiniba, ikin kanye bona kumce, teleb kanye uk bobuka unamlulume.

²⁹Nada kanye talima erena kum, mitang arye ununye binya arye, na nyasinye yupu ap, na wininye ning ap, kekebuka kel bikmunyop ura, na unye touk unamlulume. Winipmunyop ura, anggun kanye imun usilye ning ara kum dasiliba, teleb kanye uk bobuka unamlulume. ³⁰Na arye ‘Wininamak’ tenen, nyasinye yupu ap, na arye nyapsiniba, winibuka fil donamlum ning ap, anirya ara kanam uk anya arye, na ti diba tenebuka dobolyanganamlulume. Yesus arye nyabuk.

Yesus arye, “Allah el si erena ati, fil dona kum dib aryuk, didik sen sum, Sabat sum deiyoknye bira, na uka,” nyabuk yupu
(Markus 2:22-28; 3:1-6; Lukas 6:1-5; 6:6-11)

12 ¹Yahudi yala nang sik Allah si erena ati, fil dona kumce, didik sen sum, tonok Sabat talak ara, Yesus ap, el mapu ap, yuk nang gandum^x wa wiyamika noutamak banmek. Abanmek talak ara, sik din patabukba, el mapu arye gandum duk dakuka, deice bama labuka batakickop ura, gandum pinpinya labuka imbik dinmek. ²Sik gandum dinmek talak ara, Yahudi yala nang sikce Allah si erena ati, fil dona kum

^x 12:1 *Gandum ara*, mitikanun beras atonun bukni, el urasin yuke. Aning ara, mitikanun maning atonun bukni, buta deice tam ara, mitik duk weik moulamle. Aduk el urasin ara, beras atonun ulule. Aduk dobuka, tikikirye, singsinga atonun akunum uplyop ura, mek ap tabakuka, din ning el si roti dabuka dinyake.

dib aryuk, didik selamik sum arye dinmek. Gandum dakuka dinmekba, Farisi nang eibikce, ‘Anang wenepnyuyap’ tenen, Yesus ati asipdeyik. “An mapu arye gandum dakuka dinmaka ara, yata ati do? Allah arye, ‘Wininamlulume, aning ara kum wininamlulume,’ nyapdeibukba, Musa arye sekeiyamsuk yupu noutamak ara, ‘Allah si erena ati, didik sen sum, Sabat sum ara, wa win dam lilbana meme,’ nyabuka sekeiyamsuke. Musa arye nyabuka sekeiyamsuk bukni, an mapu arye gandum dakuka dinmaka ara, wa lilbana atonun ning wininmaka anya arye, awininmak deice arye, Allah yupu yaninmake. Awininmak, ning ara, yata ati do?” nyabuka, Farisi nang arye Yesus ati wenebuka asipdeyik.

³Nyabuka wenebikba, Yesus arye tamubuka sik Farisi nang ati ayupu nyabuk.

Na mapu, sik awininmak ning atonun, Allah yupu buku Samuel noutamak wamuk ning ara, nyalulum bukni, kum kel kiplum do? Nun apu kopropa Daud ap, el melibuka neika balamik nang ap, din fia patabukba, din ning roti ara, Allah arina aik fum dabuka deipmeka ara, Daud arye dobuka dibuk. Tonda, el ap neika banmek nang ati, bokuka aribukba, dibik. Aning ara, moubuka kum kel kiyamlumce, ayupu nyanmanulum do? ⁴Allah arina ati, din ning roti dabuka,^y el aik fum delilamika ara nyapnusine. Yahudi yala nang arye, din ning roti 12 dabuka, Allah arina aik noutamak delilamik. Aroti ara, Musa arye nyabuka sekeiyamak touk, Allah arina aik fil dona deiyok nanguk aroti dilamik. Aroti ara, mem roti ati, yuk talya nang ara kum dilamik. Talya nang ara kum dilamik bukni, atalak Daud arye winibuk ning ara nyapnune.

Din ning roti ara, Allah arina aik fum dabuka deibik ning ara, Daud din patabukba, dobuka dibuk. Tonda, el ap neika banmek nang ati, bokuka aribukba, dibik. Dibik bukni, Daud ap, el melin nang ap, roti dobuka dibik ning ara, Allah arye anang ati, ‘Malye winipmake,’ tenebukce, kum wenebuk. ‘Aning ara telebe uka,’ tenebuk.

⁵Musa sekamuk yupu noutamak ara, “Ninye didik sebakiryey, Allah el ti si erebuka, si erenamak sum, Sabat sum deice arye fil kum donamlulume,” nyabuka sekamuk ning ara, anggun elilulume. Anggunce ayupu akunum elilulum bukni, moubuka kum kel kipmalumce walwal arye nyanmanulum do? Musa arye, “Sabat sum deice arye fil kum donamlulume,” nyabuka sekamuk bukni, malye ning dekna ati, Allah arina deiyok nang^z arye, Allah el arina ati,

^y 12:4 *roti* – Yahudi yala nang arye, ‘Nun fil dolamibya ani, dolonyap ning ara, dipkoprop Allah arye aripsiliba dolonyabe, tenenamap’ tenen, Roti 12 dabuka, Allah el weik arina aik tia domik aik, butum aling bola aik fum delilamika ara deiyok ani. Ara, Allah el kina ati, minggu-minggu nirya, sik Allah si erelamik sum, Sabat sum deice arye, roti winiryuk ning 12 dabuka, Allah arina aik fum delilamik. Aroti ara, talya nang arye fia kum dilamik. Mem ning atonun wamuka atia. Bukni, tonok minggu akunum ubuk ura, Allah arina aik fil dona deiyok nang aryuk, aroti dobuka dilamikce, winiryuk ning ton dabuka delilamik. ^z 12:5 *Allah el si erena ati arina deiyok nang ara*, Allah el si eren aik fum fil dolamik. Sik deiyoknye lak len yupu, nomor 14 dipdelulume.

el si erena aik fum Sabat sum deice arye fil tuba donyake. Sabat sum deice arye fil donyak bukni, Allah el kanye ara, 'Afil donyaka deice arye, na yupu kum yanininyake,' tenelule. 'Aning ara, telebuka,' tenelule. Anggunda aning kum kel kiplumce, nyapmanulum do? ⁶Allah el si erena ati keil aik weik ning domik asik ara, 'Weik mambule,' tenelulum bukni, na dipkoprop nyapsine. Anyaik ara, mitikto mambule. Nada, weik mambulnye akunum yanmane. ⁷Allah yupu laka nyalamuknye nabi Hosea arye, sekuk yupu ara ani.

'Allah el kanye ara, anggun malye winimunye ning dekna ati, ining ning obuka arinumunya ara, mitikto mambule. Weik mambul ning ara, ninye malye-malye winipmakibuk, wenebuka oltakna kumce, bico tenebuka kanye delina ara telebe, tenelule.' Nabi Hosea arye sekamuk. (Hosea 6:6)

Hosea sekamuk yupu bol deice uk kum bukni, 'Deiyok ani' tenen, moubuka teneamtum tipto ura, na mapu gandum dinmak ning ati ara, "Sik malye unamake," kum nyaptume. Yesus arye sik Farisi nang ati nyabuk.

⁸Yesus arye Farisi nang ati, ayupu akunum nyabukop ura, ayupu tonap nyabuk. "Aning ati ara, na Ninye Mi Koprop Atonunye ununa anya arye, didik sen sum Sabat sum deice una ara, 'Aning telebe, aning malye' tenen, bokuka delina deiyoknye bira, na tonoka. Ati na arye, 'Aning telebe, aning malye,' nyapmasine," Yesus arye sik Farisi nang ati nyabuk.

Yesus arye taruk kwanyamuknye kwetebuk yupu

⁹Ayupu nyabukop ura, anyaka batakuka, Yesus ap, el mapu ap, balamika ani, Yesus arye Yahudi yala nang, Allah yupu peterelamik aik binuka wekuk. ^a ¹⁰Wekuka Allah yupu peterena aik fum unmok talak ara, taruk kwanyamuknye ton anyaik fum unmok. Atalak ara, Farisi nang arye, 'Yesus malye winiptuba, nunce, el malye winipmale nyaptibye' tenen, Yesus ati fia dipnilibuka kalikinmek. Kalikinmekati, 'Yesus arye malye nyapnul do?' tenen, ayupu asipdeyik. "Nun Allah si erena ati, fil dona kumce didik sena sum, Sabat sum deice arye, uk dilamlye ninye kwetena ara teleb do, malye do?" nyabuka asipdeyik.

¹¹Asipdeyikba, Yesus arye tamubuka nyabuk. "Yatanye do nirya, el weilamlye domba basam, Sabat sum deice tuku fum saklyop ura, adip aryuk kum doproprnamle do? ¹²Aning kum tenepmalumce do? Domba basam ara, mitikto mambule bukni, ninye ara, weik mambule anya arye,

^a 12:9 *Allah yupu aik* – Yahudi yala ninye arye, Allah yupu peterelamik asik ara, mutuku-mutuku nirya domik. Anyaik yuk, bukni, sik malye winin ning dekna ati, Allah ati arilbalamik aik, el si erena asik ara yuke. Peterena aik weik awamuk bukni, Allah el si erena ati arilbalamik asik ara, Yerusalem mutuku noutamak, tonok asik uk, weik keil aik domikba, amutuku wamuk.

Allah si erena ati, ninye didik sen sum deice arye, ninye melina fil dona ababye telebe uka. Winina deice arye Allah yupu kum yaniptibye.” Yesus arye nyabuk.

¹³ Yesus arye Farisi nang ati, ayupu nyabukop ura, ila ton, taruk kwanyamuknye biti, ayupu nyabuk. “Anda taruk bibikuka aripnilyame,” nyabuk. Nyabukop ura, taruk kwanyamuknye birye, el taruk bibikuka aribuk ura, adip aryuk el taruk teleb ubukba, taruk pung kipdeibuk. Yesus arye anye el taruk kwetebukop ura, anye el danatam taruk teleb wamuk touk ubuk. ¹⁴ Yesus arye anye kwetebuka ati, Farisi nang ara, yu ubukba, ‘Yesus yata ubuka opnamap do?’ tenen, anyaik batakuka yukak yupu sisikilbinmek.

¹⁵ Winipmekce, yupu sisikilbinmek ning ara, Yesus akunum bikmokce kel kipmoka ati, amutuku batakuka, yukak biyuk. El banmok talak ara, ninye weik arye, ‘El ap binuyap’ tenen, aminyan melibuka biyik. Sik ap biyikop ura, sik uk dilamuk ninye nirya ara, Yesus dam boyanganmekba, Yesus arye aninye kwetebuk. ¹⁶ Kwetebukop ura, aninye nirya ati ayupu mopreibuk. “Na Allah el Mi Koproprop ununa ara, anggun kel kiplum bukni, yuk nang ati kum laka nyanamlulume,” nyabuka yupu sekuk. ¹⁷ Nyabukop ura, Yesus arye, “Anggunce, ‘Yesus ara, Allah el Mi Koproprop ulule,’ nyabuka kum nyanamlulume,” nyabuka, yupu sekuk winibuk ning nirya ara, Allah yupu laka nyalamuknye, ‘Nabi Yesaya arye sekamuk yupu ara, atonun winipnamle’ tenen, winibuk. ¹⁸ Allah arye ‘Ninye weike lyeppnamle’ tenen, dopkwetebuknye Yesus ati, Yesaya arye ayupu nyabuka sekuk. Yesaya arye sekamuk yupu ara ani.

‘Anye bira, na amutam ulirye, na fil uk donamnil’ tenen, wibuka deipse. Na arye el ti kanye deipsirye, kanye talima aripnuke. Na Kanye ap, na mikip ap, weik arye el ti aripnyop ura, elce, ‘Diksukum una ara, wininamlulume,’ nyabuka laka nyalbinamle. Na Allah arye tenepse ning nirya ara, elce ninye mutuku-mutuku nirya ati, laka nyalbinamle. ¹⁹ Anye bira, kariyung bisik ninye weike balamakak noutamak tikuka, yupu weik arye kum nyanamle. Tonda, yuk nang arye el ti malye yupu nyabikiba, yu upliba, walana yupu kum nyanamle.

²⁰ Ninye arye kwalin pina malye ati, batakلامak touk, tonda, ninye arye upna ubikiba, ililim abuka tangalamle touk, anye birye mikip kum ninye ati kum bataknamle. Tonda, ‘Yata wiripnun do?’ tenen, kanye walwal upliba, teneipdebuka, mitang asa unyak ninye ara, elce kum bataknamle. Sik kanye talima melinauk unamle. Aning wininamla ara, fil dopra balamlya ani, ninye mutuku-mutuku nirya arye Allah nyasilye yupu ap, ‘Wininamake,’ tenesilya ning ap, akunum winibiceop ura, el fil sirya daknamle. ²¹ Ninye mutuku-mutuku nirya arye, el nonge ap, el si ap deice arye, diba

tenebikirye, 'El dem aryuk lyepnamsile' tenen, sik kanye talima el deice uk delinamake.' Allah arye nyapdeibukba, Yesaya arye sekuk. (Yesaya 42:1-4)

Ayupu ara, Yesaya arye sekeiyamuk. Yesus atalak arye nyabuk yupu nirya ara, 'Yesaya nyalamuk yupu deice winipnamle' tenen, nyabuk.

Musa sekamuk yupu peterena deiyok nang arye, "Belesebul arye Yesus talibuka, fil dolule," nyabik yupu
(Markus 3:23-27; Lukas 11:17-22)

²² Yesus binuka unmok mutuku noutamak arye, isa taliamuka deice arye, yupu luba kibuka, asing kuamuknye tonok, 'Yesus arye kwetepnul' tenen, yuk nang arye anye bobuka, Yesus dam boyayik. Boyayikba, Yesus arye anye talyamuk isa yakuka kwetebukop ura, anye yupu nyabuka, aning-aning nirya teleb ubuka dinmok. ²³ Winibukop ura, awakuka dinmek nang arye, Yesus ati ngalukunmekce ayupu nyabik. "Se, anye bira, Daud yalanye birye deibuknye anya arye, elda Allah arye Ninye Lyenanye, 'Mesiasnye yanuka unamle' tenen, wibuka deibukba, akunum yanmasil do, kum do?" nyabik. Nyabik ning ara, 'Yesus ara, Ninye Lyenanye ulul do, kum do?' tenena ati nyabik.

²⁴ Sik anang arye nyabikba, Farisi nang kekebikce ayupu nyabik. "Kume, aisok yakalula ara, isa mer nirya, sik deiyok isa, el si Isa Mutuku Dongonye, el si ton Belesebul,^b el mikip deice arye, Yesus arye isa mer yakuka dolkwetelule. Isa nirya sik deiyoknye Belesebul mikip deice arye, Yesus arye aisok nirya yakuka dolkwetelule," nyanmek. ²⁵ Ayupu nyanmekop ura, Yesus arye anang sik talimak noutamak tenepmek ning kel kipmoka ati, Yesus arye, anang ati adomon yupu deice arye nyabuk.

Dan mutuku do nirya, tonok weik deiyoknye birye talilul ninye, noutamak bokukabikirye, olanmacop ura, sirya dakdanamake. Aninye nirya arye olanmaceop ura, tonoknye birye yata ubuka aninye nirya taliptu do? Neika kum upting bukni, yuk-yuk bindoptinge. Aning atonun, yata yala nang do nirya, sikce opdakcop ura, sirya dakdanamake. Yata ubuka neika uptinge do? Akunum, bokuka yuk-yuk bindoptinge. ²⁶ Farisi nang arye nyapmak yupu atonun, Isa Mutuku Dongonye ap,^c el mapu koprop, isa mer ap, sik damang uk olatinge, Isa Mutuku Dongonye el mapu koprop ati, yakuka dopkwetep top ura, sik mikip fia kum uptue. Isa

^b 12:24 *Belesebul* – Isa Mutuku Dongonye el si bitinye anya arye, ton talak ara el si ati, Belesebul nyanyake. Ton talak ara, el si ati mutuku dongonye nyanyake. Tonda, laka nyana yupu nomor 13 dindelelume. ^c 12:26 *Isa Mutuku Dongonye* nyanyapnye bira, sik Yahudi yala ninye, sik yupu deice arye Setan nyalamik. Sik Yahudi yala ninye, sik yupu Ibrani yupu deice arye, Setan yupu deiyok ara, atau artinya ning ara, "Ninye Onanye, tonda Minina Yupu, tonda, Lululina Yupu Nyana Deiyoknye ulule," nyalamik. Tonda, laka nyana yupu nomor 13 dindelelume.

Mutuku Dongonye el mikip kum uptuop ura, ninye ton kum taliptue. Isa Mutuku Dongonye arye na talipnutuba, fil doptinyop ura, el mapu koprop isa ara kum yakuka dopkweteptinye. Ati, anggun Farisi nang ara talya yupu nyanmaluma.

²⁷Isa mer nirya yakuka dolkwetenyara, 'Isa Mutuku Dongonye el mikip deice arye dolkwetelule,' tenepmanulum bukni, anggun Farisi nang, anggun melin nang ababye, isa yakuka dolkwetenyaka anyara, aning ara, dan do? Anang ara, yatanye mikip deice arye isa yakuka dolkwetenyak do? Sik yupu kekebuka melinyak nang arye, isa mer yakuka dolkwetenyak deice arye, akunum laka kipmasile. "Ara Allah el mikip deice arye wininyake," nyalulume.

Ati na arye isa dolkwetenuna ati na ning ababye, "Allah el mikip deice arye dolkwetelule," nyaptume. Anggunce na ti, "Isa talibuka deice fil dolule," nyanulum yupu ati aning ara, anggun bidamang mapu arye fil donyaka deice arye, akunum lakak kipsila anyara, anggun ti yupu lipsisikuka bokolina deiyok nang atonun upnamsiyake. Anggun mapu babye, na babye, atonun fil donyapa ati, Allah el mikip deice aryuk isa yakuka dolkwetenyabe. Sik Farisi nang ara tilila yupu nyalulum nang ani. ²⁸Kume, na arye isa mer nirya yakuka dolkwetenuna ara, Isa Mutuku Dongonye mikip deice arye kum dolkwetenune. Allah El Dib Kanye el mikip deice arye yakuka dolkwetenune. Aning ati ara, Allah ninye weike lyeplirye sik kanye talima talinamle talak akunum deiyok uple. Na wininye ning ap, isa mer bisibuka dolkwetenuna ap, aning deice arye laka akunum upmasile. Yesus arye nyabuk.

²⁹"Anggun nyapmalum ning kum winipmanto. Yata nang do nirya, fum tonok 'El aik wekuka el ning ubula dopropnuyp' tenen, el aik wektinge bukni, anyaik deiyoknye, weik mikipnye anyara, tapu kum kuptingop ura, el ning ubula kum doproptinge. Anyaik weik mikipnye minopce tapu kouplopting tipto ura, el ning ubula dobuka betinge. Kumop ura, kume. Aning nyapmasin touk, Isa Mutuku Dongonye ara, aik deiyoknye atonun bukni, nada weik mikipnye birye, el tapu koupmana anyara, el mapu isa mer yakuka dolkwetenune." Yesus arye aFarisi nang ati nyabuk.

³⁰Nyabukop ura, Yesus arye ayupu ton nyabuk.

Na ap neika kum fil dolulnye bira, yupu sekuka malye kibuka, yaniptapra balamak nang atonun ulule. Tonda, winipmanto ara, kwaning yongopra tonok ak bulubuka deibice talak ara, el ap bulubuka kum delilulnye bira, yamupra donoklamak touk ulule. Na ap sik ap, neika kum fil dobibyop ura, arup nyapmasin nang, aunyak nang atonun malye weik winilulume. ³¹Aning ati ara, anggun moubuka kekeplulume. Ayupu fia mambul, dipkoprop nyapnusine. Ninye nirya, sik malye tenelamikce ning ap, malye winilamikce ning ap ara, Allah ati, yanibuka nyalamak yupu ap, anirya ara, sikce sik malye winin ning nirya batakikceba, Allah

arye aning nirya kum daneiplirye namin kipnamsile. Bukni, yata ninye do nirya ara, sikce Allah El Dib Kanye ati, yanibuka nyalamak yupu ara, Allah arye aning kum kum kipdeipnamle. Aning ara fia kum namin kipnamsile. Ayupu nirya awamlya deice uk wenepnamsile.

³²Yata nang do nirya, sikce nada Ninye Mi Koprop Atonunye ati, malye yupu nyapnice ninye ara, sik malye nyapnice ning ara batakiyceba, Allah arye sik malye nyanyak yupu kum daneiplirye, aninye ati namin kipnamle. Bukni, sik anang arye, Allah El Dib Kanye, el fil dolye ning ati, “Aning ara, Isa Mutuku Dongonye el mikip deice arye fil donyake,” nyabuka, malye yupu nyabikcop ura, atalak noutamak ababye, aminyan doyanamle talak nirya ababye, Allah arye sik malye nyanyak yupu ara, kum daneiplirye kum namin kipnamle. Aning fia tuba awamlyeba, aninye wenepnamle. Ayupu nyanyak ning ara, kum lyepmanto ning unyaka ati nyapsine. Yesus arye nyabuk.

Yesus arye ayupu nyalamuk ara, Musa sekamuk yupu peterena deiyok nang arye, “Yesus ara, Isa Mutuku Dongonye talibuka mikip deice arye fil dolule nyanmekata ati,” nyabuk.

Yesus arye yo duk mouna ati, domona yupu nyabuk

³³Yesus arye nyabuk.

Duk moulamle yo nirya ara, ‘Yatato yo duk mouamnya’ tenen, duk mouamlya eibibyeop ura, urasin kel kibibnirye, adip aryuk, ‘Ayo el yala anye, ayo ara, el yala anye,’ tenen, kel kinyabe. Yo duk mouamlya deice arye, kel kinyaba anye arye, yo duk teleb ning mouplyop ura, ‘Ayo ara teleb yo,’ tenenyabe. Duk malye ning mouplyop ura, ‘Ayo ara malye yo uka,’ tenenyabe. Aning ati ara, na wininye ning teneipdenululume. ³⁴Anggunda, kwatima duknupmalya ani ninye olamle touk winilulum nang. Anggunda kanye talima fia malye winilulum nang anye arye, yata ubuka teleb yupu nyaptum do? Yata nang do nirya, sik talimak wamlye ning deice, si bam bol arye yupu nyanyake. ³⁵Sik teleb nang ara, sik talimak teleb ning wamlya deice arye, teleb yupu uk nyanyakke, telebuk wininyake. Sik malye nang ara, sik talimak malye ning wamlya deice arye, malye yupu uk nyanyakke malye uk wininyake.

³⁶Aning ati ara, na dipkoprop nyapsine. Allah arye ninye nirya bokuka wenepnamle talak ara, malye nyalamak yupu ap, moubuka tenena kum dib aryuk, talya nyaltakalamak yupu ap nirya ara, “Deiyok ara ani, anye,” nyabuka, adip aryuk Allah kekenak ati, ninye tonok-tonok arye, sik bidamnye aryuk lakak laka nyanamake. ³⁷Ati, anggun nyalulum yupu teleb uplyop ura, Allah namin kilinamsie kum wenepnamsile. Bukni, anggun nyalulum yupu malye uplyop ura, Allah kum namin kilinamsie, wenebuka dopnamsile. Anggun talimak upliba winilamlum touk Allah arye yupu lipsisikuka bokeipnamsile. Yesus arye nyabuk.

‘Yesus ara, dipkoprop Allah el Mi do?’ tenen, ninye kum winipmanto fil ap, sirya dakna ning winina ati, morobik yupu
(Lukas 11:29-32; Lukas 11:24-26)

³⁸Nyabukop ura, sik Farisi nang ap, Musa sekamuk yupu, mem yupu peteren deiyok nang ap, Yesus ati tamubuka nyabik. “Yesuso ance sirya dakna fil doptumba, eiptibye,” nyabuka nyaldena ati nyabik. Anyabik ning ara, ‘Yesus elda, Allah mikip deice arye fil kum dolule. Elda, talinye binya,’ tenebika ati, nyabik. ³⁹Nyabikop ura, Yesus arye anang ati nyabuk.

Anggun witalak ululum nang ara, Allah yupu yaniltana uk ululum nang anya arye, yuk ning ati kanye deibuka talilulum nang. Na ti diba kum tenenululum nang anya arye, anggun winilulum ning atonun ning nyapnusine. Ara, anggun malye nang arye, sik min domikce kilapu batakuka, talya kil yolamaka atonun winilulume. Anggunce na bataknuluma ati nyapsine. Ati, sirya dakna fil ap, ninye kum winipmanto fil tonap kum fil dopnusine.

Allah yupu laka nyalamuknye Yunus ulamuk talak winibuk ning atonun ning ara, aminyan winipnamle ning ara eipnamlume. Yuk ning tonap kum arepnamsine. ⁴⁰Weik mekin bal arye Yunus amkorokukba, mekin bal mun fumbisik ara, like winilye umoka ani, amekin bal arye Yunus el nong dukdonokuk. Winibuk touk, nada, Ninye Mi Koprop Atonunye tuku fum unmanya ani, like winilye akunum upyop ura, kam buknamne. ⁴¹Niniwe mutuku nang ara, ‘Yunus mitikto mambulnye,’ tenelamik bukni, Allah yupu peterebukba, kekebikce, sik malye ulamik ning batakik.

Winibika anya arye, Allah arye ninye nirya bokuka wenepnamle talak ara, Niniwe mutuku nang arye tikuka, anggun witalak umunye nang ati, “Anggunda, malye ulamlum nang atia,” nyabuka lak akarye nyapnamsiyake. Yunus mitikto mambulnye peterebukba deice arye, Niniwe mutuku ninye diba tenebik bukni, witalak ara, weik mambulnye bira, na akunum yase bukni, tuba diba kum tenenululume.

⁴²Aning atonun ton, weik ninye deiyok kil, Seba mutuku talyamuk kil arye,^d ‘Raja Salomo weik kel arye nyalulul yupu ara, na ton kekeptinge’ tenen, fia karen mutuku bukni, el mutuku batakuka Salomo dam kekelbiyuk. Winibuka ati, Allah arye ninye nirya bokuka wenepnamle talak ara, akil tikukapliiry, anggun atalak winimunye ninye ati, “Anggunda fia malye ulamlum nang atia,” nyapnamsile.

Na dipkoprop nyapsine. Akil arye karen mutuku arye, ‘Salomo yupu kekepnun’ tenen, biyuk. Dipkoprop ara Salomo mitikto kelnye bukni,

^d **12:42** *Seba mutuku* yupu ara 1 Raja-Raja pasal 10 noutamak elilulume. Witalak amutuku bukni, yuk si Yemen mutuku nyanyake.

nada, weik kelye birye anggun kan-kan akunum yasi bukni, tuba na ti diba kum tenenululume. Ati aning ara, Seba mutuku talyamuk deiyok kil arye, anggun winitalak winilulum nang ati, wenepnamsile.

Yesus arye sik Farisi nang ap, Musa sekamuk yupu peteren nang ap ati, nyabuk. ⁴³Nyabukop ura, ayupu ton nyabuk.

“Anggunda, kanye mouplulume. Isa mer nirya ninye talima noutam talyamsilya ani, kutukuka balirye, ‘Dana ak didik septinye do?’ tenen, mek fia kumak balamlya ani, teleb ak kum eiplyop ura, ila tamubuka el min arye talyamuknye dam yangalule. ⁴⁴Winipmanto ara, yanuka dinmaliba, el min arye ulamlye aik noutamak ara, amsuna ap, delin ning nirya ap, teleb wamlirye, ninye ton una kum ati, ‘E, anyaik ara lo tuba upmala ati, asukum uk unamne,’ tenebuka ulule.

⁴⁵Utenebukce, elda mitikto yu bukni, weik yu isa tek barye binuka doyaliba, anye el talima noutamak wekuka unamake. Anye el talima talyamuk ning ara, min arye mitikto malye ulamuk bukni, winitalak ara, fia weik malye unamle.” Yesus arye nyabuk. [Ara, Yesus arye, “Ayupu nyapmasin touk anggun babye, min arye malye winilalum ning mitikto akunum batakum bukni, talima lo upmasil ning ara, Allah arye ninye nirya talinamle talak nyasinye yupu ara, kum talipmunyop ura, ‘Aminyan ara fia malye upmunyak’ tenen, nyabuk.]

Yesus arye, “Na nin yapu atonun kilapu ap, na weit yapu atonun nang ap, anggun uka,” nyabuk yupu
(*Markus 3:31-35; Lukas 8:19-21*)

⁴⁶Yesus anyaik bukmokce, awekmek nang ati tuba nyanmok talak ara, el lin koprop ap, el weit yapu koprop ap arye, ‘Yesus ap yupu taliptibye’ tenen, Yesus dam yayik. Aik yanuka tikikce, ‘Yuk nang arye Yesus binuka nyapdeipnunyaka’ tenen, nyabik. ⁴⁷Anang arye, Yesus ati nyabik. “An nin ap, an weit yapu ap, asik dam tikilyanmakce enmakiyake,” nyabik. ⁴⁸Nyabikop ura, Yesus arye, ‘Na nyapne yupu ara sik moubuka tenepnamak’ tenen, anang ati asipdeyuk. “Na nin yapu ap, na weit yapu ap ara, yata ninye do?” nyabuka asipdeyuk. ⁴⁹Nyabukop ura, Yesus arye el yupu kekebuka el melibuka balamik nang ati, taruk dum bupukukce, ayupu nyabuk. “Na nin yapu ap, na weit yapu ap ara, anggun aunmalum ninye, anggun akunum aunmaluma. ⁵⁰Yata ninye do nirya, Allah arye ‘Wininamake,’ tenelul touk fil dolamikce ninye ara, sikda, na weit yapu ap, na weit kilapu ap, na nin yapu ap, atonun unyake,” Yesus arye nyabuk.

Yesus arye tonoknye yo duk doknin banmoka ati, nyabuk yupu
(*Markus 4:1-20; Lukas 8:4-15*)

13 ¹Asum aryuk Yesus arye anyasik batakuka, Galilea mekwen dam bukuka peterenmok. ²Peterenmok bukni, el dam yanuka wekmek

nang ara, yupa fia weike bulubuka yanmeka ati, Yesus ara mekwen deice kup-kup ak, mek lia yo deice bukmokce, amekwen lil kwa koprop tikuka wekmek nang ati, el yupu peterenmok. ³Peterenmok talak ara, domon yupu ton weik arye peterenmok. Apeterenmok domon yupu noutamak arye, ayupu ton nyabuk.

⁴Anggun kekeplulume, tonok sum tonoknye birye wa wibuka, yo duk doknin banmok. El yo duk doknin banmokak, ton ning ara, el doknin banmok bisik noutamak sakmok. Sakmok bukni, talya maka yayikce, yanuka ayo duk bubuka dodibik. ⁵Ton ning ara, doknin banmok bukni, keil deice ak mirin tuku mitikanun wamukak sakuk. Sakukce daupnin balamuka ani, mirin tuku mitikanun uk wamukak arye, minopce pabuk. ⁶Pabuk bukni, yating tukwak teleb ubuka kum binmanto wamuka ati, kiting yanuka donokuk ura, kiting bupu arye sisal lebuka koulubuk.

⁷Atalak bukni, ton yo duk ara doknin banmok bukni, tirmaka weiyang-weiyang kan-kan noutamak arye sakuk. Dawamuka ani, pabuk bukni, tirmaka weiyang-weiyang arye welebukce, apamuk ning koupdongobukce, angkalung kipdongobuka, wen-wen alamuk. Wen-wen alamuka anya arye, duk kum moulamuk. ⁸Aning ara, duk kum moulamuk bukni, yo duk ton doknin banmok ning ara, mirin tuku teleb ak sakuk. Mirin tuku deice sakuk ning ara, pabukce nebukop ura, duk teleb ubuka moulamuk. Yo duk tonok-tonok sakuk bukni, aduk tonok arye pabukce moulamuk ara, ton ning ara 30 moubuk, ton ning ara 60 moubuk, ton ning ara 100 moubuk. ⁹Yesus arye adomon yupu nyabukop ura, ayupu ton nyabuk. “Anggun amol aupmasilyop ura, ‘Ayupu deiyok ani’ tenen, kekepmanto ninye ara, kekeplulume,” nyabuk.

¹⁰Ayupu akunum nyabukop ura, aminyan Yesus el yuk unmok talak ara, Yesus el wipdeiamuk nang, sik 12 nang arye, el dam yanuka asipdeyik. “Naie, talya yuk ninye ati domon yupu deice arye nyaminya ara, yata ati do?” nyabuka asipdeyik. ¹¹Asipdeyikbuk, Yesus arye tamubuka nyabuk.

Allah arye ninye weike lyeplirye, sik kanye talima talinamle nyasunun yupu ara, Allah arye nyapdeiamnuk touk, na mapu anggun ti yupu nong laka nyasunune. Bukni, yuk talya ninye ati ara, na yupu dib tenebuka, moubuka kum kekenyaka ati, aninye ati domon yupu arye, nong bola deice uk nyanune. ¹²Yata ninye do nirya, Allah yupu kekena ati, Allah arye kel bikna deiyok ning arepliba, moubuka kekekiry, aning uk batakna kumce, talibuka unyak ninye ara, Allah arye kel bikna deiyok ning weik arye tabakuka arepliba, weik arye kel biknin banamake. Bukni, yata nang do nirya, ‘Ayupu ara nun like’ tenen, amol deice kekeltakakiry, Allah yupu kum talibuka unyak ninye ara, sik min arye mitiktonun bikamikce ning babye, kum danamle. ¹³Aninye ati domon yupu deice aryuk nyanuna ara, deiyok nyapnusine. Ara,

‘Na wininye ning ara, elininyak bukni, ‘Deiyok anye,’ tenebuka kum biknyake. Na nyanye yupu ara, amol deice aryuk kekenyak bukni, ‘Deiyok ani’ tenen, moubuka kum kekenyake. Lik ati, talya kekeltakanyake.’ (Yesaya 6:9)

¹⁴Sik wininyaka ara, Allah yupu laka nyalamuknye, nabi Yesaya arye, ‘Wininamak’ tenen, nyalamuk touk wininyake. Yesaya nyalamuk yupu ara ani.

‘Amol arye talya kekeltakanamlum bukni, nong noutamak deiyok ning ara, fia kekebuka kum bikinamlume. Asing arye bola deice uk elinamlum bukni, ‘Deiyok anye,’ tenebuka, fia kum bikinamlume. ¹⁵Sik awininamaka ara, talya ati kume. Sik kanye talima fum tam lik upliba, ‘Kekena nun lik’ tenen, akunum batakanyake. Wininyaka anye arye, aninye ara na yupu ‘Lik’ tenen, mitikanun uk kekenyake. Sik talima fum tam lik upliba, ninye asing arye bita kum elilamak atouk akunum wininyake.’

‘Aning-aning nirya kum winilamtingop ura, asing arye teleb kibuka eipnamtinge, tonda amol arye teleb ubuka kekenamtinge. Sik kanye talima ayupu nong noutamak ‘Deiyok ning ara, anye’ tenen, teleb ubuka kel biknamtinge. Sik kanye talima teleb ubuka kel biklamtingto ura, sik malye wininyak ning batakuka, balye tamubuka, na tam kipningba, na arye sik ti teleb kipdeiptinye.’

(Yesaya 6:9-10)

“Yesaya birye nyalamuk touk anang ara, wininyake nyapsine.” Yesus arye el mapu ati nyabuk.

¹⁶Yesus ayupu nyabukop ura, ayupu tonap nyabuk. “Bukni, sik anang wininyak touk, anggun na mapu ara aning kum wininamlulume. Na mapu anggunda, asing arye teleb ubuka elilulume. Anggun winitalak umunce, na donye fil nirya eililulum ning ninye ara, anggunce aning-aning nirya, fia mambul ning eliluluma ati, anggunda fia mambule. Ati, fia teleb kanye bobuka unamlulume. Anggunda amol arye teleb ubuka kekenululume. Ati, anggunda fia teleb kanye bobuka unamlulume.

¹⁷Na dipkoprop nyapsine. Allah yupu laka nyalamik nang, sik nabi-nabi nang weik ap, lipsisikuka winilamik nang weik ap, anggun eililulum ning ara, fia patalamuk ati, ‘Se aning eiptibye,’ tenelamik bukni, kum elilamik. Tonda, na mapu anggun kekelulum yupu ara, minop talak ulamik ninye fia patalamuk ati, ‘Se aning kekeptibye,’ tenelamik bukni, kum kekelamik. Ati, winitalak anggun teleb ubuka kekena ap, elina ap umunye nang ara, anggunda, fia mambul anye arye, fia teleb kanye bobuka unamlulume. Allah arye teleb kilinamsile.” Yesus arye el mapu obarye (12) nang ati nyabuk.

¹⁸Ayupu nyabukop ura, ayupu ton nyabuk.

Anggunda teleb ubuka kekenululum nang anye arye, yo duk yamubuka doknin banmoknye, nyapmanu yupu ara, deiyok laka nyapnusine.

Adomon yupu nyapmasunu ning ara, nong laka nyapnusine. ¹⁹Ura, yo duk dokninbanmok bukni, bisik noutam sakmok ning ara, Allah yupu peterebik bukni, yuk ninye arye, ‘Kekepnyup,’ tenebikibuk, bita kum kekenyake. Ara, Isa Mutuku Dongonye, malye winina deiyoknye birye, adip aryuk sik talima noutamak arye, ayupu dalubuka dololule. Dopropliba, aninye dib kum, tenenyake.

²⁰Ton ninye ara, yo duk keil deice sakamuk touk, Allah yupu peterenyak bukni, kekebikirye, dib tenebuka kanye deibuka adip aryuk ayupu dolonyake. ²¹Dolonyak bukni, yo yating tukwak teleb ubuka kum biyuk arye, koulubuka atonun, aninye ara, Allah yupu fia talipmubuka kum dolonyakce, minopce batakanyake. Ara, dib tenenyaka ati, yuk nang arye yu upliba, ikin ning sik nong deice deibica ati, adip aryuk batakaldongonyake. Tonda, ikin ning yalyop ura, aninye ara ikin kanye bobuka, Allah yupu kekemakce ning ara, adip aryuk batakaldongonyake.

²²Ton ninye ara, Allah yupu kekebuka dolonyak bukni, yo duk tirmangka weiyang-weiyang kan-kan sakmok ning atonun wininyake. Ara, tukwak mutuku noutamak arye, ‘Aning doproptinirye teleb uptinye do? Yuk ning aupnutuba teleb uptinye do?’ tenen, teniltona ap, kanye bokoltona ap deice arye, Allah yupu batakalogonyake. Tonda, “Bona weik doproptinirye, telebuk uptinye,” nyabuka, sikce sik bidamang arye, tilila yupu talya nyaldanyake. Tonda, aning-aning nirya weik patapliba, ‘Aning ton doproptinye, aning ton winiptinye,’ tenenyak deice arye, lik upliba Allah yupu batakalogonyake. Wininyaka ara, tirmangka weiyang-weiyanga arye apamuk ning koupdongobukce, angkalung kipdongobukba, wen-wen alamuk touk, talya tukwak ning aning-aning nirya fia tenenyak deice arye, Allah yupu kekelamikce ning ara, batakiceba duk kum mouplirye, talya urdem uk bolule. Ara, teleb ubuka kum kekekiryeye, Allah yupu fia kum dobolbanyaka ati nyapsine.

²³Aninye ara wininyak bukni, yuk ninye ara, yo duk yamubuka doknin banmok bukni, mirin tukwak sakmok ning ara, duk weik arye moubuk ara, ton 30, ton 60, tonda yupa weik 100 moubuk touk wininyake. Sikda, Allah yupu kekebikirye, dib tenebuka kanye deibuka, fia dolonyak ninye ara, yo duk weik arye moubuk touk, na ti dobolyananinyak nang ara, Allah el fil weik arye donyake. Yesus arye el mapu ati nyabuk.

**Yesus domon yupu deice arye, teleb ning ap, talye
palamle ning ap, pabuka ati, nyabuk yupu**

²⁴Ayupu nyabukop ura, domon yupu tonok ton nyabuk.

Allah arye ninye mutuku-mutuku noutamak nirya, ninye weik lyeplirye sik talima talilya ara, anyapnusin ning atonun ulule. Wa wina deiyoknye birye, wa wibuka teleb yala ning dokuk. ²⁵Dokukop ura, el ap, yuk nang ap mapmek talak ara, el ti lik tenelamik nang arye, el teleb yala ning

wa wibuka dokmok ak, yuk talye palamle ning yanuka turukuka dokik. Dokukabikce, yukak biyik. ²⁶Sik daulamik bukni, el dokuk ning pabukce, welelamuk ani, duk moubuka muruk kibuk. Muruk kibukop ura, talye nang arye turukuka dokamik ning babye welelamuk ani, duk moubuka muruk kibukop ura laka ubuk.

²⁷Atalye palamle ning laka kibukop ura, awa deiyoknye, el wa fil melin nang arye el ti nyabik. “Naie, atalye pabuk ning ara, dan tam arye yayuk do? Ance teleb yala ning kum kouplum arye, amalye ning talye pabuk do?” nyabik. ²⁸Nyabikop ura, awa deiyoknye birye tamubuka nyabuk. “Aning ara kume. Na ti lik teneninyak nang arye dokikba, pabuke,” nyabuk. Nyabukop ura, el melin nang arye nyabik. “Ati, nun bibirye atalye palamle ning nirya kwini buka donoknuyap do?” nyabik. ²⁹Nyabikbuk, elce tamubuka nyabuk. “Kume, malye ning kwenepmunye talak ara, ‘Na arye teleb ning koupse ning ap, talya talbalibuka kwini plopmunyak’ tenen, aning nirya awamlyani, wisiplye talak uk, malye ning kwini plopnamabe. ³⁰Dauamli bukni, teleb ning ap, malye ning ap, wisiplyop ura, dakuka lipnamap talak arye, na melin nang ak nyapnamne, ‘Anggunda talye palamle ning kwini munce, koubuka uku dongopnamlume. Winipmunyop ura, teleb ning nirya bulubuka, na din ning delin aik delilyanamnlume,’ nyapnamne.” Wa deiyoknye birye nyabuk.

Yesus arye Galilea mekwen dam bukmokce, ninye weik bulubuka wekmek nang ati adomon yupu nyabuk.

Yesus arye, “Fia mitik yo duk bukni, paplirye weik yo nelule,” nyabuk yupu
(Markus 4:30-32; Lukas 13:18-21)

³¹Yesus arye winipmanto yupu nyabukop ura, awekuka kekenmek nang ati, ayupu ton, winipmanto ning tonap nyabuk. “Allah arye ninye weike lyeplirye, sik talima talinamle ara, ‘Anggun tenebuka kel biknamlum’ tenen, winipmanto yupu ton nyapnusine. Kabalye yo duk^e mitik bukni, weik nelamle touk, Allah arye ninye weike lyeplirye sik talima talinamle nang ara weik kipnin banamle. ³²Kabalye yo duk, mitik duk arye dokamiki bukni, beteklirye nepnin balamlya ani, neplyop ura, taruk weik arye leklyop ura, ataruk deice ara, yuk-yuk maka nirya, sik yo

^e 13:31 *Kabalye yo duk* – Minop talak sekik buku noutamak ara, kabalye duk kum sekik. Aning ara sik mutuku kum ulamuk. Sikce sekik ning ara, fia mitik duk, tai duk atonun ning sekik. Bukni, aning kouamikba, weik yo nebuka anya arye, anggun Eipomek nang moubuka biknamak tenen ning ati ara, winipmanto ning ati, kabalye yo duk sekupe. Deiyok ara, duk ara fia mitik bukni, aminyan talak neplirye, tiklamle yo ara weik cang yo tiklamle atia. Allah yupu ara, mitikto ning bukni, aminyan ara ninye fia weik dib tenebikcop ura, Allah el mapu ara fia weik kinin banamake.

koak ati, bulyakirye manyake. Ayo duk ara mitikto duk ulul bukni, aduk paplirye ayo ara weik arye nelule. Aning atonun, Allah arye ninye weike lyeplirye sik talima talinamle ara, deiyok bikna talak ara, mitikanun ulul bukni, fia weik kipnin banamle,” Yesus arye nyabuk.

³³Ayupu nyabuknye ara, ‘Allah arye ninye weik lyeplirye, sik talima talinamle ara, weik upnamle ning ara, kel kipnamak’ tenen, winipmanto yupu ton nyabuk.

“Roti nena deiyok ning ara, el si ara ragi, fia mitik ninguk ulul bukni, aning roti bun deice deibice ura, weik arye nelamle touk, Allah arye ninye weik lyeplirye, sik talima talinamle ning ara, deiyok kouplye talak ara, mitikanun ulul bukni, aminyan talak ara fia weik upnin banamle. Danatam, danatam nirya weik kipnin banamlarya. Tonok kil arye, ‘Roti dapnun’ tenen, roti telen ning deipmok kan-kan arye, roti nena deiyok ning dobuka, roti bun noutamak dongobuk ura, akan-kan dabanmoka ani, roti ara weik arye nebuk. Awinibuk touk, Allah arye ninye weik lyeplirye sik talima talilya ara, atonun weik upnin banamle,” Yesus arye nyabuk.

³⁴Winipmanto yupu aning winibuka nyabuk touk, Yesus arye peterenmok talak ara, ‘Ayupu kekepnuyap’ tenen, abulubuka talye wekmek nang, sik kekena ati, domon yupu ap, winipmanto yupu ap, weik tonap peterenmok. ‘Ayupu deiyok anye,’ nyana kumce, domon yupu deice aryuk peterenmok. Laka arye kum peterelamuk. ³⁵Domon yupu deice aryuk peterenmok ning ara, Allah yupu laka nyananye, nabinye nyalamuk touk upnamuka ati, peterelamuk. Nabi Asap arye nyalamuk yupu ara, ani.

‘Allah arye, “Na peterenamne talak ara, domon yupu ap, winipmanto yupu ap adeice aryuk peterenamne. Allah arye aning-aning nirya kintinipdeibuk talak, aniryuk dipdongobuka anoutam talak nirya, Allah arye duknyamuk ning nirya ara, winitalak ara, laka kibuka nyanamne,” nyabuk.’

(Mazmur 78:2)

Ayupu ara, Mazmur yupu noutamak, nabi Asap arye nyalamuk.

Yesus arye, “Teleb ning ap, talye palamle ning ap, pabuke,” nyabuka domobuk yupu ara, Yesus arye ayupu nong ati laka nyabuk yupu

³⁶Yesus arye atalye bulubuka wekmek nang ati, adomon yupu nyabukop ura, anang asukum uk bataukuce, el yuk aik wekelbiyuk. Aik akunum wekukop ura, elce wipdeiyamuk nang, sik 12 nang el dam yanuka asipdeyik. “Naie, tonok wa noutamak, teleb ning ap, malye ning ap, ansinibuka pabuk nyapmom ning ara, yupu nong laka nyapsilyame,” nyabuka morobik. ³⁷Asipdeyikop ura, Yesus arye el mapu 12 nang ati laka nyabuk.

Teleb yo duk pabuk ning deiyoknye bira, na Ninye Mi Koprop Atonunye, na tia. ³⁸Wa nyapmanua ara, tukwak mutuku im sirya mutuku

sirya nirya ati nyapmanue. Teleb yo duk ara, Allah akunum lyebukce sik talima talilul ninye ati nyapmanue. Malye yo duk pabukce, palamuk ning ara, Malye winin ning Deiyoknye, Isa Mutuku Dongonye el yupu kekebuka fia malye winin nang ati nyapmanue. ³⁹Wa deiyoknye lik tenebukce, malye yo duk dokuknye bira, ara, Isa Mutuku Dongonye el tia. Wa noutamak dokamik ning wisibuk ura kwiniwikce, bulubuka tonok ak deibik talak ara, sirya daknamle talak winipnamle ning ati nyapmanue. Koun ning wisibuk ning bulubuka tonok ak deibik ning ara, na im deice fil don nang, sik malaikat arye winipnamak ati nyapmanue.

⁴⁰Sik wa win nang arye, talye palamuk ning malye ning kwiniwikabikce, koubuka uku dongobik touk, na Yesus arye ninye mutuku-mutuku nirya ati yupu lipsisikuka bokolin talak, ninye nirya bokukabnirye, yuk-yuk deipnamne talak ati nyapmanue. Diba tenena kumce, malye uk wininyak ninye ara, bokukabnirye, wenebuka uku din mutuku dongopnamne ati nyapne. ⁴¹Ara na Ninye Mi Koprop Atonunye birye, na im deice fil don nang malaikat dopdeipniba, Allah arye taliliba, mutuku-mutuku nirya unamak nang kan-kan arye, malye unyak ninye ap, malye una deiyok ning ap, wibuka dopropnamake. ⁴²Doprobikirye, amalye unyak nang ap, malye ning nirya ap dobuka, uku din mutuku dopkwetepnamake. Dopkwetebikiba, uku dilye talak ara, aninye arye kanye imun kanye bobuka, weik arye engenamake.

⁴³Aning akunum winibikop ura, Allah arye talyamukba, diksukumuk wininyak ninye ara, Allah ap, im deice unamake. Kiting deiplirye, dirina weik ulamle touk, diksukumuk wininyak ninye ara, im deice unamak talak ara, Allah arye aninye taliplirye, im deice unamle mutuku noutamak ara, sikda weik mambul ninye anya arye, fia teleb ubuka unamake. Ati, anggun amol aupsilyop ura, ayupu kekepmanto ululum nang ara, na nyapmasin yupu moubuka kekepnululume. Yesus arye nyabuk.

**Domon yupu arye, tonoknye talye winiplobukce, dekna
weik ning eibukce doprobuk ati, nyabuk yupu**

⁴⁴Ayupu nyabukop ura, domon yupu tonap nyabuk. "Allah arye ninye weike lyeplirye, anggun talima talisilye atonun ning ara, nyapnusine. Yuk nang ara, 'Malye nang arye nun dekna weik ning ubula dopropsikcak' tenen, tuku palibuka duknyamik bukni, tonoknye talye mangkau asa banmokce, aduknyamik ning eibuk. Eibukce, 'Yuk nang arye, adekna weik ning doprobikcak' tenen, elce aning dobuka ila tonap moubuka duknubuk. Dunubukce, utenebuk. 'Awa tuku deknypop ura, adekna weik ning awa noutamak, tuku palibuka duknubuka deiamuk ning ababye doproptinye,' tenebukce el min arye talyamuk ning nirya dekukabukce libuka, awa talyamika deiyok nang dam biyukce, ayo bok deice arye awa

tuku dekuk.” Yesus arye nyabuk. Tonda, ayupu nyabukop ura, ayupu atonun ning ton nyabuk.

⁴⁵“Tonok dekna deiyoknye birye, dekna weik ning bace atonun ning, el si ara mutiara ati, ‘Mutiara deknun’ tenen, fia epnin banmok. ⁴⁶Epnin banmoka ani, fia weik teleb ning eibuk. Eibukce aning fia patabukba, ‘Adekna weik ning mutiara deknun’ tenen, el min arye talyamuk ning nirya dobuka, yuk nang dam dekukabukce, elce eipmok ning, dekna weik mutiara dekuk.” Yesus arye adomon yupu nyabuk.

Domon yupu arye, mekin bal dona ati nyabuk yupu

⁴⁷Yesus arye adomon yupu nyabuk.

Allah arye ninye weik lyeplirye, sik talima talinamle ning, atonun ning ara, adomon yupu nyapnusine. Tonok talak ara, ninye arye, ‘Mekin bal doproprnyap’ tenen, mekin bal yangan ning mekwen noutamak dongobikba, mekin bal aning-aning nirya weik arye wekik. ⁴⁸Wekikce, akunum langdibuk ura, amekin bal donmeka deiyok nang arye, mekin bal yangan ning erebuka dobukabukce, mekwen liikwa binuka deibik. Deibikce, mekin bal nirya dipdeyikce, mekin bal wibukabikce, mekin bal teleb ning dobuka, mekin bal lin ning fumbisik dongobik. Bukni, malye mekin bal ara, talyak buru tam uk donokik.

⁴⁹Anang arye mekin bal wibuka dipdeyikce, ton ning ara dokola deibuka, ton ning ara buru donokik touk, Allah arye sirya daknamle talak atonun winipnamle. Ara, el im deice fil don nang malaikat arye, ninye mutuku-mutuku nirya bokuka deibikirye, “Malye uk unyak ninye ani, telebuk unyak ninye ara ani,” nyabikirye, bokuka yuk-yuk deipnamake. ⁵⁰Nyabikirye, malye un ninye ara, uku din mutuku donokice ura, uku arye dinmaliba, aninye ara, kanye imun kanye bobuka weik arye engenamake. ⁵¹Ati, Allah arye ninye weik lyeplirye, anggun talima talinamsil ara, aning atonun ulule nyapmasin yupu ara, kekepmalum do? Yesus arye wipdeiyamuk nang, el mapu 12 nang, ati nyabuk.

Nyabuk ura, sikce, “Nun kekepmabe,” nyabik. ⁵²Nyabikop ura, Yesus arye nyabuk. “Aning ati ara, winipmanto ara, tonok aik deiyoknye birye, el dokola ning delilu ak, anyaik fum arye, minop talak deiyamuk ning babye, winiryuk deipmalye ning babye dobuka lakak deiplirye, fil dolamle touk, sikda, Musa sekamuk yupu peterena deiyok nang ababye, atonun unamake. Ara, ‘Allah talisilirye winilye ning anye,’ nyabuka, nyasinye yupu kel kiplumce, na mapu upmunyop ura, minop nyalamik yupu ap, na winiryuk nyasinye yupu ap dukdongobuka peterenamllume,” Yesus arye nyabuk.

Yesus arye, “Allah yupu laka nyananye, nabinye bira, el mutuku kopropa nang arye el ti si kum erenyake,” nyabuk yupu
(Markus 6:1-6)

⁵³Yesus arye adomon yupu nirya akunum nyabukop ura, amutuku batakuka, tuku bisik arye yukak mapnin balamuk. ⁵⁴Sik mapnin

balamika ani, Yesus el mutuku koprop, Nasaret mutuku koulukik. Koulukuka biyikke, Nasaret mutuku noutamak daulamik bukni, Yahudi yala nang arye Allah yupu peteren aik, Yesus wekukabukce, Allah yupu peterenmok. Peterenmok talak ara, fia teleb ubuka peterenmoka ati, el yupu kekenmek nang arye ngalukunmek. Ngalukunmekce nyanmek, “Anye bira, el peterenmal yupu ara, dan mutuku arye kel kibuk do? Yata weik kel bikna nang arye peterebikba, weik kele kibukce teleb ubuka peterenmasil do? Yata mutuku arye ninye kum winipmanto ning, mambul fil dona ati, mikip deiyok ning arebikba afil donmal do?” nyabuka ngalukunmek.

⁵⁵“Anye bira, ara nun mutukunye birye, Yusuf elce deibuk mi do? Anye bira yo cakuka marikna memebuka dolinye koprop ulule. Diba de, nun makal kil Maria arye deibuk mi ara, el akunum atia. El weit kopropa capu ara, Yakobus ap, Yoses ap, Yudas ap, Simon ap, sik amutuku unyake. ⁵⁶Tonda, el weit kilapu ababye, nun ap aunmabe. Anye bira, nun akunum kel kibupa anya arye, dan mutuku kel kibukce yanuka peterenmasil do?” nyanmek.

⁵⁷Nyabikke, Yesus ati yu ubukba, ‘Anye bira nun lik’ tenen, Yesus ati batakik. Winibikop ura, Yesus arye anyaik wekmek nang nirya ati nyabuk. “Allah arye aminyan winipname ning laka nyanyak nang, nabi nang arye sik mutuku kopropa batakuka yuk mutuku bikcop ura, yuk nang arye sik yupu kekebuka, kanye deibuka kinyake. Bukni, nabi nang arye, sik yala nang ap, sik asik nang ap, sik mutuku nang ap arye, kum kibikirye batakanyake,” Yesus arye nyabuk.

⁵⁸Yesus el mutuku koprop nang arye, el ti lik ubuk ning ati ara, amutuku noutamak nirya ara, ninye sirya dakna fil ap, ninye kum winipmanto ning ap, weik arye fil kum dobuk. Mitikanun uk fil dololamuk. Winibuk ning ara, Nasaret mutuku noutamak ulamik ninye nirya, sik dib kum tenebik ati, Yesus arye el mutuku kopropa noutamak ara, ninye kum winipmanto fil weik arye kum dololamuk.

Raja Herodes arye Yohanes Pembaptis ya ngang sekuk yupu

(Markus 6:14-29)

14 ¹Yesus el mapu arye peterepra balamika ati, ninye weik arye, Yesus el si kekelamik. Ninye weik kekelamika ati, sikce laka nyalamikba, amutuku talyamuk deiyoknye birye, Raja Herodes^f babye kekebuk. ²Yesus el fil dolamuk ning, Raja Herodes kekebukce, walwal

^f 14:1 *Raja Herodes* Roma mutukunye bukni, sik Roma mutuku nang arye, Yahudi yala ninye ulamik mutuku nirya talyamika ati, Yesus ulamuk mutuku nirya ara, Roma mutuku memerintah deiyok nang talilamikce, Herodes dibuka deibik. Anya arye Herodes ara, Roma mutuku ninye deiyoknye ulamuk.

arye nyabuk. “Se, anye bira Yohanes arye winilule. Yohanes Pembaptis ara, ya arye ngang seklopsinye bira, akunum kam bukuke. Akunum kam bukuka ati, amikip deice arye ninye kum winipmanto ning fil dolule,” walwal arye nyabuk.

³Raja Herodes arye Yohanes Pembaptis obuka deiyok ara ani. Raja Herodes elcuk yupu nyapdeibukba, el yin talin nang arye Yohanes Pembaptis tapu koubuka deibikke, wenen aik dongobik. Herodes arye Yohanes dobuka wenen aik deibuka deiyok ara, ani. Herodes el weit Pilipus arye domuk kil Herodias ara, Raja Herodes arye dopromuk.

⁴Dopromuka ati, Yohanes arye Herodes biti nyalamuk. “Anda an weit el kil dopluma deice, Allah arye ‘Yuk nang kilapu dolona kume, winina meme,’ nyamuk yupu ara, ance yanipmalame,” Yohanes arye Herodes ati, nyalamuk. ⁵Yohanes arye nyalamuka ati, Herodes yu ubukba, elce, ‘Yohanes optinye,’ tenelamuk bukni, Yohanes nyalamuk yupu kekelamik ninye arye, ‘Yohanes ara, Allah el yupu laka nyananye, nabi ulule. Elda, telebnye,’ tenelamika anya arye, Herodes arye, ‘Aninye arye derepnikcak’ tenen, ilil ubukba, ‘Yohanes opnamne, tenepse ning ara, dawaplye,’ tenebukce, batakuk.

⁶Batakuk bukni, Raja Herodes el deiamik sum akunum ubuk ura, weik kwalina kwalibuka deibukba, el kayapu nang weik dilyayik. Sik akwalipmok ning dinmek talak ara, Herodes el kil Herodias, el kilmu mot yanuka senmokba, sik anang nirya arye, kanye deibuka dinmek. ⁷Herodes arye asenmok kilmu ati, kanye deibukce, akilmu ati nyabuk. “Yata ning do, an patapkil ning ara moropniminyop ura, dipkoprop aripnukine,” nyabuk. Tonda, Herodes arye “Talya kum nyapmakine, ance patapkilye touk nyapniminyop ura, fia dipkoprop arepnamakine,” nyabuk.

⁸Nyapdeibukop ura, akilmu anyaik batakuka, el lin ulamuk aik biyuk. Biyukce el lin Herodias biti asipdeyuk. “Nongo, Raja Herodes arye arepnamnil ning ati, yata ning moropnaman do?” nyabuka asipdeyuk. Asipdeyukba, Herodias arye tamubuka nyabuk. “Nyapnulyame. ‘Yohanes Pembaptis el ya ngang sekuka, el kisok tam pala yangan ning deice deibuka arepnutume,’ nyabuka moropnulyame,” nyabuk. El lin birye nyapdeibuk touk, adip aryuk tamubuka, akilmu Raja Herodes bukmokak binuka morobukce nyabuk. “Yohanes Pembaptis el ya ngang sekukamince, kisok tam ara, pala yangan ning deice ak yangabdeibuka, ‘Winitalak arepnutum’ tenen, patanmanile,” nyabuk.

⁹Nyabuka morobukop ura, Raja Herodes arye, ‘Se aning ara, yata wiripnun do?’ tenen, malye kanye bobuk. Malye kanye bobuk bukni, elce nyalinmok yupu ara, el kwalina dilyanmek nang nirya arye, akunum kekenmek ati, ‘Aning ara kum arepnune, kum nyaptinye,’ tenebuk.

¹⁰Utenebuka ati, Raja Herodes arye ninye olina deiyoknye biti, nyabuk.

“Yohanes el ngang ya sekuka, el kisok boyanilyame,” nyapdeibuk ura biyuk. ¹¹ Anye birye Yohanes wenena aik deamikak biyukce, Yohanes ngang ya sekukabukce, pala ning deice ak, el kisok dongobuka deibukce, akilmu dam deibuk. Bobiyukce aribukba, akilmu arye aning dobuka, el lin Herodias binuka aribuk. ¹² Aning niry a akunum winibukba, yuk nang arye laka nyabik ura, Yohanes el yupu kekebuka melibuka dobolbalamik nang kekebikce yayikop ura, Yohanes el nong dobukabikce, ninye weilamik keil deiya bobinuka weibik.

Yesus arye din ning bokuka aribukba, 5.000 ninye arye dibika ati, nyabuk yupu

(Markus 6:32-44; Lukas 9:10-17; Yohanes 6:1-13)

¹³ Yohanes ninye mek dongolamuknye obika ati, yuk nang arye Yesus dam binuka nyabikba, kekebukce bico ubuk ura, ‘Na ara ninye una kum mutuku didik selbinune,’ tenebukce mek lia yo deice wekuka bukukce, Galilea mekwen deice biyuk. El ap, el mapu sik obarye (12) nang ap, sik yuk banmek bukni, mekwen deice banuyik talak ara, yuk nang kekebikce, ‘Nun ap epdanamap’ tenen, asik dana-dana dam nang niry a arye, mekwen lil kwa bisik bik-bik abuka banmekce, Yesus binuyukak biyik. ¹⁴ Yesus ap, el mapu ap, mek lia yo lukuka delilbiyikce, Yesus tukwak tikilbiyuk ura, amutuku yupa weik wekmek ninye ara eibuk. Eibukce, awekmek ninye ati, Yesus arye bico tenebuk. Aninye arye, yukuk uk dilamuk ninye bobuka boyanmek niry a ara, Yesus arye kwetebuk.

¹⁵ Tuba kwetena ap, peterena ap, wininmok bukni, kiting kumupnuyuk talak ara, Yesus el wipdeiyamuk nang, sik 12 nang, el yupu kekebuka melibuka balamik nang arye, Yesus dam nyalyayik. “Naie, ninye kumak unmaba anya arye, kiting akunum kumupnula ati, abulupmak ninye ati, ‘Anggunda bilulume,’ nyabuka bokeibipminba, amutuku noutamak yuk-yuk aik malbitingce, sik din ning dekuka diptinge,” nyabuka nyalyayik. ¹⁶ Nyabik bukni, Yesus arye el mapu sik 12 nang ati nyabuk. “Sik aninye yuk mutuku bana kume. Anggun na mapu aryuk aninye ati, sik din ning areplulume,” nyabuk.

¹⁷ Nyabukop ura, sik 12 nang arye tamubuka Yesus ati nyabik. “Kume naio, nun din ning roti pamu barye ap, mekin bal bitinye ap, anyuk upmasila ati, yuk din ning ton kum dekeipyop ura, aninye fia weik ati, aupmasil ning ara mitik ati kum areptibye,” nyabik.

¹⁸ Nyabikop ura, Yesus arye, “Aupmasil ninguk na dam boyalulume,” nyabuk. ¹⁹ Nyabukop ura, Yesus arye nyapdeibukba, el mapu arye yupa weik wekmek ninye ati nyabik. “Anggun yupa yuk-yuk, maning deice yuk-yuk bokuka buklulume,” nyabik.

Akunum bukikop ura, Yesus arye el mapu, aroti pamu barye ap, amekin bal bitinye ap, arepnamek ning ara dobuka, im deice dipdeyuk.

Dipdeyukce, Allah ati, “Telebe,” nyabukce, aroti ara tobukabukce, ‘Na mapu 12 nang arye, abukmak ninye ati aripnuyaka’ tenen, aribuk. Tonda, amekin bal bitinye kalibuka el mapu aribukba, abukmek ninye ati, aroti ap, amekin bal ap, bokuka aripna banmek.

²⁰El mapu arye abukmek ninye ati, aning bokuka aripna banmekba, dobukabikce dinmek bukni, akunum boubukop ura, kwal batakik ning ara, dobukabikce, libuka tonok ak deibik. Yesus el mapu 12 nang arye bulubuka libuka deipmek ning ara, aling atonun ning, el si ara bakul weik ning, 12 deiyamika arye libuka deibik. ²¹Aroti ap, mekin bal ap, dinmek nang ara, kilapu mapu kum nukik bukni, sal demuk nukika ara, yupa weik 5.000 ninye dipra banmekce unmek. Abukmek nang ara sal demuk nukik.

Yesus elce yan yanibuka mekwen deice biyuk yupu
(*Markus 6:45-56; Yohanes 6:15-21*)

²²Aninye weik 5.000 nang, sik din ning aribikba dibikop ura, adip aryuk Yesus arye el mapu 12 nang ati, nyabuk. “Anggunda minopce mek lia yo arye mekwen deice banmamunya ani, mekwen otam binamalulume. Na ara, awekmak ninye ati, ‘Telebe dabilulume,’ nyapnune,” nyabuk. ²³Nyabuk ura, el mapu mekwen deice akunum biyikbuk, awekmek ninye ati, “Telebe, dabilulume,” nyabuka, amutuku batakuka, Yesus arye el yuk, ‘Allah moropnun’ tenen, amutuku deice welebuk. Yesus Allah morona uk unmokbuk, inipmanto akunum ubukop ura, Yesus el yuk amutuku deice unmok bukni, el mapu ara mek lia yo arye Galilea mekwen deice bisik noutamak banmek.

²⁴Sik ‘Otam binamap’ tenen, mekwen lilkwa batakuka, pera mekwen noutam bayik talak ara, urasin deibuka banmek. Banmek bukni, urasin deibuka banmek tam arye, weik mok piriipna yayukba, yo lakase mikip arye bukunmek bukni, asukum arye binmanto kum ubuk. ²⁵Sik amekwen deice tuba banmek ani, bereknamalya ati, tulik bisik yalamle talak ubuk ura, Yesus mekwen deice yanibuka, el mapu banmekak biyuk. ²⁶Banmoka ani, sik dam biyukop ura, sikce Yesus el mekwen deice yanibuka banmokok eibik. Eibikce, ‘Ara isa do, ninye kanya banmal do?’ tenen, sik lukdayikce ilil weik ubukba, “Dibik nang kanya yanmasil ani,” nyabuka weik arye ngalukik. ²⁷Ngalukikba, adip aryuk Yesus arye, “Na aunmana ati, anggun ilil una meme,” nyabukce, “Ilil una kumce, kanye lamapdongobuka banamalulume,” nyabuk.

²⁸Nyabukop ura, Peterus arye Yesus ati nyabuk. “Naie, an dipkoprop aunmaminyop ura, ‘Mekwen deice yayo,’ nyapnutumba, na arye mekwen deice yanibuka an dam yanune,” nyabuk. ²⁹Peterus arye nyabukba, Yesus tamubuka, “Telebe anda yalyame,” nyabuk. Nyabuk ati, Peterus ‘Yesus dam binun’ tenen, mek lia yo deice sakuka, mekwen deice yanibuka

banmok. ³⁰Mekwen deice yanibuka banmok talak ara, weik mok piripna donmokba eibukce, ilil weik ubuk arye, mekwen noutam wekukba mekwen singnipmanto ukuk ati, Peterus arye Yesus ati, “Se, naio, na melibuka doproprnyame,” nyabuka morobuk. ³¹Morobukba, Yesus adip aryuk Peterus el taruk talibuka doprobukce, nyabuk. “Ance, ‘Winiptinye do, kum do?’ tenen, kanye bokoltonmakila ara, yata ati do? Anda, na ti mitiktonunuk dib tenepmanilama arye, mekwen singnipmanto upmakile,” nyabuk.

³²Nyabukop ura, Yesus ap, Peterus ap, mek lia yo welebuka bulbirik. Mek liya yo welebuka, sik anang ap bulbirikop ura, weik mok piripna donmoka ara tunimabuk. ³³Tunimabukop ura, Yesus el mapu 12 nang arye, ‘Se’ tenen, mambul kanye bobikce, el si erena ati, ayupu nyabik. “Anda, dipkoprop Allah el Mi Koprop ulyame,” nyabik. ³⁴Mek liya yo arye mekwen deice banmekani, mekwen kup-kup otam Genesaret mutuku biyukop ura, mek lia yo binuka lukuka deibik.

³⁵Lukuka deibikce, mek lia yo deice tukwak sakuka tikilbiyik talak ara, adip aryuk sik min arye epdanmek nang aunmekce, Yesus el nong kel bikikce, ‘Yesus atia,’ tenebik. Utenebikop ura, amutuku-amutuku noutamak niryala lak nyalbanmekba, amutuku noutamak ulamik ninye niryala, kekenmekce, uk aning-aning niryala dilamuk ninye bobuka, Yesus dam boyanganmekba, kwetenmok. ³⁶Atonun ton, Yesus balamukak niryala ara, uk dilamne ninye niryala delilbalamikce, aninye arye Yesus ati, “Uk dilamnye ninye arye, an ongopmalam butum aling mouse ak bolpipkiting do?” nyabuka morolamik. Morolamikce, el butum aling kup-kup ak bolfilamik nang niryala ara, uk kwetelilamuk.

Yesus arye ninye talima malye winina ati, nyabuk yupu
(Markus 7:1-23)

15 ¹Ura, Farisi nang ap, yuk Yahudi yala nang niryala ap ara, sik din talye mangkau asa kum dilamik. Sikda, Musa sekamukce nyapdeiamuk touk, ‘Kanye talima malye upsilyak’ tenen, taruk mek liknaryuk dilamik. Sik apu yapu, Yahudi yala sik deiyok nang winilamik touk, sik babye aning uk talibuka ulamik. Aning-aning niryala tenelamika ati, tonok talak ara Farisi nang ap, Allah arye, ‘Wininamlulume, aning ara kum wininamlulume,’ nyapdeibukba Musa arye sekeiyamuk yupu peterena deiyok nang ap, Yerusalem mutuku anyuk Yesus ulamuk aik bulubuka dilyayik. Dinmek bukni, Yesus el yupu kekebuka dobolbalamik nang ara, din dinmek.

²Sik din dinmek talak ara, Farisi nang arye, ‘Kanye talima malye upsilyak’ tenen, taruk mek liklamik touk, Yesus el mapu ara taruk mek kum ilikmekce talye urdem dinmekati, Farisi nang arye Yesus ati nyabik. “An yupu kekebuka dobolbakikce nang ara, nun apu yapu arye

mem yupu nyapdeiamsika atonun, kum wininyake. Sikda, taruk mek ilikna kumce, talye urdem dinmake. Winibuka dinmak deice arye, nun apu yapu nyapdeiamsik yupu yanipmaka ara, yata deiyok ati do?” nyabik.
³Nyabikop ura, Yesus arye tamubuka nyabuk.

Sik Farisi nang ara, Allah elce “Wininamlulume” nyalilamuk ati, sik Allah yupu laka nyalamik nang sekamik yupu ara, akunum batakume. Anggunda, talye ninye arye peterelamik ning yupu uk talibuka winilulum ning ara, yata ati do? Anggunda Allah elce, “Wininamlulume,” nyalilamuk yupu batakumce, ‘Nun apu yapu peterelamik ning, ayupu uk talibuka wininamabe,’ tenemunce winimunye ning ara, laka nyapnusine.

⁴Ara, Allah arye nyapdeibukba, Musa arye ayupu sekiamuk.

‘Anggun ni yapu ap, anggun nin yapu ap, kibuka kil-kil asa arye melinamlulume. Yata kil do, yatanye do, anggun ni yapu ap, anggun nin yapu ap ati, malye yupu nyabikcop ura, wenebuka opnamlulume.’ Musa arye nyapdeiamuk. *(Keluaran 20:12; 21:17)*

⁵Musa arye nyapdeiamuk bukni, sik Farisi nang arye nyanyake. Tonoknye birye el li ap, el lin ap ati, “Aning-aning nirya arepkitinye bukni, Allah el si erena ati arepnamna ati, aning nirya ara melibuka kum arepnusine,” nyaptue. Nyapturye, el li el lin kum arelantuop ura, anggun Farisi nang ara, “Aning ara telebe, Allah ati arina ara, weik mambul anya arye, anggun nin yapu ap, anggun ni yapu ap ati, melibuka arina ara dauplule,” nyalulume.

⁶Ayupu nyamunya deice arye, Allah yupu yaniptabuka malye kilulume. Anggun apu yapu peterelamik ning kekelamlumce, peteremunya deice arye, Allah nyalilamuk yupu nirya yaniltamunce, malye-malye uk winilulum. Yesus arye sik Farisi nang ati nyabuk. ⁷Nyabukop ura, ayupu ton nyabuk.

“Allah el yupu laka nyalamuknye Yesaya arye anggun ti nyapdeiamsuk ning ara, dipkoprop nyapsuke. Anggunda talye yupu nyabuka, malye ululum nang anya arye, Yesaya arye anggun malye winilulum touk wininyak nang ati, sekdeiyamuk yupu ara anyapnusine. Allah arye nyapdeibukba, nabi Yesaya arye sekamuk yupu atia.” ⁸Allah arye nyabuk.

‘Anang ara, sik talye nyaltakne yupu deice arye, nong bol deice uk na ti si erenenyak bukni, sik kanye talima noutamak ara, dipkoprop na ti kanye deibuka kum talininyake. ⁹Na si erenyak nang ara, talya uk wininyake. Sik peterelamik yupu ara, ‘Winina telebe, winina meme,’ nyabuka nyalamak yupu ara, ninye kanye aryuk peterenyak yupu uk peterenyake, nyabuk.’ *(Yesaya 29:13)*

“Allah arye nyapdeibuk ura, Yesaya arye sekamuk.” Yesus arye Yesaya nyamuk yupu dobuka, anang ati nyabuk. ¹⁰Yesus arye nyabukop ura, awekmek ninye nirya ati, ayupu tonap nyabuk. “Na dam bulubuka yalulume,” nyabukba bulubuka yayikop ura, ayupu nyabuk.

“Anggun nirya na yupu moubuka kekepmunce, ‘Deiyok ani’ tenen, kel kiplulume. ¹¹Yata ning do nirya, ninye nong buru tam ulye ning nirya

ara, dilulumba, si bam bol bisik arye anggun mun fum wekesulul bukni, adeice arye anggun talima malye kum winilulule. Aning kum bukni, anggun talima ap, anggun kanye ap noutamak uleye ning ap, malye tenelulum ning ap ara, talima noutamak tenemunya deice arye, malye winilulume. Winibuka malye umunye ning deice anggunce anggun bidamnye ati malye winilululume,” Yesus arye Farisi nang awekuka kekenmekka ati nyabuk.

¹²Nyabuk ura, aminyan talak, el mapu arye Yesus dam yayikce nyabik, “Naie, anyapmamu yupu ati, Farisi nang yu upmalba, derenmakiaka ara, bikmalam do?” nyabuka asipdeyik. ¹³Asipdeyikba, Yesus arye tamubuka adomon yupu deice arye nyabuk.

“Yata ning do nirya, na ni im deicanye, elce aning-aning nirya kum kouamuk ning ara, yating ap, nong ap, nirya kwiniplonnamle. Ara talye palamle ning ati kwiniplonnamle. ¹⁴Ati, na mapu anggun ti nyapsine. Anggunce sik Farisi nang ati, tenena kume, sik dauplye. Sik Farisi nang ara, bisik peterena deiyok nang atonun unyak bukni, dipkoprop ara asing kun nang atonun unyake. Tonok asing kunanye birye, yuk asing kunanye biti, ‘Na arye an taruk talibuka teleb bisik bobinukine,’ nyaplirye, bobuka banmaliba, bisik noutamak weik fum wamyak barikirye, sik bitinye nang kote sakarurake. Sik Farisi nang ara, na mapu koprop kum unyake. Sik Farisi nang ara, asing kun nang atonun unyak nang ati, dauplye, nyapsine,” Yesus arye el mapu 12 nang ati nyabuk.

¹⁵Nyabuk ura, Peterus arye Yesus ati, morobuk. “Naie, kanye talima malye ulisulul ati, domon yupu deice nyapmasilam ning ara, laka kibuka laka nyapsilyame. Ayupu nong ara, laka nyapsilyame,” nyabuka morobuk. ¹⁶Asipdeyukba, Yesus arye tamubuka nyabuk.

“Anggunda tuba walwal upmasil ati asipdenmanulum do? Na nyapman ning ara moubuka kum bikmalum do? ¹⁷Na nyapmasin yupu deiyok ara, ani. Yata ning do nirya, nun dinmabiba, nun mun fum weksilirye, nun talima malye kum kilisulule. Nun dilamap ning ara, talima fum kum wekesulul bukni, mun fum uk mapmasilya, dei yaltakanyabe. Talya din ning dilamibya deice arye, Allah yupu kum yaniltakanyabe,” nyabuk. [Yesus ayupu nyabuka deice arye, “Din ning aning-aning nirya dilamibya deice arye, talima malye kum kilisulule,” nyabuka laka nyapsuke.]

¹⁸Nyabukop ura, ayupu ton nyabuk. “Bura tam ulamle ning arye, nun nong fum weksiliba, nun talima malye kum kilisulule. Aning kum bukni, ninye talima noutamak malye tenenyap ning ara, ‘Aupmal ning ara, kanye arye dopropnune,’ tenebiba deice arye, malye winibibyop ura, awininyaba deice arye, talima malye ulisulule. Din ning dinyaba deice arye, talima malye kum ulisulul bukni, anggun talima noutamak malye tenepmunce, malye winimunya deice aryuk, Allah el yupu yanilulume. Anggun malye winimunye ning deice, anggunce anggun bidamnye atibuk

kanye talima malye kililalulume. ¹⁹Ninye talima malye upliba, anoutam arye elelamle ning ara, ani. Malye tenena ap, ninye ona ap, sik ninye dolana ninye batakukabikirye, yuk nang kil alubuka dona ap, kil talye-talye yona ap, ubula dona ap, yuk nang ati malye-malye yupu nyabuka minina ap, tilila yupu nyana ap, anirya ara, anggun talima noutamak malye una deiyok ning aupsilya deice arye malye kililalulume. ²⁰Amalye tenelulum ning nirya ara, kanye talima noutamak welebuka, malye winipmunyop ura, talima malye kilisulule. Taruk mek likna kum dib aryuk, din ning talya mangkau asa dipmunyop ura, talima malye kum kilisulule,” nyabuk. Yesus arye el mapu 12 nang ati laka nyabuk.

Kanaan mutuku kil arye diba tenebuk yupu

(Markus 7:24-30)

²¹Yesus ara, Genesaret mutuku batakuka welebanmoka ani, Tirus mutuku ap, Sidon mutuku ap, dam biyuk. ²²Amutuku noutamak Kanaan tam ulamuk kil, Israel yala kum kil arye, Yesus dam yayuk. El kilmu talima noutamak ara, isa arye talyamuka ati, utenebuk. ‘Na kilmu talibuk isa ara, Yesus arye dobuka aisa yakuka buru dopkwetepu’ tenen, Yesus ati morolyayuk. Morolyayukce ayupu nyabuk. “Naie, anda nun deiyoknye ulyame. Anda, Daud yalanye[§] birye deipkuknye birye, na ti bico tenebuka melipnutume. Na kilmu isa talyamuka deice arye, fia ikin ubukba, kanye imun kanye bolula ati ara, ance na kilmu kwetepume,” nyabuka morobuk. ²³Nyabuka morobuk bukni, Yesus arye akil ati, yupu tonok babye kum nyabuk. Tunim ana uk ubuk. Winibukop ura, akil arye fia morona uk unmok ati, Yesus el mapu arye Yesus ati nyabik. “Akil ara, morona uk unmasila ati, ‘Bilyame,’ nyapminba, bilye,” nyabik.

²⁴Nyabikop ura, Yesus arye tamubuka sik ti nyabuk. “Akil ara, Israel yala kum kil bukni, na ni birye dopkwetepnuka ara, Israel yala kum ninye dam bobana ati, kume. Israel ninye bukni, domba basam weilamlanye kum upliba, domba basam talye balamak touk, ‘Kanye walwal unyak ninye, Israel ninye lyepnamle’ tenen, na ni birye dopkwetepnuke,” Yesus arye nyabuk.

²⁵Nyabuk ura, akil arye Yesus el dam yayukce, ‘Si erepnun’ tenen, gutam tuku dipdongobuka morobuk. “Naie, anda Daud yala nang arye deipkiknye, ance bico tenebuka melipnilyame,” nyabuka, weik arye morobuk. ²⁶Akil Israel yala kum kil arye morobukop ura, Yesus arye akil ati adomon yupu deice arye nyabuk. “Mapu kwaning kum dipmakibuk, sik kwaning dalubuka kam dam donokona kume. Teleb ning ara, mapu akunum dinmakca ani, sirya akunum dibikcop ura, kam arebikiba,

[§] 15:22 *Daud yalanye* – Ayupu nyabuka ara, ani. Ara minop talak, Allah arye ‘Ninye lyepnamle,’ tenen wibuka deiamuknye, ‘Yesus akunum yanmasile,’ tenen, nyabuk.

kam arye dina telebe,” nyabuk. ²⁷Yesus arye nyabuk bukni, adip aryuk tamubuka, akil arye Yesus ati nyabuk. “Naie, dib nyapmanilam bukni, mapu dinmakca dam banmalye kam arye, bun pupdopba batakice ning ara, talye mangkau arye dilule,” nyabuk.^h ²⁸Akil arye nyabukop ura, Yesus arye tamubuka nyabuk. “Ance na ti weik arye dib tenepmanilama ati, an moropmanila atonun, an kilmu talibuk isa ara akunum yakwetepmanaba bindople. Ati, winitalak an kilmu telebuk unmale,” Yesus arye nyabuk. Yesus ayupu nyabuk touk, anyabuk talak aryuk, akil el kilmu talyamuk isa bindobukba, telebuk ubuk.

Yesus arye ninye yupa weik, 4.000 ninye ati, din ning aribuk yupu
(*Markus 7:31-37; Markus 8:1-10*)

²⁹Yesus arye amutuku batakuka balamuka ani, Galilea mekwen kup-kup tam biyuk. Daulamuka ani, yuk sum ara, mitik mutuku kon deice welebuka biyuk. Amutuku deice welebuk ura, amutuku noutamak ulamik bukni, dana-dana tam ulamik ninye bulubuka yupa weik arye Yesus dam wekelyaik. ³⁰Amutuku ninye nirya yupa weik arye, bulubuka yayik talak ara, sik tam ninye, aik bulamik ninye ap, asing kun ninye ap, uk arye bite ikilamuk ninye ap, yupu luba ninye ap ara, uk aning-aning dilamuk ninye ap, ‘Yesus arye kwetepnusi’ tenen, sik kayapu nang arye, auk dilamuk ninye bobuka Yesus dam delilyayik. Delilyayik ura, Yesus arye auk dilamuk ninye nirya kwetelinmok. ³¹Yesus arye kwetelinmokba, sik yupu lup nang yupu teleb ubuka nyanmek ning ton, ara sik uk arye bite ikilamuk ninye tonda, aik bulamik nang ap, teleb ubuka banmek ning ap, tonda, asing kun nang teleb ubuka elinmek ning ap, amutuku wekmek ninye dinmekce, ngalukunmek. Ara, awekmek ninye nirya arye, Yesus elce ninye kwetenmok ning elinmekce, ngalukunmek. Ngalukunmekce, “Sik Israel ninye talilirye, mikip arye melilul Allah ara, el fia telebe,” nyabuka el si erenmek.

³²Winibukabikce, Yesus dam daunmek bukni, like winilye akunum ubukba, aninye sik din kum ati, Yesus arye el yupu kekebuka el ap, neika melibuka balamik nang ati, “Yalulume,” nyabukba, yayikop ura, ayupu nyapdeibuk. “Aunmak ninye ara, na bico tenenune. Sik din ning mitikanun boyanmek bukni, like winilye mabupu anya arye, sik din ning akunum dibikce, fia din bulung unmake. Din patanmalibuk, ‘Anggun mutuku tamubuka bilulume,’ nyabibyop ura, ton ninye pera mutuku

^h 15:27 *Kam arye bun puplobuka batakice ning talya luparabuka dilule* – Yesus arye nyabuk ning ara, “Na ara ‘Israel yala kili sal minopce lyepnamne. Yunani ninye ara, aminyan lyepnamne’ tenen, yase,” nyabuk. Akil arye nyabuk ning deiyok ara, ‘Na ara, mambul kum kil bukni, Yesus ara, dipkoprop Ninye Lyena Deiyoknye ulula anya arye, el mikip weiknye ulule,’ tenebukce nyabuka anya arye, Yesus arye akil ati melibuk.

arye yayika ati, din kum dibikirye, ‘Bisik ak bukbicak’ tenen, anggunda bilulume, kum nyapnune,” nyabuk.

³³Yesus arye nyabukba, el mapu sik 12 nang arye tamubuka nyabik. “Nunda fia buru mutuku noutamak unmba ati, ninye weik unmba anya arye, sik din ning arina ning ati ara, dan mutuku dekelbitibye do?” nyabik. ³⁴Nyabikop ura, Yesus arye tamubuka nyabuk. “Anggun aupmasil din ning roti ara, yata barye aupmasil do?” nyabuka asipdeyuk. Asipdeyukba, sikce, “Roti ara, tek barye aupmale. Tonda, mitik mekin bal, bitinyeto winilyeto aning uk aupmasile,” nyabik.

³⁵Nyabikop ura, Yesus arye abulubuka wekmek ninye nirya ati nyabuk. “Anggun tuku deice buklulume,” nyabukba, buki. ³⁶Sik bukiop ura, aupmok din ning roti tek barye ap, mitik mekin bal ap, dobukabukce, Allah ati, “Telebe,” nyabuka morobukop ura, aroti ap, amekin bal ap tobuka, el mapu aribukba, sikce bokuka, awekmek nang nirya ati, arinmek. ³⁷Arinmekba aninye nirya dinmekani, akunum boubukop ura, kwal deibik. Dinmeka ani, kwal batakik ning ara, Yesus el mapu arye bulubuka, weik bakul aling arye tek barye libikop ura, akunum langdibuka deibik.

³⁸Asum ara, abulupmek ninye kan-kan, kilapu ap, mapu ap, kum nukik bukni, sal demuk nukuka, yupa weik 4.000 nang dinmek. ³⁹Sik aninye arye akunum dibikop ura, Yesus arye aninye ati, “Telebe anggun mutuku tamubuka bilulume,” nyabukba, banmek talak ara, Yesus ara, ila tamubuka mek lia yo deice welebukuk., Yesus ap, el mapu 12 nang ap, bukiyce Galilea mekwen deice banmek ani, yuk mutuku el si Magadan mutuku biyik.

‘Yesus arye ninye winipmanto kum fil dopsutue’ tenen, morobik yupu
(*Markus 8:11-21*)

16 ¹Magadan mutuku binuka daunmek bukni, Farisi nang ap, Saduki nang ap, Yesus dam yayik. Yesus dam yayikce, ‘Yesus ara, Allah el mikip deice arye dipkoprop afil dolul do, kum do?’ tenen, Yesus asipdeyikce winipdeyik. Sikce nyabik. “ ‘Allah arye dopdeibukba, el mikip deice arye fil dolule,’ tenepnukiyaba ati, ninye kum winipmanto ning ap, sirya dakna fil ap, dopsilyame. Aning dopminyeba eibipye ura, dib tenepkitibye,” nyabuka asibuka, Yesus ati piripdeyik. ²Piripdeyikba, Yesus arye tamubuka nyabuk. “Anggunda, sintam uplye talak im teleb uplirye, mutuku sirye dirina aklyop ura, ‘Ambusum dou mapnamale,’ nyalulume. ³Tonda, inin talak im sukuplirye, dua kunuklyop ura, ‘Arup ap, ambusum ning ap, mok deneplirye cenamle,’ nyalulume. Mok cena ap, dou mana ap ati ara, mutuku urasin eipmunce kel kilulum bukni, na wininye ning ap, peterenun yupu ap, ‘Deiyok ani’ tenen, fia dipkoprop kum bikilulume.” Yesus arye nyabuk.

⁴Yesus arye anang ati, lik tenebukce, yupu nyabuk, “E, atalak winilul ning ara, ‘Allah el mikip deice arye dipkoprop fil dolul do?’ tenenululume. Yata ati, ‘Ninye winipmanto kum fil dopsutu’ tenen, asipdenmanulumce, winipdenmanulum do? Dipkoprop nyapsine, winitalak ululum ninye ara, malye-malye uk winimunce, Allah ati batakuka yuk ninguk talibuka ululum ninye ati ara, anggunda ninye domicile kilapu batakuka, talye kilapu yoldalamak atonun ululum atia. Anggunce, ‘El Yesus ara, Allah arye dopdeibuk tenepnululume’ tenen, ninye winipmanto kum fil dopnirye, pitin kum kipdeipnamsine. Allah yupu laka nyalamuknye Yunus arye winilamuk ning atonun winipnamasin ati, akunuma. Yuk mambul fil, ninye kum winipmanto ning ton fil kum dopnamsine.” Yesus arye sik Farisi nang ap, Saduki nang ap ati nyabuk. Nyabukce adip aryuk anang abatakuka, el mapu ap, mek lia yo wekuka bulbiyikce, Galilea mekwen deice banmeka ani, mekwen kup-kup otam biyik.

Yesus arye el mapu ati, “Farisi nang wininyak ning eipmunce, adeice arye malye winipmunyak anya arye, moubuka unamlulume,” nyabuk yupu

⁵Sik Galilea mekwen, ‘Atam arye, otam binuyap’ tenen, sik binuyik talak ara, Yesus el mapu ara, sik din ning roti kum libikce, luba kibuka biyik. Luba kibik ati, roti kum libikce, talye kanye bobuka, urdem panabuka, mek lia yo deice bukuka biyik. ⁶Mek liya yo deice bukuka banmek talak ara, Yesus arye el mapu 12 nang ati nyabuk. “Farisi nang ap, sik Saduki nang ap, sik malye wininyak ning ara, mitikanun uk nyabikiba, yuk nang kekebikce deice arye, malye winin ning weik wininyaka anya arye, roti nena deiyok ningⁱ ara, roti bun mitikanun uk dongonyak bukni, weik arye balamle touk ulule. Ulula ati, sik Farisi nang ap, Saduki nang ap, sik roti nena atonun ara, ‘Aning arye malye winisulule’ tenen, fia kalikuka dinamlulume,” nyabuk. ⁷Yesus arye roti nen ning yupu nyabuka ati, Yesus el mapu kekebikce, ‘Ayupu nong anye’ tenen, moubuka kum tenebik ati, ‘Deiyok dan do?’ tenen, sik biyuk yupu talinmek. Yupu talilamekce, “Ara nun roti din ning libuka kum boyanmapa ati, ayupu nyapmasile,” tenebikce nyapdayik.

⁸Sik yupu talipdanmek ning ara, Yesus kekebukce, sik ti nyabuk. “Anggunce, ‘Se, Roti din ning kum lipmaba ati, nyapmasile,’ nyapmaluma ara, yata ati do? Anggun asing elina ap, amol kekena ap, moubuka kum tenepmalumce nyanmalum do? Anggunce na ti mitikanun uk dib

ⁱ 16:6 *roti nena deiyok ning* – Roti nena atonun nyabuk yupu nong ara ani. Ara, ‘Sik Farisi nang arye, sik yupu nyabikiba, mitika aryuk kekelumce, sik nyanyak touk winipmunyop ara, anggun malye winimunya ati, moubuka kalikuka dinamlulume. Sik yupu fia kekena mem’ tenen, nyabuk.

tenepmanulum nang atia. Mitikanun uk diba tenepnulum deice arye, na nyasinye yupu kum kekepmanto nang unmalum do? ⁹Asing ap, amol ap, aupmasilye bukni, moubuka kum elimunce, na nyanye yupu ati, ‘Deiyok ani’ tenen, kum kekenululum do? Na min arye, ninye kum winipmanto fil dopmasi ning ara, kum biklum arye do? Yupa weik 5.000 ninye wekmekbuk, roti din ning pamu barye uk aupmok bukni, na arye, tobuka arepsibuk, akunum dibikop ura, anggunce weik aling arye, din kwal bulubukaplumce, yata barye aling libuka deiplum do? Akunum luba kiplum do?” nyabuka, Yesus arye el mapu ati asipdeyuk.

¹⁰Nyabukop ura, Yesus arye tamubuka ila tonap asipdeyuk. “Yupa weik 4.000 ninye wekmekba, roti din ning tek barye uk upmokbuk, na arye tobuka arepsiba, dibikke batakik ning ara, weik aling arye, yata barye libuka deiplum do? Akunum luba kiplum do?” nyabuka asipdeyuk.

¹¹Asipdeyukop ura, ayupu ton nyabuk. “Na winipse ning nirya akunum eipluma ati, yata deiyok ati, walwal arye nyanmalum do? Anggunce, ‘E, roti kum dinmaba anya arye, Farisi nang sik roti nen ning ati, malye upsilyak’ tenen, moubuka kalikildanamlulume, nyapmasile, tenepmaluma ara, yata ati do? Talya din ning roti nena deiyok ning ati kum nyapsine. Aning ara kume. Sik Farisi nang ap, Saduki nang ap arye, sik malye wininyak ning ara, roti nena deiyok ning nelamle touk un ning ati ayupu nyapsine,” Yesus arye el mapu ati nyabuk. ¹²Ayupu nyabukop ura, adeice arye el mapu moubuka kel bikik. Sikce tenebik. Ura, winira tenepmabe. Ninye arye roti dana ati, roti nena deiyok ning mitikanun dobuka, roti bun noutamak dongobikiba, weik arye balya ani, roti weik arye nelamle touk, sik Farisi nang ap, Saduki nang ap, kanye talima malye tenenyakce, peteresinyak yupu, ‘Mitika ababye kekepmunce, sik kanye tenen ning nirya babye malye upsilyak’ tenen, nyapmasile. Aning ati ara, ‘Moubuka umunce, anang sik yupu kum kekenamlulume’ tenen, nyapmasile. ‘Talya roti nena deiyok ning ati kum nyapmasile’ tenen, moubuka kel bikik.

Peterus arye Yesus ati, “Anda Allah arye ‘Ninye weik lyepnamle’ tenen, weipdeipkuknye Kristus ulyame,” nyabuk yupu
(Markus 8:27-29; Lukas 9:18-20)

¹³Amutuku batakuka welebikce, bisik mapnin balamika ani, Kaisarea Filipi mutuku biyik. Biyikop ura, Yesus ap, el mapu 12 nang ap arye amutuku noutamak, yupu talipmek talak ara, ayupu ton asipdeyuk. Yesus arye el mapu ati asipdeyuk. “Yuk nang arye nada Ninye Mi Koprop Atonunye ati, yatanye teneninyakce, nyaninyak do?” nyabuk. ¹⁴Nyabuk ura, sik nirya arye tamubuka nyabik. Ton nang ara, “Yohanes Pembaptis” nyakinyake, ton nang ara, “Ara Allah yupu laka nyalamuknye nabi Elia ulule,” nyakinyake, ton nang ara, “Allah el yupu ap, elce aminyan talak winipnamle ning ati laka nyananye ulule,” nyakinyake. Ton nang ara,

“Anye bira, Allah yupu laka nyalamuknye, nabi Yeremia dibuk bukni, winitalak ila tamubuka kam bukuka daulul darepa,” nyakinyake. Yesus el mapu arye, Yesus ati nyabik.

¹⁵Nyabikop ura, Yesus arye el mapu 12 nang ati tamubuka asipdeyuk. “Anang nirya ara, nyaninyak bukni, anggun na wibuka deipsise mapu ara, na ti, yatanye tenenululumce nyanululum do?” nyabuka asipdeyuk. ¹⁶Asipdeyukba, Simon Peterus arye tamubuka nyabuk. “Nai Yesuso, ‘Ninye mutuku-mutuku nirya noutamak, ninye weik lyeplirye sik kanye talima talinamle’ tenen, Allah arye wipdeiamkuknye, anda Kristus ulyame. Anda, Allah el Mi Koprop ulyame,” nyabuk. ¹⁷Peterus arye nyabukba, Yesus arye tamubuka nyabuk.

“Anyapmanilama ara, ninye arye kum peterepkike. Na Ni Allah im deice ululnye birye, laka kibuka peterepkukba, kel biklume. Aning ati ara Simon, an ni Yona birye deipkuknye bira, telebuk unamlyame. ¹⁸Peterus anda, dib teneplumce, winitalak ara, ‘Anda Allah el Mi Koprop Kristus unamlame’ nyapmanilama anye arye, fia bulamle keil atonun ulyame. Ninye arye tuku palibuka mutuku yangan keil deice, aik ayukumna ikuka dolamak touk, yata nang do nirya, an nyapmanilam atonun diba tenebikceop ura, Allah el mapu kipdeipniba, sik kanye talima ap, kanya ap, mikip unamake. Mikip weik kibuka ukirye, weik upnin banamake. Na ti dib tenepnikirye, na mapu weik upnin banamak ning ara, dipna deiyok isa mer ap, sik deiyoknye Isa Mutuku Dongonye ap arye, na mapu ati kum bisipnamake.

¹⁹Tonda, ‘Ninye weknuyak’ tenen, aik deiyoknye birye buplan kukne ning kunci dobuka, buplan kukeipliba weklamak touk, na arye Peterus anda, buplan kukna deiyoknye kipdeipkine. Ara, ‘Allah arye ninye mutuku-mutuku nirya noutamak ninye weik lyeplirye, sik kanye talima talinamsiak, ninye ayala-yala nirya wektinge’ tenen, na arye an ti kunci atonun ning, deiyok ning akunum aripkine. Ara, ance na yupu peterepminya deice arye, dib tenebikirye, na unyak im deice yanganamake. Ance, ‘Winina meme,’ nyabuka yupu seklam yupu ara, im deice babye, Allah arye ayupu atonun ati, akunum yupu sekelule. Aning atonun ance, ‘Winina telebe,’ nyapnalam yupu ara, im deice babye, Allah arye atonun, ‘Winina telebe,’ nyabuka akunum nyalule.” Yesus arye Peterus ati nyabuk.

²⁰Nyabukop ura, Yesus arye sik nirya ati ayupu nyabuk. “Na ara, ninye mutuku-mutuku nirya noutamak arye, ninye weik lyeplirye sik talima talinamne. Na ara weik deiyoknye, Ninye Lyena Deiyoknye, Mesias’

j 16:20 *Mesias* – Ton Allah yupu buku ara Mesias sekuk ning. Ton buku ara Kristus nyanyake. Ayupu deiyok ara tonok bukni, Ibrani yupu nyanyak nang arye Mesias nyanyake. Yunani yupu nyanyak nang arye, Kristus nyanyake.

nyalamaknye, na aunune. Bukni, winitalak ara yuk nang ati, ayupu laka min kum nyalbinamlulume,” nyapdeibuk. Yesus arye el mapu ati ayupu nyapdeibuk.

Yesus arye el aminyan opnamik ning ati, laka nyabuk yupu
(Markus 8:31–9:1; Lukas 9:22-27)

²¹ Yesus arye anyapmok yupu moupdeibukce, el nong deice ikin ning deipnamik ning ap, kanye imun ning upnamuk ning ap, el mapu 12 nang ati, deiyok koubuka peterenmokce nyabuk. “Na ara Ninye Mi Koprop Atonunye^k unune. Na arye Yerusalem mutuku binyop ura, sik Yahudi yala nang sik deiyok nang ap, Allah arina ati deiyok nang ap, Allah arye, ‘Winamlulume, aning kum wininamlulume,’ nyapdeibukba, Musa arye sekeiyamsuk yupu, mem yupu peterena deiyok nang ap, anang nirya arye na ti, ‘Nun like’ tenen, bataknikirye, ikin ning weik na nong deice deipnikirye opnamniyake. Opnikcop ura, dipmanyani, weipnikcop ura, like winilye sum arye,^l ila tamubuka Allah arye kam bukeinamnile,” nyabuk.

²² Ayupu nyabuk ning ara, lak akarye nyamokba, Peterus arye Yesus talibuka yukak biyukce, anyanmok yupu ati yupu sekuk. “Naie, aning ara fia kume. ‘Winibuka winipnikirye, opnamniyake,’ nyanmasilama ara, fia kum winipnamkiyake,” nyabuka wenebukce, yupu sekuk. ²³ Peterus ap, Yesus ap, yukak binmarikce, Peterus arye yupu sekukop ura, Yesus arye tamubuka, Peterus ati nyabuk.

“Peterus anda yukak bilyame. Na kum dinukine. Allah arye teneamnuk touk, akunum nyapdeiamnukba, ‘Wininamne,’ tenepse ning, ance yukupmanilama anya arye, winira Isa Mutuku Dongonye atonun wininmanilame. Allah arye patapliba, tenelul ning kum bukni, talya nang arye pataplyeba tenelamak touk, tenepmalamce ayupu nyapmanilame,” Yesus arye Peterus ati nyabuk. ²⁴ Nyabukce, el yupu kekebuka dobolbalamik nang ap, abulubuka wekmek nang nirya ap ati, “Na dam yalulume,” nyabukce ayupu ton nyanmok.

Yata kil do, yatanye do, na ti diba tenepnikirye, na dobolyanganamniyak nang ara, sik ning atibuk, ‘Aning mambule,’ kum tenenamake. Sik wenebikiba dipnamak nang uk, wanwanun yo bobuka talya mangkau asa balamikirye, ‘Akunuma, anang arye oplopnamniaka

^k **16:21a** *Ninye Mi Koprop Atonunye* nyabuk ning, ara im deicanye ulamuk bukni, tukwak ninye lyena ati yayuk talak ara, ninye nong dayukce, talya tukwak nang urasin atonunye dayukce yayuk. Ninye urasin kibuka yayuka ati, ayupu nyabuk. ^l **16:21b** *winilye sum* – Sik Yahudi yala nang arye, nuklamik touk, ara pamu sum lukunyan ap, nakup lukunyan ap, asukum noutam ara, Minggu inin talak akunum berekukba, ‘Like winilye sum akunum uple’ tenelamikce nyalamik. Sikce aning atonun nuklamika anya arye, ‘Like winilye sum,’ nyabik.

ara telebuka, na kam unmana ara mambul kume,' tenenyak touk, na mapu ababye, 'Yu nang arye opnamniak do?' tenena kumce, sik kam un ning ap, sik patalye ning ap atibuk, kum tenenamake. Yesus dib tenenyaka ning ati ara, yuk nang arye opnukcop ura, 'Ara mambul,' kum tenenamake. Na yupu uk kekebuka dobolyanganamniake. ²⁵ Aning ati ara, yata kil do, yatanye do, na ti diba tenenyakba, yuk nang arye, "Opnuyabe," nyabikiba, ilil upliba, 'Nun kam una ap, nun bidamnye ati patapsilye ning ap, aning uk mambule. Na tenepce,' tenebuka batakaninyak ninye ara, aminyan talak Allah arye weneplirye opliba, dibikcop ura, ila tamubuka tonap, sik kam bukuka fia kum unamake.

Bukni, na ti diba tenepnica, deice arye, yuk nang arye obikiba, dipnamak ninye ap, na yupu dobuka peterelbica ati, opnamak ninye ara, sik nong dipnamak bukni, sik kanye ara, na ap neika fia kam unamabe. Allah arye aninye ila tamubuka kam bukdeipliba, aninye ara fia kam unamake. ²⁶ Tonoknye birye, aning-aning yala weik talyamtuba, na ti diba kum teneamnuturyuk dipturye, uku din mutuku bitop ura, atalyamtu ning nirya awamtu bukni, el kanya babye dipmatua ati, el talyamtu ning deice arye lyeptomimitu do? El talyamtu ning arye, el ti ila tamubuka teleb kipdeipmimitu do? Ara, fia kume. Aning nirya arye teleb ubuka kum deiptue. Anggun kam una deiyok ning ap, anggun kanya ap ara, yatato ning deice arye dekuka doproptum do? Kume, fia kam una ara, dekmanto kum ning atia.

²⁷ Ara, talye ati kume. Na ara Ninye Mi Koprop Atonunye, na ni el urasin fia teleb ulirye, dirina weik ulya atonun, na babye atonun upyop ura, Allah arye kwepdeibukba, el im deice fil don nang, malaikat ap, ansinibibyop ura, tukwak yanamabe. Yanamap talak ara, tukwak ninye nirya wenebuka lipsisikuka bokeipnamne. Yata ninye do nirya, sik winilamikce ning atonun, na arye moubuka dipdebuka nuknirye lipsisikuka bokeipnamne. Ara malye winin ninye ati wenebuka opnamne. Teleb winin ninye ati dekna ning aripnamne. Yesus arye awekmek nang ati nyabuk. ²⁸ Nyabukop ura, ayupu ton nyabuk. "Na dipkoprop yupu nyapsine. Anggun mening dam atikmalum nang kan-kan ara, ton nang ara, 'Allah arye mutuku-mutuku nirya noutamak arye, ninye weik lyeplirye, el mikip deice sik talima talinamle' tenen, na ara Ninye Mi Koprop Atonunye yanamne talak min kum uplye talak ara, kum dipnamake. Sik aninye ara awinipnamle ning eipnamake." Yesus arye awekmek ninye ati nyabuk.

Yesus el urasin dirina weik ubuk yupu

(Lukas 9:28-36; Markus 9:2-13)

17

¹ Ayupu nyabukop ura, daulamika ani, like naku barye sum akunum mabikop ura, Yesus arye winilye nanguk dobuka,

weik mutuku dup welebig. Yesus ap mutuku dup welebig nang si ara, Peterus ap, Yakobus ap, el weit kopropa Yohanes ap, Yesus ap, sik uk amutuku welepmeke eiunmek. ²Sik amutuku dup welebigkop ura, el mapu arye adinmek bukni, Yesus ara el urasin yuk ubuk. Yesus el urasin yuk dayukce, kiting deiplirye til fia daklamle touk dirina weik ubuk. El urasin dirina weik ubuka atonun, el butum aling kurubukce, dirina weik ubuk. ³Winibukop ura, sik awinilye nang tikmek dam arye, minop talak ulamrik nang ara, nabi Elia ap, Musa ap, tikilyarikba, Yesus ap, Musa ap, nabi Elia ap, neika tikikce, yupu talipmek. ⁴Sik ayupu talipmek talak uk, Peterus arye Yesus ati nyabuk. “Naie, nun aunmaba ara, fia teleb ati, nun winilye nang arye bara asik ton doptibye. Ton aik ara an ti, ton aik ara Musa biti, ton aik ara nabi Elia biti doptibirye, asukum uk uptibye,” Peterus arye nyabuk.

⁵Peterus arye ayupu tuba nyanmok talak ara, sik amutuku dup unmek bukni, dua arye sik tikmek mutuku nirya palibuka lelipdongobuk ura, adua kan-kan arye, Allah arye ayupu nyabuk. “Aunmalanye bira, na Mi Koprop ulula ati, el ti na kanye fia delinune. Anggun nirya ara el yupu fia moubuka kekenamlulume,” Allah arye nyabuk. ⁶Allah arye nyabukba, Yesus el mapu awinilye nang kekebikce, ilil weik ubukba, kanupdobikce tukwak amubuka mabik. ⁷Winibik bukni, Yesus el taruk arye el mapu sik nong talibukce, nyabuk, “Anggun ilil una meme. Anggun nirya buklulume,” Yesus arye nyabuk.

⁸Yesus arye ayupu nyabuk ura, adip aryuk sik awinilye nang arye, sik tikmekak dana-dana dipdeyik bukni, ninye yuk nang ara, nabi Elia ap, Musa ap kum eibik. Sik winilye nang ap, Yesus ap, sik uk aunmek. ⁹Amutuku dup arye tamubuka kouluka yangamek talak ara, Yesus arye awinibuk ning nirya, ‘Yuk nang ati laka nyalbikcak’ tenen, yupu sekuk. “Na ara Ninye Mi Koprop Atonunye opnikiba, dipnirye kam buknyop ura, amutuku deice winipmalba eipmalum ning ara, aminyan talak laka nyalbinamlum bukni, winitalak ara yuk ninye ati laka nyalbana kume,” nyabuka yupu sekuk.

¹⁰Aminyan ara, sik anang arye Yesus ati asipdeyik. “Allah arye, ‘Wininamlulume, aning ara kum wininamlulume,’ nyapdeibukba, Musa arye sekeiyamsuk yupu peterena deiyok nang arye, ‘Elia minopce yanamle bukni, aminyan sirya talak ara, Allah arye dopdeipnamlanye, Ninye Lyena Deiyoknye, Mesias nyanyaknye bira, nabi Elia aminyan yanamle,’ nyanyak yupu ara, yata deiyok ati nyanyak do?” nyabuka asipdeyik. Asipdeyikbuk, Yesus arye tamubuka nyabuk.

¹¹“Sikke, ‘Nabi Elia minopce yanmalirye, aning-aning nirya lipsisikuka kintinipdelinamle,’ nyanyaka ara dipkoprop nyanyake. ¹²Bukni, na dipkoprop nyapsine. Winitalak ara, nabi Elia ulamuka atonunye akunum yayuke. Minop talak arye, ‘Elia yanamle,’ nyalamik ara,

Yohanes yanamuka ati nyalamik. Nyalamik touk, Yohanes akunum yayuk bukni, winitalak unyak ninye ara, kum bikik. Kum bikika ati, Allah yupu laka nyalamik nang, sik nabi nang arye, Allah yupu deice sekamik touk, winitalak ara amutuku unyak deiyok nang arye anye Yohanes biti, 'Optibye,' tenebuka patalamuka atonun akunum winibik. Anye, el ti winibik touk, na babye, Ninye Mi Koprop Atonunye ikin ning na nong deice deipnikirye, sikce obuka bataknamniyake," Yesus arye nyabuk. ¹³Nyabukop ura, el mapu arye, 'E, nabi Elia atonunye nyapmala ara, Yohanes arye dib tenen, ninye dobuka mek dongolamuknye biti, nyapmasila' tenen, kel kibik.

Yesus arye isa talyamuk mi kwetebuk yupu

(Markus 9:14-28; Lukas 9:37-42)

¹⁴Sik welepmek mutuku deice arye koulukikce, amutuku amutam bataka binmek nang unmeke dam yayik. Yaikop ura, Yesus el mapu tupne barye bataka binmek nang ap, yuk nang ap, unmekak yayik. ¹⁵Atikmek nang kan-kan tonoknye Yesus dam yayukce el ti, 'Si erebuka kipnun' tenen, gutam tuku dipdongobukce, ayupu nyabuk. "Naie, na mi ara isa talyamuka deice arye, fia kanye imun upmalce, donmale. Isa talilye talak nirya ara, isa mikip arye dobuka, tuku deice poukloplibya, si ula weik sakalule. Tonda, isa talyamukce, 'Uku fum ap, mekwen fum ap, opnamle' tenen, dongolbalule. ¹⁶Winilya ati, 'An mapu arye, aisa yakdonoknamak' tenen, moropman bukni, sikce aisa kum yakdonokmake." Isa talyamuk mi el li birye Yesus ati nyabuk.

¹⁷Nyabuk ura, Yesus ayupu kekebukce, atikmek nang nirya ati lik ubukba, ayupu nyabuk. "Anggun atalak umunye ninye ara, dib kum tenelulum ninye anye arye, fia malye winilulume. Na lik ati, 'Yata barye talak arye anggun dam tuba unamne do?' Tonda, 'Teleb unamak do?' tenen, batakna kumce, yata barye talak arye fia dinamsin do? Ati, isa talyamuk mi ara, dobuka na dam boyalulume," Yesus arye nyabuk. ¹⁸Yesus arye nyabuka ati, anang arye ami dobuka, Yesus dam boyayik. Boyayikop ura, ami talyamuk isa ati, Yesus arye nyabuk. "Ami talimak talipluma batakmince, kutukuka bilyame," nyabuka yakwetebukop ura, atalak aryuk aisa ami talimak arye kutukuka biyuk. Biyukop ura, ami teleb ubuk.

¹⁹Aminyan ara, Yesus ap, el mapu 12 nang ap, sik yuk aik fum wekik talak ara, el mapu arye asipdeyik. "Naie, ami talyamuk isa ara, nunce yakwetepmanto kum upmaba ara, deiyok yata arye do?" nyabuka asipdeyik. ²⁰⁻²¹Asipdeyikba, Yesus arye tamubuka nyabuk. "Anggunce aisa kum yakwetepmanto upmaluma ara, na ti dib tenepnuluma ara, fia mitikanun upsuk arya. Sumik duk fia mitik ning bukni, anggunce na ti dib tenepmanulum ning ara, amitik ning sumik duk atonun

dib tenepnutum ura, anggunce omutuku ati, ‘An bidamnye aryuk erepdakuka, anyaka arye otam delilbilyame,’ nyaptumba, amutuku el bidamnye aryuk erebuka, otam delilbitue. Anyapmasin touk winiptumop ura, ‘Aning-aning nirya winipnuyap’ tenen, moroptum ura, winiptue. Dib tenepnumunce, moropnumunyop ura, kum winipmanto ning ara, ikin kum upsutue. Anggunce moroptum touk uptue.” Yesus arye el mapu 12 nang ati nyabuk.

²² Yesus ap, el mapu ap, amutuku batakuka, Galilea tam noutamak banmek. Ton atalak noutamak arye ayupu nyabuk. “Na ara Ninye Mi Koproprop Atonunye bira, opnamniyake. Ara, tonoknye birye, ‘Yuk nang arye Yesus opnamak’ tenen, inipdaka yalye ura, sik anang arye na dobuka opnamniyake. ²³ Opnikcop ura, dipmanya ani, like winilye sum akunum uplyop ura,^m tamubuka kam buknamne,” Yesus arye el mapu ati laka nyanmok. Lak nyamokba, Yesus el mapu 12 nang kekebikce, ‘Se nun ni Yesus opnamake’ tenen, bico ubukba, imun kanye bobik.

Yesus arye, ninye deiyok nang pajak yo bok arina ati, nyabuk yupu

²⁴ Yesus ap, el mapu ap, amutuku batakuka bisik mapnin balamika ani, Kapernaum mutuku biyikop ura, Yahudi yala nang sik Allah ati arilbalamik aik wekelban ati, pajak yo bok dona deiyok nang, Peterus el dam yayikce asipdeyik. “An peterena deiyoknye Yesus arye, Allah arina ap, el si erena ap ati, anyaik bana ati, dekna pajak yo bok arelul do, kum arelul do? Ara, Allah si erena aik talina deiyok nang arye, ‘Anyaik bana ati, pajak yo bok areplulume,’ nyapsikce talak ara, Yesus arye arelul do, kum do?” nyabuka asipdeyik.

²⁵ Asipdeyikbuk, Peterus arye tamubuka nyabuk. “Kume, sikce nyapsikce talak ara arelule,” nyabukba, anang kekebikce, biyik. Biyikop ura, Peterus arye Yesus unmok aik wekuk. Wekuk ura, adip aryuk Yesus arye minopce nyabuk. “Simono anda yata ning tenepmalam do? Mutuku-mutuku nirya weik ninye deiyok nang arye, pajak yo bok dolonyak ning ara, sik mapu koprop arye arenyakba dolonyak do? Sik yuk talye nang aryuk arenyakba dolonyak do?” nyabuka asipdeyuk.

²⁶ Yesus arye ayupu nyabuka asipdeyukba, Peterus arye tamubuka nyabuk. “Kume sik mapu koprop arye kum arenyake, yuk talye nang aryuk arenyakba dolonyake,” nyabuk. Nyabuk ura, Yesus arye, “Dipkoprop nyaplame. Weik ninye deiyoknye el mapu koprop sikcuk pajak yo bok kum arenyake. Aning ati ara, Allah el Mi Koproprop na ap, ara anggunda na mapu ap, Allah arina aik bana ati dololamak yo

^m **17:23** *like winilye sum* – Sik Yahudi yala ninye arye nuklamik touk, Yesus obikba Jumat lukunyan ap, Sabtu nirya ap, Minggu sum inin ap, nukikba, ‘Like winilye sum akunum uple,’ nyalamik.

bok, nunce kum arebipyop ura, aning babye telebuka. ²⁷Bukni, ayo bok dona deiyok nang arye, nun ti malye tenepsikcak tenen ati, anda Galilea mekwen lilkwa bimince, mekin bal youn ning dobuka, mekwen fum dongopminba, mekin bal tonok youpminyop ura, amekin bal si bama baktalibuka dileminba, derakma keil uang tonokⁿ awaplyop ura, dopropnulyame. Akeil uang ara, nun bitinye nang anyaik wekelbinunama dekna ati, akil uang deklyame. Akeil uang ara, dopropmince Allah el si erena aik deiyok nang ati, arel binulyame,” Yesus arye nyabuk.

Yesus arye, “Weik deiyoknye upnamak nang ani,” nyabuk yupu
(Markus 9:33-37; Lukas 9:46-48)

18 ¹Kapernaum mutuku anyuk tuba unmek talak ara, Yesus el mapu arye Yesus ati asipdeyik. “Allah arye ninye weik lyeplirye sik talima talinamle talak ara, nun kan-kan arye, yatanye tiklirye, minopce nun weik deiyoknye uplirye melinamsil do?” nyabuka asipdeyik. ²Nyabuka asipdeyikba, Yesus sik bukmek kan-kan arye, mitik mi tonok yukubukba, yayukop ura, Yesus arye amitik mi dobuka, tikebukce, ayupu nyabuk.

³Na fia dipkoprop nyapsine. ‘Nun weik nang upnamap’ tenen, kanye talima erelamunya ara, bataklulume. Mitik mapu ara, sik kanye talima nimalya arye unyakce, du nang yupu kekebuka ulamak touk, sik bidamnye kanye tamubuka kum umunyop ura, Allah arye anggun ti lyepsilirye kum talinamsile. Lyepsilirye im deice babye kum weknamlume. ⁴Aning ati ara, Allah arye ninye mutuku-mutuku nirya noutamak arye, ninye weik lyeplirye, sik kanye talima talinamle talak ara, amitik mi atonun talima lamapdongobuka arye ulamice ninye ara, Allah arye sik ti, minopce weik deiyok nang kipdeipnamle. ⁵Tonda, yatanye do, yata kil do, amitik mi atonun ninye ati, bico tenenyakce, na si deice arye telebe nyabuka, aninye ati melilamikcop ura, ara na ti melinamniyake. Yuk ninye ati melibicop ura, ara na melin atonun ati nyapsine.

⁶Bukni, yata nang do nirya, sik malye winilamikce ning deice arye, atikmal mi atonun ninye, talima lamapdongobuka ninye arye na diba tenenyak bukni, sik malye nang arye malye winipbikceba, anang ton eibikirye, ‘Sik anang wininyak touk na babye ton atonun winipnun’ tenen, malye winibikcop ura, Allah arye sik malye wininyak nang ati, minopce

ⁿ 17:27 *Derakma keil uang* nyalamik ning ara atonun. Derakma ara dekna weik ning keil uang si ati nyalamik. Tonok sum donman bukni, inipnop ura, asum nirya dekna ati, derakma tonok arilamik. Tonoknye biti, Allah si erena aik wekelban ning ati ara, mitik keil uang el si derakma bitinye arilamik. Amekin bal si bam bol fum aupmalye ning ara, derakma dum barye atonun ning upmoka any arye, Yesus ap, Peterus ap dukdongobuka arina atonun ning ati nyabuk.

wenebuka opnamle. Ura yuk nang arye minopce malye ulamika deiyoknye bira, weik keil arye el ngang kirikuka, laut mekwen noutam dongoptingba, mekwen dipmimituop ura, ara wenena kanam ninge. Bukni, anang atonun nang ara, sik malye wininyak deice arye, yuk nang ati, malye winilinyaka anya arye, Allah weik arye anang ati wenepnamla ara ikin weik upnamle. Allah arye malye ulina deiyok ninye weik arye wenepnamla ati nyapsine.

⁷Yata ning do, malye winilisuusulba, Allah diba tenelulum ning ara, batakalulume. Tukwak mutuku noutamak ara, malye winilislulul ning ara, aupnamla ati, se tenebuka kanye imun usulule. Atonun winin ning ara, fia tuba awininamle bukni, amalye winin ning winililamak deiyok nang ara, sik fia kanye imun upnamle. Yuk nang ati malye ulina deiyok nang ara, Allah weik arye wenepnamla ati nyapsine, Yesus arye nyabuk. Ayupu nyabukop ura, ayupu ton nyabuk.

⁸Anggun taruk arye talibuka malye winina do, anggun yan arye yanibuka bimunce, malye winina do, winibuka malye winipmunyop ura, amalye winina ati talipmamunye taruk ap, yan arye malye anak bimunce malye winipmamunye ning ap ara, seklopnamlulume. Teleb ning ara, tonok taruk ap, tonok yan ap aupmasilye dib aryuk, fil dobuka unamlulume. Ara kanam uka. Bukni, taruk bitinye ap, yan bitinye ap arye malye tuba winipmunyop ura, Allah wenepsiliryu uku fia dilulak dopkwetepnamsil, ara fia mambule. Aning ara dipkoprop ikin upnamsile.

⁹Tonda, anggun asing eipmunce, malye winipmunyop ura, danatam asing duk lukuka bataknululume. Teleb ning ara, tonok asing dem aryuk Allah arye ninye weik lyepliryu sik kanye talima talinamlak, im deice binamlume. Ara telebe. Bukni, asing bitinye dimunce, malye tuba winipmunyop ura, Allah wenepiliryu, uku din mutuku dopkwetepnamsil ati, fia mambule. Aning ara, dipkoprop ikine. Ati winina kume nyapsine. Yesus arye nyabuk. Nyabukce, ayupu tonap nyabuk.

¹⁰Sik niryu arye, amitik mi kanye talima lamapdongobuka ulamle touk unyak ninye ati, ‘Aninye ara, sik mambul kume, daupmalye,’ tenena kume. Allah dib tenebuka, talima lamapdongobuka ulamice ninye ara, ‘Aninye ara mambul kume, daupmalye,’ teneluluma ati, anggun kanye moubuka unamlulume. Aninye ara, sik kalikna ati im deice fil don nang, malaikat, na Ni Allah dam unyaka anya arye, ‘Anang ara mambul kume,’ tenena meme. Anang ara sik kalikna malaikat arye laka nyalbikiba, ‘Allah kekepliryu, anggun ti wenepsilyak’ tenen, nyapmasina atia. Yesus arye nyabuk.

Yesus domon yupu deice arye, “Domba basam tonok ning tunimabuke,” nyabuk yupu
(Lukas 15:4-7)

¹¹Yesus arye ayupu akunum nyabukop ura, winipmanto yupu ton nyabuk. “Na ara, Ninye Mi Koprop Atonunye birye tunimalamle

ning atonun ning, ‘Eibuka lyepnamne’ tenen, yase. Utenen yasa ati, winipmanto yupu ton nyapnusine,” Yesus arye el mapu ati nyabuk.

¹²Nyabukop ura, ayupu ton nyabuk. “Anggun kanye ara, yata tenepmalum do? Tonoknye el domba basam 100 ulamice bukni, tonok ninguk yukak banmalya ani, tunimaplyop ura, domba basam yupa weik 99 domba basam amutuku arye asukum uk batakuka, tunimap malye ning ati, ‘Amutuku noutamak ara, na domba tunimapmanil ning ara, daupmalye’ tenen, mangkau kilul do? Kume, domba basam deiyoknye birye, ‘Domba basam tunimap malye ning eipnun’ tenen, epra balule.

¹³El domba basam 99 yukak kum banmakirye, tuba anyuk unmaca ati, mitikto kanye delilul bukni, tonok domba basam tunimap malye ning ati, eibuka balirye, akunum eiplyop ura, fia weik arye kanye delilule.

¹⁴Adomon yupu nyapmasin touk, anggun Ni Allah im deice ululnye el kanye ara, amitik mi atonun, ninye tonoknye babye ton, ‘Na kum bataknamne,’ kum tunimanamake. Atonoknye babye ton lyepnamne. ‘Na mi kopropa unamle’ tenen, patapliba fia tenesulule. Allah arye tukwak ninye nirya ati, ‘Ninye tonok ton uku din mutuku bana ara, na like,’ tenelule.” Yesus arye el mapu 12 nang ati nyabuk.

Yesus arye, “Yuk dib tenen ninye arye anggun ti malye winipsicop ura, namin kinamlulume,” nyabuk yupu

¹⁵Yesus arye nyabuk. “Dib tenenyak ninye, anggun ap neika ululum nang arye, anggun ti malye winipsicop ura, yuk nang ap kume, anggunce sik malye winipmasice nang damak bimunce, ‘Kao malye winipmanulum ning ara, anye,’ nyabuka, malye winipmasice ning ati, laka nyalbinamlulume. Malye kipdeipmasilinye kekepsiliry, ‘Telebe,’ nyapsilyop ura, kanye deipdamunce, neika ansinibuka unamlulume.

¹⁶Bukni, kum kekepliry, ‘Telebe,’ kum nyapsilyop ura, anggun kwit capu tonoknye do, bitinye nang do, dobuka neika bimunce, malye winipdeipsuknye, el dam binuka, yupu tonap lipsisikuka talinamlulume. Yuk nang ap yupu talilbinamluma deiyok ara, Allah yupu noutamak sekeiyamsuk touk, ‘Ninye bitinye nang do, ninye winilye nang do, anye bira, dipkoprop malye winibuke’ tenen, biktingce nyaptingop ura, ayupu kekepnamlulume. ‘Tonoknye birye nyaplyop ura, kum kekepnamlulume,’ nyabuka sekeiyamsuk touk winamlum tenen, nyapsine,” Yesus arye nyabuk.^o

¹⁷“Anggun ap, yuk nang bitinyeto, winilyeto ap, binuka malye ulina deiyoknye biti yupu nyalbimunyeba, anye birye fia kum kekepsilyop ura, anggun mutuku bukni, Allah dib tenenyak ninye, yuk ninye sik kekena ati, sik dam binuka ayupu lak nyalbinamlulume. Kekebikirye,

o 18:16 Ulangan 19:15

anang nirya arye malye winipmasilinye biti, nyabice yupu ton kum kekepsilyop ura, anggunce anye biti, utenenamlulume. ‘Anye bira, dipkoprop Allah diba tenena kum ninye, sik ulamak atonun ulule’ tenen, batakanamlulume. Tonda, amutuku talinyaka deiyok nang arina ati, ‘Pajak yo bok dona deiyok nang, sik malye ulamak touk, nun ti malye ulina deiyoknye, el ton atonun ulule,’ tenenamlulume. Winibuka tenepmunce, amalye ulina deiyoknye ap neika kum unamlulume,” Yesus arye nyabuk.

¹⁸Nyabukce, ayupu ton dukdongobuka nyabuk. “Lupkina meme, na ti diba tenelulum ninye arye, anggun tukwak mutuku umunye talak ara, ‘Winina ara telebe,’ nyamunye ning ara, anggun Ni Allah im deice ululnye ababye, ‘Aning telebe,’ nyanamle. Tonda, anggunce, ‘Winina ara malye ning,’ nyamunye ning ara, anggun Ni Allah im deice ululnye ababye, ‘Aning malye ning,’ nyalule. ¹⁹⁻²⁰Dan mutuku do nirya, na ti dib teneplumce, na si deice arye bulupmunyop ura, na babye anggun unmamunyak uk neika unamabe. Na ap neika unamabe. Tonda neika unamaba ati, anggun Allah moronamlum talak ara, ninye bitinye nang kanye tonok tenebuka, moropmunyop ura, na Ni Allah im deice ululnye kekepsilirye, anggun moropmamunye touk melinamsile,” Yesus arye el mapu 12 nang ati nyabuk.

**Tonoknye, el malye winibuknye biti, kum namin
kibukce, tamubuka wenebuk ati nyabuk yupu**

²¹Yesus arye ayupu nyabukba, Peterus arye, Yesus ati asipdeyuk. “Naie, yuk dib tenenanye bukni, na ti malye upnilyop ura, like yata barye talak arye namin kipnamne do? Like tonok talak arye dipdongobuka, tek barye namin kipnamne do?” nyabuka asipdeyuk. ²²Asipdeyukbuk, Yesus arye tamubuka nyabuk. “Ance, ‘Like tek barye talak uk anye namin kipnirye, bataknamne,’ tenena kume. An kwit dib tenenanye birye malye winipkilyeba, namin kipnamlam ning ara, like yupa nirya ara, like yupa tek barye, ila tonap tek barye, ara like 77 kali deice arye namin kipnamlame. Ara, malye winipsikce ning ati, batakna kumce, fia namin kina uk wininamlume,” Yesus arye nyabuk. ²³Yesus nyabukce ayupu ton nyabuk.

Allah arye ninye weik lyeplirye, anggun talima talinamsila atonun ning ati, winipmanto yupu nyapnusine. Ayupu ara, ani. Tonok mutuku weik ninye deiyoknye birye, el fil don nang tia doprobik yo bok kopropa ara, ‘Adip aryuk ayo bok tamubuka aripnikiba sirya daknune,’ tenebuk talak ara, el fil don nang deiyok koubukba, yayikop ura, deiyok koubuk. ²⁴Deiyok koubuk talak ara, el melin nang arye, tonoknye dobuka el dam boyayik. Anye bira, el deiyoknye yo bok yupa fia weik dopropmokyne el dam boyayik. ²⁵El yo bok tia dopropmokyne bira, tamubuka kum

aripmanto ubuka ati, anang deiyoknye birye anye biti nyabuk. “Anye el nong ap, el kil ap, el mapu ap, el ning nirya ap dobuka, yuk nang dam dekmunce, ayo bok ara, anye tia talak ati dopromnuk yo bok ati, tamubuka pununa ati aripnamnilyame,” nyabuk. ²⁶Nyabuk ura, ayo bok dopropmoknye birye, gutam tuku dipdongobukce weik arye morobuk. “Naie batakmaniminyeba, aminyan ara na dopropse yo bok nirya punubuka aripnamkinca,” nyabuka morobuk.

²⁷Nyabuka morobukop ura, aninye deiyoknye birye el ti, bico tenebukce, ‘Dauplye,’ tenebuka el dopropmok yo bok ati mangkau kibuk. Mangkau kibukce, “Na ti tamubuka arina kume, talya mangkau asa dabilyame,” nyabukba, biyuk.

²⁸Yo bok weik dopropmoknye biyuk bukni, el ap neika fil dolamdiknye, anye el yo bok fia mitika aryuk tia dopromuka ati, el ngang talipnurubuka long-long abukop ura, yu asa arye, ayupu nyabuk. “Ance tia dopromlum yo bok ara, adip aryuk aripnilyame,” nyabuk. ²⁹Nyabuk ura, el ap fil neika dolamdiknye birye, gutam tuku dipdongobuka weik arye morobuk. “Se nai kwito, batakmaniminyeba, aminyan ara, na arye tia talak ati dopropkise yo bok nirya ara, punubuka aripnamkinca,” nyabuk. ³⁰Nyapdeyukba, anye bira el kwit birye nyanmok yupu kekena kum dib aryuk, yuk nang ati nyapdeibukba, anye dobukabukce, wenena aik dongobikce, nyabik. “Anda asukum uk ulaminya ani, ance tia talak ati doproplum yo bok aning nirya tamubuka aripmince akunum sirya dakminyop ura, batakdongopnamkiyabe. Kumop ura, wenena aik fum uk, afia unamlame,” nyabik.

³¹Yuk fil don nang arye, winibik ning eibikce bico ubukba, sik deiyoknye el dam lak nyalbiyik. ³²Binuka lak nyabikba, adeiyoknye birye, el yo bok weik tia dopropmoknye biti, yukubukba yayukop ura, anye biti nyabuk. “Ance na yo bok weik tia dopromlum bukni, weik arye moropnulama ati, namin kipkisirye, ‘Ayo bok ara, tamubuka kum aripnamnilyame, daupmalye,’ nyapkise. ³³Na arye an ti bico tenebuka mangkau kiyamkisi touk, an yo bok tia dopropkuknye biti, atonun namin kipmatum bukni, bico tenebuka kum namin kipluma ara, teleb winiplum do?” nyabuk.

³⁴Nyabukce, adeiyoknye birye, fia yu ubukba, el yo bok tia talak ati dopropmoknye dobuka, wenena aik deiyok nang aribukba, anang arye el nong dobuka wenen aik dongobik. Dongobikce, “Aulamika ani, aning nirya akunum sirya dakuka akunum tamubuka ariplyop ura, batakdongobibiba, bitue. Kumop ura kume,” nyapdeibik. Yesus arye el mapu ati nyabuk.

³⁵Ayupu nyabukop ura, ayupu tonap, nyabuk. “Winipmanto yupu anyapmasin touk, anggun kayapu nang, yuk dib tenena nang malye upsikiba, kum namin kipmunyop ura, na Ni Allah im deice ululnye

ababye, elce anggun malye winimunye ning ati, ‘Dauplye’ tenen, kum namin kilinamsile, kume kum daneipnamsile.” Yesus arye nyabuk.

**Ninye arye akunum domice kilapu batakna ati, Yesus
arye, nyabuk yupu
(Markus 10:1-12)**

19 ¹Yesus arye ayupu nirya akunum nyabukop ura, Kapernaum mutuku batakuka bisik fia mapnin balamika ani, Galilea tam batakuka, Yordan mek koubuka bisik mapnin balamika ani, Yudea tam biyik. ²Biyikop ura, Yesus minopce menekuka banmokbuk, el aminyan tam ninye weik aminyan yanganmekba, aninye sik uk dilamuk nang ati kwetenmok. ³Tonok talak ara, Farisi nang Yesus dam yayikce, ‘Yesus ara, malye yupu nyapnul do, kum do? Malye yupu nyaptuop ura, nunce, “Elda fia malye winilulnye,” nyaptibya’ tenen, tenepce asipdeyik. “Musa sekamuk yupu deice, tonoknye birye el domtu kil ati, ‘Akil batakunne,’ teneplirye, adip aryuk talya lukparabuka baktu do? Yata deiyok arye do nirya, anye teneplye touk, ‘Adeiyok ani, adeiyok atia, na kil batakunne,’ teneplye touk, adeice aryuk el domtu kil baktop ura, aning teleb do, malye do? Musa arye ayupu sekeipsuk do, kum do?” nyabuka asipdeyikce, Yesus ati winipdeyik.

⁴Asipdeyik ati, Yesus arye ila tamubuka aFarisi nang ati asipdeyuk. “Musa sekamsuk yupu nirya ara, min kum nyalulum do? Anyapnusin yupu kum kel kiplum do? Ayupu ara ani.

‘Allah arye aning-aning nirya kwepdeiyamuk talak ara, sal ap, kilapu ap, kwepdeiyamuk.’
(Kejadian 1:27)

⁵Sal ap, kil ap kwepdeiamuk talak ara, Allah arye ayupu nyabuk.

‘Aning ati ara, tonoknye birye el li ap, el lin ap batakuka, el kil doplye talak arye dipdongobuka, dotalak ara, el ap, el kil ap, sik uk neika unamrake. Sik uk Ansinibuka neika urikirye, nong tonok atonun unamdake.’
(Kejadian 2:24)

⁶Winiduraka ati ara, sik yuk-yuk kum ururake. Sik kanye ap, nong ap, tonok atonun ubuka unamrake. Aning ati ara, na arye nyapsine. Sal ap, kil ap dopdarikiba, Allah arye sik nong tonok atonun kipdeibuk ning ara, ninye arye wilibuka yuk-yuk kilina ara, meme. Ninye arye domice kilapu batakanya ara, fia malye,” Yesus arye, sik Farisi nang ati nyabuk.

⁷Nyabuk ura, sikce tamubuka nyabik. “Ance ayupu nyapmasilam bukni, yata deiyok ati, Musa arye ayupu sekeipsuk do? Musa arye sekeipsuk yupu ara ani. Tonoknye birye, ‘Na kil batakun’ tenen, surat sekuka el domtu kil ariktop ura, akil bakturye akil ati, ‘Anda bilyame,’ nyapturye baktue. Ayupu ara, Musa arye nyabuka sekeiyamsuke. Asekeiyamsuk yupu ara, yata deiyok ati sekeipsuk do?” nyabuka, sik Farisi nang arye Yesus ati asipdeyik.

⁸Nyabikop ura, Yesus arye ila tamubuka sik Farisi nang ati nyabuk. “Anggun apu yapu talima malye wamukba, Allah yupu kum kekelamikke, malye uk winilamika ati, Musa arye, ayupu nyabuka sekeiyamuk. Anggun apu yapu nang malye winilamik touk, anggun winitalak ululum ninye ababye atonun winilulume. Anggun dolulum kil batakalulum ning ara, Allah arye aning-aning nirya kwepdeiyamuk talak ara, sal ap, kilapu ap dopdanuka, daulamik talak ara, aning kum winilamik bukni, anggun winitalak ululum ninye aryuk winilulume.” Yesus arye, Farisi nang ati nyabuk.

⁹Nyabukce ayupu ton nyabuk. “Na dipkoprop nyapsine. Yatanye do nirya, el dobuk kil arye, yuk nang ap talya yopdakiba, adeiyok deice aryuk akil baktue. Aning ara mitikto telebe. Bukni, yuk deiyok nirya aupmatua babye, yuk deiyok deice el kil batakliroye, yuk kil doproplyop ura, ara malye ulule. Ara, yuk nang arye kilapu talye-talye yolamak touk winilule. Akunum domlum kilapu batakna ara, fia malye nyapsine,” Yesus arye, nyabuk.

¹⁰Nyabuk ura, Yesus el mapu arye el ti nyabik. “Se, kilapu arye yuk nang ap, talya yolanyak deice aryuk, kil batakna ara mitikto telebe, nyanmasila ara, nun ikine. Ati, nun kanye ara, kil dona ara, dawaplye, kilapu kum dopnamabe. Kwit uk unamabe. Aning ara teleb atia,” nyabik.

¹¹Nyabikop ura, Yesus arye tamubuka nyabuk.

Anggunce, ‘Kil dona ara, nun like kwit uk unamabe,’ nyapmanulum yupu ara, ninye nirya kekebikiryne, fia kum winiptinge. Ayupu talya nyaplopting bukni, dipkoprop kwit uk kum uptinge. Allah arye, ‘Kwit unamak’ tenen, ton nang wibuka deipliryne, el mikip anang ati arepnilyop ura, ananguk ara, ayupu moubuka kekeptingce, kil dona kum dib aryuk kwit nanguk uptinge. ¹²Kil kum doce nang ara, yala winilye unyake. Tonok ning ara, sik nin yapu arye deibice talak aryuk, sik den duruk kum wamlyeba, kil patana ton kum wamlye nang ara, kil fia kum donyake. Deiyok bitinye ning ara, ton nang ara, sik deiyok nang arye, sik amutam unyak melin nang ati, ‘Mambul fil uk donamaka anya arye, kilapu kum dolanamake’ tenen, anang sik den duruk donyak nang ara, kil kum donyake.

Deiyok winilye ning ara, ton nang arye utenenyake. ‘Kil dobibiryne, akilapu sik patan ning fia tenebipyop ura, Allah el fil uk tenebuka, afil teleb ubuka kum doptibye anya arye, Allah lyepsiliryne, nun talima talisiliba, el fil uk tenebuka, afil uk donamap’ tenen, kilapu kum donyake. Sik bidamnye aryuk, ‘Kwit nanguk unamabe,’ tenebikiryne, kilapu kum donyake. Anyapmasin nang do, yuk nang do, Allah arye, ‘Kwit nanguk unyakce, na fil uk donamak’ tenen, el mikip ariplye nang uk, ayupu kekebuka unyakce, kil kum donamake. Talya nang arye, aning kum winiptinge. Yesus arye, el mapu 12 nang ati nyabuk.

'Allah arye mitik mapu teleb kipdeipnamle' tenen, Yesus arye Allah morobuk yupu

(Markus 10:13-16; Lukas 18:15-17)

¹³Yuk talak ara, ninye weik arye, 'Yesus el taruk nun mapu sik nong deice deiplirye, teleb kipdeipnamle' tenen, amapu sik ni yapu ap, sik nin yapu ap arye, sik mitik mapu weik arye bobuka, Yesus dam boyanganmek. Boyanganmek ura, Yesus arye wipdeibuk ati, el yupu kekebuka melibuka balamik nang arye, amapu sik ni yapu ap, sik nin yapu ap ati, "Anggun mapu bobuka, nun ni Yesus dam boyanganmaluma ara, bataklulume," nyabuka yupu sekenmek. ¹⁴Yupu sekenmek ati, Yesus eibukop ura, el mapu ati derebuk. Derebukce, ayupu nyabuk, "Mitik mapu bobuka, na dam boyanganmaka ara, telebuka. Mapu ara, na dam yangana telebuka. Sik amapu na dam boyangana ati yupu sekenmaluma ara, meme. Allah lyeplirye, sik talima talibirye, Allah el mapu unamak ninye ara, amitik mapu unyak touk, talima namin unyak ninye uk, Allah el mapu unamake. Amapu arye kanye bokoltona kum dib aryuk, na ti talya luparabuka diba tenepnikirye, lamapdongobuka unyak touk kum unyak ninye ara, na ti dib kum tenepninge. Ati, 'Mitik mapu arye Yesus dam kum yanuyak' tenen, 'Yupu sekana ara bataklulume,' nyapsine," Yesus arye el mapu 12 nang ati nyabuk. ¹⁵Yesus arye aunmek nang nirya ati ayupu nyabukce, awekelyanganmek mapu ati, 'Allah arye amapu ati, teleb kipdeipnamle' tenen, Yesus el taruk sik nong deice deibukce, Allah moronmok. Winibukop ura, amutuku batakuka, 'Yukak binun' tenen, banmok.

Bona weik talinye tonok Yesus dam yayukba nyabuk yupu

(Markus 10:17-30; Lukas 18:18-30)

¹⁶Yesus arye amapu ati, Allah akunum morobukop ura, sakwetebuka bayukbuk, bona talinanye tonok Yesus dam biyukce, Yesus ati asipdeyuk. "Naie, anda, peterena telebnye ulyama anya arye, yata teleb fil doptinya deice arye, Allah lyeprnutu ura, bola koplobuka fia kam una deiyok ning doproptinye do?" nyabuka asipdeyuk. ¹⁷Asipdeyuk ura, Yesus arye tamubuka nyabuk. "Ance, 'Yata teleb fil doptinye do?' nyapmanilama ara, deiyok ara, yata ati ayupu nyapmalamce, asipdemanilam do? Tukwak mutuku-mutuku nirya unyak ninye ara, tonoknye babye, teleb nang ton kum unyake. Dipkoprop teleb ululnye bira, Allah el tonok ulule. 'Bol koplobuka fia kam una deiyok ning doproptinye' tenen, patapkilyop ura, Allah arye, 'Wininamlulume, aning ara kum wininamlulume,' nyapdeibuk ati, Musa arye sekeiyamuk yupu mem yupu wamlye ning ara, ayupu nirya moubuka kekepmince, fia diksukumuk unamlame," nyabuk.

¹⁸Yesus arye nyabuk ura, abona weik talinanye birye tamubuka nyabuk. "Allah arye nyapdeibukba, Musa arye sekeipsuk yupu noutamak ara, dan

yupu kekebuka unamne do? Ayupu nyanmanilama ara laka nyapnilyame,” nyabuka asipdeyuk. Yesus arye abona weik talinanye biti ayupu nyabuk. “Allah arye nyapdeibukba Musa arye mem yupu sekeiyamuk ning ara ani.

‘Ninye talya oltakana ap, ubula kil talya yoldana ap, yuk ninye sik ning ubula dolona ap, yuk nang ati minina yupu nyana ap, aniryra ara, fia kum wininamlulume.’ *(Keluaran 20:12-16)*

19 “Tonda, anggun ni yapu ap, anggun nin yapu ap ati, bico tenebuka kibuka melinamlulume. Tonda, an bidamang patan ati, bico tenepdamince, teleb ubuka uminye touk, ance yuk ninye ati bico tenebuka melilanamlyame.’ *(Ulangan 5:16-20)*

Ayupu ara, Musa sekeiyamuk yupu nyapmakine,” Yesus arye nyabuk.

20 Nyabuk ura, abona weik talinanye birye tamubuka nyabuk. “Naie, an nyapmanilam yupu ara, na mitikop arye kekelamsirye winilamsa anya arye, yata ning ton winipnamne do? Musa arye sekeipsuk yupu ton bataklamse ning ara, aupmal do?” nyabuk. 21 Nyabuk ura, Yesus arye anye biti ayupu nyabuk. “Ati, ‘Diksukumuk utinye’ tenen, dipkoprop patapkilyop ura, na arye nyapnukin ning ara, winipnulyame. Ara, an talyamlum ning nirya, yuk nang dam yo bok binuka dekmince, talya bona utotoa talina kum ninye, aning-aning nirya kum talinyak ninye ati, ayo bok arinamlyame. Talyamlum ning dekuka bona utotoa talina kum ninye akunum aripminyop ura, Allah arye fia teleb ning im deice deiyamkilye ning ara, aminyan binuka dopropnalame. Bona utotoa talina kum ninye akunum aripminyop ura, na yupu kekebuka dobolyanamlyame.” Yesus arye abona weik talinanye biti nyabuk.

22 Yesus arye ayupu nyabukop ura, abona talinanye urasin yupra kukabukce, malye kanye bobuka, kanupdongobuka biyuk. Anye bira, aning-aning weik arye talilamuknye anya arye, ‘Ayupu nyapnil ning ara, kum winiptinye’ tenen, malye kanye bobuka kanupdongobuka biyuk.

23 Biyukop ura, Yesus arye el mapu ati, ayupu nyabuk. “Na dipkoprop nyapsine. Allah arye ninye weik lyeplirye, sik kanye talima talinamle ninye ati, elce nyaplye ura, el amutam bukuka unamake. Bukni, ayupu ara sik bona weik talin ninye ara, ikin upliba, kanye imun kanye aryuk kekenyake. Kanam aryuk na yupu kekebuka dib kum teneptinge. Ikin aryuk Allah el mapu unamake. Deiyok ara, bona weik talin nang arye, ‘Nun bona ara, nun na’ tenen, sik talinyak ning deice, sik kanye delinyaka ati nyapsine.” Yesus arye nyabuk. 24 Yesus arye ayupu winipmanto ning ton nyabuk. “Weik unta basam ara, butum aling wilamak yumce fum wekena ara kaname. Bukni, Allah arye sik kanye ap, talima ap, taliplirye nyapdeipliba, el mapu unamake ning nirya ara, bona weik talin nang arye ayupu kekebuka kum dobolbitinge. Ikin kanye bobuka wininyaka deice aryuk, Allah el mapu kibikirye, im deice binamake. Kanam dib aryuk dib kum teneptinge,” Yesus arye nyabuk.

²⁵Nyabukop ura, Yesus el mapu ayupu kekebikce se tenebuka ngalukik. Ngalukikce sik mamun demuk asilanmek. “Ayupu nyapmasil ning ati ara, Allah arye yatato ninye lyeptomle do?” nyabuka asilanmek. ²⁶Asilanmek ati, Yesus arye tamubuka nyabuk. “Ninye mikip ap, ninye arye wininyak ning ap, adeice arye ninye kum lyeptomtinge. Bukni, ninye arye kum winipmanto ning nirya ara, Allah elda, kanam aryuk afil dolule. Allah elcuk malye ninye babye, teleb ninye babye, kanam aryuk lyeplule. Aning-aning nirya, Allah el mikip deice aryuk, kanam aryuk fil dolule. Allah ara ikin kum uptua ati, Allah arye lyeptomle ninye ara, kanam dib aryuk lyeptomle. Ikin kum uptue.” Yesus arye nyabuk.

²⁷Nyabuk ura, Peterus arye tamubuka nyabuk. “Naie, an melin ati, nun talyamubu ning nirya batakuburye, an yupu kekebuka dobolyangakinyabe. Wininyaba ati ara, Allah arye yatato dekna ning aripsiliba doproptomap do?” nyabuka asipdeyuk. ²⁸Asipdeyukba, Yesus arye el mapu ati nyabuk.

Na dipkoprop nyapsine. Na ara, Ninye Mi Koprop Atonunye birye aning-aning nirya winiryuk ning kwepdeiptamne talak ara, aning nirya ara, na talipnirye weik ninye deiyoknye ubuka, Raja unamne. Weik deiyoknye upnyop ura, na fia teleb buna ning, weik dirina uplye nang deice arye buknye, aning-aning nirya talibuka deice tam unamne. Atalak ara, na arye wibuka deipsise nang, na yupu kekebuka fia dobolyanganamnulum ati, anggun ap aning-aning weik aripsiniba, anggun babye aning talibuka weik deiyok nang unamlume. Winipmunye talak ara, anggun babye teleb bunak 12, deice bukmunce, Israel ninye yala 12 unyak ninye nirya ara, anggun weik deiyok nang umunce, Israel yala ninye kan-kan arye, ‘Teleb unyak nang ani, malye wininyak nang anye,’ nyabuka, sik yupu lipsisikuka bokolina deiyok nang unamlulume.

²⁹Tonda, yatanye do, yata kil do? Ninye yala-yala nirya arye, na nong ap, na yupu peterena ap ati, sik talilamice ning batakikirye, na aminyan tam dobolyanganamniak ninye nirya ara, sikce batakikce ning atonun ning, yupa fia weik dolonamake. Ara, atalak noutam aryuk dolonamake. Ara, sik ulamice mutuku ap, sik aik ap, sik weit yapu ap, sik du yapu ap, sik weit kilapu ap, sik du kilapu ap, sik nin, sik ni yapu ap, sik bidamnye mapu ap, sik wa bun ap, anirya bataklamica ning ati ara, atalak noutam aryuk aning atonun ning, yupa weik dolonamake. Tonda, aminyan yanamle talak ara, kam fia una ati deiyok ning doprobikirye, nong bola koplobuka fia kam unamake. ³⁰Bukni, winitalak ninye deiyok nang kibuka ulamice weik nang ara, aminyan talak ara Allah arye aninye dobuka, amu kipdeiptamle. Atonun, winitalak amutam unyak ninye ara, Allah arye aninye dobuka erepdeiplirye, weik ninye deiyok nang kipdeiptamle. Yesus arye el mapu ati nyabuk.

Yesus domon yupu deice arye, wa win nang ati, nyabuk yupu

20 ¹Yesus arye el mapu 12 nang ati nyabuk. Allah arye ninye mutuku-mutuku nirya noutamak arye ninye weik lyeplirye, sik

talima talisilya atonun ning ati, winipmanto yupu nyapnusine. Tonok wa deiyoknye birye, ‘Na anggur tapu duk wa fil donamak’ tenen, berentam talak ninye dolbiyukce, ayupu nyabuk. ²“Asum tonok na wa winmanunye bukni, iniplyop ura, dekna teleb keil uang tonok el si ara derakma^p arepnamasine,” nyabuk ura, sik anang arye, “Telebe,” nyabuka el wa fil wilbiyik. ³Anang arye fil donmek bukni, kiting jam 9 pagi kibuk. Awa deiyoknye birye, din ning deibuka deklamikak, pasar deklamikak biyuk talak ara, talye urdem balamik nang eipdayikce, ayupu nyabuk. ⁴“Na wa wilbinumunyo ura, anggun fil dopmanumunye touk, na arye dekna teleb ning arepnamasine,” nyabuk ura, anang arye, “Telebe,” nyabuka, el wa wilbiyik. ⁵Anang niry a arye el wa winmekbuk, awa deiyoknye birye berentam talak winipmoka atonun, kiting noutam jam 11 siang ton, sintam jam 2 sore ton, atonun yuk talye tikda banmek nang ati nyapra banmok. “Na wa wipnumunyo ura, fil dopmanumunye touk, dekna teleb ning arepnamasine,” nyapmokba, anang niry a arye yuk-yuk, el wa wilbiyik.

⁶Atonun ton inilongon talak jam 4 sore arye, awa deiyoknye banmokce, yuk talye daunmek nang eedayikce ayupu nyabuk. “Yata deiyok ati, asukum uk tikmalumce, tonok sum niry a fil kum donmalum do?” nyabuka asipdeyuk. ⁷Asipdeyukba, sik atalye unmek nang arye tamubuka nyabik. “Fil deiyok nang arye, ‘Nun fil dolbisilyame,’ nyabuka fil kum nukmasiyaka ati, talya uk unmabe,” nyabik. Nyabikop ura, awa deiyoknye birye tamubuka nyabuk. “Ati, anggunce, na wa wipnumunyo ura, dekna teleb ning arepnusine,” nyabukba, sik anang babye, el wa wilbiyik.

⁸Anang niry a arye fil donmek ani, akunum inibukop ura, adeiyoknye birye el melinanye biti nyabuk. “Afil donmak nang ara, sik fil kunumna ati dekna ning arepnulam ning ara, aminyan tabakuka fil donmak nang arye deiyok koubuka, arepnin banmaminya ani, berentam talak arye deiyok koupangu nang binuka sirya dakdongobuka ariplyame. Ati anang yukubilyame,” nyabuk. ⁹Yukubukba, el wa winmek nang yayikop ura, inilongon talak jam 4 sore deiyok koupmek nang ati, keil uang el si derakma tonok aribukba doprobik.

¹⁰Arepnin banmoka ani, minopce deiyok koupmek nang yayikce, utenebik. ‘Anang ara fil mitikanun uk fil dopmangubuk, keil uang teleb ning tonok aribmuba dopromaka anya arye, nunda berentam talak arye fil weik donmaba ati, keil uang weik arye arepnusile,’ tenebik. Utenebik bukni, awa tuku deiyoknye berentam talak arye, ‘Winibuka

P 20:2 *Derakma* nyalamik ning, ara Yesus ulamuk talak ara tonok sum noutamak niry a, berentam talak arye dipdongobuka inilongon talak fil dolbalamikani, asum fil dekna ati, inilongon talak arilamik keil uang, el si derakma nyalamik.

arepnamsine,' nyapmok touk, asum noutamak nirya fil donmek nang babye, keil uang tonokuk aribuk.

¹¹Keil uang tonok doprobik talak ara, anang arye awa deiyoknye biti, yuk anye bobuka el ti, "Malye winipmasile," nyanmek. ¹²Tonda, nyanmek. "Inilongon talak dopmangu nang ara, kiting tonokuk fil dopmangu bukni, keil uang el si ara derakma, tonok arepmalame. Nunda, asum noutamak nirya ikin fil donmapu talak, bupu unmasubuk, donmapue. Nun ap, inilongon talak donmangu nang ap ara, fil neiktoto uk kum dopmapu bukni, dekna teleb keil uang, duk tonokuk neiktoto uk arepmasilama ara, teleb kume. Nun kanye ara, aning malye. Ati aning ara yata deiyok ati, neiktoto uk tonok keil uang arepmasilam do?" nyabik.

¹³Nyabikop ura, adeiyoknye birye tamubuka nyabuk.

"Anango na malye kum winipmasine. Arup berentam talak arye, 'Tonok sum fil dobibyop ura, tonok weik yo bok dona telebe,' nyapmanulum do, kum do? ¹⁴Na arye, 'Weik yo bok tonok arepnamsine,' nyapmanu touk akunum arepmasina anye arye, anggun dekna keil uang dobuka bilulume. Na kanye ara, 'Na fil donamak' tenen, 'Sirya inilongon talak dopmanu nang ap, berentam talak dopmanu nang ap, atonun ubuka keil uang tonok arepnamame,' tenepmanu touk akunum arepmasina ati, winipmana ara, na kanye telebe.

¹⁵Na arepmasin keil uang ara, na keil uang anye arye, na kanye tenepmanu touk ubuka, akunum arepmasine. Na arye tenepnye touk winipsitinye. Bukni, na arye 'Fil weik donmangu nang babye, mitikanun uk fil donmangu nang babye, keil uang ansinibuka tonok arepnun' tenen, talye mangkau arye arepmana ati ara, anggun yu upmasilba derepmanulum do? Fil weik dopmalum nang ap, fil mitika aryuk donmangu nang ap ati, dekna teleb ning neik touk arepmanu ati ara, yata ati derepnulum do? Awa deiyoknye birye el fil don nang ati nyabuk." Yesus arye el mapu ati domon yupu deice arye ayupu nyabuk.

¹⁶Nyabukop ura, ayupu nong tonap laka nyabuk. "Arup winipmanto yupu nyapmasin touk, sirya talak ara, winitalak anggun tukwak ninye arye, 'Se anang ara weik mambule,' tenelulum ninye⁹ ara, amutamuk deipnamne. Aning atonun, anggunce, 'Se aninye ara, mambul fia kum ninye unyake,' tenen, luba kilulum ninye ara, Allah arye erepdeiplirye, weik nang kipdeipnamlarya. Allah arye anang dobuka amutamto

⁹ 20:16 *Mambul nang nyabuk ning ayupu nong ara, ani. Sirya talak ara, Allah elce teneamuk nanguk erepdeipliba, weik konop nang unamake. Tukwak mutuku ninye arye, 'Anang ara mambule,' tenenyak nang ara, sirya talak ara, Allah arye aninye dobuka, amutamto deipliba, mambul kum nang unamake. Bukni, winitalak ara, 'Anang ara mambul fia kume,' tenenyak ninye ara, Allah el kanye aryuk weik arye erepdeipnamle.*

kipdeipnamle. Winitalak, yuk nang arye, ‘Sikda mambul kum ninye unyake,’ tenenyak ninye ara, Allah arye erepdeipliba, mambul weik ninye unamake.” Yesus arye nyabuk.

Yesus arye malye nang opnamika ati, nyabuk yupu
(*Markus 10:32-34; Lukas 18:31-33*)

¹⁷Aminyan ara, Yerusalem mutuku binamika ati, bisik banmek talak ara, Yesus el menekuka banmokba, el mapu 12 nang ap, yuk nang ap, aminyan banmek. Banmek talak ara, yuk nang ton aminyan yanganmek ani, Yesus arye el mapu 12 nang ati, “Na dam yalulume,” nyabukba, yayikop ura, yu nang arye aminyan talak el Yesus ati winipnamik ning ara, laka nyabuk.

¹⁸“Nun nirya Yerusalem mutuku welebiboyop ura, nada Ninye Mi Koprop Atonunye inibuka bobinice ura, Allah el si erena aik fum fil dona weik deiyok nang ap, Musa sekamuk yupu peterena deiyok nang ap arye, ‘Anye bira opdeipsululume,’ nyabuka morobikirye, Yahudi yala kum nang, amutuku talina deiyok nang ati arepnamniyake. ¹⁹Arepnikcop ura, nong bola deice nalibuka ngilikna ap, maka tuluna ap, kama arye nong deice kulana ap, winipnikirye na nong dobuka, wanwanun yo deice arye opnamniyake. Opnikcop ura, dipmanya ani, like winilye sum^r akunum uplyop ura, Allah arye tamubuka kam bukeipnamnile,” Yesus arye nyabuk.

Yakobus ap, Yohanes ap, sik nin birye Yesus ati morobuk yupu
(*Markus 10:35-45*)

²⁰Yesus arye yupu nyabukba, Zebedeus el mapu bitinye Yakobus ap, Yohanes ap, sik nin ap, Yesus dam yayikce, akil arye, ‘Si erepnun’ tenen, gutam tuku dipdongobuka, Yesus ati morobuk. ²¹Morobukba, Yesus arye nyabuk. “Yata ning patapmakilba morolyanmanilam do?” nyabuk. Nyabuk ura, akil arye nyabuk. “Naio, na patanmanilba, moropnukin ning ara, ance aripnamsilame,” nyabuka morobuk. Tonda, nyabuk, “Aning-aning nirya talibuka umince, weik ninye deiyoknye unalamak ara, na mapu bitinye bobuka, tonye bira an kwanim taruk tam, tonye bira an sirik taruk tam deipmince, ninye deiyok nang kipdeipminyeba, weik nang keptiring do?” nyabuka morobuk.

²²Morobukba, Yesus arye akil, el mapu bitinye, Yohanes ap, Yakobus ap ati, tamubuka nyabuk. “Anggun asipdenmanurum ning ara, deiyok moubuka kum tenepmarume. Na nong deice ikin ning weik deipnikiba,^s na donamne

^r 20:19 *like winilye sum* – Sik Yunani ninye arye nuklamik touk, hari Jumat lukunyan ap, hari Sabtu nirya ap, hari Minggu berentam ap akunum ubukba, ‘Ara like winilye sum atonun akunum upmale,’ tenelamika ati, ayupu nyabuk. ^s 20:22 *ikin ning weik deipnikiba* – Yunani yupu sekik ning ara, lak akarye kum sekik. Yesus arye, domon yupu deice aryuk, ‘Na mek makau dobuka dinamne ning ara, anggun babye atonun dipturum do?’ nyabuk. Nyabuk bukni, ‘mek dinamne’ nyabuk ning ara, el dipnamuk ning ati nyabuk. Ati, nunda, ayupu deiyok laka kibuka sekupe.

touk, anggun babye atonun akanye imun ning dopturum do? Tonda, na nong opnikceba dipnamne touk, anggun babye atonun dipturum do?” nyabuk. Yesus arye nyabukba, sik bitinye nang arye tamubuka nyaprik. “An donmaminya dipnalam touk, nun babye atonun winiptinimnye,” nyaprik. ²³Nyaprikba, Yesus arye tamubuka nyabuk. “Na nong deice ikin ning deipnamniyaka ap, na donamna ap, dipnamna ap, nirya ara, aminyan talak anggun babye atonun wininamrum bukni, na tukwak mutuku tamubuka yanirye, aning-aning nirya talinamne talak, na kwanim taruk tam ap, sirik taruk tam ap bukuka weik deiyok nang una ati ara, na arye aning kum aripsitinye. Na arye anggun ninye deiyok nang una ati, kum dopeipsitinye. Na dana-dana tam deiyok nang kibuka bulyanamak nang ara, na Ni Allah arye teneamukce, kintinibuka wipdeiamuk nang uk, aminyan talak anang wipdeiplyop ura, na dam bulyanamdake,” Yesus arye nyabuk.

²⁴Yakobus ap, Yohanes ap, sik nin birye morobuk ning, Yesus el mapu, sik 10 nang kekebikce, abitinye nang sik nin birye morobuk yupu ati, yu ubukba derebik. ²⁵Derebikba, Yesus arye el mapu 12 nang nirya ati bulubuka, ila tamubuka ansinipdeibukce ayupu nyabuk. “Anggun nirya kekepnululume. Sik Yahudi yala kum nang arye, ‘Nun deiyok nang ani,’ tenenyak nang ara, adeiyok nang arye sik amutam unyak ninye ati, yu upliba aninye yanibikirye, sik nong deice ikin ning weik delinyake. Tonda, sik sisinanye arye deice tam unyakce, sik amutam ninye ati, kanye imun ning sik nong deice deibikirye, talya yupu nyaplobuka ubula dolonyake. ²⁶Sik Yahudi yala kum ninye, sik deiyok nang ara wininyak bukni, na mapu anggunda aning atonun fia kum wininamlulume. Anggun na mapu ara wininamlume. Anggun awekmalum nang noutamak arye, yatanye do, ‘Nada teleb deiyoknye unamne’ tenen, deiyoknye atonun unamlanye bira, el kwit capu sik amutam buklirye, sik kanye imun uplye ning ati, melinamle.

²⁷Tonda, yatanye do, ‘Nada dunye atonun, mambul weiknye unamne,’ teneplinye bira, yuk ninye nirya ati, sik amutam fil doplirye, sik talya melinanye atonun unamle. ²⁸Na unye touk, anggun babye, wininamlume. Na babye Ninye Mi Koprop Atonunye birye, na bidamnye ati patapnilye ning, ‘Ninye nirya melinamniyak’ tenen, kum yase. Na arye tukwak ninye nirya, sik patalye ning ati, ‘Melinamne’ tenen, yase. Na unye touk, anggun na mapu babye atonun unamlulume. Na ara ninye nirya sik kanye arye, malye tenelamikce ning ap, malye winilamikce ning ap ati, ‘Allah arye sik wenebuka oplyak’ tenen, na opnikibuk dipnamne deice arye sekdongopnamne. Winipnyop ura, ara ninye kisok arina atonun winipnamne. Allah arye tukwak ninye nirya wenebuka optu bukni, sik yok pununa ati, na dipnamne.” Yesus arye nyabuk.

Yesus arye asing kuamuk nang bitinye kwetebuk yupu
(Markus 10:46-52; Lukas 18:35-43)

²⁹Yesus nyabukba, sik nirya amutuku batakuka, bisik mapnin balamika ani, Yeriko mutuku bisibuka asik dolamikak batakuka, Yesus ap, yuk

ninye yupa weike ap, banmek. ³⁰Banmekbuk, asing kuamuk nang sik banmek bisik lilkwak bukmarik. Sik abukmarik talak ara, yuk nang arye, “Yesus yanganmale,” nyabuka laka nyabikba kekeprikce, weik yupu arye nyaprik. “Yesuso, anda Daud yala nang arye deipkiknya anye arye, bico tenepsimince, nun bitinye nang ati melipsilyame,” nyabuka moronmarik. ³¹Nyabuka moronmarikba, awekmek nang weik arye, “Nyana batakurume,” nyabuka yupu sekik. Yupu sekik bukni, sik asing kuamuk nang arye, ‘Yesus kekepnusil’ tenen, weik arye tonap, “Anda Daud yala nang arye deipkiknya^t bico tenebuka nun melipsilyame,” nyabuka weik arye moronmarik.

³²Moronmarikba, Yesus banmoka ani, kekebukop ura, anang bitinye dam binuka tikukce, asing kuamuk nang abukmarik ati, ayupu nyabuk. “Anggunda, ‘Yata wiripsetu’ tenen, patapmasilba, moronmanurum do?” nyabuk. Nyabuk ura, asing kuamuk nang sik bitinye arye tamubuka nyaprik. ³³“Naie, nun asing kuamsuk bukni, nun asing arye aning-aning teleb ubuka elina patanmasil ati, nun du koproba Yesus ati moropkiname,” nyaprik. ³⁴Nyaprikba, Yesus arye abitinye nang ati bico tenebukce, el taruk arye sik asing talibukce kwetebuk. Yesus arye sik asing talipdeyukba, atalak aryuk, sik asing teleb ubuk ura, aning-aning niryala teleb ubuka eiprikce, Yesus bisik banmokba, sik bitinye nang arye aminyan dobolbirik ura, Yesus ap neika banmek.

Yesus arye, Yerusalem mutuku yayuk talak, winibuk ning
(*Markus 11:1-10; Lukas 19:29-38; Yohanes 12:12-15*)

21 ¹Yeriko mutuku batakuka, ‘Yerusalem mutuku binamap’ tenen, Yesus ap, el mapu ap, bisik mapnin balamikani, asik dolamikak si ara, Betania ap, Betfage ap bisibikce, banmeka, Zaitun^u mutuku dup welebig. ²Welebigop ura, Yesus arye el mapu bitinye nang ati nyabuk. “Ortam mutuku birumunce, asik dolamicak winiryuk wekrumunye talak ara, keledai basam el lin ap, el mi mitik ning ap, kerekipmakca eiprumunyop ura, turya kerekdongopmacak lobuka, keledai basam dobuka boyanururume. ³Winipnurunyone ura, yuk nang eipsikirye, ‘Yata ati winiprum do?’ nyabuka asipsikcop ura, tuba tamubuka nyapnamrurume. ‘Kume, nun ni Yesus el patapmala ati, bobinimnye ura, akeledai basam balye deice bukuka balyop ura, akeledai basam anggun dam tamubuka dopdeipnamsile,’ nyapnamrurume,” Yesus arye abitinye nang ati nyabuk.

^t 20:31 *Daud yalanye* nyaprik ara, ayupu deiyok ara, ani. Ara ‘Tukwak Ninye Lyena Deiyyoknye bira, Daud el yala ninye arye deipnamake,’ tenelamika ati, ayupu nyaprik.

^u 21:1 *Zaitun* – Amutuku deice zaitun yo duk moulamuk yo koumika ati, amutuku si ara Zaitun mutuku nyalamik.

⁴ Yesus arye nyabukba, winiprik ning nirya ara, Allah yupu lakak nyalamuknye, nabi Zakaria arye nyalamuk touk winipnamuka ati, Yesus arye ayupu nyabukba, winiprik. Nabi Zakaria nyalamuk yupu ara, ani.

⁵ ‘Ance Yerusalem mutuku unyak ninye ati nyapnulyame.

‘Anggun dipdelulume. Anggun weik ninye deiyoknye, talima lamapdongobuka, keledai basam mi mitik ning deice bukuka yanganmale,’ nyabuka laka nyapnulyame.’

(Zakaria 9:9)

⁶ Zakaria arye, ‘Winipnamle’ tenen, nyalamuk touk, Yesus arye nyabukba, ayupu nyapmok touk, Yerusalem asik dolamik noutam birikce, aik buplan dam keledai basam ap, el mi mitik ning ap, kerekmekak eiprik. Eiprikce binuka lobuka bobirik. ⁷Lobuka bobanmarika ani, Yesus dam boberikba, aunmek nang sik deice butum aling kwiribuka keledai basam mi mitik ning balye deice yangapdeibik ura, Yesus abasam deice bukuk ura bobiyuk.

⁸ Yesus ara, Yerusalem mutuku bisik keledai basam deice bukuka banmokbuk, amutuku bulupmek ninye arye, ton nang ara, ‘Yesus si erepnuyap’ tenen, ninye weik arye, sik ongolamik butum aling kwiribuka, Yesus yanibuka yanamokak yangapdeibik. Ton nang ara, el yanamok bisik lil kwa arye, atikamuk yo bata yangabuka, bisik yaninak yangapra banmek. ⁹Yesus banmokak menekuka banmek ninye ap, aminyan yanganmek ninye ap, ‘Yesus ara nun weik ninye deiyoknye Raja upnamsile’ tenen, Allah yupu laka nyalamik nang, nabi nang arye minop talak sekamik yupu dobuka, ayupu weik arye nyapra banmek. Nyapra banmek yupu ara ani.

‘Daud el yala nang arye deibiknye bira,’ el fia telebe. Hosana.”

‘El si erebuka gisal dobabe. Allah el mikip ap, el si ap deice arye yanmasilnye bira, Allah weik arye melipliba, telebuk ulule. Elda weik mambule. Allah anda, im deice umince, weik mikip ulyamnye bira, an si weik arye erepmakiyaba ati, hosana nyababe.’

(Mazmur 118:26)

Nyabuka Allah ati weik arye si erenmek. ¹⁰ Yesus arye Yerusalem mutuku bisik banmoka ani, Yerusalem asik dolamikak wekukce, sik Yahudi yala nang nirya arye, ‘Yatanye yanmasil do?’ tenen, mambul kanye bobuka, lukulanmekce, dinmek. Wininmekce, “Anye bira, yatanye do?” nyabuka asilenmekba, sik awekmek nang, yuk nang arye tamubuka nyabik. ¹¹ “Ayanmalanye el si ara, Yesus. Galilea tam noutamak bukni,

▼ **21:9a** *Daud yatanye* nyalamik ning, ara Allah arye minop talak nyalilamuk touk, ‘Mesias, Ninye Lyena Deiyoknye bira, Daud yala nang arye deipnamak,’ tenen, diba tenelamika anye arye, ayupu nyabika deice arye, ‘Yesus ara, nun Ninye Lyena Deiyoknye unamsile’ tenen, ayupu nyanmek. ▼ **21:9b** *Hosana* – Ayupu ara, Ibrani yupu ulule. Ayupu deiyok ara, ‘Allah arye lyesulule’ tenen, ayupu ara hosana nyalamik.

Nasaret mutuku arye, Allah yupu lakak nyalulnye, nabi yanmal ani,” nyabik.

Yahudi yala nang Allah ati arilbalamik aik, Yesus biyukce winibuk ning ati, nyabuk yupu

(Markus 11:15-18; Lukas 19:45-47)

¹² Yesus arye, Yahudi yala nang Allah ati arel balamikce, el si erelamik aik buplan dam biyuk. Tikilbiyukce, Yahudi yala nang, ‘Allah arye nun malye wininyap ning kum daneipsiliryne, lyepnamsil’ tenen, kam ning obuka, Allah arilamik ning, ining ning opnamik ning dekenmek nang ati, Yesus derebukce yakuka buru tam dopkwetebuk. Tonda, yuk mutuku nang arye sik yo bok dopdeibikba, Yerusalem mutuku nang yo bok arye dekelanmek nang nirya ati, sik yolana dalubuka yamupdonokra biyuk. Tonda yalma maka atonun maka dekenmek nang, sik bukmek ning babye danguplobuknin biyuk. ¹³ Wininmok talak ara, aunmek nang ati, ayupu nirya peterenmok. Allah arye nyapdeibukba, nabi Yesaya arye sekeiyamuk yupu ara kum tenelulum do? Ayupu ara ani.

‘Ninye mutuku-mutuku nirya arye, na aik ati, “Ninye mutuku-mutuku nirya Allah ati arel balamikce, el si erelamikce, Allah ati moronyak aik ani,” nyanamake,’ nyabuk.’ *(Yesaya 56:7)*

Tonda Yesus arye ayupu nyabuk. “Allah arye nyapdeibukba Yesaya arye anyapmasin yupu sekeipsuk bukni, ayupu ton aupmale.

‘Anyaik ara na aik bukni, anggunda, ubula nang arye ubula dobuka, duknubuka ulamak aik atonun, na aik akunum malye kipdeiplume.’ *(Yeremia 7:11)*

Nabi Yeremia sekamuk yupu dobuka akunum nyapsine,” Yesus arye anang ati nyabuk. ¹⁴ Yesus ara, Yahudi yala nang arye Allah ati arilbalamik aik unmok talak ara, asing kun nang ap, aik bun nang ap, el dam boyanganmekba, kwetelinmok. ¹⁵ Yesus arye kwetelinmok ning ap, teleb fil dobuka wininmok ning ap elinmekce, anyaik dam talya unmek mapu yupu weik arye nyanmek. “Daud el yalanye birye deibukba ayanmasilanye bira, Ninye Lyena ati, Mesias dopdeipsuknye bira ani. El si erebapa ati, hosana nyababe,” nyanmek.

Sik Musa sekamuk yupu peterena deiyok nang ap, Allah arina ati, el si erena aik fum fil dona weik deiyok nang ap, Yesus wininmok ning ap, atalye mapu arye nyanmek ning ap, eibuka kekebikce, yu weik ubukba, Yesus ati nyabik. ¹⁶ “Anyaik dam talya mapu arye nyanmakiyak yupu ara, kum kekenmalam do? Sikce nyanmakiyak yupu ara, malye atia,” nyabuka wenebik. Wenebikba, Yesus arye sik Yahudi yala deiyok nang ati tamubuka nyabuk. “Yo, amapu arye nyanmaniyak yupu ara, na kekepman bukni, sik anyapmaka ara, Allah yupu noutamak aubuk touk nyanmaka anya arye, telebuka. Ayupu ara, kum nyalulum do? Nyalulum bukni, moubuka kum biklumce nyanmanulum do? Ayupu ara, ani.

‘Allah ance sik talimak petereliminyeba, fia mitik mapu ap, kabunye nang ap arye, an si fia teleb ubuka erekinyake. ‘Na si erenamniyak’ tenen, akunum teneamlume.’ *(Mazmur 8:2)*

Mazmur noutamak sekamik yupu nyapsine,” Yesus arye nyabuk.
¹⁷Yesus arye Mazmur yupu dobuka nyabukop ura, anang asukum batakuka, Yerusalem mutuku asik dolamikak batakukce, Betania mutuku malbiyuk.

Ara yo du mouna kum ati, Yesus arye nyabukba, ara yo kolubuk yupu
(Markus 11:12-14, 20-24)

¹⁸Betania mutuku mapmoka berekukop ura, ‘Ila tamubuka Yerusalem mutuku binun’ tenen, bisik noutamak yanganmok talak ara, Yesus ara din patabuk. ¹⁹Din patabuka ati, kwarang yo duk moulamle touk, ara yo tikamukak binuka pera arye eibukce, bok weik ulamuk ati, ‘Duk moubuk do?’ tenen, ayo dam dilbiyuk. Dilbiyukbuk, ayo duk mouna kumce, bok dem wamuk. Bok demuk wamuk ati, Yesus arye ayo wenen ati nyabuk. “Akiting tamun, akiting tamun nirya, duk kum mouminya ati, ninye arye an yo duk kum dakuka dipnamkiyake,” nyabuk. Ayo ati ayupu nyabukop ura, atalak aryuk, ayo yating ap, bok ap, nirya kolubuk. ²⁰Ayo bok, nong ap, yating ap nirya, kolubuk ning ara, Yesus el mapu 12 nang arye eibik. Eibik ura ngalukikce, Yesus ati, nyabik. “Naie, ‘Duk kum moupminyeba, ninye arye kum dakuka dipnamkiyake,’ nyapmom arye, yo akunum kolupmala ara, yata wiribuk arye ayo pola kolupmal do?” nyabik.

²¹Nyabikop ura, Yesus arye tamubuka nyabuk. “Na dipkoprop nyapsine. Yatanye do nirya, kanye talima bokoltona kumce, Allah ati fia dib teneplirye, ‘Na arye Allah ati moropne ning ara, Allah arye dipkoprop winipnamnile,’ tenebuka, Allah ati moroplyop ura, weik mambul ning uptue. Ara, na arye nyapmanuba, ara yo kolupmal touk uptue. Tonda, aning uk kume. Omutuku ati nyaptue. ‘An yuk aryuk erepdakuka, laut mekwen noutamak delilbilyame,’ nyaptuop ura, el nyaplye yupu deice aryuk, amutuku el yuk aryuk erebuka, laut mekwen noutamak dopkwetepdatue. ²²Aning ati ara, na nyapsine. Allah moropmamunye talak ara, aning-aning moropmamunye ning nirya ara, ‘Allah arye dipkoprop aripnamsile’ tenen, kanye bokoltona kum dib aryuk, diba tenebuka moropmunyop ura, Allah arye dipkoprop arinamsile,” Yesus arye nyabuk.

Yahudi yala deiyok nang arye, ‘Yesus arye nun deiyoknye kum upnamsil’ tenen, asipdeyik yupu
(Markus 11:27-33; Lukas 20:1-8)

²³Yesus ap, el mapu 12 nang ap, bisik yanganmeka ani, Yerusalem mutuku asik dolamikak wekikce, Yahudi yala ninye arye, Allah arina

ap, el si erena ap ati balamik aik dam biyik. Allah ati arilbalamik aik dam bukni, Yahudi yala kum nang, anyaik buru tam uk bulubuka Allah morolamik.* Biyikop ura, Yesus arye anyaik dam wekmek nang ati el yupu peterenmok. Peterenmokba, Allah si erena aik fum fil dona ati weik deiyok nang ap, Musa sekamuk yupu peterena deiyok nang ap, Yahudi yala deiyok nang, yuk weik nang ap, Yesus dam yayikce, ‘Wenepnamap’ tenen, asipdeyik. “Yatanye birye yupu deiyok aripkukba, ining ning dekenmangu nang yakuka buru tam dopkwetepmalam do? Tonda, yatanye birye weik deiyoknye kina ati, erepdeipkukba, afil dolyam do?” nyabuka asipdeyik.

²⁴Asipdeyikba, Yesus arye tamubuka anang ati asipdeyuk. “Anggun ti tonok ning asipdenusine. Asipdesinibuk, tamubuka nyapnumunye ura, na fil donye ning yupu deiyok aripnuknye bira, ‘El si anye,’ nyabuka, laka nyapnusine. ²⁵Anggunce laka nyapnululume, Yohanes arye dib tenebik ninye mek dongolamuk ning ara, Allah arye nyapdeibukba afil dobuka ulamuk do? Talya ninye arye nyapdeiamikba, dib tenebik ninye dobuka mek dongolamuk do? Anggunce na nyapnululume,” Yesus arye nyabuk.

Nyabukba, aYahudi yala deiyok nang arye, ‘Yata yupu nyapnuyap do’ tenen, yupu talipdayik. Yupu talipdaikce, nyapdayik. “Se, yata nyapnuyap do? Nunce, ‘Yohanes mek dongolamuk ning ara, Allah arye nyapdeibukba winilamuke,’ nyabibyop ura, Yesus arye nun ti, ‘Aning ati ara, Yohanes nyalamuk yupu ara, dib kum tenelamlum ning ara, deiyok yata ati do?’ nyabuka wenepsulule. ²⁶Bukni, nun kele, amutuku noutamak unyak ninye nirya arye, ‘Yohanes ara, dipkoprop Allah yupu laka nyananye, nabi ulamuk,’ tenenyaka ati, nunce, ‘Yohanes fil dolamuk ning ara, ninye aryuk nyapdeibikba, afil dolamuk,’ nyabibyop ura, awekmak nang nirya kekepsikirye, yu upliba derepsikcake,” nyapdayik. Nyapdayikce, aYahudi yala deiyok nang arye kwaranmek.

²⁷Ilil ubuka ati, adeiyok nang arye, ‘Duknupnuyap’ tenen, Yesus ati tamubuka talye yupu nyaplobik. Sikce nyabik. “Yohanes arye dib tenen ninye dobuka mek dongolamuk, fil deiyok aribuknye bira, nun walwale,” nyabik. Nyabikop ura, Yesus arye tamubuka anang ati nyabuk. “Walwal nyapmanuluma ati, na fil donye ning deiyok yupu nyapdeipnuknye bira, el si kum nyapdeipnusine,” Yesus arye nyabuk.

Tonoknye el mapu bitinye winiprik ning ati nyabuk yupu

²⁸⁻²⁹Yesus arye ayupu nyabukop ura, winipmanto yupu deice arye ayupu ton nyabuk. Ara Yesus arye sik Yahudi yala nang, Allah ati arina

* 21:23 *buru tam morolamik* – Sik Yahudi yala ninye arye, ‘Yuk mutuku ninye nirya, sik Yahudi yala kum ninye unyaka anya arye, Allah arenyap aik fum wekelbicop ura, anyaik nirya malye upsilyake,’ tenelamika ati, Yunani ninye ap, yuk mutuku ninye nirya ap ara, anyaik buru tam uk Allah yanuka morolamik. Anyaik fum kum wekelamik.

deiyok nang ap, sik yuk Yahudi yala deiyok nang ap ati, winipmanto yupu nyabuk.

Tonoknye el mapu bitinye ulamrikba, tonye dam biyukce, nyabuk. “Na mio, na wa wilbinilyame,” nyabukba, ami arye, “Na like, na fil kum dolbinune,” nyabuk. Nyabuka daunmoka ani, aminyan ara, ami el kanye tamubukce, el li morobuk touk, el li wa wilbiyuk. ³⁰Wa wilbiyukop ura, aminyan talak ara amapu sik ni el mi tonye biti, arup nyapmok touk, bitinye mi ati nyabuk, “Na mio, na wa wilbinilyame,” nyabuk. Nyabuk ura, ami bitinanye birye, “Naie, telebe an wa wilbinukine,” nyaplobuk bukni, wa kum wilbiyuk. Yesus arye winipmanto yupu nyabuk.

³¹Ayupu akunum nyabukop ura, aYahudi yala deiyok nang ati, asipdeyuk. “Amapu bitinye nang ara, sik ni patapmokba, morobuk ning ara, danye birye dipkoprop kekebuka wininmok do?” nyabuka Yesus arye asipdeyuk. Asipdeyukba, sikce, “Minyumanye bira kekebuka el li fil ati melipmoke,” nyabik. Nyabikop ura, Yesus arye anang ati tamubuka nyabuk.

Na dipkoprop nyapsine. Sik ninye deiyok nang arina ati, pajak yo bok ubula dolonyak nang, fia malye unyak nang ap, talye-talye yoldalamak kilapu ap, aninye nirya, sik malye ning batakuka, akunum dib tenepnikirye, Allah arye ninye mutuku-mutuku nirya noutamak, ninye weik lyebuka sik talima talisilirye akunum menekuka wekenyake. Bukni, anggun winitalak ululum nang ara dib tenena kum ati, anggun winitalak babye min kum wekelulume.

³²Anyapmasin yupu ara, talya ati kume. Deiyok ara, ani. Ara, Yohanes dib tenen, ninye mek dongolamuknye birye, ‘Diksukum un bisik ara, anye,’ nyabuka, ‘Dib tenenamlum’ tenen, peterelyanamsuk bukni, anggunce el yupu ati dib tenebuka kum dololulume. Anggunce el yupu dib kum tenelamlum bukni, sik ninye talye-talye yolamak kilapu ap, pemerintah arina ati, pajak yo bok ubula dolonyak nang ap, akunum diba tenebikce, sik malye ning akunum batakik. Anang sik malye ning batakikce dib tenebikba, elilulum bukni, aeipmalum ning ati ara, anggun malye umunye ning kum batakmalumce, tuba dib kum tenepmanulume. Aning ati ara, winipmanto yupu ton nyapnusine. Yesus arye aYahudi yala deiyok nang ati nyabuk.

**Wa tuku tia talibuka wilamik nang arye, malye ubik
ning ati nyabuk yupu
(Markus 12:1-12; Lukas 20:9-19)**

³³Yesus arye, “Domon yupu ton nyapnusina ati, kekelulume,” nyabukce ayupu ton nyabuk. Ara Yahudi yala nang arye, Allah ati arilbalamik aik dam, Yesus tuba tikmokce, abulubuka wekmek ninye ati, ayupu nyabuk.

Tonok talak ara, anggur duk moulamuk tapu talyamuknye ulamuk. Anggur tapu kouamukce, awa dana-dana tam nirya keil arye poka

dobuka antanabuka denepdongamuk. Winyamukce, anggur duk teikna ati, keil kum ubuka kintinyamuk. Tonda, awa kalikuka dina ati, awa dam weik cang yo arye ikukce, adeice ak kalikna aik domuk. Aning nirya akunum kintinipdeibukce, ‘Yuk nang arye awa ara tia talak uk talibuka fil donamak’ tenen, yuk nang ati aribukba, anang arye awamuk ning dekna ati, awa tuku deiyoknye biti yo bok aribik. Winibikop ura, awa deiyoknye birye, el kayapu ap neika mana ati, yuk pera mutuku biyuk.

³⁴Atapu duk ekne talak akunum ubuk ura, ‘Atapu duk dakuka libikcop ura, ton bokuka na ti arepnamniyak’ tenen, awa tuku deiyoknye birye, el fil donanye dopdeibukba, el anggur tapu duk wa tia dolamik nang dam biyik.

³⁵Biyikop ura, awa tuku tia talyamik nang eibikce, el fil donanye tonok, el nong talibuka weik arye kulabuka obik. Tonye bira, dipkoprop fia obikba, dibuk. Tonye bira, keil dobuka el nong deice dobuka obikba, dibuk. ³⁶Atonun ton, awa tuku deiyoknye birye, el fil don nang weik arye tonap dolilamukba, awa tuku tia fil dolamik nang arye, atonun tonap, tuba-tuba anang olamik. ³⁷Winilamika ani, sirya ara, tonok dopdeipmantonye ubuk. Ara wa tuku deiyoknye, el mi koprop tuba ulamuka anye arye, ‘Anang arye na mi ati si erepnamake,’ tenebukce, el mi dopdeibuk.

³⁸Dopdeibukba, awa tuku tia talibuka fil dolamik nang dam yanganmokba, eibikce nyabik. “Awa tuku deiyoknye dipliba, el punupnamlanye bira, el mi koprop ayanmala atia. Aning ati ara, nunce el opnamabe. Obibyop ura, awa tuku nun damang uk dobuka talipnamabe,” nyabik.

³⁹Utenebika ati, nyabikop ura, anye el mi obikce, el nong ara awa poka domika buru tam donokik. ⁴⁰Winilamika ati, anggur tapu duk wa tuku deiyoknye birye, el wa win dam tamubuka yanamle talak ara, el wa tia talyamik nang ati, yata wiripnamle do?

Yesus arye sik Allah arina ati deiyok nang ap, Musa sekamuk yupu peterena deiyok nang ap, sik awekmek nang nirya ap ati, adomon yupu nyabuk deice arye asipdeyuk.

⁴¹Asipdeyukba, sikce tamubuka nyabik. “Kume, awa deiyoknye birye el wa tia talyamik nang dam yalirye, anang nirya oplyop ura, anggur tapu duk wa dobuka, yuk nang ati arepnamle. Wa tuku arepnamle nang ara, atapu duk li talak, anggur tapu duk dakuka, aning dekuka, el yo bok tamubuka arinamake. El ning tamubuka arinamak ninye ati, el wa tuku dobuka anang tia talak ati arepnamle,” nyabik. ⁴²Nyabikop ura, Yesus arye tamubuka ayupu tonap nyabuk.

Daud arye sekamuk buku noutamak sekamuk yupu nyapnusin ning ara, deiyok kum tenepmalumce nyanmanulum do? Daud arye domon yupu deice sekamuk yupu ara atia.

‘Keil aik’ dolamik nang arye ‘Akeil ara malye keil’ tenen, batakik keil ara, abilinga dukuldongonak delilamak keil, fia mambul ning ara,^z akunum uplye. Fia teleb uplye ning ara, Allah arye teleb kipdeibuka anya arye, nunce aning fia telebe tenenyabe.’

(Mazmur 118:22-23)

Ara Daud arye sekamuk yupu akunum nyapsine. Yesus arye Yahudi yala deiyok nang awekmek ati nyabuk. ⁴³Nyabukop ura, adomon yupu ton nyabuk. “Aning ati ara, na dipkoprop nyapsine. Allah arye ninye mutuku-mutuku nirya talinamsil ara, anggun Yahudi yala deiyok nang ap, Yahudi yala nang nirya ap, min arye aryamsutu bukni, anggun dam dobuka, yuk nang ati arinamle atia. El arinamle ninye ara, teleb yo arye duk teleb ninguk moulamle touk, el yupu moubuka kekebikirye, el yupu uk talibuka, el fil uk donamak nang ati arepnamle,” Yesus arye nyabuk.

⁴⁴Yesus ayupu nyabukop ura, adomon yupu tonap nyabuk. “Yatanye do, anyapmasin keil deice sakuka pulyanamlanye bira, el nong yan taruk nirya, sekuka tonok-tonok yukak donoknamle. Bukni, anyapmasin keil ara, el nong deice sakuka teiklinye bira, el nong bol ton fia kum upnamle. Atu atonun uplopnamle.^a Anyapmasin ning ara, moubuka tenipnululume.” Yesus arye aYahudi yala deiyok nang ati nyabuk.

⁴⁵Yesus nyabukba, Allah arina ati weik deiyok nang ap, sik Farisi nang ap, sik nirya arye utenebik. ‘E, Yesus arye domon yupu deice anyapmasila ara, nun wenena ati nyapmasile,’ tenebikke yu ubuk. ⁴⁶Yu ubukba, sikce, ‘Yesus yata talak arye optibye do? Tonda yata wiribuka arye Yesus tapu kouptibirye, aminyan opnamap do?’ tenen, fia teniltona uk unmek. Winibik bukni, atalak ara, Allah arilbalamik aik dam wekmek nang arye, ‘Yesus ara, dipkoprop Allah yupu laka nyalulnye, nabi ulule’ tenen, sik kanye deipmeka anya arye, sik Yahudi yala deiyok nang arye, ‘Awekmek nang derepsikirye, nun opsikcak’ tenen, Yesus asukum uk batakuka yukak biyik.

^y **21:42a** *Keil aik* dolamik ning ara ani. Ara sik mutuku ara mok fia mitikanun celamuka anya arye, yo palpal fia kum ulamuka ati, yo webuka asik kum dolamik. Yo potong fia kum ati, pala weik keil dobikke, yangabdeibikke, sik asik dolamik. ^z **21:42b** *keil mambul ning* – Ara dipkoprop keil kum bukni, domon yupu deice arye nyabuk. Keil nyabuk ning deiyok ara, Yesus ati nyabuk. Ati, ‘Urasin fia teleb keil, mikip weik keil ara, Yesus atonun,’ tenebuka domon yupu nyalamik. ^a **21:44** *Atu atonun uplopnamle* – Yesus arye ayupu nyabuk ning ara, sik moubuka kekena kum ati, dib kum tenenyak nang ati ara, Allah arye mitikto wenebuka opnamle. Bukni, moubuka kekenyak bukni, sikce, ‘Nun like’ tenen, lik upliba, Yesus ati batakanyak ninye ara, Allah arye weik wenebuka fia oplopnamle. Aning ati, Yesus arye adomon yupu nyabuk.

**Yesus arye, kil don talak kwalina ati, winipmanto
ning ati nyabuk yupu
(Lukas 14:16-24)**

22 ¹Yesus arye, el yupu nyanmok talak kekenmek nang ara, ninye diba tenebikiba, Allah lyepsilirye sik talima talibuka ulye ning ‘Kel kipnamak’ tenen, winipmanto yupu deice arye nyanmok. ²Yesus arye nyanmok.

Ninye arye diba tenebikcop ura, Allah arye sik talima talilya atonun ning nyapnusine. Tonok weik ninye deiyoknye, Raja el mi arye kil dopnamuka ati, weik kwalina kwalibuka kintinibuk. ³Adeiyoknye birye, ‘Na kwalina dilyanamak’ tenen, min arye akunum nyapdeiamuk nang ati, kwalina akunum kintinibukop ura, el melin nang dopdeibuk ura, nyalbiyik. Anang arye, “Winira, anggun dilyalulume,” nyabuka nyalbiyik bukni, el nyapdeiamuk nang arye lik ubukba, “Nun kum yanamabe,” nyabuka batakik. ⁴El min arye nyapdeiamuk nang batakik bukni, adeiyoknye birye el melin nang ati yukubukba, yayikop ura, nyanyalbinmek nanguk ila tamubuka tonap ananguk nyalbana ati ayupu nyapdeibuk. “Na weik sapi basam teleb ubuka nemuk ning akunum opsirye, kwalibuka deipse. Tonda, aning-aning nirya teleb ninguk akunum kwalibuka deipsa ati, na mi kil dopnula ati, ‘Kwalina kintinibuka deipsisa dilyalulume,’ nyalbinululume,” nyapdeibuk.

⁵Nyabukop ura, el melin nang binuka nyabikbuk, arup nyapmek ninguk, ila tamubuka tonap lik ubuk ati, lik asa yuk-yuk biyik. Ton nang ara, sik bidamang fil dolbiyik. Ton nang ara, sik bidamang wa wilbiyik. ⁶Ton abatakik nang arye, anyaik yupu nyalbalamik nang dobuka, ton nang ati, sik nong deice ikin ning deibik. Ton nang ati malye yupu nyabik. Ton nang ati oplobik. ⁷Sik abatakik nang arye winibikop ura, aweik ninye deiyoknye birye yu weik ubuk. Yu weik ubuk ura, el yin talin nang nyapdeibuk ati, biyikce el mapu ati opmek mutuku ninye nirya obukabikce, sik asik nirya uku dongobikba, dibuk.

⁸Winibikop ura, adeiyoknye birye el melin nang ati ayupu nyapdeibuk. “Na weik kwalina akunum kwalibuka deipse bukni, na minop talak nyapdeiamse nang ara, na ti kum batakningop ura yanuka dipting bukni, sikce na bataknik nang anya arye, sik kum yanamake. ⁹Aning ati ara, weik bisik dandanya, ninye weik weklamakak nirya bimunce, epdamunye ninye nirya ati, ‘Nun deiyoknye kwalina deipmala ara, dilyalulume,’ nyalbinululume,” nyapdeibuk. ¹⁰Nyabuk ura, el melin nang arye el nyabuk touk, bisik dandanya nirya banmek akarye, eldanmek ninye nirya bulubukabikce, kil dopnamuknye el li aik wekik. Teleb nang babye, malye nang babye bulubuka anyaik wekika anya arye, anyaik fum ilibik.

¹¹Aik libikba, aweik ninye deiyoknye birye, ‘Na kwalina ning dipnuyak ninye eipnun’ tenen, dilyayuk. Dilyayuk talak ara, kil don talak fia teleb butum aling ongolamik atonun ning kum wininmoknye ton, anang kan-kan bukmokak eibuk. ¹²Eibukce ayupu nyabuk. “Kao, nun kil don talak teleb butum aling ongonyap ning kum ongopmalam dib aryuk, yata wiribuka anyaik duknubuka wekmalam do?” nyabuka wenebuk. Nyabuka wenebukop ura, amalye butum aling ongobuka wekmoknye bira, ‘Yata nyaptinye do?’ tenen, teniltonmok bukni, alye ubuk ati kanye lamapdongobuka bukuk. ¹³Winibukop ura, adeiyoknye birye el melin nang ati nyabuk. “Anye bira, talimunce el yan ap, taruk ap, tapu koubuka, aik fum arye buru tam kunuknak donoklulume. Donokmunye ura, weik kanye imun upliba, engebuka daunamle,” nyabuk.

¹⁴Yesus arye awekmek nang ati, winipmanto yupu nyabukop ura, ayupu deiyok ati, ayupu laka nyabuk. “Ayupu domon deice nyapmasin touk, ninye diba tenebikiba, Allah lyepsilirye anggun talima talisilya atonun ulule. Allah arye ninye mutuku-mutuku nirya weik arye, ‘Na dam yanamak’ tenen, yuk ulul bukni, ninye mitikanun uk wililulak wekenyake.” Yesus arye nyabuk.

Yesus arye, amutuku talyamuk deiyoknye, Roma mutuku weik ninye deiyoknye Kaisar, pajak yo bok arina ati nyabuk yupu
(*Markus 12:13-17; Lukas 20:20-26*)

¹⁵Yesus arye ayupu nyabukba, Farisi nang kekebikce, yu weik ubuka ati, ‘Yesus el yupu nyaptua deice arye malye uptue’ tenen, sikce nyapdeibikba, sik Farisi nang ap, Raja Herodes ap, sik nyalamik yupu kekebuka talyamik nang, tenepce ‘Yesus talye asipnuyp’ tenen, Yesus dam yayik. ¹⁶Yayikce, Yesus ati ayupu asipdeyik. “Anda peterenanye umince, yupu diksukumuk nyalyame. Tonda, an petereminye talak ara, ‘Na peterenunba kekepnikiry, derenuniyak do? Kanye deipnuniyak do?’ kum tenelyame. An petereminye talak ara, ‘Anang ara bona weik talin nang do? Anang ara weik ninye deiyok nang do? Anang ara yuk sisinanye do?’ tenena kum dib aryuk, Allah yupu deice arye, ‘Wininamlulume,’ nyasilye touk, diksukumuk peterelyame. ¹⁷Aning ati ara, asipdenukiyabe. Nun mutuku talisilirye, Roma mutuku weik ninye deiyoknye Kaisar arye, ‘Pemerintah ati, pajak yo bok arinamlume,’ nyasilya ara, arina teleb do, kum do? Apajak yo bok ara pemerintah nang ati arinamap do, bataknamap do?” nyabuka tenebuka arye asipdeyik. (Ara, ‘Yesus el yupu nyaptua deice arye malye uptue’ tenen, talye tenepce asipdeyik.)

¹⁸Anang nyabuka talye tenepce asipdeyikop ura, Yesus arye anang sik talimak malye ning aupmokbuk, duknubuka nyapmek ning bikukce, ayupu nyabuk. “Anggunda, ‘Teleb nang tenepnamsiyak’ tenen, nong bola deice teleb ninguk winilulum bukni, anggunda dipkoprop talima

malye-malye nang ululume. Winiluluma anya arye, ‘El yupu nyaptua deice arye malye uptue,’ tenen, tenepce asipdenmanulum ning ara, yata ati do? ¹⁹Anggun pajak ati pemerintah arelulum keil uang ara, dobuka na aripdenumunye ura, na dipdenune,” nyabuk. Nyabuk ura, apajak ati arilamik keil uang, sikce dobuka Yesus ati aripdeyikop ura, Yesus arye asipdeyuk.

²⁰“Anggun dipdelulume. Akeil uang deice el ninye urasin atonun puturubuka deibik ning ara, yatanye urasin atonun do? Tonda, el yupu ap puturubuka deibik ning ara, yatanye sekna ning atonun sekuka deibik ura upmal do? Tonda, ninye si sekuka deibik ning ara, yatanye si sekuka deibik do?” nyabuka, Yesus arye asipdeyuk.

²¹Asipdeyuk ati, sikce tamubuka, “Ara Kaisar el ning,” nyabik. Nyabikop ura, Yesus arye anang ati nyabuk. “Ati, Kaisar^b el ning ara, adip aryuk Kaisar ati arinamlulume. Ton, Allah el ning ara, adip aryuk Allah ati arinamlulume.” Yesus arye nyabuk. ²²Yesus ayupu nyabuka deice arye, Farisi nang ap, Raja Herodes el yupu kekelamik nang ap arye, ‘El yupu nyaptua deice arye malye uptue,’ tenepmap bukni, ‘Aning kum winipmanto uple,’ tenebikce, “Se,” nyabuka ngalukik. Ngalukikce, Yesus asukum uk batakuka yukak bindobik.

Saduki nang arye, ‘Yesus malye nyaptue’ tenen, kil dona ati, tenepce talye asipdeyik yupu

(Markus 12:18-27; Lukas 20:27-40)

²³Asum aryuk, Saduki nang arye,^c Yesus dam asilyayik. Sikce, ‘Ninye dibikirye ila tamubuka kam kum buknamak,’ tenelamik nang anya arye, sikda, ‘Yesus arye malye yupu nyaptue’ tenen, tenepce asilyayik. Saduki nang yayikce Yesus ati nyabik.

²⁴“Musa sekeiyamsuk yupu ara ani. ‘Tonoknye birye kil dopmalibuk, anye diplyop ura, akil arye mi delina kumop ura, anye el weit koprop arye, el yok pununa ati, el du kopropa kil yuwak daklirye, mapu deipnamrake,’ nyabuka Musa arye sekeiyamsuke. Nyabuka sekeiyamsuka ati, winipmanto ning asipdenukiyabe.

²⁵Tonok talak ara, sik du weit tek barye nang ulamik. Sik du kopropa minopce kil domuk bukni, mi kum deibuk dib aryuk dibuk. Minyumanye dibukop ura, akil yuwak el weit bitinanye birye yuwak dakuk. ²⁶Dakukce dobuka daulamrika ani, el babye mi delina kum dib aryuk dibuk. Atonun ton winilinye babye, akil

^b 22:21 *Kaisar* – Roma mutuku ninye sik weik deiyoknye. Laka nyana yupu nomor 41 dirume. ^c 22:23 *Saduki nang tenelamiknye* – Saduki nang ara, Yahudi yala nang ulamik bukni, sikda ‘Ninye dibice ura aminyan talak kam buknamake,’ nyanyak yupu ap, tonda ‘Allah el im deice fil don nang malaikat unyake’ nyanyak yupu ap ara, talye ati nyanyake. ‘Ara kum winipmanto ning,’ tenelamikce dib kum tenelamik.

yuwak dakuk bukni, mi delina kum dib aryuk dibuk. Daupnin balamika ani, sik weitcapu silip tek barye nang nirya arye, atonok kil uk tonok-tonok arye, dopnin balamik bukni, mi delina kum dib aryuk dibik. ²⁷Siryra ara, akil babye dibuk. ²⁸Ati aning ara, aminyan ara, Allah arye ninye weik kam bukeipnamle talak ara, atek barye nang nirya arye akil tonok, yuk-yuk dolamika anya arye, im deice unamak talak ara, yatanye birye akil ati, ‘Na kil,’ nyabuka tamubuka dopropnamle do?” nyabuka, Saduki nang tenepce, Yesus ati asipdeyik.^d

²⁹Ayupu talye asipdeyikop ura, Yesus arye tamubuka nyabuk. “Allah arye nyapdeibukba sekeiyamik yupu ap, Allah el fia mikip weik ululul ning ap, kum kel bikamluma ati, anggun walwal arye asipdenmanulume. ³⁰Allah arye ninye weik kam bukeipnamle talak ara, kil ap, sal ap, kum dopdanamrake. Ninye tukwak ninye arye diba tenebikiba, im deice bobinamle ninye nirya ara, Allah el im deice fil don nang, malaikat, im deice unyak touk, kil dolana kum dib aryuk unamake,” Yesus arye nyabuk. ³¹Yesus ayupu nyabukop ura, yupu tonap nyabuk.

Winira, ‘Dibice ninye kam kum buknamake,’ tenemunya ara, laka nyapnusine. Musa sekamuk yupu noutamak ara, Allah arye nyasilye yupu ara, kum nyalamlumce, aning kum bikilulum do? Allah arye anggun ti, nyasilye yupu ara, ani.

³²‘Abraham ap, Isak ap, Yakup ap, si erenyak Allah ara, na aunune,’ nyabuk. (Keluaran 3:6)

Anggun tenipdelulume. Nun kele. Musa arye ayupu nyapdeibuk talak ara, Abraham ap, Isak ap, Yakup ap, sik nong akunum diamik. Dibice ninye arye Allah si kum ereptinge bukni, Musa arye, “Awinilye nang, Allah el si erenenyake,” nyabuka deice arye, ‘Anang ara tuba kam unyake’ tenen, tuba bikinyabe. Allah arye diamice ninye kum talilule. Kam unyak ninye uk talilule. Aning ati ara, anggun Saduki nang arye, ‘Diamice ninye ila tamubuka kam kum buknamake,’ tenemunya ara, anggun fia malye tenelulume. Aning ara, dib kume. Walwal aryuk tenelulume. Yesus arye sik Saduki yala nang ati nyabuk. ³³Yesus arye ayupu nyabukba, akekenmek nang nirya arye, ‘Se’ tenen, “El peterelye yupu ara, fia telebe nyabuka kanye deibikke,” ngalukunmek.

**Yesus arye, “Allah arye, ‘Wininamlulume, aning ara kum wininamlulume,’ nyapdeibuk yupu noutamak, fia mambul ning ara ani,” nyabuk yupu
(Markus 12:28-31)**

³⁴Yuk nang arye, “Yesus fia teleb yupu nyabukce, sik Saduki nang ati yupu sekuk ati, Saduki nang ara yupu tamubuka kum nyapmanto

^d **22:28** Saduki nang arye tenebik ning ara, sik tek barye nang nirya arye, akil tonok dolamika ati, tonoknye biryuk akil kum doptue. Ara kum winipmanto. Kum winipmanto ati, Yesus arye, ‘Dibikke ninye nirya ara, Allah arye kam bukeipnamle,’ nyabuka peterelul yupu ababye, kum winipnamle. Ati, ayupu ara dib kum tenebik.

ubuka ati, talya kanupdongobuka bindobike,” nyabuka laka nyabik ura, sik Farisi nang kekebik. Kekebuka bulubukabikce, ‘Nun asipdepya deice arye malye nyaptue,’ tenen, ‘Nun ton piriipdenuyabe,’ tenebikce, Yesus dam yayik. ³⁵Asinmek talak ara, tonoknye ton, Musa sekamuk yupu, mem yupu peterena deiyoknye ulamuka anya arye, weik kelnye ulamuk. Winibuka ulamukce, Yesus dam yayuk. Anye yayukce, ‘Yesus malye yupu nyaptue’ tenen, winildena ati, Yesus ati ayupu talya tenepce asipdeyuk.

³⁶“Allah arye, ‘Wininamlulume, aning ara kum wininamlulume,’ nyapdeiyamsuk ati, Musa arye sekeiyamsuk yupu^e noutamak, yupu weik aupmal bukni, fia mambul ning ara dan ning do?” nyabuka asipdeyuk.

³⁷Asipdeyukbuk, Yesus arye tamubuka nyabuk. “Fia mambul ning ara ani. ‘Nun Ni Allah ara, el tonok ulule. Anggun kanye bokoltona kum dib aryuk, dib tenepmunce, anggun kanye talima Allah el nong deice delinamlulume. Tonda Allah el deice uk anggun kanye deibuka unamlum ati, anggun nong nirya ap, anggun mikip ap, anggun kanya ap, anggun kanye tenen ning ap, anirya ara Allah el deice uk delinamlulume.’”

(Ulangan 6:5)

³⁸Anyapmasin ning ara, Musa arye sekamuk yupu noutamak minyuma ning fia mambul ning nyapmasine. ³⁹Bitinye ning ara, ani.

‘Tonda, anggun dam unyak nang ati ara, bico tenebuka melinauk unamlulume. Anggunce anggun mining nang ati, kanye deibuka, melilalulum atonun, anggun dam unyak nang, yuk nang ati bico tenebuka, kanye deipmunce, melinamlulume.’ Allah arye nyabuk.

(Imamat 19:18)

⁴⁰Allah yupu laka nyalamik nang arye seklamik yupu ap, Musa arye sekeiyamuk yupu ap ara, weik aupmal bukni, fia deiyok koprop ning ara, abitinye nyapmasin yupu akunuma. Allah arye abitinye ‘Wininamlulume,’ nyapdeibuk yupu ara, fia mambule. Abitinye yupu kekebuka biktumop ura, yuk aupmalye yupu nirya babye ton tenebuka kel kinamlulume. Yesus arye anye biti nyabuk.

Yesus arye, “Allah el Mi Kopropnye bira ani,” nyabuk yupu
(Markus 12:35-37; Lukas 20:41-44)

⁴¹Farisi nang, Yesus dam tuba unmek talak ara, Yesus arye ayupu nyabuk. ⁴²“Anggunda, yata tenepmalum do? ‘Allah arye ninye mutuku-mutuku nirya noutamak ninye weik lyeplirye, sik kanye talima talinamle’ tenen, dopdeipnamlanye, Kristus,^f el li si ara, yatanye do?” Yesus arye sik Farisi nang

^e 22:36 *Musa sekeiyamsuk yupu lak len yupu ara, nomor 35 dipdelulume.* ^f 22:42 *Kristus nyalamik ning, ara Yunani yupu deice arye nyanyake. Anye binyuk bukni, sik Ibrani yupu nyanyak nang arye, Mesias nyanyake. Anye bira, tonok bukni, el si bitinye. Ara Ninye Lyena Deiyoknye Yesus ati nyanyake.*

ati nyabuk. Nyabuk ura, sik Farisi nang arye tamubuka nyabik ara, “Ninye weik lyeplirye sik kanye talima talinamlanye, Kristus ara, nun apu kopropa Daud, el mi uk ulule,” nyabik. ⁴³Nyabikop ura, Yesus arye tamubuka nyabuk.

Anggunce, ‘Kristus ara, nun apu kopropa Daud, el yala nang arye deibik,’ nyapmanulum ara dib nyapnulum. Bukni, Allah El Dib Kanye, Daud el talimak talibuka deice arye, Daud el bidamnye aryuk, Kristus yanamuknye biti, ‘Na ni yanamle,’ nyabuk. Daud arye, Kristus ati, ‘Na ni,’ nyabuk ning ara, deiyok ara, dan do? Daud arye nyabuk yupu ara ani.

⁴⁴ ‘Allah arye na ni kopropa, Mesiasnye^g ati nyabuk. Nun bitinye nang arye, ninye nirya talibuka unamnama ati, na sirik tam, weik mambul ak buknamlame. Abukaminyeba, aminyan ara, an yupu yanikinyak ninye ara, na arye dobuka an amutam deipniba, an talinamlame. An yan baripra delin ning deice yan baripra delilbiminye touk, an yupu kum kekekinyak ninye ara, an amutam deipnye ura, ance anang ati bisibuka anang talinamlame. Anang nirya ara, an amutam unamake.’ Allah arye nyabuk. (*Mazmur 110:1*)

Allah arye nyapdeibukba, Daud arye sekamuk yupu dobuka nyapmasine. Yesus arye nyabuk. Nyabukop ura, ayupu tonap nyabuk.

⁴⁵ “Daud ayupu nyabuka deice arye, Ninye Lyena Deiyoknye, Kristus yanamuknye ati, ‘Na ni kopropa,’ nyabuk. ‘Na ni kopropa,’ nyabuka ati, Ninye Lyena Deiyoknye, Kristus bira, Daud el mi koprop kum uptue.^h Daud el yalanye birye deibuk bukni, Kristus ara, ninye nirya talinamlanye, fia weiknye ulule.” Yesus arye aFarisi nang ap, awekmek nang nirya ap ati nyabuk.

⁴⁶ Ayupu teleb ubuka nyabuka anya arye, ayupu kekenmek ninye nirya arye, yupu tonok babye tamubuka kum nyabik. Tonda, asum arye dipdongobuka, orsum noutamak nirya ara, aninye nirya Yesus ati ilil ubukba, ila tamubuka tonap kum asipdeyik.

Yesus arye, Farisi nang ap, Musa sekamuk yupu peterena deiyok nang ap ati, wenebuk yupu

(*Markus 12:38-39; Lukas 20:45-46; Lukas 13:34-35*)

23 ¹ Ayupu nyabukop ura, Farisi nang ap, Musa sekamuk yupu peterena deiyok nang ap, meneng dam abukmekati, Yesus arye el mapu 12 nang ap, ‘El yupu nyapliba kekepnyuaba’ tenen, wekmek nang ap ati, ayupu nirya nyabuk.

^g 22:44 *Mesias ap*, Kristus ap nyanyaba, ara tonoknye Yesus ati nyanyabe. ^h 22:45 *Daud el mi koprop kum uptue* – Dipkoprop Daud el yalanye birye Kristus deibuk (ara Yusuf). Bukni, ara talya tukwak nang arye mapu delilamak touk kume. Allah El Dib Kanye mikip deice aryuk, Maria arye Yesus deibuk bukni, Yesus ara im deice arye yayuke. Ninye nong atonun dayukce, tukwak mutuku yayukba, Maria arye Yesus deibuk.

²Minop talak Allah arye Musa ati, “Na yupu petereplyame,” nyabuka peterena deiyok aribukba, Musa arye peterelamuk. Minop talak ara, Musa arye peterelamuk touk, winitalak ara, sik Farisi nang ap, Musa sekamuk yupu peterena deiyok nang ap, Allah yupu peterena deiyok nang unyake. Musa arye fil dolamak touk, winitalak sik anang arye donyake. ³Afil talibuka unyaka ati, Allah yupu deice peteresinyak yupu ara, moubuka kekepmunce, aning talibuka unamlulume. Bukni, sik Farisi nang ap, Musa sekamuk yupu peteren nang ap arye, Allah yupu peterelamak touk, sik babye moubuka talibikirye dipkoprop kum unyake. Ati, na mapu anggunda, anang sik wininyak ning eipmunce, sik malye wininyak atonun kum wininamlulume. ⁴Sik Farisi nang ap, Musa sekamuk yupu peterena deiyok nang ap, sik bidamnye kanye tenena deice aryuk tabakuka, “Winipnamlulume,” nyabuka peterenyak ning arye, ninye nirya sik nong deice ikin ning weik delinyake. Ninye nong deice ikin ning weike delinyak bukni, ninye ikin uplye ning ara, ‘Nunce ton melipnusiabe,’ tenebikirye, tonok mitik fil babye, sikce ton fia kum melinyake.

⁵Sik winilamak ning ap, fil dolamak ning ap nirya ara, ‘Yuk ninye eipsikirye, se anang ara fia teleb nang, tenepnamsiyak’ tenen, wininyake. Sikda kanye talima ereldanyake. Ton ning ara, Allah yupu kekebuka diba tenenyak ninye ara, ‘Allah yupu ati fia tenenamap’ tenen, mitik pala ning deice arye, Allah yupu ayat sekdeipnop ura, taruk nakup deice ap, asok deice ap, deibuka kitilongonyak. Bukni, sik Farisi nang ap, Musa sekamuk yupu peterena deiyok nang ap ara, ‘Ninye eipnamsiyak’ tenen, pala weik ning deice kitildongokirye dinyake. Winilamaka nirya ara, ‘Yuk ninye eipsikirye, ara fia teleb nang, weik kel nang tenepnamsiyak’ tenen, wininyake.

Ton ning ara, Allah diba tenenyak ninye ara, sik Allah morona talak ara, kisok pakunyak butum aling mouse ak ara, bumang butum aling sekuka tipmenikuka mitik-mitik uk kirikildongonyake. Bukni, sik Farisi nang ara, ‘Yuk nang eipsikirye, ara Allah morona weik kel nang tenepnamsiyak’ tenen, weik cang butum aling sekuka, tipmenikuka mitik-mitik uk kisok pakunyak butum aling mouse ak kirikildongonyake.

⁶Ton malye ulamak nang ara, weik kwalina talak nirya ara, kwalina deiyok nang arye akwalina yanuka lukuka dipnop ura, sik Farisi nang arye weik nang bukmanak uk, ‘Weik nang tenepnamsiyak’ tenen, fia teleb ak bulbanyake. Ton nang ara, Allah yupu peteren talak ara, Farisi nang arye, ‘Yuk nang eipsikirye, teleb nang tenepnamsiyak’ tenen, Yahudi yala nang Allah yupu peteren aikⁱ fum, ‘Anyaik ninye sik urasin nirya din tam uk bukibibuk, eipsikirye, se, sik

ⁱ 23:6 Allah yupu peterena ap, kekena ap ati domik aik – Yahudi yala nang, sik Allah yupu peterna aik ara, nun mitik gereja atonun wamuk bukni, mitikto yuk. Ara, sikce hari Sabtu weklamikce, Allah el si erelamik. Tonda yuk-yuk sum ara, Allah yupu kekena ap, peterena ap, ninye wapdanop ura sik yupu lipsisikuka bokoliana ati, anyaik weklamik. Bahasa Indonesia deice arye, ‘rumah ibada’ nyanyake. Anyaik lak len yupu ati, nomor 26 dipdelulume.

anang ara weik mambul nang, tenepnamsiyak' tenen, weik nang bulamak uk, bulbanyake. ⁷Tonda, 'Ninye nirya din ning deibuka deklamakak ara, pasar noutamak arye babiba, ninye nirya eipsikirye si erenamsiak' tenen, kanye pinpin asa banyake. Atonun ton, utenenyake. 'Ninye nirya arye, sikda nun weik peterena deiyok nang, guru nyapnamsiak' tenen, kanye pinpin asa arye wininyake.

⁸Sik Farisi nang ap, Musa sekamuk yupu peterena deiyok nang ap, wininyak bukni, na mapu anggunda, anang winilamaka atonun kum wininamlulume. Anggun weik deiyoknye tonok, na uniba, anggunda na weit yapu atonun ulaluma ati, yuk nang arye anggun ti, "Nun weik peteren nang, nun Guru," nyabuka, 'Anggun si erepsikcak' tenen, anggun bidamnye yupu sekeldongonamlulume. ⁹Talya tukwak ninye nirya ati, "Na ni," nyabuka si kum erenammlulume. Anggun ni koprop ara, im deicanye tonok ulula ati, talye tukwak nang ati, "Na ni," nyabuka si kum erenammlulume.

¹⁰Aning atonun ton, anggun weik peterena deiyoknye, ninye nirya lypnirye sik kanye talima talinamnanye bira, Kristus na ununa ati, yuk nang arye anggun ti, 'Nun weik peterenanye, nun Guru, nyapsikcak' tenen, anggun bidamnye yupu sekeldongonamlulume. ¹¹Anggun kan-kan Allah arye erebuka weik kibuka deipnamlanye bira, yuk nang sik patalul ning ati, bico tenebuka melinamle. Ara talye fil melin nang arye, sik deiyok nang ati, kanye deibuka, melibuka ulamak touk, Allah arye weik kipdeipnamlanye bira, aning atonun wininamle. Yuk ninye sik amutam ulirye, melinauk unamle. ¹²Ara talye ati kume. Yata ninye do nirya, sik bidamnye sik damang uk erelilalamikce nang ara, Allah arye anang dobuka amutamuk kipdeipnamle. Bukni, sik talima mitang arye amutam unyak nang ara, Allah arye aninye erepdeipnamle. Yesus arye anang ati nyabuk.

¹³Yesus arye ayupu nyabukop ura, dukdongobuka ayupu tonap, nyabuk. "Farisi nang ap, Musa sekamuk yupu peterena deiyok nang ap ati, Allah arye wenebuka opnamsila ati, anggun bico," nyabuk. Nyabukce, ayupu ton dukdongobuka nyabuk.

Se, anggun Farisi nang ap, Musa sekamuk yupu peterena deiyok nang ap, Allah arye wenebuka opnamsila ati, anggun bico. Anggun talimak malye ning aupmasilibuk, 'Teleb nang tenepnamsiyak' tenen, teleb ning bola deice uk winilulume. Anggun malye winimunye ning ara, nyapnusine. 'Allah dib tenebibe ura, Allah arye nun dobuka nun talima talinamsilak binuyabe,' tenenyak nang ara, anggunce yupu sekeldongolulume. Winiluluma ara, 'Anggun aik weknuyap' tenen, buplan dam ninye tikilyangaki bukni, yu upliba, mikip arye buplan tirikildongolamak touk, winilulume. Ara, 'Allah ati, dib tenebibirye,' 'Allah talinamsilak weknuyabe,' tenenyak ninye ati, yupu

sekeldongoluluma ati nyapsine. Anggun babye dib tenebuka kum wekelulume. Tonda, ‘Nun dib tenebuka Allah talinamsiak wekenamabe,’ tenenyak nang ati ara, anggun Farisi nang arye winimunye ning deice arye, aninye ati yupu sekeldongolulume.

¹⁴Se, anggun Farisi nang ap, Musa sekamuk yupu peterena deiyok nang ap, Allah arye wenebuka opnamsila ati, anggunda bicoe. Anggun talimak malye ning aupmasilibuk, ‘Teleb nang tenepnamsiyak’ tenen, teleb ning, bola deice ninguk winilulume. Winilulum bukni, anggun talima noutam ara tuba malye uk ulule. Anggun malye winimunye ning ara, nyapnusine. Ara, anggunce youwak kilapu ati, ‘Dipminyop ura, an uminye aik ap, yuk an taliminye ning nirya ap, Allah ati arepnamlame,’ tenebuka arye nyaltakalulume. Bukni, youwak kilapu arye sik ning arebikcop ura, angguncuk aning bokuka, weik arye dololulume. Tonda, yuk nang arye, ‘Anang ara Allah morona weik kel nang nyapnamsiak’ tenen, Allah moromunye talak ara, yupu cang arye morolulume. Awinimunye ning nirya ati ara, Allah arye awinilulum nang atonun ninye nirya ati, fia weik arye wenebuka opnamsile. Yesus arye nyabuk. Nyabukop ura, ayupu ton nyabuk.

¹⁵Se, anggun Farisi nang ap, Musa sekamuk yupu peterena deiyok nang ap, anggunda, ‘Tonoknye babye ton, nun yupu kekebuka nun tam kipsutue’ tenen, tukwak bisik bobana ap, mekwen deice bobana ap umunce, mutuku-mutuku nirya peterepra balulume. Anggunda akunum malye nang ululum bukni, peterepra bamunyeba, yuk nang anggun yupu kekebikirye, anggun winimunye ning dobolbanyak deice arye, malye ning weik tonap winibikcop ura, anang ara fia malye wininyake. Anggunce yuk ninye ati malye winililulume. Anggun babye, anggun peterepmunyeba, anggun yupu kekebuka dobolbanyak nang babye, Allah arye wenebuka uku din mutuku dopkwetepnamsile. Yesus arye nyabuk. Yesus arye ayupu ton dukdongobuka nyabuk.

¹⁶Anggunda utenelulume. Ara, ‘Nunda ninye bisik peterelin nang unyabe,’ tenelalulum bukni, anggunda asing kun nang atonun ululume. Ati aning ara, Allah arye wenebuka opnamsila ati, anggun bicoe. Anggunda, anggun malye yupu peteremunye ning ara ani. Ara, ‘Yuk ninye kekepsikirye, dipkoprop nyapmak,’ tenebuka, ‘Dib tenepnamsiyak’ tenen, nyalulume. “Allah ati arel balamap aik, anyaik si deice arye nyapsine,” nyaptum bukni, anggunce, “Aning ara talye. ‘Anyaik si deice, winipnamne,’ nyanyap yupu ara, kum winibibya babye, telebuka ayupu ara auplule,” nyalulume. Bukni, anggunce yuk nang ati, “Allah arel balamap aik abelenga deice taplakdeiamik emas, anyaik emas si deice arye nyapsiyabe,” nyalulum ara, adeice arye dib teneptibye. Ara, “Emas ning ara, dipkoprop batakmento kum ati, anyanyap yupu ara dipkoprop wininamabe,” nyalulume.

¹⁷Anggunda ayupu nyalulum bukni, anggunda asing kun nang atonun umunce, fia walwal nang ululume. Anggun kum tenipmalum do? Weik mambul ning ara, emas tablakdeibik ning do? ‘Allah arinamap’ tenen, domik aik do? Ataplakeibik emas ara, talye emas bukni, Allah arina aik fum tablakdeibik deice arye, aemas fia mambul ubuke. Mambul updeibuka deiyok ning ara, Allah el aik fum ulula atia. ¹⁸Tonda, arup nyapmasin yupu atonun tonap, anggun nyalulum yupu ton, nyapnusine. Anggunda nyalulume, “Allah arina ati ining ning obuka delinyap ak, aning si deice arye nyabab yupu ara, dauptue. Bukni, Allah ati arenyp ning, aining ning el si deice arye nyanyap yupu ara, ‘Dauplye’ tenen, kum bataktybe,” nyalulume.

¹⁹Nyalulum bukni, anggunda asing kun nang atonun umunce, fia walwal nang ululume. Anggun kum tenipmalum do? Ining ning ara, weike aupmal bukni, aning ara mambul kume. Bukni, ining ning dobuka, Allah arina ati deililamak deice akunum deibikcop ura, aning ara fia mambul ulule. Ati, mambul kirikuka delilya deiyok ning ara, Allah arina ati deililamakak atia.

²⁰Aning ati ara, anggunce, “Allah arina ati delinak, si deice arye nyapsiyabe,” tonda anggunce, “Allah ati arenyp ning si deice arye nyapsiyabe,” nyabuka nyamunye yupu ap ara, abitinye yupu ara neiktoto uka ati, ayupu bitinye ara kum bokeipmanto. Aning-aning si deice arye, “Wininamabe,” nyalulum yupu nirya ara, batakaldongona kume. Adip aryuk dipkoprop “Wininamabe,” nyamunye touk, aning uk wininamlulume. ‘Dauplye’ tenen, batakana ara kume. Allah arina ati, delinak ap, aning deice delilulum ning ap ara, kum bokeipmanto. ²¹Yatanye do nirya, “Allah arel balamap aik si deice arye, wininamne,” nyalulnye bira, ayupu nyalya deice arye, dipkoprop anyaik fum ululnye Allah, el si deice arye ton ayupu nyalule. Anyapmasin yupu deiyok ara, anyaik ap, anyaik ululnye Allah ap, kum bokeipmanto atia. Yesus arye nyabuk. Nyabukce, ayupu ton dukdongobuka nyabuk.

²²Tonda, “Im deice ulul ning si deice arye, wininamne,” nyalulnye bira, ayupu nyalya deice arye, Allah el si deice ap, Allah el nong ap ati, ayupu nyalule. Aning nirya ara, kum bokeipmanto ati, anggunce, “Aning-aning nirya si deice nyapsine,” nyalulum yupu nirya ara, fia malye nyalulume. Yesus arye anang ati nyabuk. Nyabukce, ayupu ton dukdongobuka nyabuk.

²³Musa sekamuk yupu peterena deiyok nang ap, anggun Farisi nang ap ara, anggun talima noutamak malye ning aupmasilibuk, ‘Teleb nang tenepnamsiyak’ tenen, nong bola deice uk teleb ululume. Winiluluma ati, anggun bico, Allah arye wenebuka opnamsile. Anggun malye winimunye ning ara ani. Aning-aning nirya ara, ‘Allah elcuk aresulule’ tenen, fia mitik ning bukni, kuma ap, babok ap, erica ap bokuka, seper sepuluh^h dobuka, Allah el

j 23:23 *Seper sepuluh* nyanyaka, ara winipmanto nyapnune. Weik yo bok seratus ribu (100.000) bok uaptuop ura, seper sepuluh ati ara, sepuluh ribu bok (10.000) areptinye. Sepuluh ribupu (10.000) uaptuop ura, seribu bok tonok (1.000) bokuka areptinye.

si erena ati ton arerurume. Winilulum bukni, weik mambul winin ning ara, batakalongolulume. Anggun batakamunye ning ara, ninye bico tenebuka talima arina ap, 'Na kayapu' tenen, batakana kumce kanye dobuka, fil dana ap, ninye arye dipkoprop winipmakce touk yupu bokolina ap, yupu bokolin talak diksukum yupu nyana ap, anirya ara batakalulume. Allah yupu noutamak ara, ayupu nirya aubuk bukni, anggunce aning nirya batakalulume. Ati, 'Teleb nang tenepnamsiyak' tenen, mitik ning dobuka, Allah ati seper sepuluh bokuka aremunya ara, teleb bukni, aning batakna kumce, weik mambul ning babye winiptume. Weik mambul ning babye, winipmunyop ura, 'Telebe,' nyapsitinye bukni, anggunce weik mambul ning batakalulum ati, anggunda malye winilulume nyapsine.

²⁴ Anggunda, 'Nunda ninye bisik peterelin nang unyabe,' tenelalulum bukni, asing kun nang atonun ululume. Anggun malye umunye ning ati, winipmanto yupu deice arye nyapnusine. Anggun mek makau fum sungunga aupmalibuk, wibuka dolulum bukni, weik unta basam amek makau noutamak auptop ura, diltakana kum dib aryuk, talye mangkau arye diptume. Mitik teleb ning winilulum bukni, weik teleb ning, mambul weik ning ara, kum winilulume. Aning ara fia batakaluluma anya arye, anggunda malye ululume. Yesus arye nyabuk. Ayupu nyabukop ura, ayupu ton nyabuk.

²⁵ Se, anggun Farisi nang ap, Musa sekamuk yupu peterena deiyok nang ap ara, anggun talima noutamak malye ning aupmasilibuk, 'Teleb nang tenepnamsiyak' tenen, nong bol deice ninguk teleb winilulume. Allah arye wenebuka opnamsila ati, anggunda bicoe. Anggun mek makau ap, dina yangana ap, 'Malye ning palepmasilibuk mangkau arye dibibyeba, malye unyap' tenen, bola deice tam ara, teleb ubuka mek ilikilulum bukni, anggun kanye talima noutamak fia malye una ap, yuk ninye ning aluldona ap, tuba aupmasil bukni, aning tenena kum dib aryuk, talye kanye bobuka anggun bidamnye patapsilye ning uk, fia tenelulume. ²⁶ Anggun asing kun nang atonun ululuma ati, kum tenipmalum do? Anggun mek makau fum mek ilikmunyeba, bola deice tam teleb ulamle touk, anggun talima malye usilye ning ara batakmunce kum upsilyop ura, anggun winimunye ning nirya ara teleb upnamsile. Bukni, anggun talima noutamak malye ning tuba awabsilyop ura, teleb kum uptume.

²⁷ Se, anggun Farisi nang ap, Musa sekamuk yupu peterena deiyok nang ap ara, anggun talima noutamak malye ning aupmasilibuk, 'Teleb nang tenepnamsiyak' tenen, nong bola deice uk teleb ululume. Allah arye wenebuka opnamsila ati, anggun bicoe. Ninye dibikceba, keil deiya fum weibikirye, buru tam keil deibikirye, aik likne kurun mek likikcop ura, buru tam ara urasin fia teleb ulule. Bura tam urasin teleb ulamle bukni, akeil deiya fumbisik ara, ninye nong lyuplirye tong ap, yok ap, amalye

ninguk ulule. Aning ara, fia malye ulamle touk, anggun winin ning babye, fia malye winilulume. ²⁸Akeil deiya buru tam urasin teleb ulul bukni, fum tam ara, malye ning ulamla atonun, anggun babye atonun ululume. Anggunda yuk nang asing eipsikirye, ‘Anang ara diksukum teleb ubuka wininyak nang,’ tenesinyak bukni, dipkoprop anggun talima noutamak ara, fia malye ning aupsukba, bola deice uk teleb fil dobuka winilulume. Bukni, anggun talima noutamak ara, fia malye ning aupmasil bukni, malye ninguk winilulume. Yesus arye nyabuk. Nyabukop ura, ayupu ton nyabuk.

²⁹Se, anggun Farisi nang ap, Musa sekamuk yupu peterena deiyok nang ap ara, anggun talima noutamak malye ning aupmasilibuk, ‘Teleb nang tenepnamsiyak’ tenen, nong bol deice uk teleb winilulume. Allah arye wenebuka opnamsila ati, anggun bicoe. Allah yupu laka nyalamik nang, nabi nang olamikba weilbalamikak ara, sik si erena ati, teleb aik dolulume. Tonda, sik diksukum ulamikba olamik nang weilbalamaikak ara, sik si erena ati, urasin teleb ning deililbalulume. ³⁰Winimunce ayupu nyalulume. “Se, nunda teleb nang anya arye, nun apu yapu ulamikce sik nabi nang olamik talak ara, nun ap ulamtibyeto ura, nun ap melibuka anang kum olamtibye,” nyalulume.

³¹Nyalulum bukni, anggunce anang ati, “Nun apu yapu unyake,” nyanmalum deice arye akunum malye yupu nyaldalulume. Anggun apu yapu malye winilamik touk, anggun babye atonun, talima malye nang umunce, malye winilulume. Diksukum ulamik nang ati olamik deiyok nang ara, anggun apu yapu anya arye, anggunda sik mapu ululuma atia. Ayupu nyamunya deice arye, Allah yupu laka nyalamik nang, nabi-nabi nang olamik deiyok nang ara, “Sik mapu ara, nun unyabe,” nyabuka, anggunce anggun bidamnye arye, malye yupu nyaldalulume. ³²Aning ati ara, anggun apu yapu deiyok koubuka malye winilamik ning ara, anggun witalak ululum nang arye ton sirya daknamlume. Yesus arye nyabuk. Ayupu nyabukop ura, Yesus arye ayupu ton nyabuk.

³³Ninye on kwatima duknupmalya, ninye mangkau bakiba, eiplirye si tolamle touk, ululume. Anggunda fia malye nang ululuma anya arye, Allah arye uku din mutuku dopkwetepnamsilak ara, yata wiribuka lyepdana bitum do? ³⁴Anggun lyepdanmanto kum nang ululuma ati, aminyan talak na dopkwetepnamsin ning ara nyapnusine. Ara, Allah yupu lakak kibuka nyan nang, nabi nang ap, weik kel nang ap, Allah yupu peterena kel nang ap, anggun dam dopdeipnamsine. Dopdeipsinyop ura, ton nang ara, oltakanamlume. Ton nang ara, wanwanun yo deice onamlume. Ton nang ara, anggun Allah yupu peteren aik fum arye, kama arye kulanamlume. Ton nang ara, ‘Optibye’ tenen, mutuku-mutuku niryaربولkirikinamlume.

³⁵Wininamluma ati, yata nang do nirya, sik diksukum ulamik bukni, oltakalamik nang nirya ara, Habel anyapce opnin yangalamik ani,

winitalak Berakia el mi Zakaria, anggun apu yapu arye, Allah arina ati delilamika damak obiknye ap, anang nirya sik ining ara, anggun winitalak ululum nang, anggun taruk deice upnamsile. ³⁶Anang sik ining ara, anggun winitalak ululum nang, anggun taruk deice upnamla ati, anang olamik ning ati, Allah arye anggun atalak ululum nang ati wenebuka opnamsile. Aoltakalamik nang sik ining ara, atalak umunye nang, Allah arye sik ining ara, anggun nong deice deipnamsile. Yesus arye sik Farisi nang ap, Musa sekamuk yupu peteren nang ap ati, nyabuk. Yesus arye ayupu ton nyabuk. Nyabukce, ayupu ton dukdongobuka nyabuk.

³⁷Ura, anggun Yerusalem mutuku ululum ninyeo, Allah yupu laka nyabuka peterenyak nang, na arye nabi-nabi weike anggun dam dolkwetelamsise bukni, anggunce anabi sik nong deice keil dobuka ona ap, tonda, talye oltakana ap ulalume. Na arye anggun Yerusalem mutuku ululum ninye ati, ‘Ayam el mapu irilamle atonunuk, na wiamse ninye kalikuka melinamsin’ tenen, patanululba, anggun ti tuba tenesunun bukni, anggunce, ‘Anye Yesus ara, nun like’ tenen, tuba batakanululum. ³⁸Aning ati ara, anggun Allah si erena ati arelbamunye aik ara, Allah arye batakliba, anyaik ara talye lo uk upnamle. Allah ara anyaik tuba kum unamle.

³⁹Na arye anggun batakuka bindopsinyop ura, dotalak nirya ara, na ton kum elinamnulume. Daulamunya ani, na si erepnamnulum talak ara, eipnamnulum. Atalak ara, anggunce, ‘Se, Ninye Lyenanye, Mesias bira akunum yanmasile,’ tenepnamnulum talak, ayupu nyapnamnulum. “Allah el mikip ap, el si ap deice arye yanmasilnye bira, fia telebuk unamle,” nyabuka, na si erepnamnulum talak, sirya talak ara eipnamnulum.

Yesus arye sik Farisi nang ap, Musa sekamuk yupu peterena deiyok nang ap ati, wenebuka nyabuk.

**Yesus arye, aning-aning nirya kum danamle talak dam uplyop ura,
atalak winipnamle ning ati, laka nyabuk yupu
(Markus 13:1-37; Lukas 21:5-36)**

24 ¹Yesus arye ayupu akunum nyabukop ura, el mapu ap, Allah arelbalamikce, el si erelamik aik fum arye, buru tam bayik talak ara, el mapu arye anyaik domika dipdeyikce, ayupu nyabik. “Naie, dipdelyame. Anyaik-anyaik nirya domik ning ara, urasin fia telebe,” nyabik. ²Nyabikop ura, Yesus arye el mapu nirya ati tamubuka nyabuk. “Allah el si erena ati weik aik domika nirya dipdelulume. Weik cang keil pala arye deibuka welebikce, anyaik dobik keil nirya ara, aminyan ara uluplobice ura, keil deice tonok ning babye kum bataknamake. Anirya daklobikiba, singsinga bulamla atonun upnamle,” nyabuk.

³Nyabukop ura, anyaik batakuka, Zaitun mutuku deice welebuka, abinuka bukikce, yuk nang ap tabakuka kum bukmek anya arye, sik nirya arye Yesus ati asipdeyik. “Naio nyapsilyame. Allah el si erena aik, Yerusalem mutuku ulul aik ara, dan talak arye daklopnamak do? Anyaik daklopnamak ap, sirya talak an yanamlam ning ap, sirya talak sirya daknamle ning ap ati, yata ning uptua deice arye, ‘E, aning nirya akunum dam uple,’ tenen, kel kiptibye do?” nyabuka asipdeyik. ⁴Asipdeyik ati, Yesus arye ayupu tamubuka nyabuk.

Ninye weik arye nyanamake. “Nada, Yesus el si ap, el mikip ap deice arye yanganyabe,” nyabikirye, “Ninye Lyena Deiyouknye ‘Mesias yanamle,’ nyalamiknye bira, na atia,” nyabuka talya yupu uk nyanamake. Ayupu nyanamaka deice arye, ninye weik atilila yupu kekebuka, dib tenenamake. ⁵Atilila nang nyanamsiyaka deice arye, anggun kanye talima nirya lipdakuka, yuk tam bobicak ati, anggun kanye talima kalikdamunce, moubuka unamlulume. Atilila yupu nyanamak nang ara, sik yupu kekebuka, sik tam nang kum kilonamlulume. ⁶Tonda, aminyan talak ninye arye, “Ton tam nang ap, yuk tam nang ap olanamake,” nyabuka, talya nyanamake. Tonda, ton tam nang arye, yuk tam nang ap dipkoprop olakiba, laka nyapnamak ning ap, yanuka nyabikiba, kekepmunyop ura, ayupu ati ilil asa kum unamlulume. Allah arye, ‘Aning atonun ning wininamle’ tenen, akunum tenelamuka ati, dipkoprop wininamle bukni, ‘Sirya talak sirya daknamle talak ara, kabula,’ tenenamamlulume.

⁷Ton wininamle ning ara, weik ninye deiyok nang, Raja nang arye talinyak mutuku ninye arye, yuk Raja talinyak mutuku ninye ati, binuka oldanamake. Tonda, ton yala nang arye, ton yuk yala nang ati, oldanamake.^k Winilamikce ati, mutuku yuk-yuk weik arye lulukunamle. Tonda, wa wibuka kouamice ning nong kum uplyop ura, din fia patana uk unamle. ⁸Kilapu mi deipnuce talak mi deiyok uk dinmalyani, mi delilamak touk, na laka nyapmasin ning nirya akunum talye karin arye winiplyopop ura, anggunce, ‘E, sirya daknamle talak ara, akunum dam uple,’ tenenamamlulume. Bukni, anara deiyok bikna talak, sirya daknamle talak ara, aminyan uka.

⁹Aning-aning winipnamle talak noutamak ara moubuka dimunce, moubuka tenenamamlulume. Yuk nang arye anggun ti, ‘Yupu talina deiyok nang arye Yesus el mapu wenebuka opnamak’ tenen, anggun bobuka,

^k 24:7 *ton yala nang arye* – Ayupu nyabuk ning, minop sekik buku noutamak ara, “Kerajaan melawan kerajaan dan negara akan melawan negara,” nyabuka sekik. Ati, mitik mutuku noutamak unyak nang oldana ati kum nyabuk. Ara weik pala mutuku noutamak unyak ninye arye, yuk weik pala mutuku noutamak unyak ninye ati oldanamake. Ara negara ati nyabuk.

tapu koubuka, wenen deiyok nang ati arilbanamsiyake. Na ti diba tenepmanumunya ati, 'Anang arye opnamak' tenen, weik ninye deiyok nang ap, sisinanye weik ninye deiyok nang ap, sik dam bobinamsiyake. Ton nang ara, anggun deice ikin ning deipnamsiyake. Ton nang ara, oplopnamsiyake. Na ti diba teneluluma ati, ninye mutuku-mutuku nirya arye anggun ti, 'Anang ara fia nun like,' tenebuka, mal pinamsiyake.

¹⁰Anyapmasin ning winipnamle talak ara, diba akunum tenepnik ninye bukni, na yupu ap, na ap ati batakukabikirye, sik yuk diba tenenyak ninye ati, 'Anang ara, nun like,' tenepdakirye, sik kayapu nang kopropa bukni, 'Weik nang arye, aninye ati tapu koubuka opnamak' tenen, wenen deiyok nang dam yukubuka bobanamke.

¹¹Tonda, atalak ara, na mapu koprop kum bukni, ninye weik arye talya tilila yupu nyana nang arye, "Nunda Allah yupu laka nyana deiyok nang unyabe," nyabuka, tilila yupu peterepsicop ura, ninye weik, anang arye nyanyak yupu diba tenebuka dobolbanamke. ¹²Ninye mutuku-mutuku nirya fia malye winin ning weike winipnin balamica deice arye, yuk nang arye yuk nang ati, bico tenebuka kum melinamake. Tonda, sikce na ti tuba tenebuka kanye kum delinamniyake. Sik kanye talima tuba kum delinamniyake. ¹³Bukni, yatanye do nirya, na batakna kumce, na ap, ninye yuk nang ap ati, bico tenebikirye, kanye bokoltona kum dib aryuk, fia kanye lamapdongobuka ulamice nang ara, yuk nang arye anang ati obica babye, Allah arye aninye lyepnamle.

¹⁴Aning-aning nirya, sirya min kum dakmalye talak ara, na lak teleb yupu peterepra banamake. Ara, Allah lyepsilirye ninye talima melinamsil yupu dobuka, mutuku sirya, im sirya peterepra banamake. Mutuku sirya, im sirya nirya na lak teleb yupu peterepra banamak ning, ara, 'Ninye mutuku-mutuku nirya kekepting' tenen, mutuku-mutuku nirya peterepra banamake. Mutuku-mutuku nirya akunum peterepra balamica ani, sirya daknamle talak yanamle. ¹⁵Allah yupu laka nyalamuknye, nabi Daniel arye, 'Winipnamle' nyalamuk touk akunum uplyop ura, anggunce, 'Ura, sirya talak akunum uple,' tenepnamlume. Nabi Daniel arye nyalamuk ning ara, ani.

'Allah arye el fia like tenebuka, "Fia malye ulyinye birye,¹ na Teleb Aik kum tikilyatue," nyabuka yupu sekamik ning uk, amalye weiknye yalirye akurun aik fum akunum tiklyop ura, Allah ati arilbalamak aik ara, Allah arye fia bataknamle.'

(Daniel 9:27; 11:31; 12:11)

(Ayupu nyalulum nang ara, 'Deiyok ani' tenen, moubuka teneipdelulume.)

¹ 24:15 *fia malye ulinye* – Sik Indonesia yupu nyanyak nang arye, aning ati, Pembinasu keji nyanyake. Ara fia teleb ning nirya, malye derililul deiyoknye ati nyanyake. Tonda lak len yupu nomor 48 dipdelelume.

¹⁶Allah arye el si erena ati arilbalamak aik, fia batakuka bilye talak ara, anggun Yudea tam unamlum ninye arye, Yudea tam batakuka, yuk mutuku adip aryuk bik-bik abuka banamlume. ¹⁷Anggun asik kopropa kum unmamunye ninye ara, aik fum batakumamunye ning tamubuka kum dolbinamlume. ¹⁸Atalak anggun wa winmamunye ninye ara, anggun butum aling alip ning kwiribuka, aik deipmamunye ning ara, tamubuka aik fum deipmamunya ning kum dolbinamlume. Adip aryuk batakuka, yuk mutuku bik-bik abuka binamlume. ¹⁹Mi bomice kilapu ap, mi moum dininmace kilapu ap ara bicoe. Akilapu ara adip aryuk bik-bik abuka binmanto kum ati, fia ikin unamle.

²⁰⁻²¹Allah arye aning-aning niryia kwepdeiyamuk talak anyapce, winitalak babye, yuk doyanamle talak babye, ikin ning ulamuk, ton unamle bukni, aniryia ap, aminyan talak ikin upnamle ning ap, ikin ara mitiktonunuka. Bukni, aning-aning niryia sirya daknamle talak ara, fia ikin weik upnamle. Aning ati ara, kapye li deiplye talak mok celamle touk, ayanamle ikin ning ara, 'Ikin weik ning ara, kapye li deiplye talak winiplyak' tenen, tonda, 'Allah si erena ati didik sen sum, Sabat sum deice arye ikin weik ning yalyak' tenen, Allah moronamlulume.

²²Sirya talak ikin wininamle talak ara, ikin ning weik arye deipnyop ura, 'Tukwak ninye niryia dibicak' tenen, Allah arye ikin ning deipnamle talak ara, lo mitikanun aryuk arepnamle. Ninye niryia dibicak ati, Allah arye, 'Aninye ara, na mapu unamake,' tenebukce, wibuka deiyamuk ninye ara, 'Ikin unamle talak weik upliba, ninye niryia dibicak' tenen, Allah arye, 'Ikin ning winipnamle talak ara, lo mitikanun aryuk arepnamne,' akunum teneamuke.

²³⁻²⁴Atalak noutamak arye ton nang ara, tilila yupu deice arye, "Ninye niryia lyeplirye talinamle, nyanyaknye bira, Kristus akunum amutuku ayanmala ani," nyalyanamake. Ton nangop ura, "Kristus omutuku akunum yanuka unmale," nyanamake. Anang niryia ara, fia malye winin nang anya arye, sik tilila yupu uk nyanamaka ati, anang arye nyanyak yupu ara dib kum tenenammlulume. Tonda, na mapu koprop kum bukni, ton nangop ura, "Nunda, Allah el yupu laka nyan nang, nabi unyabe," nyabuka, tilila yupu nyalyanamake. Nyanamak bukni, anang arye nyanyak yupu ara diba kum tenenammlulume. Anang niryia ara, sik yuk nang arye, 'Nun fil eipsikirye, diba tenebuka dobolyanamsiak' tenen, ninye arye kum winipmanto ning, sirya dakna fil donamake. 'Ton anang ara, afil dolamibiba eipsikirye, dipkoprop Allah el mikip deice aryuk afil donyake, tenepnamsiyak' tenen, mambul fil ton donamake.

Afil-afil niryia dopnamaka deiyok ara ani. Ara, 'Allah el min arye wibuka deiyamuk nang ara, Allah ati batakuka, nun tam kipropsikirye, nun uk dobolyanamsiyak' tenen, anggun mutuku yanuka fil donamake. Wininamak bukni, Allah wibuka deiyamuk nang arye, atilila ning diba kum tenenamake.

²⁵Aning niry a wininamle ati, anggun fia kanye moubuka umunce, kintinilinamlulume. Aning niry a min kum winipmalye talak arye, aminyan talak winipnamle ning akunum laka nyapmasina ati, winiplyop ura, anang arye nyanyak yupu ara diba kum tenenamlulume. Yesus arye el mapu ati nyabuk.

²⁶Nyabukce, ayupu ton nyabuk. Aning ati ara, atalak noutamak ara, yata nang do niry a, “Anggun dilyalulume. ‘Ninye weik lyepliry e talinamle,’ nyanyaknye Kristus ara, anyaik fum amining dam akunum yanmale,” nyabuka tilila yupu nyapsicop ura, aning ati diba kum tenenamlulume. Tonda, yuk nang arye, “Anggun dilbilulume. Omutuku ninye una kumak, Kristus akunum yanmale,” nyapsicop ura, aning ababye anggun diba kum tenenamlulume. Sik nyanamakak ababye, kum dilbanamlulume. ²⁷Na ara, Ninye Mi Koprop Atonunye yanamne talak ara, kiting yangan tam arye bebeya, lakliba kiting wekelban tam balamle touk, winibuka yanamne. Lak noutam aryuk yanamna any a arye, ninye niry a arye elinamniryake. Yesus arye nyabuk. Nyabukop ura, ayupu ton nyabuk.

²⁸Na tamubuka yanamne talak ara, oltakne ning oploliba, lyulamlyrye tong nyalamliba, dei bum weik arye amulamle touk, ninye arye, ‘E lyun ning anye,’ tenelamak touk, na yanyop ura, lakak ubuka yanamna ati, arup akunum laka nyapmasin ning eipmunyop ura, ‘Oyanmal do, ayanmala do?’ kum tenenamlulume. Na yanamne talak lak uk upnamla ati, dipkoprop anggunce kel kipnamlum atia. ²⁹Aikin talak noutamak bukni, anyapmasin kanye imun ning akunum uplyop ura, ‘Aning winipnamle,’ nyabuka nabi Yesaya arye sekamuk yupu atonun winipnamle. Ati, Yesaya sekamuk yupu deice nyapnusine. Ayupu ara ani.

‘Kiting ara, kunuknamle. Tonda, wala babye dirina kum upnamle.

Tonda, kurya niry a, im deice arye tukwak saknamle. Tonda, im alip tam ulye ning niry a lulukliry e bindaknamle.’ *(Yesaya 13:10)*

“Ayupu ara, nabi Yesaya arye sekamuk yupu nyapsine,” Yesus arye nyabuk. Nyabukce, ayupu tonap nyabuk.

³⁰Im deice ubuk ning akunum winiplyopop ura, na ara Ninye Mi Koprop Atonunye, yanunye talak pitin kilin ning lakak upnamle. Winiplyop ura, na ara, weik mikip ap, dirina ap, urasin teleb una ap, aniry a deice arye dua kan-kan yanyeba, tukwak ninye niry a arye lakak eipnamake. Eibikiry e, kanye imun weik upliba, ninye mutuku-mutuku niry a weik arye engenamake. ³¹Na yanamne talak ara, im deice weik bung-bung ana nyabikiba, na im deice fil don nang, malaikat dopkwetepnye ura, im sirya, mutuku sirya dana-dana niry a, Allah minop arye wibuka deiyamuk nang bulubuka deibikiry e, na dam boyanamake.

³²Aning ati ara, winipmanto yupu nyapnusine. Binalye yo^m kita opmalya ani, bupu kipnulye ati, telel ongoplyop ura, ‘Ara, dou

^m 24:32 *Binalye yo* – Minop sekik buku noutamak ara, binalye yo kum sekik bukni, nun mutuku ulye ning sekmaba ara, ‘Ninye arye moubuka kel keptinge’ tenen, sekupe. Sik minop talak sekik ning ara, yo duk moulamle yo sekik. Tonda, Yesus ulamuk talak ara, yo el yo bok panabuka welebuk, ‘Ara dou mapnamala ati,’ tenelamik.

mapnamala atia,' tenelulume. Tonda, 'Dou abauwa upmala anya arye, dou manamle' tenen, nyalulume. ³³ Aning dimunce, 'Dou mapnamale' tenen, kel kilamlum touk, anyapmasin ning nirya eipmunyop ura, 'Sirya daknamle talak akunum dam uple,' tenepnamlume. Ara, Allah arye aning-aning nirya ap, ninye mutuku-mutuku nirya ap, taliplirye, Weik Ninye Deiyouknye unamle talak, 'Akunum deiyok koupale' tenen, kel bikinamlume. Aik buplan dam, tikilyakirye peten-peten nyalamaka atonun, anyapmasin ning akunum uplyop ura, 'Sirya daknamle talak akunum dam uple,' tenepnamlulume.

³⁴ Na dipkoprop nyapsine. Anyapmasin ning deiyok kouplirye winipnamle talak eipnamak ninye ara, sik nirya min kum dipmakce talak ara, anyapmasin ning nirya babye, aning-aning nirya sirya daknamle talak ababye, dipkoprop eipnamake. ³⁵ Im alip tam ulye ning nirya ap, tukwak tam ulye ning nirya ap ara, kum danamle bukni, na nyasinye yupu nirya ara, tonok babye ton kum kum danamle. Fia aupnamle. Na yupu nyasinye touk dipkoprop nong upnamle. Yesus arye nyabuk.

Yesus min kum yanmalye talak ninye kum bikinyaka ati, nyabuk yupu
(*Lukas 17:26-27; Lukas 12:42-46*)

³⁶ Yesus arye ayupu akunum nyabukop ura, ayupu ton nyabuk.

Na dipkoprop nyapsine. Yata nang do nirya, na yanamne sum ara, 'Asum yanamle do, asum noutamak ara berentam yanamle do, sintam yanamle do?' tenen, kum kel bikinyake. Allah el im deice fil don nang, malaikat babye kum kel bikik. Tonda, Allah el Mi Koprop na babye, kum bikse. Na Ni Allah elcuk, 'Sirya talak daknamle talak ani' tenen, akunum teneyamuka ati, el kele. ³⁷ Minop talak Nuh ulamuk talak, el ap ulamik ninye sik winilamik touk, na Ninye Mi Koprop Atonunye yanamne talak ababye, ninye mutuku-mutuku nirya atonun unamake. ³⁸ Ara, Nuh ulamuk talak weik mekwen min kum deiyamuk talak ara, sik aninye nirya arye, mek dina ap, din ning yala nirya dina ap, kil arilana ap, anirya winipra balamik ati, Nuh bira weik mek lia yo wekuk sum ababye, tuba mangkau kanye bobuka talya uk unmek.

³⁹ 'Mekwen dipsilyak' tenena kumce, talya kanye bobuka winilamik. Winipra balamikba, weik mok cenmokce, mekwen deibuka welebukce, atalak ulamik ninye nirya dibuk. Sik talya mangkau kanye bobuka ulamik bukni, mekwen deibuka dibuk touk, na Ninye Mi Koprop Atonunye, tukwak mutuku tamubuka yanamne talak ara, atonun talya mangkau kanye bobuka, 'Yesus tamubuka kum yanamle' tenen, talya unamake. ⁴⁰ Atalak ara, ninye bitinye wa winmariki bukni, tonye batakuka, tonye dem Allah arye dopropnamle. ⁴¹ Aning atonun ton kilapu bitinye kwaning danmarikibuk, ton kil batakuka, ton kil tonok dopropnamle. Ara Allah el kanye arya.

⁴²Aning ati ara, kalikuka dimunce, kanye moubuka unamlulume. Anggun ni kopropa, na min kum yanamne talak ara, 'El winitalak yanamle' tenen, kum biktuma ati, nyapsine. ⁴³Bukni, 'Anggun moubuka kel kipnululum' tenen, sirya daknamle talak winipnamsil ning atonun ning ati, winipmanto yupu nyapnusine. Aik deiyoknye birye, 'Ubula donanye alukunyan noutamak, akiting deice arye ubula dolyanamanile' tenen, kel kepmatuto ura, mana kumce, fia kalikuka dinmatu ati ara, ubula donanye birye, el aik wekuka, el ning ubula kum doproptue.

⁴⁴Aning atonun na babye, Ninye Mi Koprop Atonunye yanamne talak ara, anggun mangkau kanye bobuka unamunye kiting deice aryuk yanamna ati, kanye talima kintinibuka deipmunce, kanye moubuka fia kalikuka dinamlulume. Ara, 'Mankau kanye bopmamunye talak arye yalyak' tenen, kanye moubuka unamlulum ati nyapsine. Ayupu nyabukop ura, ayupu ton nyabuk.

⁴⁵Weik kel arye fil batakna kum dib aryuk, teleb fil melin nang ulamaka atonun, yata nang ton, anang atonun wininamak do? Aik deiyoknye tonok arye, yuk mutuku binuyuk talak ara, el fil donanye tonok ati, "Fil winibuka donamlyame. Na fil melin nang nirya ati, sik din patalye talak ara, bokuka arinamlyame," nyabuka bokuka deibuk.

⁴⁶Anyaik deiyoknye tamubuka yanamle talak ara, el fil donanye biti yupu nyabuka deibuk touk, weik kelnye ulamturye, batakna kum dib aryuk, afil nirya akunum fil dolamlyop ura, adeiyoknye birye tamubuka yalyop ura, el fil melinanye biti, 'Na ning nirya talipmince, deiyoknye atonun kibuka, na fil donamnyame,' nyabuka, adeiyoknye birye el fil donanye dobuka erepdeipnamle. ⁴⁷Na dipkoprop nyapsine. Anyaik deiyoknye birye, 'Wininalyame,' nyabuk touk, el fil donanye birye, diksukumuk fil dolamlyop ura, adeiyoknye el talyamlye ning nirya dobuka, anye arepliba, anye aning taliplirye, el babye weik deiyoknye atonun unamle.

⁴⁸Akumop ura, afil deiyoknye birye, 'Winipnulyame,' nyalye ura, kekebuka fil dolulnye malye uk uplirye, malye uk ubuka winiptop ura, 'Kume, na deiyoknye akunum binamukce daulula anya arye, nimalye arye orkiting tamun uk tamubuka yanamle,' teneptue. ⁴⁹Utenebukce, el ap fil donyak nang ap, kilapu ap ati, kulabuka oplirye, kanye wangalamak mek din nang ap, neika dibuka utingop ura, 'Na deiyoknye, el akiting yanamle,' kum teneplirye, talya mangkau kanye bobuka unamle. ⁵⁰Talya mangkau kanye bobuka uplye sum ara, el deiyoknye tamubuka yanamle. El fil donanye birye, 'E akiting yanamle, asum arye yanamle,' tenen, kum kel kiplye sum arye, el deiyoknye tamubuka yanamle. ⁵¹Adeiyoknye tamubuka yalyop ura, amalye winilamlye, el nong oplirye, seklopnamle. Winiplirye, anye el kanye ara, Allah diba tenena kumce, fia malye winin ninye unamakak, uku din mutuku

dongoplye talak ara, kanye imun unamle. Kanye imun upliba, el ap, sik kanye talima noutam malye ning upmalibuk, aning tenena kum dib aryuk, bola deice teleb ninguk unyak ninye ap, fia engebuka unamake. Yesus arye nyabuk.

Yesus winipmanto yupu deice arye 10 kam kilapu ati nyabuk yupu

25 ¹Yesus arye el mapu ati nyabuk. “Na Ninye Mi Koprop Atonunye birye, ‘Aning-aning nirya talinamne’ tenen, im deice arye tukwak yanamne talak winipnamle ning ara, ‘Kel biknamlum’ tenen, winipmanto yupu nyapnusine. Winipmanto yupu ara ani.

²Sik kam kilapu 10 noutamak bukni, pamu barye (5) kilapu walwal kilapu ulamik. Ton pamu barye kilapu, kel kilapu ulamik. ³Sik walwal kilapu pamu barye, sik weisa lampu el si pelita bobuka banmek bukni, minyak mek uku dibuka sirya dakukop ura, ‘Aminyan punubuka dikdongopnamap’ tenen, dokola ning ton kwebuka, kum bobinmek. Aning kum tenebik. ⁴Sik winibik bukni, sik kel kilapu ton tam pamu barye kilapu arye, sik lampu pelita bobinmek. Tonda, ‘Aminyan minyak mek tonap dikdongopnamap’ tenen, uku mek makau dobuka, uku mek dokola ning ton, kintinibuka bobinmek. ⁵Sik nirya arye weisa dobuka, ‘Kil dopnamuka deiyoknye yaliba epdanamap’ tenen, aik fum arye, bulupmekce, daunmek bukni, wi weik upmok ati, mapmek. Kil dopnamuka deiyoknye nimalye arye yanganmoka ati, sik nirya wi talipmoka ati mapmek.

⁶Sik mapmek ani, lukunyan duduk ubuk ura, yuk nang arye nyabik. “Kil dopnamuka deiyoknye yanganmoka ati, anggun bisik ak yanuka epdanulume,” nyabik. ⁷Nyabikop ura, sik kam kilapu 10 nirya arye bukikop ura, sik weisa ubik. ⁸Winibikop ura uku dinmokani, walwal kilapu pamu barye sik weisa ara angam-angam anmokba, sikce sik kayapu kilapu, kel kilapu ati morobik. “Se, nun weisa ara angabum-angabum anmasila ati, minyak uku mek ton aripsululume,” nyabuka morobik. ⁹Morobikop ura, sik kel kilapu pamu barye kilapu arye tamubuka nyabik. “Kume, nun mek anggun ti aripsibyop ura, nun weisa lampu ababye, angabum-angabum apsilyake. Ati, sik uku mek deklamikce aik, anggun bidamnye aryuk, anggun bidamnye minyak mek eibuka dekelbinulume,” nyabik.

¹⁰Nyabikop ura, sik walwal kilapu dekelbinmek talak ara, kil dopnamuka deiyoknye tamubuka aik yayuk. Yayukop ura, sik kel kilapu uku mek akunum kintinipmek kilapu pamu barye ap, kil dopnamuka deiyoknye ap, kil don kwalina kwalibuka deipmek aik neika dilbiyik. Aik wekik ura, sik yuk nang arye anyaik buplan tirikdongobik.

¹¹Tirikdongobik ura, daunmekbuk, aminyan ara, sik walwal kilapu pamu barye kilapu arye tamubuka akwalina kintinipmek aik dam yayikce

nyabik. ‘Naie, nun buplan kukeipsilyame,’ nyabuka morobik. ¹²Nyabuka morobik bukni, anyaik deiyoknye birye tamubuka nyabuk. ‘Kumde, na dipkoprop nyapsine, anggunda na walwale,’ nyabuk.” Yesus arye ayupu winipmanto ning nyabuk.

¹³Yesus arye el mapu ati nyabukop ura, ayupu tonap nyabuk. “Aning ati ara, Na Ninye Mi Koprop Atonunye tamubuka yanamne sum ap, kiting ap, anggun walwal anya arye, mangkau kanye bopmunye talak, na yanamne ati, fia kalikuka dinamnulung, nyapsine,” Yesus arye el mapu ati ayupu nyabuk.

Yesus arye winipmanto yupu deice, “Tonok deiyoknye birye, el fil don nang ati, yo bok aribukce,” nyabuk yupu
(Lukas 19:12-27)

¹⁴Yesus arye ayupu nyabukop ura, ayupu tonap, el mapu ati nyabuk. Na tukwak tamubuka yanamne talak winipnamle ning, ‘Kel biknamlum,’ tenen, winipmanto yupu tonap nyapnusine.

Tonoknye birye el mutuku batakuka yuk pera mutuku binuyuk talak ara, el fil don nang nirya yukubuk. Yukubuk ura, yayikop ura, ‘Na yo bok aripniba fil dolamikca ani, yo bok weik tabakuka arepnamniyak’ tenen, el yo bok weik ning bokuka, anang ati yuk-yuk aribuk. ¹⁵El dekna weik yo bokⁿ bokuka aribuk ning ara, bin tonok ati pamu barye aribuk, yuknye biti bitinye aribuk, yuknye biti tonok aribuk. Ara, sik kel ara yuk-yuk bikamik anya arye, sik fil dopmanto winilamik touk bokuka, sik yuk-yuk aribuk. Aribukop ura, adeiyoknye amutuku batakuka, yuk pera mutuku binuka ulamuk.

¹⁶Biyukop ura, weik yo bok pamu barye aribuknye birye, adip aryuk deiyok koubuka fil dopnin balamuka ani, fil dolamuka deice arye, weik yo bok 5 tonap tabakdeibuk ura, 10 kibuk. ¹⁷El winilamuk touk, weik yo bok 2 doprobuknye birye, fil dolamuka deice arye, weik yo bok 2 ton tabakdeibuk ura, 4 kibuk. ¹⁸Sik winilamrik bukni, weik yo bok tonok doprobuknye bira, adip aryuk tuku palibuka, ayo bok tuku fum duknubuka deibukce, tuku arye siknipdongobuk. Anye birye yo bok tonap tabakuka kum deibuk.

¹⁹Sik nirya daulamikani, aminyan ara, adeiyoknye el mutuku kopropa tamubuka yayukce, sik fil donyaka deice arye, ‘Weik yo bok yata barye deipnik do?’ tenen, afil don nang ati yukubuk ati, yayik ura nukdeyuk. ²⁰Weik yo bok 5 dopromukce, fil dolamuka deice arye, 5 tonap tabakuka deibuknye birye nyabuk. “Naie, ance, ‘Fil dopnamnil’ tenen, yo bok 5 aryamnulumba, fil dolamse ani, weik yo bok 5 tonap tabakuka kintinipdeipmakince, 10 aupmal

ⁿ 25:15 yo bok – Yunani yupu deice arye, talenta sekamik bukni, ayo bok tonok talenta atonun ning ara, 10 juta atonun ubuk. Ati, 5 talenta ning ara, 50 juta atonun ubuk.

atia,” nyabuk. ²¹Nyabukop ura, el deiyoknye birye tamubuka nyabuk. “Telebe, anda fil fia batakna kumce, teleb ubuka dolamnulume. Na mitikanun uk aryamkisibuk, fil batakna kumce, teleb ubuka fil dolamnuluma ati, winitalak na talyamse ning weik arye aripnukine. Na ap, an ap, kanye deipdanimirye, teleb ubuka neika unamname,” nyabuk.

²²Weik yo bok bitinye dopromukce, fil dolamuka deice arye, weik yo bok 2 tonap tabakuka deibuknye birye yanuka nyabuk. “Naie ance, ‘Fil dopnamnil’ tenen, weik yo bok 2 aryamnulumba, fil dolamse ani, weik yo bok 2 tonap tabakuka kintinipdeipmakince 4 aupmal atia,” nyabuk. ²³Nyabukop ura, el deiyoknye birye tamubuka nyabuk. “Telebe, anda fil fia batakna kumce, teleb ubuka dolamnulume. Na mitikanun uk aryamkisibuk, fil batakna kumce, teleb ubuka fil dolamnuluma ati, winitalak na talyamse ning weik arye aripnukine. Na ap, an ap, kanye deipdanimirye, teleb ubuka neika unamname,” nyabuk.

²⁴Aminyan ara, weik yo bok tonok doprobuknye yayukce nyabuk. “Naie anda fia yunye ulamlum ati kel bikamkise. An kum kouamlum wa win dam arye kwaning yongobuka dololyame. Tonda, an kum kouamlum ning ap, kum dokamlum ning ap, libuka dilyame. Anirya winilalumba kel bikamkisa ati, ilil upnukba, ance aryamnulum ning weik yo bok tonok ning ara, buru bobinuka, tuku palibuka tuku fum duknubuka deipse,” nyabuk. ²⁵“Winipsa ati, an aryamnulum ara, weik yo bok tonok adeiamse touk, tonok yo bok uk tamubuka aripkine,” nyabuk.

²⁶Nyabuk ura, adeiyoknye birye yu ubuk ura, tamubuka nyabuk. “Anda, fil lik arye batakaminya ati, anda fia malinye ulyame. Ura, na kum kouamse ning ap,^o kum dokamse ning ap, libuka diniba, ance kel bikamnulume. ²⁷Aning akunum kel bikamnuluma anya arye, na aripkise yo bok ara, yo bok tenepce delin aik dongopmatumba, sikce yo bok tonap tabakuka deipkitingba, weik upnin balamtu ani, aning ap tabakuka aripnutume. Winipmanutum bukni, talya uk duknubuka deipluma ati, anda fia malinye,” nyabuk. ²⁸Adeiyoknye birye nyabukop ura, el fil melin nang, yuk nang ati ayupu nyabuk. “Amalinye buk, na arepsiba doprobuk weik yo bok tonok ning ara, anggunce dobuka, winitalak 10 weik yo bok aripmanilanye biti, ayo bok ton tabakuka areplulume,” nyabuk.

²⁹Ara yata ninye do nirya, sikce fil teleb ubuka donyaka deice sik talinyak ning^p weikanun awamlye ninye ara, na arye tonap tabakuka aripniba fia weik

^o **25:26** *min kouamse yala ning* – Awa deiyoknye birye ayupu nyabuka ara, ‘Ubula donanye unune’ tenen, kum nyabuk. Deiyok ara, awa tuku el ara el ning kopropa anya arye, el melibuka dolamik nang arye kouamik ning libuka dilamuka ati nyabuk. Atuku deiyoknye bira el uka. **P 25:29** *sik talinyak ning* – Yesus arye akili sal ati, “Sik talinyak ning mitikanun wamlye kili sal,” nyabuk ning deiyok ara, dipkoprop talye yo bok ap, talye bona ap ati kum nyabuk. Ayupu nyabuk deiyok ara ani. Allah arye nyapsilye touk, fia pi dobuka telebuk nyak ninye ara, menenga weik arye arinamle. Bukni, ‘Allah nyalye yupu nun song’ teten, lik upliba, fil teleb ubuka kum donyak kili sal ara, menenga ning mitikanun babye kum aripnamle. Ato ninye nirya menenga ning fia kum dolonamake.

upnamle. Bukni yata ninye do nirya sikce fil dona ati, lik uliba, ‘Nun like’ tenen, teleb ubuka fil kum donyakce, sik talinyak ning mitiktonunuk walye ninye ara, mitik tonun wamlye ninye ara, tamubuka doproprniba, fia kum danamle. Aninye ara talye nong uk unamake. ³⁰Ati ara, anye tamupdobuka tapu koupnirye, weik kunuknak dopkwetepniba, elda fia kunukna kankan daunamle. Winibuka dopkwetepniba daunamle talak ara, engena ap, malye winina ap, si lina ap unamle. Deiyok ara, fia malye winilamuka atia,” adeiyoknye birye nyabuk. Yesus arye awinipmanto yupu nirya ara nyabuk.

**Yesus arye winipmanto yupu deice arye, domba
ap, kambing ap ati, nyabuk yupu**

³¹Yesus arye ayupu nyabukop ura, ayupu tonap nyabuk.

Na Ninye Mi Koprop Atonunye ap, na im deice fil donyak nang, malaikat ap, im deice arye yanamap talak ara, im deice ning nirya ulye touk, na babye urasin teleb una ap, na nong dirina weik una ap winipnamne. Winipnilyop ura, weik ninye deiyok nang bulamak ning atonun ning deice buknyrie, ninye mutuku-mutuku nirya unyak ninye ati bokuka deipnamne. Aning deice bunamne talak ara, na ning nirya ara, im alip ning ulye touk, fia telebuk upnamle. ³²Ninye mutuku-mutuku nirya unyak ninye dobuka, na dam deipnikirye, sik domba basam wein ninye arye, kambing basam yuk, domba basam yuk, bokuka delilamak touk, tukwak ninye mutuku-mutuku nirya bokuka yuk-yuk deipnamne. ³³Sik domba atonun yala ninye, teleb unyak ninye ara, na sirik taruk tam deipnamne. Ara, sik diksukum unyak ninye ati nyapne. Sik kambing atonun yala ninye ara, na kwanim taruk tam deipnamne. Ara sik malye unyak ninye ati, nyapne.

³⁴Deipnyop ura, na Raja unamna ati, na sirik taruk tam deipnamne ninye ati ayupu nyapnamne. Sikda na Ni Allah arye talima aribukba, bico tenebuka kanye deilisylye ninye ara, na dam wekelyalulume. Allah arye aning-aning nirya min kum kwepdeiyamak talak arye, ‘Anang aryuk talinamak’ tenen, akunum kintinibuka deiamsuk ning ara dolyalulume. ³⁵Ara urdem ati kume. Na din ning ap, mek ap, patalamnuk talak ara, anggunce arelamnulume. Na ninye asik nang antonun ulamse talak ara, anggunce na ti telebe nyabuka, yukubuka aik dongolanulume. ³⁶Na butum aling patalamnuk talak ara, butum aling ongolilamnulume. Na uk dilamnuk talak ara, anggunce melilamnulume. Na wenena aik dongomnik talak ara, anggunce na dam yangalamlumce, melilamnulume. Na arye sik diksukum unyak ninye ati nyapnamne.

³⁷Nyapnyop ura, sik diksukum unyak ninye arye ayupu tamubuka nyapnamniake. “Naie dan talak din ning ap, mek ap, patalamkukba, aryamkupu do? ³⁸Dan talak ninye asik nang antonun ulamlumba, nunce yukubuka aik dongolamkupu do? Dan talak butum aling patalamkukba,

nunce onglilamkupu do? ³⁹Tonda, dan talak uk dina ap, wenena aik una ap, ulamlumba melibuka dilyangalamkupu do?” nyabuka, asipdenamniake. ⁴⁰Asipdenicop ura, na ara, weik ninye deiyoknye Rajanye birye, aninye ati nyapnamne. “Na dipkoprop nyapsine, na ti diba tenepnik nang, na mapu ara, bona utotoa talina kum ninye ap, sekeltakne ninye ap, yuk nang arye, ‘Aninye ara mambul kume,’ tenenyak ninye ara, anggunce tonoknye babye melilamlum ning ara, na ti melilamnulume.”

⁴¹Nyapnyop ura, na kwanim taruk tam deipnamne ninye ati nyapnamne. “Allah arye, ‘Aninye na like,’ tenebuka akunum batakujuk ninye ara, na dam arye yukak bilulume. Allah arye Isa Mutuku Dongonye ap, el fil donyak nang, sik malye malaikat atonun isa ap, na ti batakukce, malye ning talibuka, sik malye wininyak kili sal niryada, ‘Fia uku dipnamle’ tenen, uku din mutuku kintinibuka deibukak ara, anggunc wekelbululume. ⁴²Ara tilila ati kume. Na din ning ap, mek ap, patalamnuk talak ara, anggunce din ning kum arelamnulume. ⁴³Na ninye asik nang antonun ulamse talak ara, anggunce na ti telebe nyabuka, kum yukubuka aik dongolanulume. Na butum aling patalamnuk talak ara, butum aling kum ongolilamnulume. Na uk dilamnuk talak ara, anggunce kum melilamnulume. Na wenen aik dongomnik talak ara, anggunce melibuka kum dilbalamnulume. Na arye sik malye unyak ninye ati nyapnamne.” Yesus arye nyabuk.

⁴⁴Yesus arye nyabukop ura, ayupu ton nyabuk.

Nyapye bukni, sik malye unyak ninye babye, sikce ayupu tamubuka nyapnamniake. “Naie dan talak din ning ap, mek ap, patalamkukba, kum aryamkupu do? Dan talak ninye asik nang antonun ulamlumba, nunce yukubuka aik kum dongolamkupu do? Dan talak butum aling patalamkukba, nunce kum onglilamkupu do? Tonda, dan talak uk dina ap, wenen aik una ap ulamlumbuk, nun kum melibuka dilyangalamkupu do?” nyabuka, asipdenamniake.

⁴⁵Asipdecop ura, na arye aninye ati nyapnamne. “Na dipkoprop nyapsine, na mapu ara, bona utotoa talina kum ninye ap, sekeltakne ninye ap, yuk nang arye, ‘Aninye ara mambul kume,’ tenenyak ninye ara, tonoknye babye kum melilamlum nang ara, na ti kum melyamnulume.” Sik malye unyak ninye ati nyapnamne.

⁴⁶Nyapnyop ura, adip aryuk, sik malye unyak ninye ara, dopdeipniba, Allah arye wenebuka fia opnamle bukni, sik diksukum unyak ninye ara, telebukiry kam fia unamake. Yesus arye el mapu ati ayupu nirya nyabuk.

Yahudi yala deiyok nang arye, ‘Yesus opnamap’ tenen, sirikinmek yupu
(Markus 14:1-2; Lukas 22:1-2)

26 ¹Yesus arye ayupu nirya akunum nyabukop ura, el mapu
¹²nang ati nyabuk. ²“Anggun kele. Yahudi yala nang sik

Kaplina ati Kwalina sum ambusum arye ubuka ambusum or upnamale. Atalak ara, na ara, Ninye Mi Koprop Atonunye bira, ‘Malye nang arye wanwanun yo deice deibuka opnamak’ tenen, inipraka binamniyake,” Yesus arye nyabuk.

³Yesus arye ayupu nyanmok talak ara, Yahudi yala nang Allah ati arina deiyok nang ap, sik weik deiyoknye ap,⁴ yuk Yahudi yala deiyok nang ap, anang nirya arye, tonoknye el aik bulubuka wekik. Anye el si ara, Kayapas. Kayapas ara, Allah arina ati deiyok nang aulamik bukni, elda sik weik deiyoknye ulamuk. ⁴Anang nirya anyaik wekmekce, yupu talipmek. Ara, ‘Yesus yata wiribuka deice arye tapu koubuka, Yesus optibyeba, yuk nang kum biknamsiyak do?’ tenen, yupu talipmek. Utenebuka yupu talipmek bukni, anang kan-kan yuk nang arye, nyabik. ⁵“Kum de, nun Kaplina ati Kwalina talak noutamak arye kum opnuyabe. Ninye fia weike amutuku wekmeka ati, Yesus obibyop ura, aninye weik yu upliba derepsicak ati, daupmalibuk,” ‘Aminyan talak arye Yesus optibye’ tenen, nyabik. Nyabik bukni, atalak ara Yesus kum obik.

**Yesus Betania mutuku unmok talak, kil tonok arye nintong teleb mek
dobuka, Yesus el kisok deice dikeibuk yupu
(Markus 14:3-9; Lukas 7:37-38; Yohanes 12:1-8)**

⁶Yesus ap, el mapu ap, Yerusalem mutuku batakuka, Betania mutuku binuka unmek. Yesus ara, tonoknye el si Simon, el aik binuka bukmokce, din dinmok. Simon ara, min arye barye suse atonun suse, el nong nirya dilamuka ati, el si ara Simon Barye Suse dinanye nyalamik. ⁷Yesus Simon aik bukmokce, din dinmok talak ara, tonok kil arye bol kat weik makau dobuka boyayuk. Amakau fumbisik ara, nintong teleb mek, dekna fia weik mek awamuka ati, Yesus kisok deice dikeibuk. ⁸Amek dikeibukop ura, Yesus el mapu el damak abukmek arye eibikce, sik kan-kan arye, tonang ara yu ubukba, malye kanye bobikce, ayupu nyapdayik. “Anintong teleb mek ara, yata ati talya dikipmal do? ⁹Anintong teleb mek dobuka, yuk nang ati dekmattyop ura, yo bok weik dopropmatibiryne, ninye bona utotoa talina kum ninye ati melibuka aripmatibye,” nyapdayik. Sik nyapdayikce, akil ati, yu ubukba wenebuka derebik.

¹⁰Akil ati wenebikba, Yesus kekebukce anang ati nyabuk. “Anggunce el ti nyana kume. Anggun batakulume. Malye tenepmalumce wenepmaluma ara, yata ati do? Akil arye na ti nintong teleb mek, na kisok deice dikeipmanila ara, fia teleb upmala anye arye, na kanye deipne. ¹¹Talya bona utotoa talina kum ninye ara anggun ap neika fia unamluma anye arye, anggunce teneplum talak uk aninye meliptume.

⁹ 26:3 Allah ati arina deiyok nang, sik weik deiyoknye ati, laka nyana yupu nomor 14 dindelelume.

Bukni, na ara anggun ap tuba neika fia kum unamabe. ¹²Akil arye na ti, anintong teleb mek dikeipmanila ara, laka nyapnusine. Aminyan na opnikceba dipnamne talak ara, na nong weipnamniyaka ati, winitalak ara, na nong weina ati kintinipdeipmanilarye, winipmanile. ¹³Ati ara, dipkoprop nyapsine. Na lak teleb yupu bobuka peterelbinamak mutuku nirya ara, akil arye na nong deice nintong teleb mek dikeipmanil ning ara, ‘Akil el ti fia tenenamak’ tenen, fia peterelbanamake,” Yesus arye nyabuk.

Yudas arye, ‘Yesus opnamak’ tenen, ninye yupu delilbiyuk yupu
(*Markus 14:10-11; Lukas 22:3-6*)

¹⁴Nyabukop ura, Yesus wipdeiyamuk nang kan-kan bukni, tonoknye el si Yudas Iskariot, ‘Anang arye Yesus olyanamak’ tenen, Allah arina ati deiyok nang, sik dam ninye yupu delilbiyuk. ¹⁵Yudas arye anang sik dam ninye yupu delilbiyukce ayupu nyabuk. “Yesus opnamluma ati, na arye Yesus yukupnirye, aripsinyop ura, yo bok yata barye aripnamnulum do?” nyabuka asipdeyuk. Asipdeyukba, sik anang arye, “Winipsiminyop ura, keil uang dekna weik ning, yupa winilye 30 aripnukiyabe,” nyabikke, akeil uang nukuka aribik. ¹⁶Nyabuka aribikop ura, Yudas arye, ‘Yata teleb lo waplye talak arye, Yesus dobuka anang ati areptinye do?’ tenelamukce, dina uk ulamuk.

Yesus ap, el mapu ap, Kaplina Kwalina ati, kwalina dibik sum yupu
(*Markus 14:12-25; Lukas 22:17-20*)

¹⁷Sik Yahudi yala nang arye, Nena Kum Roti’ deiyok koubuka kwalina sum arye, sik apu yapu Mesir mutuku batakuka binuyik talak ara, domba obuka buplan dam dana-dana tikilin yo ining likeipmek ati, sik minyuma mapu ona kumce, Allah arye sik aik kaplibuka biyuk ning ara, ‘Aminop talak winyamuk ning nirya ati tuba tenenamap’ tenen, asum arye domba tonok obuka dilamik.

Sik Yahudi yala ninye nirya arye winilamika ati, Nena Kum Roti deiyok koubuka kwalina sum deice, Yesus el mapu arye Yesus ati asipdeyik. “Anda, Kaplina ati Kwalina ning dipnamalam ning ara, dan aik kintinililbinuyap do?” nyabuka asipdeyik. ¹⁸Asipdeyikba, Yesus arye el mapu ati, ayupu nyabuk. “Anggun Yerusalem asik donyaka noutamak bimunye talak ara, ninye tonok eipnamlume. Eipdamunyo ura, anye

^r 26:17 *Nena Kum Roti Kwalina ara*, deiyok ani. Ara Israel ninye, Mesir mutuku batakuka binuyik talak ara, ‘Adip aryuk binuyapa ati, lo kum upmasilba, roti dabuka dipnyup bukni, roti nena deiyok ning kum dongoptibye,’ tenebikke, nena kum roti dabuka alukunyan minopce dibik. Aning tuba tenena ati, nena kum roti kwalina tuba kwalinyake. Tonda, laka nyana yupu nomor 30 dipdelelume.

biti nyapnamlulume. ‘Nun peterena deiyoknye birye nyapkile. Allah arye wibuka deiamnuk talak akunum dam upmala anya arye, na ap, na mapu ap, Kaplina ati Kwalina ning dipnamapa ara, an aik fum dilyanamabe, nyapmakile.’ Nyapmasin touk nyalbinululume,” Yesus arye el mapu ati nyapdeibuk.

¹⁹Nyabuk ura, el mapu arye Betania mutuku batakuka, Yerusalem mutuku biyikce, Yesus nyapdeipmok ning atonun winibukba, Kaplina Kwalina ati dipnamek ning kintinibuka deibik. Kintinipdeibikop ura, asukum uk unmek. ²⁰Aunmekbuk, akunum inibukop ura, Yesus ap, el mapu 12 nang ap, anyaik wekikce, bukuka din dinmek talak ara, Yesus arye ayupu nyabuk. ²¹“Na dipkoprop nyapsine. Na ap bukmapce, din dinmalum nang noutamak bukni, tonoknye birye, na opnamaniyaka ati, ninye yupu delilbinule,” Yesus arye nyabuk. ²²Nyabuk ura, sik fia bico ubukba, sik ikin kanye bobuka, Yesus ati tonok-tonok arye ayupu nyanmek. “Naio, na arye yukubkiniba, opnamkiyak do? Na ara, kume naio,” nyabuka tonok-tonok arye Yesus ati nyanmek.

²³Nyabuka asilenmekba, Yesus arye anang ati tamubuka nyabuk. “Na arye roti dobuka yangalin makau fum burubuka dinmap nang kan-kan, tonoknye birye na opnamaniyaka ati, ninye yupu delilbinamanile. ²⁴Allah yupu laka nyalamik nang, sik nabi-nabi nang arye, na ti sekamnik touk, na ara Ninye Mi Koprop Atonunye bira, malye nang arye opnikceba dipnamne. Sik Allah yupu laka nyalamik nang, nabi nang arye laka lyalamik touk, amutuku nang arye winipnamniyak bukni, na ara Ninye Mi Koprop Atonunye yupu delilbinamnilanye bira, elin, el li birye kum deiamtiringto ura, telebe. Bukni, el lin, el li birye anye deiamrika ati ara, yupu deiyaliba opnikcop ura, Allah arye delilbinamnilanye bitu weik arye wenebuka opnamle. Ati anye bira fia bicoe,” Yesus arye nyabuk. ²⁵Nyabuk ura, Yudas, ara Yesus yupu deipnamuknye birye, nyabuk. “Naie na arye yupu delilbikiniba opnamkiyak do?” Nyabukba, Yesus arye tamubuka nyabuk, “Diba, ance yupu deipniminye ura, opnamaniyake.”

²⁶Yesus ap, el mapu 12 nang ap, din dinmek bukni, nena kum roti dipnuyik talak ara, Yesus arye aroti dobuka, Allah ati, “Telebe” nyabukop ura, aroti tobuka, el mapu ati bokuka arinmokce, ayupu nyanmok. “Aroti ara, na nong atonun ulula ati dobuka diplulume,” nyanmok. ²⁷Aminyan ara, Yesus arye anggur mek kwebuka, mek makau tonok kintinipmok ning dobuka, Allah ati, “Telebe” nyabukop ura, el mapu nirya amakau tonok arye ‘Dipranin banuyak’ tenen, el mapu ati aribukce, ayupu nyabuk.

²⁸“Anggur mek aripnusina ara, na ining atonun ulula ati, dobuka diplulume. Aminyan na ining atonun nyapmasina ara, lak nyapnusine. Ara, Allah min arye nyalilamsuk touk, ‘Ninye weik arye lyepnirye

talinaṃne, tenelamuk touk, dipkoprop na opnikceba, na ining saknamle. Na ining saknamla ara, talya ati kume. Ara na ining deice, ninye mutuku-mutuku nirya, sik malye winilamikce ning ap, malye tenelamikce ning ap ati, kum daneipniba, Allah arye sik malye ning namin kiplirye, na ining deice arye ninye weike lyeplirye, sik kanye talima fia talinaṃle,” Yesus arye nyabuk.

²⁹Nyabukop ura, ayupu ton nyabuk. “Na dipkoprop nyapsine, winitalak arye deiyok koubuka, noutamak talak ap, doyanamle talak ap, anggur mek tonap fia kum dinamne bukni, Allah arye el wiamuk ninye lyeplirye, aninye ap, aning-aning nirya ap, talinaṃle talak akunum uplyop ura, nun nirya im deice wekeipyobirye, atalak aryuk, ila tonap anggur mek dipnamne.” Yesus arye nyabuk.

³⁰Yesus arye nyabukop ura, el ap, el mapu ap, sik nirya Allah yupu mot sebikce, alip aik Yerusalem mutuku sik bukmek aik batakuka, banmeka ani, Zaitun mutuku deice welebik.

**Yesus arye Peterus ati, “Ance na ati, ‘Anye bira, na walwale’ nyabuka, filipnamanilame,” nyabuk yupu
(Markus 14:27-31; Lukas 22:31-34)**

³¹Zaitun mutuku deice unmek talak ara, Yesus arye el mapu 12 nang ati nyabuk.

Anggunce na ti dib tenepmanulum bukni, ‘Malye nang arye opnamap’ tenen, tapu koubuka bobinikcop ura, anggun nirya arye, ‘Se ninye nirya lyebuka talinaṃlanye, Mesias bira, Yesus dipkoprop ulul do, kum do?’ tenen, kanye boktopsilirye, na batakuka bindopnamnulume. Allah yupu laka nyalamuknye, nabi Zakaria arye, ‘Winipnamake’ nyabuka sekamuk touk winipnamnuluma ati, elce sekamuk yupu nyapnusine. Zakaria arye nyalamuk domon yupu ara, ani.

‘Na Allah arye domba weina deiyoknye opnamne. Opnyop ura, el domba nirya buru sakuka bindopnamake.’ *(Zakaria 13:7)*

³²Zakaria birye nyalilamuk touk winipnamnulume. Bukni, na dipmanya ani, kam buknyop ura, na minopce Galilea tam binmaniba, anggun aminyan yanamlume. Yesus arye nyabuk.

³³Nyabuk ura, Peterus mikip arye tamubuka nyabuk. “Anang nirya ara an ti kanye boktopliba, batakuka bendopkitinga babye, na ara kanye bokoltona kumce, kum batakuka bindopnamkine,” nyabuk. ³⁴Nyabukop ura, Yesus arye Peterus ati tamubuka nyabuk. “Kao, dipkoprop nyapkine. Arup lukunyan ara, yim ayam min kum kamupmalye talak ara, an babye like winilye deice arye, na ti, ‘Anye bira, na walwale,’ nyabuka palibuka, bataknamanilame,” nyabuk. ³⁵Yesus arye nyabuk bukni, Peterus arye ila tamubuka mikip arye nyabuk. “Naie kume. An opkikirye, na ton opninga babye, na ara fia kum bataknamkine,” Peterus arye nyabuk.

Peterus arye ayupu nyabuk touk, Yesus el mapu 12 nang nirya babye, atonun nyanmek.

Yesus arye Getsemani mutuku Allah morobuk yupu
(*Markus 14:32-42; Lukas 22:42-46*)

³⁶Zaitun mutuku deice uk sik daunmekak uk bukni, mitik pera Getsemani mutuku biyikke, Yesus el mapu ati nyabuk. “Anggun abukmamunbuk, na yukak Allah morolbinune,” nyabuk. ³⁷Nyabukce, Peterus ap, Zebedeus el mapu bitinye, Yakobus ap, Yohanes ap, bobuka biyukke, ikin kanye bobukke, fia ilil ubukba, anang ati ayupu nyabuk. ³⁸“Na kanye talima ikin ubuka, fia ilil kanye bopmana ati, na kanye talima uk dimanilce, dipmanto upmane. Na talima uk fia dinmanila anya arye, na talima melildana ati, meneng dam asukum uk, mana kum, buna uk upnamalulume,” nyabuk.

³⁹Nyabukop ura, el mitikto karen kisikdakuka kanup donga biyukke, tuku ak lumlumuk dongobuka pulbiyuk. Lumlumuk dongobuka pulbiyukke, ‘Opnikiba dipnaman ning ara, Allah arye Iyepnutuop ura kum diptinye’ tenen, ikin ubukba, Allah moronmok. Allah moronmok talak ara, ayupu nyanmok. “Na nio, na opnamaniyak talak ikin upniliba, donmanya dipnaman ning ara, ‘Ance Iyepnutumba, aning kum winipnamniyak’ tenen, moronmakine. Bukni, na patanmanilba, tenepna arye moronmakina atonun kume. An min arye teneamnulum atonun winipnunilyame,” Yesus arye nyabuka moronmok.

⁴⁰Morobukop ura, el mapu winilye nang unmekak tamubuka biyukke, mana uk unmekba, eibuk. Eibukke, Simon Peterus ati ayupu nyabuk. “Simono anggunda mapmalum do? Anggunda kum winipmanto ati, tonok kiting mana kumce, na talima melina ati kum melipmanulum do? ⁴¹Peteruso, pirilden ning deice arye, anda malye upminyak ati ara, ‘Nada malye winipyak’ tenen, kanye moubuka dilamine, Allah morona uk unamalyame. An talima kanye ara, ‘Winiptinye,’ tenelyam bukni, an nong mikip kum ati ara, kum winiptume nyapkine,” Yesus arye Peterus biti nyabuk.

⁴²Nyabukce, ila tamubuka mitikto pera biyukke, min talak Allah moronmok touk, tonap moronmok. “Na Ni Allah, na ikin kanye upnil ning ara, ance ‘El kum obikcop ura, na tenelamse ning kum uptue,’ tenepniminyop ura, sik yu nang arye winipnamniyaka ara, dawinipninyake. Na arye patapnilaba, tenenman ninguk kume. An min arye tenelamnulum touk winipnunilyame,” nyabuka, Yesus arye Allah ati moronmok.

⁴³Morobukop ura, ila tamubuka el mapu winilye nang mapmekak yayuk. Sik wi fia weik unмокba, mana uk unmek. ⁴⁴Winipmekba eibukke, anang asukum uk batakuka, Yesus ara, mitikto karen like

winilye ning binabuka ani, min talak moronmok touk, Allah morobuk. Morobuk ura tamubuka yayukce, el mapu mapmekak eibuk. ⁴⁵Eibukop ura, el mapu ati nyabuk. “Anggun tuba mana uk unmalum do? Akunuma. Yu nang arye, na dobuka bobinuniyak talak akunum uple. Dipdelulume, na ara Ninye Mi Koprop Atonunye bira, na ona ati, ninye akunum yupu delilbinmala anya arye, elce inibuka yu nang aripnunile. ⁴⁶Ati ara, anggun buklulume, nun binuyabe. Na damkinanye akunum yanganmale” Yesus arye nyabuk.

Yesus ona ati, el nong bobuka bobiyik yupu
(Markus 14:43-50; Lukas 22:47-53)

⁴⁷Yesus ayupu tuba nyanmok talak ara, Yesus el mapu kan-kan bukni, tonoknye el si Yudas arye Yesus dam tikilyayuk. El menekuka yangayukba, el aminyan tam ninye weik bulubuka yayik. Ayayik nang ara, Yahudi yala nang sik deiyok nang, wisi nang ap, Allah arina ati el si erena aik fum fil dona deiyok nang ap, Musa sekamuk yupu peterena deiyok nang ap arye, yupu nyapdeipmeka ati, parang ya ap, ninye on kama ap, anirya bobuka, ‘Yesus tapu koubuka bobinuyap’ tenen, yayik. ⁴⁸Ura, Yesus damkinanye birye, Yahudi yala deiyok nang ati nyabuk yupu ara ani. Yudas arye nyabuk. “Na tenebuka mutupnamnanye bira, ara Yesus el uka. Anye bira, taruk talipmunce, tapu koubuka ninye weik arye melibuka bobinululume,” nyapdeibuk. ⁴⁹Yudas birye ayupu nyapdeipnuyuka ati, adip aryuk Yesus dam yayukce, “Na nie, na peterena deiyoknye,” nyabuka Yesus mutubuk.

⁵⁰Mutubukba, Yesus arye nyabuk. “Kao ance, ‘Anye biti winipnune,’ tenepnulum ning ara, dawinipnilyame,” nyabuk. Nyabuk ura, ayanmek nang mikip arye Yesus talibik. ⁵¹Talibik ura, amining dam tikmoknye tonoknye birye, el ya lin aling fum arye, ya kubdakuka, Allah ati arina weik deiyoknye,^s el amutam fil donanye tonok, el amol takwetebuk. ⁵²Winibukop ura, Yesus arye aya bopmoknye biti nyabuk.

“An parang ya ara, ila tamubuka liplyame. Ya bopmace nang ara, ya arye obikiba dipnamake. ⁵³Winina bataklyame. Anda bita kum bikmalam do? Na ni ati moroptinyop ura, adip aryuk el im deice fil don nang, malaikat yupa fia weike 12 pasukan^t dopdeipnutuba, lyepninge. ⁵⁴Bukni, na moropniba, na ni birye malaikat dopdeipniliba, sikce lyepnikcop ura, sik Allah yupu laka nyalamik nang, nabi nang arye nyalamik yupu atonun kum winiptue. Bukni, sik nabi nang arye laka lyalamik touk winipnuniyaka ati, na arye na ni biti kum moronune.” Yesus arye nyabuk.

^s 26:51 Allah ati arina deiyok nang, sik weik deiyoknye ati, laka nyana yupu nomor 14 dindelelume. ^t 26:53 Pasukan nyanyaka, ara yupa weik yin talin nang beribu-ribuan ati nyanyaka anya arye, yupa weik 12 ribu (12.000) malaikat ati nyabuk.

⁵⁵ Ayupu nyabukop ura, Yesus arye el tongolyanmek nang ati nyabuk. “Anango, ‘Amutuku talibik nang opbisipnamla ati, el deiyok koubuka el mapu bobinmala,’ tenepmanulmce parang ya ap, ninye on kama ap, bobuka tomolyanulum do? Atalak-atalak nirya, Allah ati arelulum aik dam tikuka peterenmasiba, anggunce kum tomopnulume. ⁵⁶ Bukni, Allah arye nyalilamukba, Allah yupu sekamik nang, nabi nang arye sekeiyamnik touk winipnula ati, anggun tenepmalum touk winipnululume.” Yesus arye el tongolyanmek nang ati nyabuk. Nyabukop ura, Yesus el mapu nirya ara, ilil weik ubukba, sikce Yesus asukum uk batakuka, bai bukuka biyik.

Yahudi yala nang, sik yupu lipsisikuka bokolilamik nang dam, Yesus dobuka bobiyik yupu

(Markus 14:53-65; Yohanes 18:12-13, 19-24)

⁵⁷ Yesus talibuka tongobik nang arye, Allah arina ati, weik deiyoknye, el si ara Kayapas, ‘El aik bobinuyap’ tenen, Yesus bobuka Getsemani mutuku arye, Kayapas el aik bobiyik. Bobiyik talak ara, Yahudi yala nang, sik deiyok nang, wisi nang ap, Allah arina ati deiyok nang ap, Musa sekamuk yupu peterena deiyok nang ap, ‘Yesus ati yupu lipsisikuka bokeibibirye, wenepnamap’ tenen, akunum bulubuka yanmeka ati ara, sik babye anyaik unmek. ⁵⁸ Yesus menekuka bobanmekba, Peterus ara, aminyan yanganmoka ani, Allah arina ati weik deiyoknye, Kayapas, el aik dam yayukce, yin talin nang uku sekuka pekinmekak yanuka bukuk. Bukukce, ‘Sikce Yesus ati yata wiripnuyak do?’ tenen, dinmokce el babye uku pekinmok.

⁵⁹ Yupu lipsisikuka bokolina deiyok nang, Sandeheren nyalamik nanguk bukni, noutamak bokuka, Allah arina ati deiyok nang nirya ap, anang nirya arye, min arye, ‘Yesus opnamabe’ tenelamika ati, atalak babye, aning uk tuba tenenmek. Sikda, yuk nang arye, “Yesus el malye winilye ning ara ani, ani,” nyabuka minina yupu arye nyaptingba, kekeptibye ura, ‘Ayupu deice arye Yesus optibye’ tenen, teninmek. ⁶⁰ Utenenmekba, yuk talya wekmek nang weik arye minina yupu nyanmekba, ‘Opnamtibye ning deiyok yupu dan ning do?’ tenen, kekelenmek. Kekelenmek bukni, ninye opmanto deiyok yupu ara kum nyapdeipmeka ak, kum kekebik. Ninye opmanto yupu kum kekepmeka ati, ‘Se, yata wirin deice arye Yesus optibye do?’ tenebik.

⁶¹ Ninye yuk-yuk weik arye talya yupu uk nyanmeka ani, aminyan ara, yuk nang bitinye nang arye tikuka, el Yesus ati aminina yupu nyaprik. “Yesus arye ayupu nyabukba kekebupa ara ani. Yesus arye nyapsuke. ‘Allah arina ati, ninye taruk arye domikba, Allah ati kam ning obuka arilbalulum aik ara, na arye ulupnirye, like winilye sum akunum upyop ura, ila tamubuka anyaik uk lipsisikuka dopnamne,’ Yesus arye ayupu nyabukba kekebupe,” nyaprik.

⁶²Nyaprikba, Allah arina ati, weik deiyoknye Kayapas, awekmek nang sik urasinak tikukabukce, Yesus ati ayupu nyabuka asipdeyuk. “Anang arye nyapmakirak yupu ara dan do? Ance tamubuka yupu ton nyapnulam do, kum do?” nyabuka asipdeyuk. ⁶³Asipdeyuk bukni, Yesus ara yupu tonap tamubuka kum nyabukce, tunimabuk. Winibukop ura, ila tonap Allah arina ati, aweik deiyoknye, Kayapas birye, Yesus ati asipdeyuk. “Allah arye dinmasilak unmalama ati, talya yupu nyana kum, dipkoprop ninguk nyapnusalame. ‘Ninye weik lyeplirye, sik kanye talima talinamle’ tenen, Allah arye wipdeiyamuknye, Mesias bira, an aulyam do? Tonda, Fia Teleb Etekopnye Allah ara, anuk el Mi Koprop ulyam do?” nyabuka asipdeyuk. ⁶⁴Asipdeyukbuk, Yesus arye tamubuka nyabuk. “Diba, ance nyapmanilam touk na aunune. Ara na uka. Bukni, na dipkoprop nyapsine. Aminyan talak ara, na ara Ninye Mi Koprop Atonunye, Allah el Fia Mikipnye birye ereipniliba, el sirik taruk tam bukniiba eipnamnulume. Eipnamnulume talak ara, im deice arye dua kan-kan koluka yanamne talak eipnamnulume.”

⁶⁵Yesus arye ayupu nyabukop ura, Allah arina ati, aweik deiyoknye birye, Yesus nyapmok yupu kekebukce, ayupu ati yu weik ubukba, el butum aling kwiliklobukce ayupu nyabuk. “Yuk nang arye tonap nyapnuyak yupu ara, nun patana kume. Yesus ayupu nyapmala deice arye, Allah ati akunum yanimalce, malye yupu nyapmala anya arye, el wenena ati, yata wiribuka wenepnamap do? Anggun awekmalum nang babye, el yupu nyapmala ara, akunum kekepmalume. ⁶⁶Ati, el wenena ara, yata wiripnamap do? Anggun bukmalum nang ara yata tenepmalum do?” nyabuk. Nyabuk ura, ayupu lipsisikuka bokolina deiyok nang, Sandeheren nang nirya arye, “Akunum, Yesus arye ayupu anyapmala ara, fia malye nyapmala ati, adeice arye optibye,” nyabik.

⁶⁷Nyabikop ura, ton nang arye Yesus nong deice si maka tululinmek. Ton nang arye Yesus el asing, butum aling arye pakubuka kitibikce, anang nirya arye taruk kitibuka, Yesus el nong deice bokuka onmek talak arye ayupu nyanmek. ⁶⁸“Yuk nang arye, ‘Allah yupu laka nyananye ulule,’ nyakinyake. Tonda, ‘Ninye weik lyeplirye sik kanye talima talinamlanye Kristus ulule,’ nyakinyaka anya arye, aopmakilanye bira el si laka nyapsilyame,” nyabuka, Yesus ati asinmekce, nalinmek.

Peterus birye, “Anye Yesus ara, na walwale,” nyabuka filibuk yupu
(Markus 14:66-72; Lukas 22:55-62; Yohanes 18:16-18, 25-27)

⁶⁹Sik anang nirya arye wininmek talak ara, Peterus anyaik dam asukum uk unmok. Ara, Yahudi yala nang Allah arina ati, sik weik deiyoknye Kayapas, el aik dam Peterus unmok. Allah arina deiyoknye, Kayapas, el aik fil don ati melin kil tonok Peterus unmokak yayuk. Peterus uku pekinmokba, akil yayukce, Peterus el urasin uk eibuk ati

bita dilenmok. Bita dilenmoka ani, 'Anye bira, Yesus el melinanye, akunuma,' tenebukce ayupu nyabuk. "An ap, aGalilea tamnye ap, neika ulamrurume," nyabuk. ⁷⁰Nyabuk ura, Peterus arye tamubuka akil ap, awekmek nang ap, sik nirya ati nyabuk. "Anyapmanilam ning ara, deiyok yata ati nyapmanilam do? Na kum tenepmane. Anyapmanilamnye bira, na walwale," nyabuka filibuk.

⁷¹Nyabuka filibukce, anyaik denebuka wiyamik poka buplan dam tikilbiyuk. Abinuka tikabukba, yuk melin kil eibukce, awekmek nang ati ayupu nyabuk. "Anye bira, Nasaretnye Yesus ap, melibuka ulamik nang ara, tonoknye ton atikmale," nyabuk. ⁷²Nyabukba, Peterus ayupu kekebukce, yu ubukba, "Anye bira, na walwale," nyabukce, fia malye yupu ap tabakuka nyabukce filibuk. ⁷³Pilibukba, sik nirya daunmeka ani, Peterus ap tikmek nang arye, Peterus ati, ila tonap nyabik. "Anda, Galilea tam unyak ninnye arye yupu nyalamaka atonun, an babye atonun nyalyamnye ati, anye Yesus ara el melibuka balamlum nang ara, an ton aunmalame," nyabik.

⁷⁴Nyabikba, Peterus yupu mikip arye tonap nyabuk. "Anyapmanulumnye bira, dipkoprop fia na walwale. Na nyapmasin yupu ara tilila nyapsitinyeto ura, Allah arye wenebuka opnutue," nyabuka yupu weiktonun arye nyanmok. Ayupu nyabuk talak aryuk, yim ayam ngalukuk.

⁷⁵Yim ayam arye ngalukukop ura, adip aryuk, Yesus arye Peterus ati min talak nyapmok yupu ara, Peterus ila tonap tenebuk. Tenebukce, "Se, Yesus arye, 'Yim ayam like bitinye kum kamupmalye talak, anye bira na walwale,' nyabuka, like winilye deice arye filipnamanilame," nyapmanu touk, 'Na akunum winipne,' tenebuk. Utenebukce, el kanye talima fia ikin ubukba, anang asukum uk batakuka, bai tam biyukce, weik arye engenmok.

Yudas opdayuk yupu

27 ¹Yahudi yala nang Allah arina ati, weik deiyok nang ap, Musa sekamuk yupu peterena deiyok nang ap, Yahudi yala nang, yuk deiyok nang wisi nang ap, alukunyan noutam nirya ara, sik yupu weik arye talinmek. Anang nirya yupu weik talinmekop ura, 'Yesus ara opnamabe. Ara winipnamabe,' tenebuka yupu talipmek. ²Akunum tenebikop ura, sikce nyapdeibikba, sik yin talin nang arye Yesus tapu koubuka, Yudea tam talyamuknye, 'Gubernur Pilatus arye yupu lipsisikuka bokeipnul' tenen, bobinuka aribik. ³Sik Yahudi yala deiyok nang arye, 'Yesus akunum opnamabe,' tenebikce nyapmekop ura, Yudas ninnye lake yupu delilbinmoknye bikukce, 'Se, Yesus ati ninnye yupu nyana batakmatinye, na malye winipmane' tenen, malye kanye bobuk. Malye kanye bobukce, sik aripmek keil uang 30 dobuka, sik Allah arina ati

deiyok nang ap, yuk Yahudi yala deiyok nang ap, sik dam uk tamubuka bobiyuk.

⁴Sik anang dam biyukce ayupu nyabuk. “Se, na ni yapu, ‘Anye bira opnamlum’ tenen, yupu nyalyanmasinye bira, dipkoprop malye ning tonok babye kum winilule. Ati minina yupu nyapsirye, na dipkoprop malye winipse,” nyabuk.

Nyabuk ura, sik anang arye tamubuka nyabik, “Anyapmasilam ning ara, nyana kume, dawaplye. Nun kum tenepnuyabe. Amalye winiplum ning ara, deiyok ara an uka,” nyabik. ⁵Nyabikop ura, Yudas malye kanye bobukce, akeil uang 30 bopmoka ara, Allah arilbalamik aik amsuna deice mikip arye dopouklobuk. Dobuka pouklobukce, anyaik fum arye batakuka, buru tam biyuk. Yo tikamukak deiyok dam binuka, tapu yo taruk kirikukce, el nong atapu arye, erebuka biribukce youpdanuka opdayuk.

⁶Yudas anyaik batakuka binmok talak ara, elce pouklobuk keil uang bulubuka dobukabikke, ayupu nyabik. “Akeil uang ara, ninye on keil uang ati, ‘Musa sekamuk yupu yanibibiyak’ tenen, Allah ati kum ariptybye. Aning ara kum winiptybye,” nyabik. ⁷Utenebuka nyabikop ura, ‘Ninye asik nang, yuk mutuku arye nun mutuku yakirye dibikcop ura, sik nong weinamabak ati, akeil uang bobuka, tuku deknuyabe,’ tenebikke, tuku dekik. ⁸Winilamika ati, aninye arye, “Atuku ara ninye ining tuku,” lyalamik touk, winitalak ababye ayupu tuba nyanyake. ⁹⁻¹⁰Aning nirya winilamika deice arye, Allah yupu laka nyalamuknye, nabi Yeremia arye, “Winipnamake,” nyabuka nyalilamuk touk winibik. Yeremia arye nyalamuk yupu ara ani,

‘Israel ninye arye ninye yupu nyabuka, opnamika ati, keil uang 30 aribik ning ara bobuka, ninye asik nang weinak ati, tuku dekik. Awinibik ning ara, Allah arye ‘Winipnamake,’ teneamuk touk winibik.’

(Yeremia 32:6-9)

Yeremia arye nyabuka sekamuk.

Yesus bobuka Pilatus dam bobiyik ati, yupu talipmek yupu
(Markus 15:2-15; Lukas 23:2-3, 18-25)

¹¹Yesus bobuka, amutuku nirya talyamuk deiyoknye Gubernur Pilatus el dam bobinuka aribik ura, Pilatus arye Yesus ati asipdeyuk. “Yahudi yala nang sik weik deiyoknye Raja atonun nyanyaknye bira, an akunum do?” nyabuka asipdeyuk. Asipdeyukbuk, Yesus arye tamubuka nyabuk. “Diba anyapmalam touk unune,” nyabuk.

¹²Nyabuk ura, Allah arina ati deiyok nang ap, sik Yahudi yala nang, yuk deiyok nang, wisi nang nirya ap arye, ‘Pilatus kekeplirye, diba tenepnamal’ tenen, “Yesus el malye ulye ning ara, ani, ani,” nyabuka weik arye nyanmek. Nyanmek bukni, Yesus arye tamubuka yupu nyana

kumce, talye tunimana uk ubuk. ¹³Sik weik arye nyanmek ura, Yesus tunimapmok ati ara, Pilatus arye ila tonap, Yesus ati asipdeyuk. “Anang arye, ‘El malye ulye ning, ani, anye,’ nyabuka weik arye nyanamaka ara, kum kekenamlam do? Nyanamaka anye arye, an bidamnye sik yupu kum seknulam do? Yata deiyok ati, talye tunimabuka tikmalam do?” nyabuka asipdeyuk.

¹⁴Asipdeyuk bukni, Yesus arye, sik nyanmek yupu tonok ning ati ara, yupu tamubuka kum nyamok ati, Pilatus arye, ‘Se, el ilil kum upmala ara, yata kanye bopmala arye do?’ tenebukce, ngalukuk.

¹⁵Ura, Yahudi yala nang, kiting tamun nirya winilamik ning ara ani. Kaplina ati Kwalina talak noutamak ara, wenen asik dongolamik nang kan-kan bukni, ninye nirya arye, “Anye bira, loplulume,” nyapnanye demuk, Gubernur Pilatus arye, tonoknye wibuka lolilamuk. ¹⁶Okiting tamun deice yuk nang arye, ‘Nun mutuku talyamsik nang, Roma nang opnamap’ tenen, olamik talak ara, ninye tonok, el si ara Barabas, elce ninye ton omuk. Ninye omuka ati, wenen aik dongamikba, wenen aik tuba unmok. ¹⁷Kiting tamun nirya Kaplina Kwalina talak arye, ninye tonok lolilamuk anye arye, ninye weik arye, Pilatus dam bulubuka yayik ura, Pilatus arye abulupmek nang ati asipdeyuk. “Tonoknye lopdeipnusina ara, Barabas lopdeipnun do? ‘Ninye weik lyeplirye talinamle,’ nyanyaknye, Kristus” nyanyaknye bira, Yesus lopdeipnun do, kum do?” nyabuka asipdeyuk.

¹⁸Ura, Pilatus arye ayupu nyabuk deiyok ara, ani. Ara Allah ati arina deiyok nang, ‘Sik yuk ninye arye Yesus el yupu kekebuka dobolbakirye, nun tam bataksikcak, anye arye Yesus ara nun like,’ tenelamikce, Yesus ati kanye talima erebuka wililalamik. Yesus ati sik talima wililalamik ning ara, Pilatus akunum kel bikamuka anye arye, ‘Anang arye, Yesus akunum opdeipsilyame, nyapmanika ara, deiyok anye,’ tenebukce, “Yesus opdeipsilyame,” nyabuka, el dam morolyanmek nang ati, Pilatus arye asipdeyuk. “Yahudi yala nang, anggun weik deiyoknye, Mesias nyanyaknye bira, ‘Yesus lopdeipsutu’ tenen, patanmasil ati, moropmanulum do, ‘Barabas lopdeipsutue’ tenen ati, nyanmanulum do?” nyabuka asipdeyuk.

¹⁹Pilatus arye, ‘Yesus yupu lipsisikuka bokeipnun’ tenen, ninye yupu lipsisikuka bokolinanye bunak deice bukmokak, el kil arye yupu nyapdeibuk ura, yuknye birye ayupu nyalyayuk. “Kao, anye Yesus ati ara, ninye yupu bokuka kum wenepnulyame. Na lengdar mapmanu deice

^u 27:17 *Kristus* – Ninye Lyena Deiyoknye biti, Yunani yupu nyanyak ninye arye, Kristus nyanyake. Ibrani yupu nyanyak ninye arye, Mesias nyanyake. Ati, ton ayat noutamak ara Kristus nyabik. Ton ayat noutamak ara Mesias nyabik. El si ara bitinye ulul bukni, anye tonokuka, ara Yesus atia.

arye fia ikin upmanila ati, anye bira el malye ning ton dipkoprop kum ubuka anya arye, batakana uk upnulyame. Tonap el ti yupu talibuka kum bokeipnulyame,” nyabuk.

²⁰Nyabuk bukni, sik Allah arina ati deiyok nang ap, Yahudi yala sik deiyok nang, wisi nang ap arye, “Nyapnulyame, nyapnulyame,” nyabuka yupu nyalinmek ati, sik talye bulubuka wekmek ninye arye kekenmek. Nyalinmek yupu ara ani. “Barabas ara lobuka aripsimince, Yesus uk ara opdeipnamsulume,” nyabuka nyalinmek ati, awekmekce talye kekenmek ninye nirya arye, Pilatus ati ayupu uk nyapdeibik. ²¹Sik ayupu nyalilanmek talak ara, Gubernur Pilatus arye awekmek ninye nirya ati, asipdeyuk. “Abitinye nang ara, yatanye bak lobuka aripnusin do?” nyabuka asipdeyuk. Asipdeyukbuk, “Barabas uk lobuka aripsilyame,” nyabik.

²²Nyanmekbuk, Pilatus arye tamubuka nyabuk. “Aning ati ara, anggunc Ninye Lyena Deiyoknye, Kristus nyanyaknye Yesus ara, na adip aryuk yata wiripnun do?” nyabuka asipdeyuk. Nyabukop ura, sik awekmek ninye nirya arye, weik yupu erebuka nyanmek. “Ance nyapminba, wanwanun yo deice deibuka opnuyake,” nyabuka weik yupu arye nyanmek. ²³Nyanmekbuk, Pilatus arye tamubuka nyabuk. “Deiyok ara yata ning deiyok ati, anye opnuyak do? Nun amutuku talinyap nang arye, ‘Wininamlulume,’ nyanyap ning, dan ning yanisulula ati, ‘Deiyok anye,’ nyaptiniba, yin talin nang arye opnuyak do?” nyabuk. Pilatus arye nyabuk bukni, sik awekmek ninye nirya arye, ila tamubuka tonap weik yupu arye nyanmek. “Ance nyapmin ura, wanwanun yo deice deibuka opnuyake,” nyanmek.

²⁴Sik yupu weik arye weik nyanmeka ati, Pilatus arye, ‘Na yupu nyaptinya babye, kum kekepnuniyake. Na yupu tonap nyapnyop ura, yu upliba, deiyok koulakirye, opdakcak ati, daupmalye,’ tenebuk. Utenebukce, ‘Anye el ining na taruk deice kum upnamnile tenepnamniyak,’ tenebukce, sik anang dinmekak aryuk, Pilatus el taruk mek likuk. El taruk mek likuk talak ara, ayupu nyabuk. “Anye bira, malye ning kum winibuknye anya arye, el ining ara na taruk deice kum saknamnile. Anggun yuk nang arye opnamluma ara, anggun deiyok uka,” nyabuk.

²⁵Nyabukop ura, sik awekmek ninye nirya weik arye ayupu nyabik. “Aning ara telebuka. Nun taruk deice ap, nun mapu sik taruk deice ap, anye el ining upsutua ababye teleb atia,” nyabuka weik arye ayupu nyabik. ²⁶Aning ati ara, Pilatus arye Barabas lopdongobukba, talye biyuk. Barabas ara talye biyuk bukni, Yesus uk ara, Pilatus arye el yin talin nang ati nyapdeibukba, Yesus bobuka ninye on ning” arye kulabuka

v 27:26 *ninye on ning* – Sik atalak ulamik nang arye, ‘Ninye opnuyap’ tenen, winilamik ning ara ani. Sapi bola kobuka deiamnabuk, akunum kel-kel apnop ura, selebukapna arye urup tam ara, besi ning tace ning arye potokuka deiamna arye, ninye nong bol deice kulanmanba, abesi ning tace arye ninye nong bol tup anirya lyiklamok.

onmek. Yesus onmeka ani, ‘Yuk nang arye, Yesus bobuka wanwanun yo deice delilbinuyak’ tenen, aribik.

Yin talin nang arye Yesus ati nalinmek yupu
(*Markus 15:16-20*)

²⁷Gubernur Pilatus, el yin talin nang arye Yesus bobuka, Pilatus el weik aik fum bobiyik. Anyaik ara, ninye yupu talibuka bokolilamik aik atia. Yesus dobuka bobiyika ara, ‘Nun neika yin talinyap nang nirya yanuyak’ tenen, yukubik ati, nirya bulubuka yayik. Yayikce, Yesus noutamak deibikbuk bukmokop ura, sik dana-dana tam nirya yanuka wekik. ²⁸Sik yayikop ura, ‘Yesus nalibuka akutunuyap’ tenena ati, Yesus el ongopmok butum aling kwiribukabikce, atalak ara weik ninye deiyok nang dekna weik ining bi butum aling ongolamaka atonun, Yesus el nong deice abutum aling ongopdeibik.

²⁹Winibikce, tace weik ning kwanibukabikce, Yesus el kisok deice parikeibik. Tonda, ‘Weik ninye deiyok nang teleb kama talibuka balamak touk winipnul’ tenen, talye kama yo aribik ura, el urasin tam gutam tuku dipdongobuka, Yesus el nalibuka akutuna ati, ayupu weik arye nyanmek.

“Naie, Telebe. Yahudi yala nang, sik weik ninye deiyoknye ulyama anya arye, nunce si erekinyabe,” nyabuka nalinmek. ³⁰Nalinmek talak ara, ayo kama arepmek ning uk, ayo dobukabikce, el kisok deice molokona uk unmek. Molokona uk unmekce, el nong deice si maka tululinmek. ³¹Atalak nirya wininmeka ani, Yesus ati weik arye nalibuka akutunmekop ura, el nong deice arup ongobuka deipmek ining bi butum aling ara, ila tuba kwiribukabikce, el bidamnye butum aling ara, ila tuba ongopdeibik. Winibikce, ‘Wanwan yo deice deibuka opnuyp’ tenen, Yesus bobuka buru tam bobiyik.

Yesus wanwanun yo deice obik yupu
(*Markus 15:22-32; Lukas 23:33-43; Yohanes 19:17-24*)

³²Yesus wanwanun yo deice deipmeka ati, bisik banmek talak ara, tonoknye, yuk mutuku Kirene mutukunye, el si Simon bura unmoka ani, bisik noutamak yangayuk bukni, epdayik. Yin talin nang arye Yesus bobanmekbuk, Simon ap epdayikop ura, Yesus el wanwanun yo ikin ati, yin talin nang arye yupu mikip arye nyabik. “An adip aryuk awanwan yo takubuka bilyame,” nyapdeibik ura, Simon arye ayo takubuka biyuk. ³³Simon arye awanwan yo takubuka banmokbuk, bisik banmeka ani, mutuku si Golgota mutuku biyik. Sik yupu deice arye, Golgota” nyalamik yupu deiyok ara, ninye kisok yok atia. ³⁴Golgota mutuku deice biyikop

^w 27:33 *Golgota* nyalamik ning ara, amutuku urasin ara, ninye kisok yok atonun wamuk mutuku ati, sik yupu deice arye, amutuku si ati Golgota nyalamik.

ura, Yesus wanwanun yo deice deipnuyika ati, anggur mek, kanye wangalamak ning ap, ‘Uk diplyak’ tenen, sekeldongon obat si ara mur ap, tabakuka kintinibikke, Yesus ati arepdeyik bukni, Yesus mangkau kanye bobuka dipdeyukce, kel kibukce, ‘Uk dadipnulule’ tenen, amek kum dibuk.

³⁵ Kum dibukop ura, wanwanun yo tuku deice deibukabikke, Yesus el nong ayo deice alibuka deibikke, taruk dana-dana ap, yan tonok ak ansinibuka deibikke paku dakik. Winibikop ura, Yesus el nong wanwanun yo deice deipmek yo ara, erebuka tuku palipmeka fumbisik erebuka dopkwetebik. Winibikop ura, Yesus el ongolamuk butum aling kwiriplopmeka ara, ‘Yatanye doproprnamle do?’ tenen, sik arikal dona deice arye, el si undi^x arikal dopdabirye, Yesus el butum aling bokuka doprobik.^y ³⁶ Winibikop ura, Yesus el wanwanun yo dam anyaka uk bukmeke, kalikuka dinmek. ³⁷ Ninye arye, “Yesus el malye nyalye ning ara ani,” nyalamik ning ara, yo lakase deice surat sekuka deibikke, Yesus el kisok deice tam deibik. Ayo lakase deice surat sekik yupu ara, atia. ‘Yesus ara, Yahudi yala nang sik weik ninye deiyoknye, Raja ulule,’ nyabuka sekeipmek.

³⁸ Yesus wanwanun yo deice deipmeka dam ara, ubula dolamrik nang bitinye, tonye Yesus el sirik tam, tonye Yesus el kwanim tam, wanwanun yo deice dana-dana deibik. ³⁹ Yesus wanwanun yo deice deipmek bisik banmek nang arye, Yesus ati malye yupu nyanmekce, ‘Merekuka opmake’ tenen, taruk tapne bolokuka kaisunmek. ⁴⁰ Kai sunmekce ayupu nyanmek. “Ura, akunum wenebuka opmakiyak atia. Ance nyaplume. ‘Allah ati arilbalamikirye, Allah el si erenyak aik ara, na arye uluplopmanya ani, like winilye akunum upyop ura, yuk ning ton lipsisikuka^z dopnamne.’ Ance ayupu nyapluma ati, winitalak wanwanun yo deice lyepdamince, tukwak saklyame. Anda dipkoprop Allah el Mi Kopropla ulaminyop ura, tukwak sakminyeba kum opnukile,” nyabuka weik yupu nyanmekce, nalinmek.

⁴¹ Atalye banmek nang nyanmek touk, Allah ati arina deiyok nang ap, Musa sekamuk yupu peterena deiyok nang ap, sik Yahudi yala nang, deiyok nang, wisi nang ap, anang nirya arye sik babye Yesus ati, nalibuka akutunmek. ⁴² Sik nyanmek yupu ara ani. “Yesus arye yuk nang ati melibuka lyelamuk bukni, elce el bidamnye ati kum lyepdatue.

^x **27:35a** *Undi* arikal dolamak ning ara ani. Mitik yo tinggul dobukabikke, ninye si ayo deice sekuka kintinibuka deibikke, ayo nirya tuku deice deiplobikba, ninye si laka ubuknye birye menang kibuk. ^y **27:35b** *el butum aling bokuka doprobik* – Yesus el butum aling bokuka doprobik ning, ara nabi nang arye Mazmur 22:18 nyalilamik touk winibik. ^z **27:40** *yuk ning ton lipsisikuka dopnamne* – Yesus arye ayupu nyabuk ning, ara el ti obikiba, dipmoka ani, kam buknamuka ati nyabuk bukni, anang arye aning moubuka kum kel bikik.

Elda Yahudi yala nang, nun weik ninye deiyoknye Raja Israel, ulamtuto ura, wanwanun yo deice arye tukwak kouluktuba eiptibye ura, el ti diba teneptibye. ⁴³Anye bira, ‘Na ara Allah el Mi Koprop unune,’ nyalamuka ati, ‘Allah elcuk melinulul’ tenen, ululnye anya arye, Allah arye anye pataptop ura, atalak aryuk Allah arye lyepmimitue,” nyabuka nalinmek. ⁴⁴Sik anang nirya nalinmek touk, Yesus noutamak dana-dana tam wanwanun yo deice deipmek nang, malye ulamrik nang ara, sik bitinye arye, Yesus ati malye yupu weik arye nyanmarik.

Yesus dibuk yupu

(Markus 15:33-41; Lukas 23:44-49)

⁴⁵Inina tonok kiting deice arye, Yesus wanwanun yo deice deipmek ura, daunmoka ani, kiting dukduk jam 12 siang ara inibukba, amutuku nirya adip aryuk inibukce kuna dakuk. ⁴⁶Inibukce kunadakmoka ani, kiting winilye ton akunum ubuk ura, sintam jam 3 sore atonun, Yesus weik yupu arye nyabuka ngalukuk. El yupu deice arye nyabuk ning ara atia.

‘Eloi, Eloi lama sabaktani.” Yesus arye nyabuk. Anyabuk yupu deiyok ara ani. Ara, “Na Ni Allah, na Ni Allah yata ati batakuka lubakipmanilam do?” nyabuka ngalukuk.’ (Mazmur 22:1)

⁴⁷Ayupu nyanmok talak ara, amining dam tikmek nang noutamak, ton nang kekebekce, walwal arye nyabik. “E, anggun kekeplulume. Yesus arye nabi Elia, el si sisibuka yukupmale,” nyabik. (Yesus “Eloi, Eloi,” nyapmok yupu ara, bita moubuka kum kekepmeka ati, ayupu nyabik.)

⁴⁸Yesus ayupu nyabuk ura, adip aryuk tonoknye bik-bik abuka biyukce, mek tulongon ning, kama arye lumubuka, anggur mek yu ning, ‘Yesus dipnul’ tenen, mek burubuka, Yesus si bam bol dam arebuk. ⁴⁹Arebuk ura, sik yuk aunmek nang arye ayupu nyabik. “Aning-aning winina kum dauplye. Allah yupu laka nyalamuknye, ‘Nabi Elia arye wanwanun yo deice arye, Yesus ati lyebuka doproprnul do?’ tenen, dina uk unuyabe,” nyabik. ⁵⁰Winibik ura, Yesus weik arye ngalukuka, malye nyabukce, adip aryuk dibuk.

⁵¹Yesus dibukop ura, adip aryuk Allah arilbalamik aik noutamak, wilibuka lalkwetelamik butum aling ara, el yuk aryuk, itam arye kwilikuka dana-dana kibukce bitinye kibuk.^a Atalak aryuk amutuku nirya weik arye lokukce, keil

^a 27:51 *butum aling kwilikuk bitinye kibuk* – Allah ati arilbalamik aik fumbisik ara aik yuk-yuk wilibuka domik. Weik mambul aik, el si Fia Teleb Aik ara, Allah arin nang, sik weik deiyoknye elcuk anyaik weknamtue. Anyaik lelilongona ati, cang butum aling dobukabikke, lapkwetcamikba, ‘Allah ara anyaik noutamak ulule,’ tenelamika ati, anyaik yuk talye nang fia binmanto kum ulamik. Bukni, Yesus dibukop ura, anyaik bitinye wilina ati, lapkwecamik butum aling ara kwilikuka binye kibuk. Deiyok ara, ‘Winitalak ara, Yesus dibuka deice arye, ninye nirya arye, Allah el dam yangana ara telebuka’ tenen, ninye kel biknamaka ati, Allah arye abutum aling kweliklobuk.

bulamuka nirya bongabuka dibuk. ⁵²Tonda, ninye diksukum ulamna ani, dipneba weilamik keil deiya, buplan tirikilongolamik keil ara, paksakuk ura, min arye akunum diamik nang weik bukni, kam bukuka yanganmekak yuk ninye amutuku unmekce eibik. ⁵³Keil deiya fumbisik weiamikak arye, min arye akunum diamik nang kam bukuka yanuka daunmek bukni, Yesus kam bukuk talak ara, anang arye Yerusalem mutuku asik dolamika noutamak banmekba, amutuku ulamik ninye weik arye sik kam bukuka banmek nang eilimiek.

⁵⁴Yesus weik arye ngalukukce, el dipmok talak ining mek lokuk ning ap, ton asum winibuk ning yuk ning nirya winibukba, yuk nang ton eibik. Tonda, tonoknye, yin talin nang yupa weik, 100 nang talyamuknye, Yesus wanwanun yo deipmeka deice tam tikuka dinmoka anya arye, el ap neika unmek ninye ap, sik nirya eibikce, ilil weik ubuk ati, ayupu nyabik. “Se, anye bira, dipkoprop Allah el Mi Koprop ulamuke,” nyabik.

⁵⁵Yesus wanwanun yo deice opmek talak ara, kilapu ton mitikto pera arye dinmek. Akilapu ara, ‘Yesus el patalye ning nun melipnamap’ tenen, Galilea tam arye yuk mutuku balamuk talak arye, sik ap melibuka neika balamik. ⁵⁶Anirya dinmek kilapu noutamak arye, akilapu si ara ani. Magdalena mutuku kil el si Maria ap, kam nang Yakobus ap, Yoses ap, sik deibuk kil Maria ap, ton Zebedeus el kil ap, unmekce dinmek. Akilapu nirya ara, Yesus Galilea tam balamuk talak ara, el ap melibuka balamikce, el patapne ning sikce melibuka arilamik.

Yesus el nong dobuka keil deiya fum weibik yupu
(*Markus 15:42-47; Lukas 23:50-56; Yohanes 19:38-42*)

⁵⁷Inibuk ura, tonok bona talinanye el si ara Yusuf, ara Arimatea mutukunye, Yesus el yupu kekebuka talyamuknye binya arye, ilil kumce, ‘Pilatus dam binuka moropnyop ura, Yesus nong aripnunil’ tenen, Pilatus ati morolbiyuk. ⁵⁸Morobuk ura, Pilatus arye, ‘Na yin talin nang arye aripnuyak’ tenen, nyapdeibuk ati, aribik. ⁵⁹Yesus el nong Yusuf aribik ura dobukabukce, namin butum aling, teleb butum aling arye pakubuka kitipdongobuk. ⁶⁰Yahudi yala nang ara, ninye dipnop ura, keil deiya weilamik. Sik nirya winilamika ati, Yusuf bira namin teleb butum aling dekukce, wanwanun yo deice arye Yesus nong dobuka, anamin butum aling arye el nong kitibuka, Yusuf el bidamang keil deiya lokamuk fumbisik ara, Yesus el nong dongobukce weibuk. Dongobukce, keil deiya fum ara, yuk weik pala keil bongopnin banmoka ani, bura tam buplan tirikdongobukce, biyuk. ⁶¹Yusuf arye Yesus el nong dongobuka weipmokak ara, Maria Magdalena ap, Yoses el lin Maria ap, sikce Yesus weinmek keil deiya dam bukmarikce, dinmarik.

Yesus nong weibika ati, kaliknanye deibik yupu

⁶²Yesus akunum dibuk ura, sik nirya daulamika ani, mapmeka Sabat sum lukunyan berekuk sum ara, sik Yahudi yala ninye arye, Kaplina ati

Kwalina deiyok koulamik sum ubuka ati, sik Farisi nang ap, Allah arina ati deiyok nang ap arye, Pilatus el dam ayupu nyalbiyik. ⁶³“Naie, atilila yupu nyalamuknye Yesus, el tuba kam ulamuk talak ara, ‘Na opnikce ura dipmanya ani, like winilye mapnirye, tamubuka kam buknamne,’ nyalamuk yupu ara, nun tuba tenena uk unmabe. ⁶⁴Wininmaba ati, ance nyapdeipminba, an yin talin nang bikirye, el nong weibik keil deiya binuka kaliklamikibuk, winilye sum akunum uplyop ura, bataknamake. Ara urdem ati kume. Aning kum winipbikce ura, el yupu kekebuka melin nang arye, el nong lukuka doprobikirye, ‘Yesus akunum kam bukmal atia,’ nyapsikcop ura, ninye weik diba tenebikiba, nunda ikin weik upnamsile. El minop arye tilila yupu nyalamuk ning ara, mitikto ikin bukni, el mapu arye anyapmap yupu nyapsikcop ura, aning ara dipkoprop weik ikin upnamsile. Yuk nang nirya arye nun ti, ‘Sikda tilila yupu nyan nang,’ nyapsikcak ati nyababe,” nyabik.

⁶⁵Sik Yahudi yala deiyok nang arye nyabik ura, Pilatus arye sik anang ati tamubuka nyabuk. “Aning ati ara, anggun bidamnye aryuk na yin talin nang dobukapmunce, ‘Yesus el nong weipmakak, teleb ubuka kaliklulume,’ nyapdeipnamlulume,” nyabuk. ⁶⁶Pilatus arye nyabuka ati, sik anang arye yin talin nang dobuka, “Keil deiya buplan dam kaliknulume,” nyapdeibik ura, kalikikop ura, buplan kum kum alip tam fum wamukak ara, yo fia arye lelipdongobik. Aning ara dakmacop ura, ninye arye, ‘Yesus nong ubula dopropmake’ tenen, ‘Kel biktibye,’ tenebikce, keil deiya buplan ak deipmek keil deice tam ara, yo fia tabakuka deibik.

Yesus kam bukuk yupu
(*Markus 16:1-8; Lukas 24:1-10*)

28 ¹Sik nirya damapra ulamika ani, Sabat sum akunum ubuk ura, berekuk ura, minggu sum berentam arye, Maria Magdalena ap, Yakobus el lin Maria ap, akilapu bitinye, ‘Yesus el nong weipmanguak dilbinunam’ tenen, akeil deiya dam dilbirik. ²Minggu sum berentam arye, akilapu Yesus weipmekak binuka, unmarikba, weik ining mek dokukba, im deice arye Allah el fil donanye malaikat tonok yayukce, Yesus weinak buplan tirimok keil bongobuka dopkwetebukce, akeil deice bukuk.

³Ayayuk malaikat ara, el butum aling bebeya laklamle atonun winibukce, dirina weik una ap, fia kurun ap ubuk. ⁴Winibukop ura, akalimek yin talin nang eibik ura, lukdayikce, ilil weik ubukba, sik nong nirya sirim talibukce, dipna atonun ubik. ⁵‘Akilapu ara, lukdanuka ilil uplyak’ tenen, aim deicanye malaikat arye akilapu ati nyabuk. “Anggun lukdanuka ilil una kume. Na kele, sik yu nang arye wanwanun yo deice opmeknye Yesus ati enmalume. ⁶Bukni, winitalak ara el anyaka kum

unmale. Elce, ‘Kam buknamne,’ nyalilamuk touk, akunum kam bukmale. El nong deipmanguak ara, akeil deiya fum yanuka dipdelulume. El fia asukum kum unmale. ⁷Eipmunce adip aryuk minopce, elce wipdeiyamuk nang, sik 11 nang ati, ayupu laka nyalbirurume. Yesus ara akunum kam bukmale. Ati, Yesus arye, ‘Na kam bukuka minopce Galilea tam binmanop ura, anggun aminyan bimunyeba, eipdanamabe,’ nyapdeiamsik touk el minopce kam bukuka binmale. Ati, anggun nirya epdanamlume. Ayupu laka nyalbinululume. Na akunum nyapsine,” Amalaikat arye akilapu ati nyabuk.

⁸Anye ayupu nyabukop ura, akilapu arye kanye bokol tonmok arye, ilil weik ubuk bukni, tonda, teleb kanye deiprikce, ‘Yesus el mapu nyalbinunam’ tenen, keil deiya dam batakuka, bik-bik abuka birik. ⁹Bisik noutamak bik-bik abuka banmarik talak ara, Yesus talye karin yayukce epdayik. Epdayikce, Yesus arye akilapu bitinye ati, “Telebe,” nyabukba, el dam yarikce, si erebuka, ‘El si kipnunam,’ teneprikce, el yan dam yanuka taliprik. ¹⁰Winiprikba, Yesus arye ayupu nyabuk. “Anggun ilil una meme. Na mapu dam birumunce, na weit yapu ati nyaprurume. ‘Galilea tam bimunce, Yesus ap epdanuka eipnamlume,’ nyabuka laka nyalbinururume,” Yesus arye nyabuk.

Keil deiya kalikna ati, yin talina nang arye nyabik yupu

¹¹Akilapu bitinye bisik noutamak banmarik talak ara, akeil deiya dam kalikmek nang, ton yin nang ara, Yerusalem mutuku laka nyalbiyik. Ara Yerusalem mutuku noutamak bukni, Allah arina ati el si erelamik aik fum fil dona deiyok nang, sik dam binuka awinipmok ning nirya ati, laka nyalbiyik. ¹²Sik yin talin nang arye ayupu laka nyalbiyikop ura, sik Allah arina ati deiyok nang ap, Yahudi yala deiyok nang ap kekebikce, ‘Se, yata nyapnyap do?’ tenen, malye kanye bobikce yupu talinmek. Yupu talinmekce, ayin talin nang ati, yo bok weik aribikce, ‘Tilila yupu nyapnamak’ tenen, ayupu nyapdeibik. ¹³“Anggunce nyapnamlulume. ‘Kume, nun mapmapu talak ara, Yesus el mapu lukunyan noutamak arye yanuka, Yesus el nong ubula dobuka binmangue,’ nyanamlulume.”

Ayupu nyabikce, ayin talin nang sik kunusa dona ati, yo bok weik aribik. ¹⁴Aribikce, ayupu tonap nyabik. “Anggunda ilil una, meme. Anggunce, ‘Nun mapmapubuk, ubula dopropmangua,’ nyabibyop ura, ‘Pilatus kekepsilirye opsilyak’ tenen, ilil una meme. Nunce anggun melina ati, Pilatus el dam yupu sekenamap ati, nun nyapmasiap yupu uk, kanam asa arye nyapnamlulume. Aning ara, ikin kum upnamsile,” nyapdeibik. ¹⁵Nyapdeibik touk, yin talin nang ayo bok doprobikce, anyapmek touk nyalbalamik. Ayupu nyalbalamikba, Yahudi yala ninye weike kekelamika ati, winitalak unyak ninye babye, ayupu tuba nyanyake.

Yesus arye, “Na yupu peterelbilulume,” nyapdeibuk yupu

¹⁶ Aning nirya akunum winibukop ura, Yesus elce wipdeiyamak nang, sik 11 nang ara, Yesus arye, ‘Na nyapsinye mutuku, amutuku binamlulume,’ nyapdeibuk touk, Yerusalem mutuku batakuka, Galilea tam noutamak, Yesus arye nyapdeibuk mutuku tamubuka biyik.

¹⁷ Amutuku tamubuka biyikke, daunmek talak ara, Yesus yayukba eibikke, ton nang ara diba tenebikke, el si erebik bukni, ton nang ara, ‘Dip do, telela do?’ tenen, teniltona uk unmek. ¹⁸ Yesus sik dam yayukke ayupu nyabuk.

“Im deice ulye ning ap, tukwak mutuku ulye ning nirya ara, Allah arye na amutam akunum deipnuka. ‘Aning-aning nirya talibuka weik ninye deiyoknye unamle’ tenena ati, Allah arye el mikip weike akunum aripnukba, talinune. ¹⁹ Ati ara, ninye mutuku-mutuku nirya, na yupu moubuka kekebikirye, ‘Na wininye ning atonun wininamak’ tenen, anggunda na mapu arye, ‘Ninye mutuku-mutuku im sirya mutuku sirya nirya kekenamak’ tenena ati, peterelbanamlume. Peterepra balamunyebuk, ninye dib tenebikkeop ura, Allah el si deice ap, el Mi Koprop, Yesus na si deice ap, Allah El Dib Kanye si deice ap, sik diba tenepnamak ninye mek dongopdeipnin banamlume.

²⁰ Tonda, na arye, ‘Wininamlulume,’ nyabuka peterelamsise yupu nirya, ‘Aninye babye, aning atonun winibuka unamak’ tenen, na yupu bobuka peterelbinamlume. Wininamlum talak nirya ara, na dipkoprop nyapsine, na ap, sik ap, neikak unamabe. Winibuka daulamibya ani, sirya talak babye, na ap, sik ap, fia neika uk unamabe.” Yesus arye nyabuk.

Telebe, na Matius arye ayupu sekdeipsine.